

# المسرح العربي

## فِلْحٌ وسلاطين

ثلاث مسأخر شعبية


- سعدون
- الليلة فنطرية
- واقرا الفاتحة للسلطان

سمير عبد الباقي





چند سالہ



الإخراج الفني : محمد قطب

---

**سعدون**

**او**

**● سيرة شحاته سى اليزل ●**

**كوميديا مصرية**

## قبل أن تقرأ

واجب علينا واحنا بنحلم بسهرة مصرية أو عربية ..

سواء كان ذلك نابعا من حسن النية أو رغبة في الخروج من  
أسر الدونية أو بسبب نقص في القدرة النفسية أو الفنية أو عنطزة  
شوفينية أو بحثا عن هوية !!

يجب علينا أو على الأقل يجب عليه .. أن أقدم فروض الشكر  
والتحية لبعض الخواجات اللى أثروا فيه ..

زى سرفانتس وشيدرلين وبيديا والأصفهانى وماكس فريش و ..  
ابن اياس !!

ولكثيرين من أولاد البلد يتوه فيهم العدد .. وأهمهم والحق  
حق : بيرينخت .. وحسين بن عبد ربه ويوسف بن ادريس وحسن  
فؤاد وصلاح حافظ وجوركى .. وسمير بن العصفورى ..

وصقفة للفلاح خيال الضل ..

سمير عبد الباقي

## قبل أن تقرأ

واجب علينا واحنا بنحلم بسهرة مصرية أو عربية ..

سواء كان ذلك نابعا من حسن النية أو رغبة في الخروج من  
أسر الدونية أو بسبب نقص في القدرة النفسية أو الفنية أو عنطزة  
شوفينية أو بحثا عن هوية !!

يجب علينا أو على الأقل يجب عليه .. أن أقدم فروض الشكر  
والتحية لبعض الخواجات اللى أثروا فيه ..

زى سرفانتس وشيدررين وبيدبا والأصفهاني وماكس فريش و ..  
ابن اياس !!

ولكثيرين من أولاد البلد يتوه فيهم العدد .. وأهمهم والحق  
حق : بيرخت .. وحسين بن عبد ربه ويوسف بن ادريس وحسن  
فؤاد وضلاح حافظ وجوركى .. وسمير بن العصفورى ..

وصقفة للفلاح خيال الضل ..

سمير عبد الباقي

سعدون

او

● سيرة شحاته سي العزل ●

كوميديا مصرية

« ان أهم ما وفق فيه الكاتب في هذه المسرحية هو  
رسمه لملامح شخصية سعدون الفلاح البسيط الصادق  
المخلص - وهو سانشو في رواية « دون كيشوت » -  
وتصوير علاقته الحميمة القوية بشحاته بطل المسرحية  
الحالم بالعدالة وبالحرية ، العاجز عن تحقيقهما دون  
عون سعدون ، بل والعاجز عن حماية نفسه من المكائد  
والمؤامرات دون حماية سعدون »

هذه العلاقة تمثل عنصرا أساسيا في بناء المسرحية  
وتشيع نداء وصدقا نادريين في جوها »

● فؤاد دواردة ●



## مقدمة الطبعة الأولى :

هذه هي المرة الثالثة التي أعيد فيها كتابة هذه المسرحية .  
في المرة الأولى حاولت جاهدا تخليصها من علاقات حميمة  
برواية سرفانتس الخالدة التي سحرتني ..  
وفي المرة الثانية حاولت بقدر ما أملك اغناءها بعطاء الشعر  
والمسرح الشعبي الممتزجين بدمي .  
وفي المرة الثالثة حاولت الوصول الى لغة فصحي مسرحية  
محتميا في مواجهة كافة المحاذير بلغة التراث الشعبي الذي  
أقدسُه (\*) .  
وفي كل مرة كان لأصدقاء أعزاء من المهوبين الخلاقين فضل  
لا ينكر في اضاءة الطريق الصعب أمامي ، الى حلمي الدائم أن أسهم  
في خلق عرض مسرحي شعبي راق ..  
لكنني مضطّر هنا للاقرار بحقيقة أنه لا يمكن للبعض من  
عديمي التوهبة ( المتسرعين ) أن يناموا الكاتب المسرحي كيف  
يكتب لأنه في المسرح بالذات أكثر من أي فن آخر . يدرك صاحب

---

(★) هذه الطبعة كتابة رابعة باعادتها الى لغتها الأصلية .. اللغة العامية  
وكان اسمها سيرة شحاته سي اليزل .



الموهبة الحقيقية ( صاحب الحلم ) حين يمتلك - بعد تجارب عديدة  
- بعض القدرة ، وحين تتضح له - بعد معاناة قاسية - بعض  
الرؤية ، متوجا قدرته ورؤيته بالتزام جانب الشعب ، أن معاناته  
لم تكن عبثا ، لأنه يؤمن أن كل عمل ينجح في اكماله ، رغم ليالى  
الرعب والرهبة من النقصان والفشل - انما هو مجرد خطوة صغيرة  
على طريق مرهق ومدهش .. ورائع ..

( دمشق - ١٣/١/١٩٨١ ) ..

**سمير**



الزمان : بعد الفتح العثماني بفترة كافية ليصبح الحال سيئا بصورة كافية ..

المكان : قرية في ريف دلتا مصر العثمانية وما حولها من دروب وقرى ودساكر ..

الشخصيات : حسب امكانيات الجوق .. وأهمهم :

شحاته البشپورى : فارس فوارس العصر .. في زمان غير الزمان ..  
أسير الكتب وأحلام سيف بن ذى يزن .. رفيع ممصوم  
ولكنه نبيل وحكيم حكمة العشاق الذين نحل عقلهم وجسمهم  
حب لاخلص منه .

سعدون : صديقه ورفيقه الفلاح الفحل .. أكول واقعى لا يرى أبعد  
من تحت رجليه وان كان له حكمة مالها أصحاب ..

الجارية : وقد تلعب أيضا دور ( زوجة سعدون ) وزوجة ( صاحب  
الخان ) ( وزوجة الوالى ) فكلهن شريرة متسلطة وامرأة لأى  
سرير ..

الفتاة : هدها الفقر سواء كانت في بيت شحاته أم في الخان هي  
شامة الحلوة في كل مكان ..

الشيخ أو سيدنا : ويلعب أيضا دور صاحب الخان الخمار ..  
وحبذا لو لعب دور الوالى العثماني ..

الحنلق : ويكون هو أيضا رئيس السبانة أو زعيم الحمامة .. أو  
كبير السياس وخلافه ..

وعلى باقى أفراد الجوق أو الفاضى منهم أن يلعب دور  
الحكواتى أو شاعر الرباب .. أو أدوار السجانة والحماره والعسكر  
والمساجين .. فهم لكل شىء جاهزين .. وعشاننا عليك يا كريم !!



## قيام شحاته البشورى من تراب الكتب

( افتتاحية تهرجية للجوق الشعبى يستعرض فيها مهاراته وتقاليعه وفنونه بعبها ، فردا فردا أو جماعة ، متحركا أو ساكنا ، حسب ما يخطر على بال أو يطن فى نافوخ رئيسه وامكانيات أفراده )

### الجوق افرادا ومجاميع :

- أهلا وسهلا شرفتمونا - ، ياللى حضرتم وآنستمونا ..
- عشان خاطرکم جايين نشخص - وعشان خاطرنا تشجعونا •
- وصلى على النبى ..
- صلاة تدفى قلب المكان ، ترعب خاين العيش والملح وتطرده من سامرنا كل شيطان ..
- كان يا ماكان .. فى بلادنا زمان .. ياماكان فرسان .. أبطال شجعان .. زى الأحلام ..
- وأنا واد فنان ..
- يوهب عمره لجل الأوطان .. تصبح جنة من غير سجان ..
- صقفة ياجدعان ..
- غار الممالك .. آه .. ياربابه ..
- رجعوا الممالك صرنا غلابه ..



البر صبح جحر ٠٠ ديايه ٠٠ وبحور أحزان ٠٠  
عسكر عثمانليه ٠٠ لاوندى ٠٠  
أومباشى وباشا وأفندى ٠٠  
يطمع فى الكتكوت لو عندى ٠٠ زى الغربان ٠٠  
أفعالهم لما تدغدغنا ٠٠  
ياتجيب داغنا ٠٠  
ياتصحيح وتصحى دماغنا ٠٠ حسب الإمكان ٠٠  
- جهاز أرغولك ٠٠ سمعنا ٠٠ حلو المغنى ٠٠  
يمكن للحلم ٠٠ ترجعنا ٠٠ نفهم معنى ٠٠  
وبحق اللى الليلة ٠٠ جمعنا ٠٠ ابعده يا شيطان

### رئيس الجوق ( الحكاواتى ) :

- فى يوم من الأيام بعد أن راح عصر الفتونه والجدعنه  
والشجعان ٠٠ حط على مصر وعلينا عصر أزرق من النيله  
وليل أسود من القطران ٠٠ ابتداه السلطان ( سليم بن عثمان )  
بان شنىق بلا رحمة على باب زويله السيد ( طومان ) !!

فى تلك الأيام كان يوجد رجل من أرض المنصورة - يعنى  
منصورى ٠٠ اسمه ( شحاته البشبورى ) ٠٠ لا جابت مثله  
ولاده ٠٠ ولا رضعت شبهه داه ٠٠ ولكنه ياساده كان على  
غير ما جرت العاده بيحب القرايه والحكايات ٠٠ وتملك منه  
هذا الداء كالبلاء ٠٠ فقضى أكثر من ثلاثين سنة وزياده ٠٠  
يقرا كتب السير والتفاسير ٠٠ ويمق عينه فى دفاتر القصص  
والأساطير ٠٠ ثم فجأة ٠٠



في لحظة تاريخية عبقرية مفاجأة ..

قرر ان يهرب من بطن الكتب ويخرج لدنيا البشر .. الذين  
كانوا يعيشون تحت حكم العسكر العثماني عيشه تفرس  
البقر ..

والحقيقة صاحبنا شحاته كان رقيق القلب .. رقيق الحال ..  
ولم يبق عنده من زهر الدنيا مال ..

الا جارية حيزبون ، أخلاقها دون .. وبنت فقيرة جميلة قريبة  
من قلبه يبدو - والله أعلم - انها كانت بتحبه ..

ومن المؤكد أكيد .. أن شحاته لما بص حواليه .. سألت  
دموعه زى المطر على خدوده واتذكر جدوده وغنى بالموال على  
الربابه وقال :

لابد للدنيا ترجع سيرة الفرسان ..

حيث الشرف والكرامة ميزه للانسان

اللى اصطفاه ربنا فرقه على الحيوان

شرع العدالة ياناس محتاج لجراءة

وسيف وحرية وحصان وشهامة وبراعة

تعلم العثمانيه ، ان احنا ناس جدعان

والليلة ياساده حنكى سيرة شحاته بالتمام والكمال ..

يكفيننا رب الفن شر السهو والنقصان ..

.. يمكن ياناس شىء من حالنا يتبدل .. أو حاجه من

عادتنا أو أفكارنا تتحول

.. وابدأ معانا وقسم ياجدع .. م الأول ..

\* \* \*



## شحاته مع أهل بيته في بداية سيرته وحواديته

(شحاته في خلوته جاي رايع وكأنه في دنيا تانيه .. عمال يجادل ويتبادل كلام وقتال .. وحاله حال اللي مع نفسه ف غضب طايح )

الجارية : قدامكم سهران بيقرأ ، الفجر شقشق وهو سهران بيقرأ ، البيت خلا م الطحين والعجين وهو سهران بيقرأ ..

سيدنا : بقى له زمان ع الحال ده يا وليه ؟ ..

الفتاة : سنين ..

الجارية : انسل بدنه وفقرنا ولسه بيقرأ ..

الفتاة : القرايه باب الغنى .. والحلم .. باب الحب ..

الجارية : ( مقاطعة في شراسة ) يحبك برص عثمانلى .. القرايه وراها ايه خلاف الفقر .. ( لسيدنا ) شفت في حياتك شخص له قيمه ، والى أو سلطان عرف يفك الخط ..

سيدنا : الحقيقة الحق .. لأ .. كلهم .. كما خلقتنى ..

الفتاة : هيه ياسيدنا الكتب صحيح بتخفف العقول ؟ وتجفف الجتت ؟ ( تتأمله ) انت لا جاف ولا ضعيف ..

سيدنا : ( يبعدها ويأخذ سمت المعلم ) يا بنتى .. هذا موضوع معقد .. قالوا فيه كلام كثير .. أنا رأيت ( يتحدث كمحاضر ويقدم اليه ميكروفون ) .. في الحقيقة أثر القرايه يتوقف ..



على درجة تقل الدم وف بعض الاحيان .. على درجة خفة  
الشعر وان كنت متأكد ان جنون القرابه يحصل بسبب  
ضمور الكلاوى ..

**الفتاة :** يكفينا شر البلاوى ..

**الجارية :** أنت علمته القرابه ، وبليته بالكتب ..

( يعجبه المديح فيمشى مبتخرا )

**سيدنا :** العبيط هو اللي يصدق الكتب ..

**الفتاة :** هو صدقها عشان قلبه فصيح ..

**الجارية :** ( تضربه على صدره ) انما أنت قلبك جامد ماتقراش غير  
الكتب السمينه ! انصحه ..

**سيدنا :** اخرسى وسيديني امحص .. ياخرابى .. ايه ده ؟ بنى  
هلال السيرة والتغريبة ؟ أوف .. سيرة عنتره الأبطال ؟ ..  
يا للهول .. بابات ابن دانيال الكحال .. يامصيبة ! ..  
رجوع الشيخ وتعديل الأحوال .. والله عال .. سيف بن ذى  
يزن وخرق الشجر .. وماجرى مع عظمم من الأهوال ..  
جنون ! .. سيف بن ذى يزن وواقعة دربال متاطح البغال !  
.. لا حول ولا قوة .. سيف بن ذى يزن وصديقه سعدون  
الزنجى والرحلة لبلاد الخيال .. ! ، مؤكد أكيد سيف ذى  
اليزن هو اللي قلب نافوخه .. ! ..

( يتدرج الحوار الى غناء ايقاعى راقص ) ..

مع انى ياصبيه عرفت من زمان ..

بانه كان حيبقى أكيد راجل مهم ..

قالوا لى فى السرايه بان الوالى كان



ح يبعته البحيرة ويبقى ملتزم ..

الجارية : ( منجذبة الى الايقاع )

وبص شوف بنفسك .. ايه نابنا وايه جرى لنا ..

شوف ازاي افتقرنا .. وحالنا صار عدم ..

الفتاة : ( في ايقاع حالم مختلف )

انما أنا قلبى شايفه ..

لما ينطق اسمى بلسانه وشفايفه ..

باشوف نفسى أميرة ..

الجارية : اخرسى جاك داهيه تاخذك ..

الفتاة : والتقى نفسى سجينه ..

وهو طاير فوق حصانه بينادينى ..

الجارية : شفت داهيتنا الثقيلة ؟ ..

الهبل صابها بداء الهلوسة ..

سيدنا : القراية في بعض أحيان قد تسبب وسوسه ..

الجارية : أحمد الرب الكريم انى بجم عقلى م الفهم برىء ..

الفتاة : ولما يحكى عن جمال أطلوه ( شامه ) ..

آه ما أحلى كلامه .. يا نغم صوته الرقيق ..

( ايقاع الكلام ينكسر ويتحول الى تقرير ) .. وأنا مصبوغة

بسخام الفرن زى المعزه هربت من حريق ..



الجارية : ( تزعم طاردة اللحن والحالة معيدة الجميع لواقع الحال )

كل ده من الكتب ..

سيدنا : لابد من حرق الكتب .. هي السبب وحرقتها الحل الوحيد .

الفتاة : ح تقتلوه .. يا خلق حاولوا تفهموه .. لو كلامه صح تبقى الدنيا أحلى وأجمل م الأحلام ..

الجارية : الأحلام كلها تخاريف ..

سيدنا : ( يأخذ الفتاة محاولا اقناعها بما يريد وللحظة يبحث عن الميكروفون ثم يتجاهل الأمر )

.. يابنتى انت صغيرة .. لا تفهمين فى هذه الأمور ، طول حياتك بتعاشرى البهائم والحمير ، وعشان كده من حقك تخرفى ، الحلم ضرورى للى زيك عشان يستحملوا عيشتهم الكرب ، انما هو ابن الأكابر العاقل مالوش فى الأحلام .. لازم يحجر عقله .. مايحسش الا باللى يمسكه بايده .. أو يشوفه بعينه .. عشان رجليه تفضل ثابتة على الأرض ..

الفتاة : ( تنسلخ من بين يديه .. وتعود الى اللحن وحالة التهويم )  
أنتم عايشين فى قرار البير

قلبكو من هم الفقر أسير

وكيف المقصوص الريش ح يطير ..

لكن هو بقلبه الطاير ..

بجناح الحلم وشوق الفارس ..

شايف بكره جنة أساطير ..

- والدنيا فوارس وعرايس
- بقتام على صوت المزيكه
- تصحى على صوت العصافير

( يدخل الحلاق محظما هذا الجو الرومانسى الحالم  
الذى جعل حتى سيدنا والجارية يفقدان توازنهما للحظة ،  
الحلاق يحدث ضجة فظيعة بما يحمله من حديد خردده ووزنه  
وطاسه •• )

الجارية : أعوذ بالله من الشيطان

سيدنا : البيت ده مسكون •• بالعفاريت •• بالتأكد ••

الفتاة : ( ماتزال وحدها هائمة ) بينا وبينه الفرق كبير •• كبير ••

الجارية : دستور ياسيادى •• من أنت ؟

الحلاق : ( يلقي بما يحمله ) أنا الحلاق •• التعيس ••

الجارية : عامل نفسك عفريت ؟ ••

الحلاق : أنا •• أنا اللى موسى علم على كل دقون البلد أمرا وغفرا

وخواجات •• ييجى زمن ألف فيه وأدور على الخرابات

( يبكى زاعقا ) يالى عندها حديد قديم للبيع ••

ويضحك على العيال •• ويمسخرونى الجرابيع ••

الجارية : خيبتك ما وردت على حد ••

الفتاة : ( تفحص ما أحضره بفرح ) وجهزت له اللى طلبه منك ؟ ••

الجارية : مين اللى طلب الزباله دى ؟ ••

الحلاق : هو اللى أقنعنى ( يشكو لسيدنا متخلصا منها ) بيقرا ويفهم

لابد اقتنع باللى يقوله •• صح ••



( الفتاة تفرح - الجارية تجذبه بعنف )

سيدنا : اتركه يفسر لنا .. هل هو طلبها بنفسه ..

الحلاق : ( منفلتا يقول في ايقاع خاص به )

كل هذا كان موصيني عليه ..

اشحته لو كنت أقدر واشتريه

من بواقى الخرده وأكوام الزباله ..

سيدنا : ( بنفس الايقاع ) هو قال لك .. قصدى يعنى قال لك ايه ؟

الحلاق : قال لى أجيب له درع من زرد الحديد

زى حمزه وسيف وعنتر لبس فارس

الجارية : أنتو زيه عقلكم خف أكيد ..

الفتاة : يا حلاوة .. حيرجعوا لمصر الفوارس ..

الجارية : ( تكف اللحن والحركة ) ..

احنا لا يمكن نسكت على كده أبدا .. بعد زباله الكتب يملى

البيت بزباله الحدادين والحلاقين ..

الفتاة : حيثبت لكم شجاعته حيرد روحى .. ويخلصنى وحيرجع

وياه الفرسان ..

سيدنا : يابنتى انتهى عصر الفرسان .. احنا فى عصر أولاد عثمان

ولابد من حرق الكتب أو دفنها ..

الحلاق : والحديد ؟

الجارية : ندفنه فى سابع أرض برضه .. ( تقولها فى حقد )

**الفتاة :** ( تصرخ ) تدفنوه •• يا مجرمين ، الحقونا •• يا خلق  
هوووه •• ( تخرج فتطاردها الجارية ) ••

**الجارية :** بنت المجنونة حتفضحنا ••

**سيدنا :** احبسيها في الخزانة •• على ما نحرق كله ••  
المهم انقاذه ، وانقاذ عقله لو كان باقى عنده عقل ••  
( ينظر ناحية برج شحاته فيجده يتحرك •• ) يا خبر أسود  
( يتحول نحوهم في هدوء وحركة غامضة كفارس نبيل  
مضحك ) ••

**الجارية :** ( تدخل ) حبستها في الخزانة ••

( تشاهد تسمرهم فتخرس معهم وشحاته يتحرك نحوهم )

**سيدنا :** حالته متدهورة جدا ••

( كل منهم يحاول العودة خلف زميليه )

**الحلاق :** أنا قلبى ضعيف ••

**الجارية :** ماتهربوش وتسيبونى وحدى •• شافكم •• اثبتوا ليرميننا  
بالحرية ••

( يكون شحاته قد قطع المسافة اليهم في حركة مهيبة •• يبدو  
كخيال الظل ضعيفا ، ممسوسا ) ••

**شحاته :** آن الأوان يا ( سقرديون ) أيها الساحر الدون ، كى اكشف  
أمرك ، وأدفن للأبد شرك •• مثلما هو مكتوب فى لوح ( ابن  
نوح ) جدى الكبير ( يزعق فيفزعهم ) وابشروا أيها المساكين  
والمظلومين سأعيد كتاب النيل •• وسأسقى من ظلمكم كأس  
المنون •• ( يتحول ) واهدئى ياشامه ياست الملاح ، على



سجنك الحقير سيطلع الصباح ؛ فامسحى دموعك لاننى  
سأنتقم ممن حبسك فى الخزانة ٠٠

الجارية : يامصيبتي ٠٠ ده عرف ٠٠

سيدنا : دستور يا اسياى ٠٠

الجارية : الحقوا بيشارو ردوا عليه ٠٠

( كل منهم يدفع الآخر ، ويذهب الحلاق أخيرا اليه بعد

أن يلبس الطاسة ويمسك بعمود السرير كفارس كاريكاتيرى ٠٠  
يتقدم فى خوف ٠٠ بينما يغرق الشيخ فى تعاويذه ٠٠ )

الحلاق : مثل ما أمرت تمام ياسيدى الفارس سيف اليزل ٠٠

الجارية : قلت لك اتجننوا زيه ٠٠ بيقول له سى اليزل !!

الحلاق : نفذت كل أوامرك ٠٠ شوف درع نحاس من غنايم مرج  
دابق ودى حربة الأمير قطز شخصيا ، ودى عملها خواجه  
أعور كان أصله قرصان ٠٠ أما الخوذة العجيبة دى كانت  
فى الأصل سلطانية شوربة لكنها كانت سلطانية السلطان  
الغورى ٠٠ اللى كان بيلبسها فى مواكب الفشخرة ٠٠

( يتأمل شحاته الأشياء ويفحصها بينما يعود الحلاق محتما  
بهم )

الحلاق : خش عليه أنا خلّيت ألو آخر طراوة ٠٠  
( يمسح عرقه )

سيدنا : أنت متأكد ان مزاجه معتدل ؟ ٠٠

الحلاق : حار جاف لكن معتدل ٠٠ السلام عليكم ٠٠

( يحاول التسلل خارجا لكنهما يمسكان به ، يتدافع

الجميع ناحية شحاته كثيره الضجة التي تحدثها تعثرهم في  
الحديد يتقدم ، ليحاصروهم ويلعب بهم )

شحاته : هرجوا يا اراجوزات بنى عثمان .. فقد آن الأوان وصحا  
فارس الاقطار والدمن ، مبيد أهل الشر والفسوق ، العاشق  
المعشوق الأمير التبعى الحميرى اليمنى وحش الفلاة وهازم  
الطغاة .. سيف بن ذى يزن وستكون رؤوسكم مهرا لحبيبتى  
( شامه ) حتى تتم العلامة .. وينتهى عهد النهازين الهباشين  
السحرة .. هرجوا لآخر منه يا تعابين لابسين طرابيش ،  
ياسلاطين تهبش ، وأغنيا سرقة وبقشيش . من هنا بارفع  
صوتى ..

( رئيس الجوق الذى يراقب ما يجرى يخرج الارجوز  
ويطلق ضحكة ساخرة طويلة .. فيزداد غضب شحاته  
وتوتره .. ويبحث عن الصوت ويحاربه فى غير مكانه ..  
الجارية تنتهز الفرصة وتهرب ، سيدنا يصرخ يا ستار ويغمى  
عليه ، تعود اليه وتحمله وتخرج به هاربة .. الحلاق  
لا يستطيع الهرب بسبب العمود الذى يحمله ويبدو والطاسة  
على رأسه كمقاتل هزلى .. )

شحاته : الآن .. سأجعلك تندم .. وكما سببت الألم ستتألم ..  
( كلما حاول الحلاق الرد قاطعه ) اخرس ولا تتكلم ، كيف  
تتجراً وتخطف ( شامه ) وتحبسها فى الخزانة .. !

الحلاق : مش أنا .. دى هى

شحاته : جئت لتسخر منى فى دارى ؟!

الحلاق : ياسيد شحاته ؟ ..

شحاته : من ؟ .. أنا لم أعد شحاته فلا تحاول الشماتة ..



الحلاق : على رأسى ياسى اليزل ٠٠ لا تؤأخذنى ٠٠ بس أنت غلطان  
أنا مش اللى أنت فاكره أنا ٠٠

شحاته : لن تستطيع أن تخفى صورتك الحقيقية ٠٠ مهما تنكرت أيها  
السحار اللعين !

الحلاق : أنا حلاق حلاق وآدى الموس ٠٠ اهه ٠٠

( يلقي بالحربة ويشهر الموسى )

شحاته : وتجرؤ على اشهار سيفك فى وجهى ٠٠

( يخوض معه مبارزة كوميدية ويهزمه ويجعله يركع وينتزع  
منه الخوذة )

وهكذا عادت اليك خوذك التى صنعتها لك فى جهنم أختك  
العفريته ( عاقصة ) ولن ينتزعا منك أحد بعد الآن ٠٠

الحلاق : ( فخورا ) أنا اشتريتها لك بنفسى ياسى اليزل ٠٠

شحاته : اخرس ٠٠ وانهب الآن لتعترف بهزيمتك أمام ( شامه )  
اطلق سراحها وأخبرها أن حبيبها وفارسها قد خرج من قبره  
٠٠ وكنت أظنه أى أنك كنت تظننى قد انتهيت ٠٠

الحلاق : هوا ٠٠ سأذهب وأبدل سروالى وأرمح اليها ٠٠

شحاته : لا وقت للهدوم ٠٠ تعالى هنا ٠٠

( يجرى الحلاق أمامه يدوران حول بعضهما يتعثر هو  
فى الخردة وينفلات الحلاق فيصطدم ( بسعدون ) الذى يدخل  
فى نفس الوقت يدوران حول نفسيهما ثم ينفصلان ٠٠ الحلاق  
مندفعا الى الخارج وسعدون الى حيث صديقه شحاته مكبلا  
فى السلاسل والحبال والخردة )

شحاته : لم عدت ثانية ؟ .. أيها المأفون .. اذهب واطلق سراحها  
لا وقت لدى .. أغرب ..

سعدون : ( غير فاهم ) أغرب .. ؟ .. ايه الحكاية ؟ .. ياسيدي  
.. أنا سعدون ..

شحاته : تغير صورتك ولهجتك لتخدعني وتحاورني .. اذهب والا  
قطعت رقبتك .. بحد هذا السيف ..

سعدون : لا .. ؟ في عرضك .. أنا مش هو .. دانا سعدون بشحمه  
ولحمه .. سعدون أبو راسين الفحل ..

شحاته : ( يتماسك ويحملك فيه ) ياللهول .. ؟ أحقا ؟ .. أنت  
حقا سعدون الزنجي صديقي الحقيقي ؟ ..

سعدون : سموني أبوكرش وأبو راسين .. والفحل وأبو حنتيت لكن  
الزنجي دي جديدة .. ما يضرش .. أى حاجة منك مقبولة ..  
مادام حنبقى حكام .. العبرة بالخواتيم !

شحاته : هش .. ( في شك ) .. انك تبدى نكاء لا يليق بفلاح فأظهر  
على حقيقتك .. أيها المأفون الساحر ..

سعدون : ساحر ؟! مراتى بتقول كده عليه برضه ؟

شحاته : ياللألم .. ألم تجد صورة أخرى تتخفى فيها غير صورة  
صديقي ؟ ياللحيرة !! .. الأطردك أم أقتلك ؟ .. وهم أم حقيقة؟  
هل أنت هو أم انك لست هو ؟ .. حيرتني أيها الحقير ..

سعدون : لأ ؟ .. شتيمه لأ .. أنت طالبني في نص الليل عشان  
تدخلني التاريخ ، وتعملني قائد طابيه ، مش تشتمنى . اذا  
كان الحكم حيقلل قيمتنا ويهزأنا لأ .. الله الغنى ..



شحاته : سعدون .. لا تذهب ، أشم في صوتك ريحة الصدق لكن  
لا تخدعنى أأنت هو ؟ .. والا أنت مش هو ؟ ..

سعدون : شمنى .. ريحتى أصدق من الصدق .. احنا ياعم فلاحين  
عمرنا مانخدع حد .. علشان احنا المخدوعين دايمًا ..

شحاته : سعدون ! اذن هيا نازلنى كما كنا نفعل أيام الشباب ..

سعدون : أنا لا ح أنازلك ولا ح أطالعك .. أنا ح أفارقك بالمعروف ..

شحاته : سعدون ليس من شيمتك أن تهرب من القتال .. لا تجبن  
والا ظننتك هو .. وقتلتك ..

سعدون : ( متألماً من سن السيف ) تقتلنى .. خبر أسود .. أنا  
ياعم مش سعدون الزنجى أنا سعدون الفلاح .. وعمرى  
ماشلت سلاح ..

شحاته : لاتؤاخذنى ياسعدون .. ( يفحصه ) فالساحر سقرديون  
كان هنا قبل أن تأتى متخفياً فى ثوب حلاق يبيع الخردة ..  
وقد ادعى ان طاسة وحش الفلاة طاسة شوربة .. تصور ؟ ..

سعدون : ( يتأملها ) لا .. مالوش حق .. مجرم ..

شحاته : ومنذ المساء وهو وسحرته ، يحومون حولى ، ويريدون  
حرق كتبى ودفنى وقد خطفوا شامه وحبسوها فى الخزانة ..  
صرت وحيدا بين الوحوش .. لا تتركنى لهم ليفترسونى ..

سعدون : ( مرتعباً ) ياعم .. أنا خايف أكثر منك ..

شحاته : ( يستعيد فروسيته ) لا .. لا خوف بعد الآن .. فقد قام  
سيف بن ذى يزن من قبره .. هيا بنا .. ولتكن المواجهة  
هيا ..

سعدون : أنا لا .. أنت عارف مراتى ؟ ..

شحاته : وما دخل مراتك في ذلك ؟

سعدون : مش موافقة ..

شحاته : وهل تسمح لامراتك أن توافق أو لا توافق ؟ ..

سعدون : أنا لا أسمح لها ، هي التي تسمح لنفسها .. ثم اننى  
بصراحة باخاف من السحرة والعفاريت كوم واخاف من مراتى  
كومين ..

شحاته : حرر نفسك من استعبادها ..

سعدون : ( يضحك ) أنا ؟ .. أنها الساحر سقرديول بنفسه ..

شحاته : ياخسارة .. سعدون يخاف من النسوان ..

سعدون : زيك تمام .. ما أنت قالب الدنيا عشان ( شامه ) .. كلكم  
كده أبوزيد كان يقدر يكح قدام ( الجازيه ) ؟ .. والا عنتر ؟  
مش كان بيلحس تراب كعب ( عبلة ) ..

شحاته : ولكن هؤلاء فرسان وفوارس ياسعدون ..

سعدون : ( محتجا ) أنا زيهم باعمل حساب مراتى حبيبتى .. لو  
اكسر خاطرها تكسر خهري ..

شحاته : وتقدر تكسر خاطرى أنا ؟ هل ترضى أن أكون الفارس  
الوحيد من بين كل فوارس الدنيا اللى مالوش صديق ..  
يكون رفيقه على الطريق .. هل تريد أن تشمت فى الأعداء ؟!  
.. ( يبكى ) ..

سعدون : ( يأخذه فى حضنه ويربت عليه ) قطعت قلبى

شحاته : كيف يكتب الشعراء موالى ؟ .. من سيقص عليهم  
أفعالى .. ؟ .. غيرك أنت ياخادمى وسائس حصانى !



سعدون : الطاسه انحشرت ؟ ..

شحاته : لن تخرج الا بقطع الرقبة ..

سعدون : ( مرتعبا ) ياخبر أسود .. شدها أنا فى عرضك ..

شحاته : سأجربها عليك .. أعطنى رقبتك ..

( سعدون يجرى وهو وراءه شاهرا سيفه .. بينما قائد  
الفرقة يخرج الارجوز ويضحك ساخرا .. وينجح سعدون فى  
خلعها .. ويلقى بها على أحد المقاعد .. )

شحاته : ستندم على خلعها وسترى كيف ستقاوم ضرباتى .. التى  
هى أقوى من ضربات عطمطم .. طم ..

( يرفع السيف وينزل به على الخوذة .. فتفتتت .. )

سعدون : ياراسى .. ياعم أنا ماليش الا طاسة مراتى الحقونى ..

( شحاته مذهول لما حدث .. ينتبه فينادى عليه ويحاول  
اللاحاق به ولكنه يسقط فى الخردة .. )

شحاته : لا .. لا .. ياسعدون .. الحلاق سرق خوذة وحش الفلاة ..  
بدلها .. يزيفون كل شىء ياسعدون .. ولكنى سوف أوقفهم  
عند حدهم ..

( تدخل الفتاة فتتقدم لتساعده على النهوض .. وهى تتألم )

شحاته : أخيرا .. جئت .. لقد شئت شملهم .. هل رأيت الساحر  
وهو يفر مذعورا .. ؟ ..

الفتاة : أنت وحيد .. بتدور على حلم فى زمن لا بیسمح براحة  
ولا بأحلام ..

شحاته : أنت راحتى وحلمى .. سأهزمهم وسأخلصك من العذاب  
والإهانة وأحررك من الأسر ..

( يتغير صوته عندما يسمع ضحكة الراجوز وتفزع هى لعودة  
الحالة اليه ) ولن أسمح للساحر بدفنى حيا .. وسأنقذك من  
قلعته الى الأبد ..

الفتاة : يا خسارة .. السنين فاتتها المواعيد والمشاورير طويلة ..  
وبعيد .. ولا أنا فاهمة منك كلمة واحدة ..

شحاته : المهم أن يحس قلبك يازهرتى الملونة بألف لون ..

الفتاة : ألف لون ؟ .. لون التبن والتراب والا لون هباب الفرن ؟  
ياسى شحاته أنت حالتك صعب قوى .. وحياتنا أصعب ..  
والحلم أصعب م الجنون .. قوم .. قم ولم نفسك .. تعالى  
نام واستريح ..

( تساعده على القيام ) ..

شحاته : لا .. النوم حرام بعد الآن .. ومهما كان الصعب فأنا  
الأصعب من أى صعب ( ضحكات الراجوز حين يتعثرون .. )  
.. لا تسمعى لهم .. وصدقينى ..  
( يدور مطاردا الفراغ والصوت يهرب منه )

شحاته : اظهر أيها الساحر الجبان ؟ .. لاننى سأجذبك ولو اختبأت  
فى جبل قاف .. ان بصرى اليوم حديد ..  
( يسقط متعثرا مرة أخرى )

الفتاة : ياسى شحاته .. بص تحت رجلك ..

شحاته : أنا شايف .. أنا أرى جيدا .. واسمع جيدا ..

( تخرج يائسة باكية ) .. لا أبقى معى .. سأهزمهم جميعا .. قوموا



من قبوركم أيها الفرسان ٠٠ يا أبا زيد ياهلالي ٠٠ يا عنتره  
ويا حمزه البهلوان ٠٠ هيا ٠٠ وأنت ياسعدون ٠٠ هاهو  
يستيقظ في قلبي ٠٠ ( تظهر عرائس وارجوزات أو يقوم  
أعضاء الجوق بنفس الدور إذ ينتظم ويتلاشى جيش وهمي )  
فارس الفوارس ٠٠ التبعى اليمنى ٠٠ سيف بن ذى يزن ٠٠  
فتعالوا الى ٠٠ وانفضوا تراب الكتب والسنين ٠٠ أعاهدكم  
أن أجمع الشمل وأحقق المرام ٠٠ وان أهدم قلعة الساحر على  
أم رأسه ٠٠

( يطارد الفراغ ٠٠ تطارده الأشباح والضحكات وهو يقود  
جيشه الهزلى )

● اظلام ●

## حديث غرامى بين سعدون الفحل وزوجته الدون وهم على حصر النوم يتسامرون

سعدون : يا امره اهمدى .. دنيا كلها حتحفظ اسمى ( سعدون  
الفحل أبو راسين ) .. والناس حتتعرف قيمتى !

الزوجة : ولاحد عارف قيمتك زىي ..

سعدون : أفهمينى .. أنا خلاص سممت على الققص ، صعب  
تحشرينى دلوقتى فيه وتقولى لى بيض ! ..

الزوجة : هو اللى دخل فى مخك الزناخة دى .. هو من حقه يحلم  
يبقى حاكم وسلطان .. لكن أمثالنا مالهمش الا الأرض ..  
سيبك من أفكاره ..

سعدون : أنا ليه أفكارى المستقلة .. أنا مش امعه ؟!

الزوجة : ( متباكية ) يا حسرة على بختك يا أم العيال .. العاقل  
مايدخلش الزريبة والتيران بتتناطح ياسعدون .. أولادك  
وغيطك عايزينك ..

سعدون : آن الأوان أبقى حاكم ياوليه ..

الزوجة : ح تجرى ورا مشكاح .. وربما مالها الا النواح ..  
( تبكى )

سعدون : أنا ح أدخل التاريخ من باب الحرس المزهر .. عايزه



تعلقى المحرات فى رقبتي طول النهار • وتعلقيني فى ساقيتك طول الليل ؟ •• بصى •• أهم واقفين جاهزين •• أول ما أبدأ مغامراتى •• حيحكوا حكاياتى •• وتلاقى أسسمى زى الجوهرة على صدر باب التاريخ ••

**الزوجة :** والتاريخ ده بقى اصطبيل والا زريبه ؟ ••

**سعدون :** يا جاهله •• التاريخ كله كتب •• ياما قرالى •• وسمعنى حكايات •• اللي تقتل من الرعب •• واللى تموت من الحزن •• واللى تفس من الضحك ••

**الزوجة :** حياخدك يقتلك فى التاريخ •• ياسبعى ••

**سعدون :** ياهبله •• لو كنتى معانا لما دخلت خلوته ! •• ياه ! •• مش ح تصدقى طبعاً •• كان معاه كل الصناديد فى نص الليل ••

**الزوجة :** بسم الله الرحمن الرحيم •• عفاريت ؟ ••

**سعدون :** ماتفسريش •• دول الأبطال وأرواحهم بتجتمع عنده كل ليله يتشاوروا فى أحوال الدنيا ••

**الزوجة :** أوعى يكون حد منهم لمسك ••

**سعدون :** يلمسونى أنا ؟ •• وهمه بيكلموا أمثالى ؟ •• أنا ماشفتش غير دمدمه •• كانوا بيتكلموا سريانى وبيدبروا أزاى نغلب الساحر سقردول •• وحواليهم خرايط وكتب وجزاير وطوابى •• وخطط حربية •• ودخان •• أنا اترعبت ••

**الزوجة :** يا خرابى •• مصيبة ليطلعولنا •• هنا ••

**سعدون :** يا شيخه تفى من بقك •• دول ملوك ••

- الزوجة : والنبي دول عفاريت ..
- سعدون : ماتفسريش فى وشى ! سامعه ! .. ( أصوات أقدام )
- الزوجة : يالهوى .. رجلين معزه .. كله منك ؟
- سعدون : انتى اللى فسرتى .. ليلتك سوده ..
- ( يسمع دق شديد على الباب .. يخفقى سعدون تحت اللحاف بينما هى ترتجف )
- الزوجة : دستور يا أسيادى .. قوم شوف مين !؟
- سعدون : ( يشخر ) أنا نايم ..
- صوت : سعدوون ..
- الزوجة : بينادوا عليك .. اخرج لهم .. مايدخلوش هنا ..
- سعدون : قولى لهم أنا نايم ..
- الزوجة : أنا عريانه ياسعدون ..
- سعدون : وأنا حافى ..
- ( تذهب بعد تردد الى الباب تفتحه وتجري لختبىء ..
- يدخل شحاته فى ملبسه الغريبة ) ..
- الزوجة : عفريت يا سعدون .. الحق ..
- سعدون : وأنا مين حيلقنى .. أنا ميت ..
- شحاته : ايه جرى يا أولاد ؟ .. أنتم خايفين ؟ ..
- سعدون : الرحمه ياشمهورش ..
- سعدون : سعدوون ..



سعدون : نعميين

شحاته : ألا تعرفنى ؟

سعدون : اللى ما يعرفك يجهلك ياملك الجان ..

شحاته : لا تترك الشك يفسد عقلك ياسعدون .. اجعل ايمانك يملأ

قلبك .. انهض .. وكن رجلا يليق بصحبة الفوارس .. لقد

آن الأوان .. لندق أبواب التاريخ ..

سعدون : سيدى شحاته البشبورى ؟ ..

شحاته : سيف بن ذى يزن ..

الزوجة : يا مصيبتى .. يقطعك ياسى شحاته بيه ؟ عامل فى روحك

كده ليه ؟ ..

شحاته : نسيت ياسعدون ؟ صار شحاته ماضيا ..

سعدون : وحياتك افكرتك عفريت ..

الزوجة : ماهو منهم ..

سعدون : اخرسى يا مره .. وادخلى جوه .. ( يقلد سيده ) عندما

يتكلم الفرسان تسكت النسوان .. !! ..

الزوجة : يكون فى علمك لا سفر ولا خروج .. شىء الله يا تاريخ

.. لا التاريخ بيطلع جعان ولا يكسى عريان .. ( تخرج ) ..

سعدون : امشى يامرة يا جاهله .. واعذرنى لأنى ما شفتش فرسان

قبل كده .. لكن دلوقتى حاسس اننا حنهد الدنيا ونبنيتها تانى

.. والا مانبنيتهاش مش مهم .. لانى حاسس أن كل اللى ف

نافوخك حيتحقق ..

شحاته : هكذا كتب في التاريخ .. سنحرر ( شامه ) ليكون العدل  
شريعة والخير مشاع ..

سعدون : بس أنا خايف ..

شحاته : من أى شيء ؟ .. أنت معى ؟ ..

سعدون : وأنا ايه ؟ .. حنة فلاح ماقتلش فار فى حياته .. ده كله  
خيال ..

شحاته : لن يظل خيالاً .. وستكون لك طابيه حقيقية فى مملكة  
حقيقية .. آمن وسيكون الحلم حقيقة ..

سعدون : وهل يكون لى شعب حقيقى .. احكم واتحكم فيه ..

شحاته : طبعا .. شعب من الصناع والفلاحين .. والنساء ..  
والعسكر ..

سعدون : واللصوص .. والدكاكين ؟ والصعايده ؟ والعثمانلية ؟ ..

شحاته : لا .. لن يكون هناك عثمانلية بعد اليوم .. سنطردهم  
أو نقتلهم ..

سعدون : الله اكبر !! زى ما يكون كل شيء حصل !! أكيد ..  
أنت بتضحك على دقنى ..

شحاته : سعدون .. أنا سيف بن ذى يزن التبعى اليمنى .. سيد  
الفرسان .. لا أنا لا أكذب وهذه هى الحقيقة المؤكدة التى  
تقودنا الى النصر ..

سعدون : مدد .. ياسى اليزل !

شحاته : هل قبلت ؟ ..

سعدون : قبلت الطابيه ..

شحاته : ومستعد للرحيل ؟

سعدون : بالروح بالدم ..

شحاته : اذن هيا ..

سعدون : هيا بنا هيا .. نظوى الفلا طيا .. ( تدخل الزوجة ) ..

الزوجة : على جثتى وجثث عيالى ..

سعدون : يامرہ ماتحرجنیش قدام سى اليزل ..

الزوجة : ( تتركه لتأخذ بخناق الفارس وتهزه ) سى اليزل ؟ خيبة

أمل ! سايق الهبل ! عملنالک ايه يا راجل أنت عشان تجنن

اللى مالناش غيرہ .. حرام عليك حرمت عليك عيشتك ...

شحاته : ( فى هدوء وهى تطوحه ) مسكينه وجاهله ويجب أن نغفر

للفقراء .. الفقر قاسى ياسعدون .. جفف قلبها فأصبحت

عمياء لا تبصر الحقيقة ..

الزوجة : أنا عميا يا عديم النظر ..

شحاته : كل هذا من فعل الساحر الكهين ياسيدتى .. ولكن اطمئنى

فسنحررك أنت أيضا ..

الزوجة : ( باكية ) سيبنا فى حالنا .. اعمل معروف .. لا ترملى

ولا تيتم عيالى ..

سعدون : خلاص .. ارجع وأنا حاكم طايبه وحيبقى ولادك وزرا

وأنت سلطانه ؟

الزوجة : ياسعدون عيالك محتاجين لك فلاح ..

سعدون : العالم محتاج لى أكثر .. ( ينفلت ويخرج وراء فارسه

فتصرخ فى يأس ) ..



**الزوجة :** ملعون أبو العالم .. أولادك أحق ببيك .. الأرض عايزاك  
وعايزه محراتك .. ياسعدون اللي ما عندوش مروة يسوق محرات  
ازاي يحكم مدينه .. عقلوهم ياناس .. لو كان عندكم ذرة  
عقل .. ما كنتوش تتفرجوا على خيبة أكبر منها خيبتكم ؟  
وما كنتوش تضحكوا على مصيبة أهون من مصيبتكم .. فوقوا  
ياناس .. تخاريف الراجل ده حتهد الدنيا على دماغه وعلى  
دماغكم .. زى ما هدت بيتي على دماغى !

( ضحكات الراجوز ) !

\* \* \*

## واقعة سى اليزل والحمارة فى القلعة الخمارة

شاعر الربابة : للدنيا طار سى اليزل عدى جبال وبحور

قصده ينجى وينقذ كل طير مأسور

ح يحارب الجن عشان شامه ست الحسن ..

وحبيبه من قهرها فى بيته قتلها الحزن

شقيانه ياحسره غرقانه ف تراب الفرن ..

كاس الغرام ع الفقير زى الغنى بيدور ..

الفتاة : كل الصبايا اتهنوا وارتاحوا الا أنا ..

والكل عرفوا الحب عشقوا .. الا أنا ..

والناس يناموا الليل فى راحة .. اشمعنى أنا ..

سهرانه ابكى حسرتى .. طول السنه ..

حط الظلام لأسود وضع سكتى .. وتهدت أنا

شوك الطريق الصعب قطع هدمتى ..

وحفيت أنا

لكنى مشتاقه أدوق طعم الهنا ..

على صوت حوافر مهرتك ..

بيدق قلبي لغنوتك ..

ارجع لى ياسيف اليزل ..

رجع لى أحلام الأمل ..

ترجع معاها لحننا ولأهلنا كل المنى ..

( يفضل أن تغنى الفتاة وهى تعمل فى بيته ثم يتدرج  
سواء أحسها المتفرج أو فانت عليه ، الى أن نجدها مختلفة  
قليلا وعملها مختلف تتحول الى مرمطونة فى الخزان الذى  
يزدحم بالحماره هى فتاة البيت بقدر ما هى ليست هى ..  
السكرارى يعابثونها وهى ترفض وتتمنع وتقاوم .. )

الفتاة : بس يا حمار الكلب .. سيبنى ..

حمار ١ : أميرتنا الليلة وحببتنا .. شد معايا يا أبو على ..

حمار ٢ : منجه أمورك .. الليلة حتبقى آخر حمورية ..

( واحد منهم يلبسها عباءة مرقعة .. )

حمار ٣ : بنت السلطان لبست قفطان .. ها .. ها ..

حمار ١ : لبس البوصة ، تبقى عروسة ..

حمار ٢ : طب ولو قلعتها .. ها .. ها ..

الفتاة : الهى ربنا يبتليكم بمصيبة .. يا أولاد الكلب .. الحقونى  
.. ياناس ..

حمار ٢ : حنى ع الشعب ياسلطانه ..

حمار ٤ : لف العباية على وسطها التحتانى أحلى ..

الفتاة : ياغجر يا مجرمين ..



حمار ٢ : لبسها التاج .. على الطلاق ولا تاج الخنكار ..

حمار ٣ : كله يقدم فروض الطاعة ..

حمار ١ : أنا ح أقدم لها قرعة بوظة على حسابي ..

الفتاة : يا عجر .. الحقوني ..

( يحملونها قسرا ويدخلون بها وهو تقاومهم بشدة ..  
صارخة )

( من بعيد أو مخترقين الصلاة أو الساحة نجد شحاته وسعدون  
وقد انهكهم التعب .. )

شحاته : سامع ياسعدون .. وصلنا للقلعة اللي حبس الساحر فيها  
شامه .. سامع صوتها بيستنجد بيه ..

( صرخات )

سعدون : سامع صوت آه .. بس متأكد انها قلعه ؟ ..

شحاته : مؤكد قلعة ؟ .. والا ماكناش سمعنا أصوات العذاب دي

سعدون : على أى حال المهم أن يكون فيها أى أكل .. أكل .. وكوم  
تبين أذفن جسمي واشخر ..

شحاته : ياسعدون .. لازم تكون واثق من المكان اللي وصلت  
له .. والا حتتلخبط .. خليك زيي .. قدر لرجلك قبل الخطو  
موضعها ..

سعدون : ياسلام .. وأنت اتأكدت ؟

شحاته : انكتب علينا منذ الأزل اننا نوصل القلعه دي

سعدون : أرجوك ياسى شحاته .. ما تضحكشى عليه دي خان  
وخماره .. بتاعة حرامية وحماره ..

شحاته : ( بجدية ) ياسعدون ليه سيبت عينك تخذعك تانى عن جوهر  
الأشياء . . بص بقلبك . . ألم نعبّر الأنهار الأربعة ؟!

سعدون : انهار ؟ وأربعة !؟

شحاته : نعم أربعة ؟ . . النيل والفرات وسيحون وجيحون . .  
وبعدها . . آدى القلعه . .

سعدون : وحياء شنب مراتى أنا لاشفت نهر ولا بحر . .

شحاته : ثق ياسعدون . . الثقة هى بداية طريق الانتصار . .

سعدون : اللى أنا واثق منه أن عصافير بطنى بتوعوع . . وان أنا  
عايز ارتاح حبه وأنام . . عشان نبدأ الشغل . .

شحاته : شغل !؟

سعدون : الحكم ! . . الولاية ! . . الأبهة والتاريخ . . ! أنت مش  
قلت ان لما نوصل عند الأميرة . . نستلم الحكم . . ؟

شحاته : وسترى بعينيك كيف سيكون استقبالنا عظيما . .

( يتقدم وينادى ) . . أيها الأمير يا صاحب القلعه . .

أناديك فاخرج للقتال . . اطلق سراح الأميرة والا دمرتها فوق  
رأسك . .

( يخرج صاحب الخان وزوجته ، يتطلعان اليهما فى دهشة ،  
زوجة صاحب الخمار سوقية معلمة . . والحمارة يخرجون  
أيضا يتطلعون فى دهشة ) . .

الخمار : عايز ايه يا جدع أنت ، لو عايز سرير ما عندناش كل الأوض

مشغولة . . مافيش غير الاصطبل . .

زوجته : كل شىء له يشبه اللى له . .

شحاته : لا أتصور انك تتكلمين بهذه اللهجة السوقية .. يامولاتى  
الأميرة!؟

الخمارة : هه ؟ .. أميرة ! ..

زوجته : أميرة ؟ يطول عمرك .. طلباتك ايه يازين الفوارس ..

شحاته : جيت عشان أرجع الأميرة ( شامه ) لأهلها ..

الخمارة : أميرة أيه ياروح أمك ؟

سعدون : آه .. ياكثافى .. حاسس ان اجنابى حتاكلنى ..

شحاته : لا تتجاهل الأمر يا أمير .. اطلق سراح الأميرة اللى خطفها  
جنودك الانذال هؤلاء ..

الزوجة : يكون قصده البنت اللى شغاله عندنا ؟

الخمارة : معقول!؟

الزوجة : دى لقيطة اشتريتها بغدوة من شحات ..

الخمارة : ممكن يكون الشحات ده خطفها من قصر ؟ ..

شحاته : لن أنتظر أكثر من ذلك يا أمير .. هيا .. والا هدمت  
قلعتك على أم رأسك ..

الزوجة : هاو .. قلعه ؟ .. دى أمك اللى قلعه ..

خمارة : هاو أو .. أراجوز على حصان خشب ..

خمارة آخر : يا راجل تعالى .. الشغل جوه ..

الزوجة : ما يحكمش يا عمر

شحاته : ابتعدى عن طريقى يا صاحبة السمو .. لا يجب لمن هى فى  
مقامك أن تحشر نفسها بين الفرسان ..



( تضحك ضحكة مثيرة )

سعدون : يا ست الستات فى عرضك .. ما تأخذي هوش أصله مش  
منهم ..

الخمارة : ترالالى .. والا ..؟! ( ضحكات الارجوز )

شحاته : ( يتوتر ) لن أسمح لأى انسان مهما كان أن يسخر منى ..  
هيا .. ياسعدون .. الى المعركة ..

حمارة : صاحبك ماله ؟ حمقى كده ليه ؟ ..

حمارة ٢ : اديله شفقة م الهباب يمكن يروق ..

شحاته : أيها الوغد .. اذهب الى سيدك وقل له ..

الزوجة : أيوه ياسيدى .. أنت مش منهم ؟

بحاته : أنا فارس الاقطار والدمن ، مشتت أهل الفسوق والمروق  
فاحذرى وناذى زوجك نربال مناطق البغال .. لأسوى الأمر  
معه .. هيا ..؟! ( يهجم عليها بالحربة )

( تهرب الى الداخل )

صوت الفتاة : يا عالم الحقونى .. آه .. يا حمارة الكلب ..

شحاته : ياسعدون .. هل سمعت أنهم يعذبونها .. جئت (ياشامه)  
فلا تخافى ولا تحزننى ..

سعدون : ( يضع البرذعه على ظهره ) سمعت وأتأكدت فلتستعد  
بدرع متين ..

( يقتحمان أحد الأبواب ويغيبان فى الداخل بينما تعلو أصوات  
كركية ودريكة من الداخل ) ..

شاعر الربابة : وهجم صاحبنا سى اليزل فى قوه

وفى عروقه الحماسة نبض ومروة  
لكن يا ميت خسارة .. القلعة خسارة  
أيه يعمل السيف لوحده ويا حمارة !  
( أصوات من الداخل )

شحاته : لا تتدخل يا سعدون ، يجب أن أهزمهم وحدي .. كما هو  
مكتوب فى الألواح القديمة ..

سعدون : لكن دول مستفردين بى أنا ..

شحاته : يهربون من مواجعتى فارسلم لى

سعدون : أعمل ايه ؟ أنا الحيطه المائلة ..

شحاته : لن أتركك لهذه الكلاب السكرانة السعرانة ..

( يسود هدوء ثم تقذف أشياءهم ويدخلان متساندين )

سعدون : ( باكيا ) هرمشونى ياسى اليزل ..

شحاته : الساحر مخادع وشرير ؟ .. استعان به أمير القلعة ..

واستعان هو ببيرنوخ .. ابو ألف دراع خشب ودراع حديد

.. لكنهم .. لم ولن يتغلبوا على .. سوف أريهم .. أى ..

سعدون : فلقوا دماغى ياسى اليزل ..

شحاته : لكننا مع ذلك انقذناها .. من بين أيديهم .. هل رأيت

كيف هربوا .. وتشتتوا

( ينهار واقعا ) ..

سعدون : طبعاً .. هربوا .. هرسونا وهربوا .. انتصرنا عليهم

.. فنحن لم نجر ولم نهرب .. لكنهم هربوا جروا .. والا

كنا دبحناهم .. م الله ..

( ينهار الى جواره ) ..

● اظلام ●

## عندما طلع الصباح .. وكيف ضاع الحلم وساح

( آثار السهرة الصاخبة ، الحمارة مكومون ، زجاجات  
وبقايا .. يدخل صاحب الخان يتمطى ، ويشهد قامته كمن  
يعيش في حلم وضاع .. )

الخمار : نظراتي النبيلة ؟ .. وعودى بيشبه عود الزناتي .. ؟ ..  
وأنا ملك ؟ .. سلبوا منه عرشه ؟ .. معقول ؟! والبنت  
اللقيفة دي .. اسمها شامه وبنت سلطان .. ؟ ..

والحرب دايره على رجل ونص .. ؟ لأه .. النهار  
طلع .. ولسه باحلم .. ياه .. أكيد الراجل ده شيطان  
وسواس .. فعلا مقنع .. معقول ؟ .. واحد زيى من أصل  
نبيل ، معقول يفضل مرطوط في المزبلة دي طول عمره ..  
يتحمل رزالة الزباين ويشحت البقشيش منهم بكل أدب ..  
لا .. عنده حق .. هيه دي الحقيقة .. دي قلعة .. قلعة ..

وأنا سلطان ابن سلطان ، سرقوا منى عرشى .. ازاي  
سمحت لنفسى انى اتمرمط واتشحطط بين المصاطب لولا  
الفارس ده ماكنتش عرفت حقيقتى .. الناس كلهم بالليل ..  
عرفوا حقيقتى وحطونى ف مكانى الحقيقى .. احم ..

يا أميرة الزمان وملكة العصر والأوان .. تعالى .. كى  
نباشر مهام مملكتنا الصغيرة ..



الزوجة : ( ترتب هيئتها كمن باتت في غير مكانها ) أليه اللى جرى  
لك يا فالج ؟ .. لسه مافقتش ..

الخمارة : فوقى انتى يامولاتى .. واتمسكى بالحقيقة اللى كشف  
لنا عنها سى اليزل ..

الزوجة : هاو .. مش كفايه أهبل واحد .. اتفهيت أنت كمان ؟ ..

الخمارة : سوقية .. أفاظ سوفية .. ماتليقش بأميرة .. يامولاتى  
احنا .. من ..

الزوجة : مولاتك ؟ .. اتجننت ياسبعى ؟ ..

الخمارة : سوف يغضب لو سمعك وانتى بتتلفظى بالكلام الزرايبي  
ده ..

الزوجة : اسم الله عليه وعليك .. وحياء أمك الغالية أنت اتجننت ..

الخمارة : وحياء أمى .. ! مش ممكن تكون دى أفاظ سلطانه .. لكن  
دى غلطتى لانى اتجوزت واحدة من العامة ..

الزوجة : العفو يا ابن الأكابر .. اللى نفخك يفسيك .. ياصعلوك  
صدقت انك سليل ملوك ؟ ..

الخمارة : أنا مش منفوخ .. أنا اكتشفت ذاتى .. وأعرف حقيقة  
أصلى ..

الزوجة : الحقيقة الوحيدة انك حمار ابن حمار ولما ربنا فتحها عليك  
زودوك نقطة اتجوزنا وبقيت خمارة ..

الخمارة : والقلعه ؟ .. القلعه دى .. اللى صدت جيوش عظمم ؟ ..

الزوجة : عظمم تبقى خالتك ..

الخمارة : والعرش .. والتاج .. أهه ..

الزوجة : اسم الله ع التاج .. عمّة أبوك تحتها قرد .. فوق .. دى  
خماره من أربعين سنة .. مملكة آه لكن مملكة أمى أنا يا عرة  
الحمارة صدقت خرافاته .. كنا بنتسلى يادهل .. سكرنا  
ولعبنا ترفيه عن الزباين ..

الخمارة : يعنى قصدك ان كل اللى حصل كان عشان سكران  
وباحلم ..

الزوجة : مش من حقنا نحلم ، الاحلام بتكلف .. مش دى نصيحتك  
اللى اتجوزتك بسببها .. كانت نصيحة راجل فاهم ويعرف  
يحمى ست زى وسط البهايم .. تقوم بعد ثلاثين سنة ننساها  
.. عايز تضيعنا بتخاريف الفارس المفلس ..

الخمارة : عندك حق ( يصفع نفسه ) الاحلام بتكلف كثير .. دى  
الحقيقة الوحيدة اللى لازم يعرفها خمارة عقله زنج زى ..  
اسندينى ( تصب عليه جردل ماء ) .. يابت ياللى  
ما بتحلميش ..

الزوجة : اصحى .. فوق .. وازعق ع البت المفعوصه دى تساعدنى  
نروق المطرح .. لازم روخره صدقت أن امها ملكة ..

الخمارة : بت يا مقصوفة الرقبة ..

الفتاة : من ينادى فى الصباح الباكر ؟ .. لا يجب أن يرفع أحد صوته  
فى حضرتى .. ( تضربها ) يالهورتى .. أنا ابنة الملك أفراح  
( تبهدنها الزوجة محاولة أفاقتها ) ..

الزوجة : نعم ! ياروح أمك .. ؟ اسمع ياملك الخمارة .. اسمع ..  
صاحبك المجنون كل عقل البنت روخره !

الفتاة : زيحوا الغشاوة عن عيونكم .. بصوا للدنيا ولبكره  
بقلوبكم ..

الزوجة : الهى بصينا عليكى مالاقيناكى ..

الفتاة : أنا فتحت عينى على حقيقتى .. خلاص ..

الزوجة : تعالى هنا ..

الفتاة : وحيرجنى لأهلى ياخطافين ..

الزوجة : سمعت .. اليتيمه اللى وهبها لنا الزمن عشان يمشى حال

الخماره .. عايز يخطفها .. عممك وعملك شاه عشان

يلهفها .. ياللاع الجردل والخيشة نضفى المطرح .. ولى

الزباله .. وامسحى البلاط يابنت الرفضى ..

الخمارة : مش ممكن أكون أمير .. ولا يمكن تكون دى قلعه .. لا ..

أنا اتجننت بالتأكد

الزوجة : ياللابنت .. بسرعه .. بقينا الضهر .. ( تخرج باكيه )

الخمارة : بالليل كان كل شىء واضح .. كنت سلطان وملك .. وكان

هنا قلعه فعلا .. وأنا قاعد على العرش .. ايه اللى

حصل ؟

الزوجة : معلش ياملك الكوتشيينه .. طول عمرك وأنت حمار

وخمار وطول عمرها زريبة وخماره .. واحنا عشنا هنا

سلاله ، سلسال أبا عن جده .. هع .. سلاله مولوده بين

السراير والبراميل .. عشنا على دراهم اللصوص وقطاع

الطرق وشحاتين الحماره .. أصح .. ياملك .. أشمعنى

أنا ماصدقتش تخاريفه .. هه .. عشان عارفه نفسى وواثقه

من ذاتى .. أمى غساله وأبويها حرامى بط .. جمعوها مليم

على سحتوت وفلس ورا فلس .. لغاية ما فتحوا المملكة دى

.. وأنا .. أنا عصر الهم قلبى .. من صغرى .. اغتصببنى

العسكر العثمانلى ورمونى فى الطين ألم لقمتى .. فرفوته

فرفوته ٠٠ من تحت حوافر السكارى ولصوص الزمان ياملك  
الزمان لاذعر ٠٠ فوق !!

( يدخل الحماره وهم يجرون شحاته وسعدون يحاول ابعادهم  
بمناوشات مضحكة )

حمار : خد ٠٠ دى عشان ضيغت ليلتنا ٠٠

شحاته : ( للخمار ) سيدي ٠٠ جئت اليك لتسمح لى بمبارزة  
كبيرهم ٠٠

( يصربونه فى وجهه ويلبسونه أقنعة حميرية وقرون ٠٠ )

حمار ٢ : ودى ٠٠ عشان حرمتنا من البنت ٠٠

شحاته : مولاي ٠٠ اسمح لى أن اشتتهم ٠٠

سعدون : سيبه يا ابن الكلب ٠٠ أبعد عنه يا حمار ٠٠

حمار ٣ : وخذ دى فى اسنانك عشان اسنانى اللى كسرتها ٠٠

حمار ٤ : ودى عشان هدومى المقطعة اللى مزعتها ٠٠

شحاته : يامولاي ٠٠ أناديك فأجبنى قبل أن أغضب ، أبعد كلابك  
عنى ٠٠ والا فتعالى وبارزنى ان كنت تملك شيئاً من  
الشجاعة ٠٠

الخمار : يعلقوك ع الشماعه ٠٠

سعدون : ياسى اليزل ٠٠ كفايه ٠٠ وتعالى نمشى من هنا ٠٠

الخمار : بس يا أولاد ٠٠ تعالى يافارس الفرسان ٠٠ خش على  
عمك ٠٠

( وعندما يقترب منه يضرب أشد فى وجهه ٠٠ فينذهل )



الخمارة : عايزنى أبعدهم عنك .. دانا ح أخليهم يطحنوك فطيره  
يفطر بها الزباين اللي طفشوا بسببك . ح أخليهم .. يعجنوك  
كفته أوزعها على روحك اللئيمة اللي ضحكت على ..

شحاته : ما هذه الألفاظ البذيئة ياملك الملوك .. هل أنت مريض  
لتخرف ..

الخمارة : اخرف يا أبو فصاده راكب نمله ؟ ..

شحاته : عيب .. لا يليق بك .. هيا امتشق حسامك والى القتال  
.. لن أصبر على تخاريفك وسأقتلك رغم انى ضيفك ..

الزوجة : شاهد ؟ حضرته ضيف .. ( شفته مع حركة من يدها )  
الحساب مش عايز يدفعه ..

الخمارة : دانا ح اسلخ جلدك .. تضيع القلعه منى .. وتفلسنى  
.. كمان ؟ ..

شحاته : القلعه اللي يسكنها الاندال لازم تخرب .. والقصر اللي  
ساكنه شياطين .. لازم ينهد على راسهم ..

سعدون : أعمل معروف ياسى اليزل ، ضلوعى بتحلف لك ده راجل  
خمار قرارى من أصل وشه ..

شحاته : لكن هذا قصر الملك عيروط ياسعدون ! ..

سعدون : تانى ..

الخمارة : قصر ! هع القصر اللي وهبته هولى امبارح ..

سعدون : أنت وهبت له قصر ؟ مع انك لسه مقابله وأنا ؟ .. ياللى  
رجلى فأفأت وضلوعى اتدشذشت أطلع بلوشى ؟ ..

شحاته : ( فى ألم حقيقى ) ماذا جرى للدنيا وأنا نايم ؟ الغشاوة  
طلست على قلوب الجميع !! .. حتى أنت ياسعدون ؟ ..

وكان حربي ضد الشياطين والسحرة طول الليل كانت من  
غير فايده ..

( سعدون يساعده على صعود الحصان .. )

الفتاة : سى اليزل ..

شحاته : شامه ..

الفتاة : مش حتاخذنى معاك ..

الزوجة : ( تجرها ) ياخذك ربنا .. ع المطبخ يابنت الكلب ..

الفتاة : لو سمعك أبويا .. كان يشنقك ..

الخمارة : على جوه يابنت السعدان .. ياللا على شغلك ..

الفتاة : شفت ياسى اليزل ست الحسن الأسيرة ما بين المطبخ وسراير  
الخمارة ..

الزوجة : ست الحسن أم طرطور .. ( ضحكات الارجوز ) ..

شحاته : ( فى توتر مولاتى يتفوه لسانك بهذا الهراء ؟ .. يالوضاعة  
الحال التى صار اليها البشر .. لكنى لن أسمح لهم فلا  
تلقى يا شامه .. لن تظل الدنيا خمارة قدره تمسكى بحلمى !

الفتاة : ( وهم يجرونها على الأرض ) لو معاك حاقدرا أحلم ..

الخمارة : هاتى العصايا يا وليه .. اكسر له راسه وادشده  
عضيمها ..

سعدون : وقف عندك .. تكسر راس مين يا قفل أنت .. أحسن لك  
تحفظ مركزك .. ياللا بينا ياعم سى اليزل .. قلت لك خمارة  
ورجالته خمارة .. ما صدقتش .. دى حميرهم بتفهم عنهم  
يا راجل .. ده اللى كان حيعطينى الطابيه ؟ .. وهو  
مايساويش زلطة !

شحاته : عندك حق ياسعدون .. أحيانا تنطق حكمه أحكم من حكمه  
الحكماء هيا بنا يا شامه ..

الزوجة : نعم؟! شامة ايه ياروح أمك ! ..

الخمارة : عايز تخطفها كمان .. طب انجر قبل ما أخطف عينك ..

سعدون : ياسى اليزل .. لا تجعلهم يستفزونك هيا بنا الآن ..  
الحرب خدعه برضه .. بكره فيه يوم يرضى الجميع ..

شحاته : لكن بكره .. يكون الوقت فات ياسعدون ..

سعدون : ياعمى واحنا ورانا ايه ؟ اللي يفوت نعيده على مهلنا ؟  
( يضحكون عليهم ويسخرون )

شحاته : اضحكوا .. على خيبتكم .. الواجب انكم تبكوا على  
حالكم بدل الدموع دم .. ولكنى سأعود لتأديبكم ..

سعدون : حتكم الغم .. انتم وحميركم : أولا عم ..

( يمضيان تنفلات الفتاة وتحاول اللحاق به .. والزوجة  
تطاردها وتجذبها .. )

الفتاة : سى اليزل .. ياسى اليزل ..

( تصرخ يائسة )

الخمارة : تعالى هنا .. راичه فين ؟

الفتاة : سيبنى .. ماتروحش وتسيبنى ارجع ياسى اليزل

الزوجة : رجعت الميه ف زورك راичه فين ؟

الفتاة : ( فى يأس واستسلام )

وح أوره فين ؟ .. أنا مدفونه هنا بالحيا ..  
لكن ح استناد .. في الليل وفي النهار ح استنى رجوعه  
لازم يرجع .. معقول يفضل حال الدنيا كده ؟ ..  
لازم يعمل حاجة ..  
والا الدنيا حتبقى كلها خماره ! ..

\* \* \*



## واقعة سي اليزل فارس الفرسان مع مساجين السلطان

( آهات وهمهمات وأنات حزينة لأناس مطحونين ثم يظهر  
موكب من التعساء المشكوكين في سلسلة يحرسهم اثنان من  
الجند العثمانية )

( الأغنية الحزينة تفيض شجنا .. قرب نهايتها نرى ولو في  
عمق الصالة سعدون يبكي وشحاته يتأمل المنظر في ابتسامة  
وفخر )

المساجين : خفوا عن أكتافنا ياسجاناه

- مركبنا تاهت في الليل ..
- خطفونا من حضن أولادنا
- ولا لينا في الغربة دليل
- سرقونا من أرض بلادنا
- وما فيش للحرية سبيل
- والشوق يقتلنا لأهالينا
- يانسمة خدينا وودينا ..
- من شهدك تشرب يانيل ..

شحاته : أخيرا ظهر حرس الشرف !!

- نشيد مليان حماس وفخر .. بالوطن ..
- بس اللى محيرنى ياسعدون .. ملابسهم الغريبه ! .. تفتكر  
تابعين لمملكة ايه ؟ ..
- سعدون : مملكة الأشغال المؤبده ف اسطول اسطنبول ..
- شحاته : ودى بعيده ..
- سعدون : فركة كعب ..
- شحاته : ماسمعتش باسمها قبل كده ولا قرئت عنها ..
- سعدون : ماهى دى المصيبه .. أذت بتسمع عن اللى أذت عايزه ..  
مش اللى حاصل فعلا ..
- شحاته : أنا بسمع دبة النملة ..
- سعدون : ممكن .. لكن ياسى شحاته فيه حاجات تخرق عين البنى  
آدم ولو عاز مايشفهاش ..
- شحاته : لكن انا شايفهم ..
- سعدون : ( بسخرية ) بقلبك برضه .. على كل حال دول من مملكة  
مايحسش بيها الا اللى جواها ..
- شحاته : دى تبقى مملكة نمونجية ، لازم ندخلها ..
- سعدون : كل شىء بأوان ..
- شحاته : نظامها بديع ..
- سعدون : باذن واحد أحد حيبقى هو النظام الأساسى فى حكومتى ..  
مافيش يا أمه ارحمىنى ..
- شحاته : متساويين حتى شعرهم طول واحد والوجوه عليها سيماء  
العزم والبراءة ..

سعدون : ( فاقدًا صبره ) ياسى اليزل ماتجننش أبويا .. حرام عليك .. ( يبكى ) أنا ماعدتش قادر استحمل .. عزم ايه ونيلة ايه ؟ دى وجود شوها الذل والعذاب .. وشعرهم مخلوق اهانة أنت ايه ؟ .. هيه الكتب بتموت القلب .  
شحاته : ماذا جرى ياسعدون ؟ .. لم تبكى والدموع غالية ..

سعدون : جرى ؟ .. اللى جرى لا ينكتب ولا ينقرا .. الخمارد عملتها قصر مش مهم .. الخمار الحمار عملته سلطان ماتفرقش .. انما دول .. دول مش ممكن يبقوا الا متاعيس مناكيد خاطفينهم عشان يبقوا عبيد فى الأسطول العثمانى ..  
سخره ..

شحاته : اتقول الحقيقة ياسعدون ؟ سخره سخره ..

سعدون : أيود سخره .. ودى كلمه مالهاش الا معنى واحد فى كل اللغات اللى فى الدنيا ..

شحاته : لا .. لا يمكن أن أسمح بهذا .. لا سخره فى عصر الفرسان .

سعدون : تسمح ؟ وأنت مين عشان تسمح والا ما تسمح ياسى شحاته ..

شحاته : عدت للشك ياسعدون .. أنا سيف بن ذى يزن لم يكن فى عصرى سخرة ولن يكون ..

سعدون : حصل .. وكان .. مايحسش بالكرباج الا الملسوع على قفاه ..

ولا بالسلسلة الا المشموط من رقبته ..

شحاته : لكن أنت متأكد انهم مضروبين ومخطوفين ..

سعدون : أقول له أيه ده بس ٠٠ ؟

شحاته : قول ٠٠ لا تخف ٠٠

سعدون : أى أعمى لازم يشوف انهم متقندين ٠٠

شحاته : اذن لابد من انقاذهم وتحريرهم ٠٠

لا بد أن أمسح عن عيونهم دموع الحزن ٠٠ ليكون لابتسامه

( شامه ) ٠٠ معنى ٠٠

سعدون : لا ٠٠ أعمل معروف كله الا ده ٠٠ دى حرمة السلطان

شخصيا ٠٠ ده أمور سلطانية ! ٠٠

شحاته : الظلم ظلم سواء كان سلطاني أو غير سلطاني ٠٠

سعدون : المره دى حيبقى فيها عسكر وخوازيق ٠٠ هنا مش خماره

٠٠ لا

شحاته : هذا هو الاختبار الحقيقي لفروسيتى أو أكون كما قال عنى

الخمار مجرد خيال ظل وهجاص ٠٠ هل تريدنى هجاصا ٠٠

سعدون : ياسيدى العفو بس تعالى نشوف لنا حته تانية نتفرسن

فيها ٠٠

شحاته : هل بدأ الخوف يتسلل الى قلبك ياسعدون ؟ ٠٠ قلت لك ألف

مرة لابد أن تكون متأكدا من الطريق الذى تمضى فيه !

( يتقدم شحاته تاركا سعدون على ركبته يندب ٠٠ يتجه

شحاته ناحية الحارسان يشير سعدون لهما اشارة توحى

بجنون شحاته تخفيفا لوقع كلامه )

شحاته : يا قائد الفرسان ٠٠

أنا فارس الاقطار سيف بن ذى يزن ٠٠ لحسن حظك ان القدر

وضعك فى طريقى ٠٠



ولذا عليك أن تجيب سؤالي البسيط .. والذي يمكن أن تجيب،  
عليه أصغر عصفورة تطير في السماء ..

الحارس : تفضل يا أشطر الفرسان !!!

شحاته : هل تعرف معنى الحرية ؟ ..

الحارس : طبعا أفندم .. الحرية يعنى تتفضل تمشى في طريقك في  
حرية بعيد عن طريقنا ..

سعدون : سى شحاته .. دى اجابة معقولة جدا .. ياللا بينا ..  
شحاته : فعلا اجابة واضحة جدا .. ولكن أنا لا أحب الاجابات  
الواضحة .. لأن معناها غالبا مايبقى مقصود به السخرية  
أو الكذب ..

الحارس : عفارم صح .. أوضحها أكثر لو ما فارقتناش في حرية ..  
ح يزيد عدد مساجين السلطان واحد أو اثنين وتقل الحرية ..

سعدون : مافيش أوضح من كده .. ياللا بينا ..

شحاته : لا .. انها اجابة غامضة وأنا أكره الاجابات الغامضة  
لأنها تخفى تهديدا غير مفهوم .. !

الحارس : ما عنديش مانع أفهمها لك .. ( يعمر البندقية )

سعدون : دول لا فرسان ولا يعرفوا ( شامه ) .. !

شحاته : وهل اتخلى عن هؤلاء ، فكيف اذن اجرؤ على القول باننى  
حررت ( شامه ) .. ، أيها الحارس لم سـجنت هؤلاء  
انتاعيس ؟

سعدون : ما تأخذوهوش .. هو طيب جدا .. التعب وقلة النوم  
والأكل .. تصور سيادتك ثلاث أيام ماكلناش ولا نمناش ..

الحارس : ( يزيحه ) يا فارس الغبرا .. القاضى وزن لكل واحد  
منهم على قد ذنبه .. اتحاكموا واتحكموا مافيش فيهم بجح

يقدر ينكر اجرامه .. فسبيك منهم وتعالى كل لك لقمة مادام  
الجوع عمل فيكم كده ..

( ينتحى هو وزميله ركنا ويفردان منديلا به طعام ..  
سعدون بدون تكليف يذهب معهم .. بينما يتجه شحاته  
للمساجين )

الحارس ١ : صاحبك ده تراللى ؟ .. يا ااد ..

الحارس ٢ : فعلا .. التعب هرانا .. ناكل ونغفل حبه .. وخلي  
بالك أنت ؟

( يأكلون ويشربون وسعدون معهم )

شحاته : أيها المساكين .. ماذا فعلت بكم الدنيا ولماذا أنتم هنا ؟  
.. ولماذا هذه السلسلة ؟ ..

( المساجين باتفاق خفي يحاورونه في لؤم وسخرية )

سجين : قطع السجن ولو في جنينه ..

سجين : ياما في الحبس مظالم ..

سجين : لكن مين يقرأ ومين يسمع ؟

سجين : بص في وشنا .. فيه أطيب من كده ؟ .. شوف .. شوف

شحاته : بس بصدق وصراحة قول لى أيه جريمتهك ؟ ..

سجين : أصدق وأصرحة همه سبب سـجـنى .. الكـل بيكـذب

والصريح مالوش الا السجن .. الشرف متقيد في سلسلة ..  
والصدق والقهر حاجة واحدة ..

سجين : تصدق يحبسونى عشان رطل زيت مغشوش .. ماكانش  
حيلتى الا هو ..

آخر : وأنا تهت عن سكة بيتنا في الضلّمة .. فدخلت بيت تانى  
اتعشيت ونمت .. ضبطونى ..

ثالث : كان جوزها مسافر ورجع فجأة ( يضحكون )

رابع : وأنا كنت مسافر بالليل .. وجعان .. سرقت رغيف اسكت  
بيه عصافير بطنى ..

الأول : لكن الرغيف كان سخن فلفه في كيس مليون دنانير بندقية ..

الثانى : أنا اتهمنى التجار بانى جمعت أموالهم وهربت مع ان  
الفلوس اللى عطوهانى كانت مزيفة ..

الثالث : أما أنا يافارس الفرسان ..

فاللى سجنى الحب .. عمرك شفت عالم في العالم يعتبروا  
الحب جريمة ..

شحاته : الحب ليس جريمة ..

( يشهر سيفه فيسرع اليه سعدون - الحارسان غفلا من

التعب )

أنا أيضا مثلك عاشق .. الحب ينادينى لانقذ حبيبتى ..

سعدون : ياسى اليزل .. أنت حتصدق ؟ دول اجرام ! .. قالوا  
للحرامى احلف .. ياللا بينا .. السكة دى آخرها خازوق  
شترى ..

شحاته : ياسعدون .. لقد رأيت بنفسى انهم مظلومين ..

سجين : صدقت يافارس الفرسان ..

سعدون : ياسى اليزل .. القاضى حكم .. حتى ولو ظلم خلاص ..  
يبقى عدل .. العدالة عميا ..

**شحاته :** عدالة الفرسان ليست عمياء .. لابد أن تفتح العدالة  
عيونها .. نعم .. فالعدالة العمياء ظالمة .. أيقظ الحراس  
ليفكوا السلسلة .. ( الارجوز يضحك .. يتوتر شحاته ) ..  
أيقظهما حالا .. والا ..

**سجين :** لآ .. استنى ماينفعلش ..

**تاني :** دي حتبقى غلطة أشنع من غلطة العدالة العمياء ..

**ثالث :** العدالة النايمة أهون دلوقتي ..

**شحاته :** لماذا لا توقظهم ؟

**سجين :** تعبوا من السفر ومن الضرب بالكرابيج طول السكة ..

**آخر :** نوم الظالم عباده .. يافارس الفرسان ..

**شحاته :** ولكنى أريد أن ترى العدالة انتصارها ..

**سجين :** العدالة تفرح أكثر ودول نايمين ..

**شحاته :** انتو شايفين كده ؟ ..

**الكل :** طبعاً ..

**سعدون :** يا خراب بيتك ياسعدون .. ( يحاول التسلل لايقاظ الحراس  
لكن المساجين يمسكون به ويكتمون صوته حتى لا يصيح )

**سجين :** نستطيع أن نشئت شملهم ..

**آخر :** وان تفتت رأسهم ..

**ثالث :** ولكن هذا حرام .. ماداموا ناموا .. فلماذا يكون خلاصنا

سبباً في تيتيم عيالهم ..

**رابع :** نسيبهم في حالهم ..



الأول : عايزين حريتنا بيضا غير ملوثة بالدم ..

شحاته : شايف ياسعدون طيبة قلبهم .. أرايت كيف يحبون حراسهم .. هيا .. واحضر مفاتيح الاقفال وافتح لهم باب الحرية ..

سعدون : أنا مابافهمش فى المفاتيح .. أنا سايس وفلاح .. والمفتاح مسئولية كل بواب ..

شحاته : هذا أمر .. هذا المفتاح سيفتح الباب الأول فى سجن ( شامه ) .. هيا ..

سعدون : شامه ؟ .. يبقى روح أنت هاته ..

سجين : ماتزعقوش .. اتخانقوا من غير صوت .. ماتسمع الكلام يا بغل ..

شحاته : هذا المفتاح هو الذى سيفتح باب قلعتك ..

سعدون : أنا عايزها سداح مداح من غير باب ولا مفتاح ..

شحاته : ( يهدده ) كفى اذهب وهات المفتاح ..

( يزحف سعدون تحت تهديد السيف وبطريقة هزلية .. يسرق المفاتيح ويلقى بها ناحيتهم .. ثم يسرع ويغضى رأسه بذراعيه ويتناوم )

سعدون : والله وضعت ياسعدون وعمرك ضاع ..

( المساجين يفكون السلسلة وبسرعة يذهب بعضهم فيخطفون البنادق .. الحراس يستيقظون .. هرج ومرج .. لا يجد السجناء سوى سعدون قريبا منهم .. فيضربونه .. مسجون يطلق طلقة فى الهواء .. يسكت الجميع ) ..

شحاته : خلاص .. تم الخلاص أيها الفرسان أما أنتما .. فهيا

بسرعة الى ملككم الظالم وأخبراه اننى ( سيف بن ذى يزن )  
أحذره من سرقة أولاد الناس .. وتسخيرهم فى الأساطيل ..  
قولوا له اننى فى الطريق اليه لاهدم قلعتة فوق رأسه ..  
( حين يقترب منهما .. يوسعانه ضربا ويشنكلانه .. يخلصه  
المساجين بطلاقة فيهربان )

حارس : حليق عليك الخازوق ياتخين يا ابن الفيل .. أنت وخيال  
الظل ده ..

( يهربان ) ..

( سعدون مازال متظاهرا بالنوم بينما يتوجه شحاته  
للمساجين )

شحاته : والآن .. أيها الأحرار نقتم طعم الحرية .. فافعلوا فعل  
الأحرار وانهبوا برسالة صغيرة .. الى من أحب ..  
سجين : ان كانت فى آخر الدنيا مستعدين ..

شحاته : هى سـجينة فى قلعة الملك عيروط .. فانهبوا واطلبوا  
لقاءها .. وبشروها بقرب حضورى .. و بانتصارى - هذا  
الذى حرركم .. والذى سيفتح باب سجنها ..

سجين : فتح الله عليك !!

سجين : انشاء الله نفوت عليها .. بس بعد ما نعدى البحر لبلاد  
واق الواق ..

سجين : بعد عمر طويل نروح لها ..

شحاته : ترفضون رد الجميل يا ناكرى الجميل ..

سجين : من غير ما تشتم أفهم .. الدنيا حتنقلب عليكم وعلينا ..

وأحسن حاجة يعملها أى عاقل .. هو أنه يربط ديل حصانك  
فى ديل زميلك .. وتكت ..

سجين : أجدع حاجة دلوقتى انك تعمل أرنب .. وتفر ..  
شحاته : أنا لا أفر أنا فارس أيها الاغبياء وآمركم بالذهاب اليها  
لتقصوا قصة تحريركم على يدى ..

سجين : اسمح يا جدع أنت .. حبيبتك دى ماتهمناش .. حتى ولو  
جوزوها لقرد ..  
شحاته : سعدوون ..

( بينما ينشغل المساجين بنهب متاع الحارسين )

سعدون : أنا نايم ..

شحاته : الآن اتضحت لى واضحة جلية حقيقة قلوبكم السوداء ..  
ياناكرى الجميل .. ها أنتم تخببون ظنى .. سامحيني  
يا ( شامه ) .. سأعيدهم الى سجنهم بنفسى لأنهم يهينون  
عدالتى .. سعدون ..

سعدون : أنا مغمى على ..

شحاته : قم واربطهم فى السلسلة ! ..

سعدون : أنا مت .. خلاص ..

شحاته : هيا والا ربطتك معهم ( يدفعه )

سعدون : ارحم من الخازوق ..

سجين : طب ما تحاول تربطنا أنت يا فالح ..

سجين : نصير المظلومين أبو سيف خشب ..

سجين : محرر العبيد أبو مخ ورق .. عاش ..

- سجين : ياسيد .. قبل ما تربط عقده .. لازم تفكر فى حلها ..
- سجين : عايزنا نروح لمراته .. يا راجل عيب على ذقنك ..  
( يسخرون منه وهم يشاكسونه ويدورون حوله )
- شحاته : وهبتكم الحرية ..
- سجين : وتريد أن نعطيها بأنفسنا للسلطان ..
- سجين : هل أنت عبيط ؟ ..
- شحاته : لماذا تنكرون الجميل ؟ .. لا أفهم لم لستم على خلق كالفرسان ؟ ..
- سجين : لا بتفهم ولا حتفهم ! ..
- سجين : يا أخ .. يا نصير الحرية ؟ .. كل اللى علينا دلوقتى نختفى ..
- سجين : الحرية دلوقتى يعنى أن يكون معانا أكل أو فلوس ..  
ادينا اللى معاك .. يبقى اعطينا حريتنا بصحيح ..
- شحاته : الفرسان لا يحملون نقودا ..
- سجين : يعنى مفلس وشحات ..
- سجين : نبيع الحصان ..
- سجين : لا يساوى فلس ..
- سجين : يبقى الحمار أجدع .. ناخده نبيعه وناكل بيه ..
- سعدون : وأنا ذنبى أيه ؟ اللى عملها صاحب الحصان .. صاحب الحمار ذنبه ايه ؟ ..
- شحاته : اتركوا الحمار والحصان والا ..



سجين : ( يدفعه على سعدون فيقع ) يا أخى .. اتلهى واتكلم على  
قدك ..

سجين : وابعد عن طريقنا .. أنت ح تهددنا !؟

سجين : يا فارس الفرسان .. لما تدافع عن شىء - على الأقل يبقى  
ف ايدك اللي تضرب بيه ..

سجين : الحرية مش لعبة ..

الحرية ثمنها غالى قوى .. وان كنت حتفهم حاجة أى حاجة  
فى يوم من الأيام .. فأعرف ..

ان لما تكون الضفدعة سايقة المركب ..

وأبو فصاده حارسها ..

يبقى على اللي زى حالتنا .. مايفلش غلظتنا .. ويقع فى  
ايدهم ، عليه يكت ويهرب لآخر الدنيا ..

سجين : أما حكاية مرواحنا لمراتك دى ..

بعدين .. لما نفضى نروح نآنسها ..

( يضحكون ويسخرون منه .. وهو غير فاهم .. مذهول .. )

شحاته : لم أعد أفهم ! سعدون !!

لما لا تسير الأمور مثل ما هو مكتوب لها أن تسير ؟ ..

ولم يصبح المظلوم .. بلا ضمير !؟

( ضحكات الارجوز )

\* \* \*

## شحاته المضروب يصبح للحرس العثماني مطلوب

الحكواتى : ما أصعبك يا طريق ..

ما أصعبك يا ظروف ..

على اللي زاده وزواده سطور وحروف

احلم ياسيد شحاته .. الحلم البسيط مسموح ..

لكن حدود الحلم زى السيف ساعات تقطع

أيادى التمادى ..

وآدى الحياة لغز قدامك صعب تفسيرها ..

وايش حال بقى لوحتنوى ياعم تغييرها ..

عديت حدودك يا صاحب الحلم ليه تخطى ..

هربت مساجينى واتعديت على شطى ..

وجب عليك الحد ..

دخلت من باب حرام وطلقت ميت وسواس ..

وصبح صعيب الرجوع ..

وصعب لى تبطى

على المفارق منادى وفى الحارات طبال

على دق طبله بيزرع فى القلوب الخوف

ومعاه يطل الطمع يملى قلوب الرجال ..

المنادى : يا أهل البلاد يا عباد الله

- • على اتساع الخطاوى ودأير الناحيه
- • يامن قلوبكم بحب المصطفى صاحيه
- • يعلن اليكم مقدم كافة الحراس
- • باسم حضرة صاحب السلطان
- • اللى طاعة امره على كل العباد واجبه
- • قطعاً لدأير المفسدين والشر
- • واجب علينا تدور فى عموم البر
- • عن وغد مأفون مسمى نفسه سيف اليزن

لا يؤتمن

- • اعتدى ع الشرع والقوانين
- • وافسد العدل والاحكام
- • يا أهل مصر يا طيبين
- • ومين ح يرضى ان الشرع يتعطل
- • أو يرضى أن الحد حامى العدل يتبطل
- • وألف دينار بندى من ذهب ابريز
- • حلوان كبير ولذيد
- • للى حيقدر يدل الحرس ع اللص وزميله
- • السعد يناديله
- • بألف دينار ذهب دينار ينطح دينار
- • من ذهب ابريز
- • يشد حيل الشباب ويريح العواجيز !

( المنادى يدور في أماكن مختلفة يتجمع حوله الحماره والفتاة  
وصاحب الخان وزوجة سعدون كل منهم يلهب خياله حلم  
الحصول على المكافأة ) ..

حمار : سمعتم يا أولاد الكلب .. هو ..

حمار : الراجل المهفوف اللي ضربناه

الأول : هو ساعتها كان يسوى درهم ؟ ..

رابع : أهو بقى يساوى ألف دينار ذهب بعد ما هرب مساجين

السلطان .. بخت .. ياجحش ..

الخمار : ماحدث ح يقبض عليه غيرى ..

واقبض الألف دينار ..

اشترى بيهم قصرى وعرشى اللي سلبهم منى ..

زوجة سعدون : الهى ربنا يكرمكم يا قادر ياكريم ..

دلونى على طريقه ياناس .. ماحدث جاب سيرة جوزى مع

انه قال أن الكل حيتكلموا عنه .. ويعرفوا اسمه .. ياناس ؟

حمار : ألف دينار ذهب والنبي لا مسكهم ولو كانوا فى سبع أرض

حمار ٢ : ألف دينار ذهب يعنى كام .. أكثر من خمسين درهم ؟

حمار ٣ : ح اعمل لحمارى بردعه قطيفه وحداوى فضه ..

الفتاة : ياربى ياكريم ، أعمى عيونهم عنه ..

عشان يرجع سالم .. يفضل بعيد يارب لحين يموتوا كلهم

ويرجع لى ..

الخمار : هو السبب .. نغص على حياتى ولازم انتقم .. قلب كيانى

بعد ماكنت راضى بمملكى الصغيرة .. لو اقبض الألف دينار،

يمكن مراتى ترجع تحبنى وترضى عنى .. وترجعنى أمير

لمملكها ..



**زوجة سعدون : ياناس** .. جوزى معاه ! ياترى دخلت التاريخ ؟  
والا دخل وحده ؟ .. حاكم احنا دايمًا كده نزرع الزرع  
ومانكلهاش .. نبني البنايه ومانسكنهاش .. أكيد سـأبـك  
ضايـع على السكك ودخل هو .. دلونى ياخـلق على طريق  
طابيتـه .. ارجع لنا ياسعدون .. ماشى تفرق الذهب على  
الناس بالالافات واحنا مش لاقين اللقمه !؟

طب وفر دنانيرك لعيالك

**الفتاة : لسة ماخلصتش توبى الجديد للفرح** .. خد وقتك يا حبيبى  
بس غيب عن عينيهم .. ح استناك ..

**زوجة سعدون : ياترى مين بيهرش لك ضهرك لما ينمل ياسعدون ؟**

**الفتاة : نفسى ألبس التوب الجديد فى الفرح ياسى اليزل** .. أوعى  
يمسكوك .. بعدين ألبسه فى الجنازه ..

**زوجة سعدون : كان لازم تعرف ياسعدون ان اللى عنده عيال واجبه**  
يكن وينام فى حضان أولاده ومراته ويخرس .. والا خدوا أمواله  
وحطوه على الخازوق .. ارجع ياسعدون ارجع احكم واتحكم  
فينا .. أنا طابيتك الحقيقية .. ياسعدون !

( تختلط نداءاتهم وصياحهم وكل منهم يتسحب بحثًا عن  
المطاردين مثلما دخل من جهات عديدة .. تخف الاضاءة ثم  
يظهر ( سعدون ) و ( شحاته ) متعبان منهكان ) ..

**سعدون : طلع النهار وورا كل حجر عسـكـرى عثمانلى واقف**  
زنهار ..

**شحاته : دى تشريفة الفرسان للمجد**

**سعدون : لا .. وأنت الصادق .. للخازوق والمشانق ! ..**

**شحاته : ياسعدون .. عمر مافيه فارس اتشنق .. الفرسان بتموت**  
فى المعارك بس ..

سعدون : وأنا بقى اللي حيتشنق .. ويتخوزق ؟ ..  
شحاته : ضرورى يتشنق حد .. مش ممكن الكل يبقوا فوارس ..  
سعدون : يبقى ح استنى ايه ، أنا اشنق نفسى واخلص ..  
شحاته : على كل حال ماتشغلش بالك ممكن تنجو من المشنقة  
ماتفكرش

سعدون : فعلا الأفضل يموت الواحد وهو مايفكرش ( يبكى )  
شحاته : وفر دموعك .. مش حيحصل أى شنق الا بعد ما ننقذ  
( شامه ) .. ونهزم الساحر ونرجع بكتاب النيل وأنت تبقى  
حاكم .. ولما حتبقى حاكم ماحدثش حيجرؤ على شنقك ...  
مافيش حاكم بيتشنق بالسهولة دي !

سعدون : سى اليزل .. أنت حكيت لى قصص اتشنق فيها ييجى ألف  
حاكم .. غير اللي اتخوزقوا على العرش ..  
شحاته : على كل حال أنت لا بقيت حاكم ولا لسه اتحاكمت ..

سعدون : والعسكر اللي زى الجراد .. مش بشاير الشنق ؟ ..  
أرجوك ؟ .. قول لى بصراحة .. فيه شنق والا لأ ؟ ..  
شحاته : أكيد فيه شنق ..

سعدون : حيرتنى ! ح احكم والا ح اتشنق !

شحاته : وحتى لو اتشنقت مش ح تموت ..

سعدون : ازاي ؟ ..

شحاته : فى قصص الفوارس يفضل الجراد رافع سيفه لكن قبل ما  
ينزل به على رقبتك أقصد رقبة التابع .. يظهر الفارس زى  
النسر وينقض زى الصقر ويخطف التابع بايده اليمين بعد  
ما يفك قيوده بايده الشمال .. ويختفى الاثنان زى البرق ..

كل الحكايات والسير اللى زى حكايتنا دى مكتوب فيها كده

سعدون : المصيبه اننى مش باعرف اقرا ٠٠ ( يتأمله ساخرا )  
وحكاية الايد اليمين - ( تك ) والايدي الشمال ( تك تك ! )  
واسعه قوى ٠٠ ماتزعلش منى ٠٠ أنا أصلى جعان ولما الجوع  
مخى بيضلم وماعدش مصدق أى حاجه لان مخى هنا ٠٠  
( يشير الى بطنه )

شحاته : اسمع ياسعدون ٠٠ كفايه لحد هنا ٠٠

سعدون : ايه ؟ ٠٠

شحاته : كفايه لحد هنا ٠٠ أنت قمت بواجبك واكثر ماقدرش احملك  
اكثر من كده ٠٠

سعدون : لا ٠٠ عايز ترجع فى وعدك ليه ؟ والطايبه !؟ بتتخلى  
عنى ؟ ٠٠

شحاته : الطريق بيطول والحرس بيزيد وبيكثر ٠٠ وانت اتحملت  
كثير ٠٠

سعدون : مش ح اسيبك أنا مايهمنيش الجوع ٠٠

شحاته : والمشنقة والخازوق ؟ ٠٠

سعدون : أنت حتنقذنى ٠٠ ايوه ٠٠ حتفك العقدة بايدك دى ، لأ دى  
٠٠ وتشيلنى بايدك دى ٠٠ مش مهم بأنهى المهم انك حتنقذنى  
والسلام ٠٠

شحاته : افرض أنا مت قبلك !؟

سعدون : ماينفعش يبقى فيه غلط ٠٠ مافيش فارس يموت قبل  
التابع ٠٠ كده يبوظ التاريخ ٠٠ ويغرق العالم فى ظلم ماترضاش  
بيه كتب الفرسان ٠٠

**شحاته :** وعرفت منين ياسعدون ؟

**سعدون :** عرفته بالفكاكه .. الفرسان مش ممكن يسديبونا للكلاب  
والشياطين لا .. مين حيرعانا غيركم ؟ .. مين حيشسفى  
أوجاعنا وجوعنا ولو بالحلم ؟! .. مين ينقذ البنت الغلبنة  
( شامه ) وأنت اللي عارف شكلها .. ومكانها .. ماتأخذنيش  
إذا كنت خرفت عشان جعان .. لكن الأصول أصول ..  
أوعى تتخلى عنى بعد ما مليت قلبى بالحلم ( شامه ) ! ..  
الطابيه ! كتاب النيل .. لآ .. مش راجع .. مش ح امبيك  
حتى لو كان الشنق قبل الحكم ..

**شحاته :** الله .. اسمعى يا أرض مصر المحروسة .. اسمعى كلام  
سعدون واشهدى .. على الصداقة اللي حتخلينا نواجه الموت  
وتقدرنا على الخطر ..

دلوقتى أنا زاد ايمانى حنرجع بكتاب النيل .. وحتتم العلامة  
وحنكون المعجزة .. بص .. مش قلت لك .. حرس الشرف  
.. ( شامه ) .. مش قلت لك .. مش حيهزمننا الجوع ولا  
التعب ولا اليأس ..

( لمحة من خيال مختلط بالواقع .. الفتاة مرقدية ثوبها  
الجديد والحماره والخمار يقتربون .. يبدو المشهد وكأن  
هناك استقبالا وديا للفارس

الحماره يخفون شباكا وحبالا معهم .. لا تبدو فى البداية  
يتم المشهد فيما يشبه رقصة .. يحضر الخمار كرسيا كالعرش  
ويضعه فى المنتصف .. ويقوم وكأنه يزف اليه شامه ..  
ويلبسه عباءة .. وحتى ينتهى المشهد يكون هو وسعدون  
مقيدان بالحبال ..

الأغنية لها ايقاع يسمح بالخلط المطلوب ( .. )

شحاته : شامه ياست الجمال

•• أنا خضت ساحات القتال

سعدون : وبعد ما طال العذاب

•• ضرب العصا وشك الحراب

•• الدنيا اهي صارت جميله

•• الخمار : فهيا يابطل الفوارس

•• هيا ادخل القصر وآنس

تستظرك شامه الحبيبه

وجه القمر نور المجالس

•• في آخر الرحله الطويله

الحماره : فارس فوارسنا البطل

هيا انحنوا له في أدب

وعشانه زيدوا في الغنا

وماتسألوش عن السبب

بعد العذاب تبين وحمير

نشرب عصير قرب قرب

نلبس بدال الخيش حرير

عجب عجب عجب عجب

مش صار لنا بعد العذاب

•• فارس بألف دينار ذهب !

\* \* \*



## كيف حررت شامه سعدون وشحاته وجنبتهم الشماته !

- رئيس الجوقة : آه م الخيانه وآه م البايع الخاين
- وآه م الطمع والجشع
- وآه م حمار صار خمار قليل الأصل والذمه
- خان اللى دله يكون انسان صاحب همه
- عماء رضا الوالى •• والسلطان وحب المال
- حبس صديقنا وصاحبه ف أربعة جدران
- شاعر الربابة : نزلنا بحر الكلام والشعر مقداونا
- موجه تشيلنا وموجه تانيه تحدفنا
- نعشق تراب الوطن والفن قدرنا
- نعوم فى بحر البشر مكشوفه أسرارنا
- نحلم بيكره يحررنا رجال فرسان
- راجعين تكمل لكم حدوته الموعود
- فارسنا هذا الذى كان صادق النيه
- فظن ان الخيال يمحي الليالى السود
- ضاع حلمه ما بين جحود ظالم وقلب حسود
- لانه جهل السبب فى قهرة الشقيان
- ( فى قبو الخماره شحاته وسعدون مقيدان )

سعدون : سيف اليزل ..

شحاته : ليه بتصحينى ياسعدون للمرة الألف ..

سعدون : قادر تنام هنا يا ابن الاكابر ؟ .. وأنا اللي الأرض كلت  
من جلدى راقات مش قادر !

شحاته : ده لأن قلبى مليان ايمان ..

سعدون : ربنا يزيدك .. بس قول لى ..

شحاته : نعم ..

سعدون : هوه مافيش قدام الفوارس الا السجون والضرب وقلة  
القيمة ونكران الجميل ..

شحاته : لابد من ابر النحل ياسعدون مادمت عايز تغرق فى العسل .

سعدون : كلامك حكم .. لكن من يوم مادخلنا كار الفرسان ده  
مادقناش لحسة عسل .. كل ماكلناه كان رفس وعزق ..

شحاته : الفروسية طريقها صعب وطويل .. ومشوارها فيه النصر  
وفيه الهزيمة .. كر وفر هكذا دواليك ! ..

سعدون : دواليك؟! يبقى احنا بقى اللي منحوسين . دواليك دى مش  
بتتحقق طول الوقت ننضرب ونفر .. فين الدواليك بقى ؟

شحاته : العالم الغرقان فى الجهل من الصعب يفهمنا بسرعة والناس  
زيك ياسعدون مايحسوش الا بالمحسوس .. أنت مثلا .. مش  
حتصدق أنك حتبقى حاكم طايبه الا لما تجيلك الطاييه على طبق  
من فضة ..

سعدون : طبق ؟ .. ليه ح احكم زلطه!؟

شحاته : شفت ؟ مش قادر حتى تفهم لا الرمز الجمالى ولا التشبيه  
البلاغى ..

سعدون : لا جمالى ولا معيزى .. أنا كل اللى شففته الضرب  
الحميرى .. كان القصر طول عمره خماره ..  
والعرش اللى قعدوك عليه امبارح بكل احترام طلع سـجـن  
وسلاسل ..

حتى ( شامه ) اللى قلنا انها أميرة .. تطلع بنت من  
الموعودين ..

شحاته : لأن عدونا شرير وخطير .. متسحب تحت جلد الناس  
وتحت سقفهم بيعيش .. ولا يمكن تقدر عليه وتهزمه لو شكيت  
لحظة أوضاع ايمانك .. لكن المعجزة لازم حتحصل .. فإكر  
ازاى عاقصه انقذت أخوها ( سيف بن ذى يزن ) .. من قرار  
البير ..

( سعدون ينتبه انه صار يتحدث عن سيف بن ذى يزن  
كشخص آخر )

سعدون : يعنى هو ؟ .. أنت ؟ سبحان الله ..

شحاته : أيوه ياسعدون انقذته ؟ .. زى ماهى ممكن تنقذنا دلوقتى  
.. هس اهه ؟! سامع ؟ ..

( تسمع من بعيد آهات غناء البنات ) ها .. لازم يحصل ! والا  
ماكاناش فرسان .. سامع ؟ .. المعجزة ياسعدون ..

( صوت البنات يقترب ثم تبدو كخيال يتجسد فى ثوبها الجديد  
وكأنها فى الخماره .. ثم تنفصل عنها اليهم حيث هما  
مقيدان )

الفتاة : لو كان عند أمى فدان ..

كان لازم يخطبني غفير ..

ولو أبويا تاجر مليون ..

كان حيجوزنى لوزير ..

ولو كان خالى قبطان  
يمكن كان يخطبني أمير  
لكن أبويا عاش غلبان  
وحبيبي زى أمى فقير  
ارجع لى يا حلم الفرسان  
افتح باب السجن وأطير ..

شحاته : ( شامه ) ؟ .. المعجزه ياسعدون ، حقيقة مش وهم !! فى  
الوقت اللى تضلم فيه الدنيا تظهر ( شامه ) زى الشمس فى  
ليل الزنزانة وتنقذنا ..

سعدون : تانى !!

شحاته : مش مصدق !؟

سعدون : الواجب ننقذها احنا ..

الفتاة : حطيت لهم داتوره فى البوظة ناموا زى الحمير

شحاته : وماذا تم فى أمر حراس الطوابى والابراج ؟ ..

الفتاة : أنا ماشفتش غير الحماره .. انما صاحب الخان ومراته  
راحوا للوالى عشان بيعت حرس يقبض عليكم ..

شحاته : الجبان .. ذهب ليطلب النجده ولكننا سوف نصمد لهم  
حتى ولو احضر جيش السلطان نفسه ..

سعدون : أنا رأيى انها تفكنا بسرعة عشان نفلت بسرعة ..

شحاته : نهرب كالأرانب ياسعدون !؟ .. فما قيمة معجزة ( شامه )  
اذن !! اذا لم نتحداهم .. سيكون ذلك خطأ بالغا ..

سعدون : الخطأ الأفظع لو بقينا لحظة واحدة ..

( شحاته يغضب ) أنا قصدي نبعد ، ناكل لقمه .. وتهدا الأمور  
ونفكر في خطة لمفاجئتهم .. خطة ماتخرش المية ؟ ..  
شحاته : ده رأيك ؟ .. لا بأس .. هيا ( ياشامه ) واستعدى للرحيل  
معنا ..

سعدون : كده تبوظ الخطة .. الدنيا مقلوبة علينا وان جت معنا  
يعرفوا مكاننا أنت نسيت رأيك في النسوان ..

شحاته : خجلان نهرب ونسيبها وهى اللى فكتنا ..

الفتاة : خدونى معاكم .. دانا خلصت توبى الجديد .. ماتسيبونيش  
للوحوش دول ..

سعدون : اهدى ياست ( شامه ) .. حنرجع ( هامسا ) ناخذك فين  
يابنت الدايحة ؟ .. ما ربنا موجود .. ( يرفع صوته )  
يا ( شامه ) ستبقين هنا لتعطيهم .. عشان الخطة تنجح ..  
الفتاة : أمركم ..

شحاته : قلبى لا يطاوعنى .. ولكن لن أغيب عنك .. قليل من الحزن  
يشد أزر الحب حتى أعود ..

الفتاة : كفاية .. شفت توبى الجديد .. ح استناك وعارفه أنك  
حترجع ..

( يتأثر فيحتضنها )

سعدون : ياسى اليزل مش وقته الغزل .. أنا لسه مربوط ..  
مطاردة ألف دينار ذهب أشد من مطاردة جيش مفترى  
خصوصا فى بلد فقير .. رمانه فى بلد جعانه .. ياللا ..

شحاته : هس . وصلوا .. استعدوا للمعركة .. سنخرج لكم أيها



الأوغاد .. اننى أسمع أصوات أقدامكم فوق الصخور ..

سعدون : وطى صوتك ..

الفتاة : لا .. ده صوت حوافر البغل الداير فى الطاحونة .

شحاته : كده .. طب فكيه ..

سعدون : قطعى الحبل .. انقذينا عشان نرجع ننقذك .. دواليك !

\* \* \*

## هروب شحاته من أسر الجدران يجعل سيرته على كل لسان

الحكواتى : ويفضل الحلم غير العلم حدوته ..

القلب عاجز

والادين عاجزه ..

على حدود الأمل سيف الأمل .. مكسور

لكن ما بين اللسان والودان تتنقل القصصه . ومن القلوب  
للقلوب تتغير وتتبدل ..

تصير أحلى تصير أجمل ..

تبقى ع اللسان اعدل ..

وما أسهل الحلم ع المقهور وع المشتاق ..

يكفن الحزن أحلام الوطن بالشوق

فتملا قلب البشر بالحلم بالأشواق

بين الكفور والنساكر .. صابين الفعله والشغياه

والتراحيل .. وحتى على لسان العساكر ..

القصة تصبح مشاعر ..

اكبر من الفارس وم الشاعر

تلف وتطير على لسان البشر وتسافر ..

- تكبر تزيد على قد ما الحلم بيزيد وبيكبر ..  
وتبدأ السهرة .. يطول الليل  
يدوروا في الحكاية عن خلاص مستحيل ..  
ولا حد شاف ( سيف بن ذي يزن ) ولا حضر عصره ..  
ولا حد شاف مافعل ..  
سى شحاته سيف اليزل  
اذ حرر المساجين وحقق المعجزات .. وهرب من السجن  
حين كان الجميع نايمين ..  
الناس تشوف نفسها فى القصة منصوره ..  
مرة تشوف نفسها من نفسها مجبوره  
يفصلوا الصوره ..  
تنور ليلهم العاتى بضى دنيا جميله  
تخفف عذاب عيشهم اللى كان تحت حكم العثمانليه ..  
أزرق من النيله .. !  
شاعر الربابة : ولما دخلوا عليه الحرس والوالى فى العنبر ..  
ضحك شحاته اليزل لا خاف ولا أتاثر .  
سلط عيونته ف عينيه وهب صارخ فيه ..  
انشل راس الحرس والرعب كتف ايديه ..  
هجم عليهم بقوه وشتت العسكر ..  
صار السجن حر والسجان به بقو مساجين  
سبحان الذى بيغير الأحوال ولا يتغير

( الجوق يتحولون الى سامعين في مجاميع حول الشاعر  
أو المنشد .. أو ينتقلون من مكان لآخر .. أو يدور عليهم  
منشد وراء الثاني )

راوى : السجن كان بابيه حديد

من صلب قاسى شديد

وشحاته كانت عيونه

في الضلمه تطلق شرار ..

زعقت في قلبه قوة الفرسان

وقع الحجر واتهدت الجدران ..

وانشل جيش الظلم والأشرار ..

وبكى من القهر والى سلطنة عثمان ..

لما فارسنا قال بكل فتوه

اسمع يا حاكم غريب ..

قادر بكفى اخبزك في النار

واعصر عساكرك .. زى العسل والطحينه

وافرمك ممبار ..

باسم المظالم تسافر اسطنبول ..

تقول لسطانك آخر الانذار ..

يحل عن كتفنا داحنا رجال احرار

مداحه : واحلف يمين بالمولى رب الغلابه ..

السجن كان مقفول سبع ت أقفال

حواليه رجال عثمان كلاب وديابه ..

لكن شحاته سى اليزل ابطال ..

- قرا على الاختتام بكل مهابه ..
- ساح الحديد بالحق مي . . وسال ..
- عنتر صرخ فى القبر قال ياربابه ..
- نادى على أبو زيد فجاله رجال ..
- والبهلوان حمزه هجم بصلابه ..
- جعل صحارى ازلزلت وجبال ..
- غنى شحاته سى اليزل فى صبابه
- ولعب بسيفه وقسم الموال ..
- ومشى الجميع للحرب جيش وصحابه ..
- زاحوا الغريب واتعدلت الأحوال ..
- ( الوالى ييدو وكأنه بيسمع ويدور يتسمع ما يقال .. )
- رئيس الجوق : الشعرا قالوا وغنوا ..
- ومشى الكلام من بلد لبلد .. ومن مولد لمولد
- وكل لحظة يزيد وكل ليلة يكبر ..
- والى البلاد اللى كان عثمانلى مستعمر ..
- حاكم على مصر بالقوه وحد السيف ..
- سمع بنفسه الغنوه والحدوته
- ( الوالى ثائر يزوم كالأسد المحاصر ) ..
- الوالى : هذا كلام لا يجوز .. لابد من قطع دابر ذلك القراقوز
- لا يمكن اسمح بتاتا لفلاحين يحكوا حكايات عنا .
- ولا لشعرا يقولوا روايات .. تسخر منا ..
- الغى جميع احتفالات وموالد .. ممنوع غناء .. أكسر
- ربابات ..



صادر الكتابات .. ممنوع حكايات بدون استئذان ..  
الا حكاوى بطولة بنى عثمان ..  
رئيس الجوق : ابني سجون للكلام ..  
لكن ياوالى الزمان الكلمة تمنعها ، تزيد ..  
هذا قانون أكيد ..

( يهمس له ) دور على الحيله .. هذا قانون السياسة يا حامل  
الصولجان .. ما بيمك الفلاح حين تكثر الاحزان .. غير  
اللسان .. علشان يفضفض والا انتفض بركان ..

الوالى : ايه العمل ؟ .. شحاته سى اليزل .. تعدى الحدود ،  
مرغ فى الطين هيبة الجدود اطلق سراح مساجين الأسطول ..  
وهدد أمن الدولة صيرنا فى خطر .. ولا بد من تأديب ..

رئيس الجوقة : وحتنسى صنعة صنفاك الحكام ..

للضرورة احكام .. وحين يغضب الحاكم بيفقد حكمة التدبير  
فن السياسة كياسة الهدوء سلطان .. املا عينيك بالابتسام

.. ( يطبع الوالى )

واهدأ وروق .. دارى الحماقه .. وكن مثال الذوق فكر  
ودبر .. دى أصول صنعتك .. وميزة كل من كان يرتدى  
حبتك .. مش علموك حين ارسلوك .. ولمصر بعثوك .. وعلى  
عرشها اجلسوك .. لازم تكون بحر هادى .. لو عزت تطفى  
النار ..

( الوالى فى تمثيل صامت يتأثر بالانصيحة تماما .. ثم يفكر  
وكأنه وصل لفكره ثم يشير .. فينزل المنادى ويدور معلنا :  
يا أهل مصر المحروسة فى كل مكان

يا للى كرمهم ربنا فذكرها فى القرآن ..  
يا من فزتم بالعدل والاحسان  
فى ضل بنى عثمان ..  
بشرى من حبيب القلب  
بشرى من الوالى .. عن الفارس .. الغالى حبيب الشعب ..  
والألف دينار اللى كانت تمن لرقبته  
صارت هديه لمن ينقل اليه بشارته  
ويطمنه على قرب وصال حبيبه  
فى قصر الوالى .. اللى بيستناه على أحر من الجمر ..  
ياخلق قولوا لفارس الفرسان ..  
القصر مفتوح له بلا استئذان .. فقد ظهرت العلامه وسيتم  
زفاه ( لشامه )  
فى زفه مالها مثيل ..  
ولا شافت زيها بلاد النيل ..  
يا أهل المحروسة من الظلم والطغيان  
من أول الزمان ..  
( يغيب صوته مع اظلام تدريجى )

\* \* \*

## شحاته فارس العصر وما جرى له في القصر

زوجة الوالى : شهدت لك ، ساعات تبقى عليك تقاليع .. أمان ربي  
منك أمان

الوالى : مش تقاليع يا عبيطة .. دى سياسة لمصلحة دولة عثمانية

زوجته : المهم نضحك عليه زى ماضحك علينا الناس  
أنا جهزت نفسى عشان أضحك على تخاريفه

الوالى : ضحكنا على تخاريفه كفاية .. آن الأوان يكون للضحك  
نهاية .. والا .. انقلب لضده ..

أصبح بطل فى نظر الناس .. وله سيره فى كل مكان ..

وأهل مصر لهم فنون تعمل جنون كثير .. وخطير

زوجته : ولا خطير ولا حاجه .. ده مسخره .. فى كل مكان بيذفوه  
العيال ويتمسخروا عليه ..

الوالى : فى الأول .. لكن دلوقتى الأطفال بيخوفوا عساكرنا باسمه  
.. والمصيبة أن العسكر فاكرين أنه ممكن يطلع عليهم فى أى  
مكان وفى أى لحظة .. ويخنقهم .. كارثة مصيبة كبيرة  
جدا ..

زوجته : تهويل .. الناس كلها عارفه انه بيخرف وعمايله كذب

الوالى : طول عمرك مابتفهمنيش .. مهما أفهمك .. أنا مايهمنيش  
هو عمل ايه ؟ .. ده خيال مآته ولا يسوى واى عسكري  
عثمانى ممكن يدفنه حى .. الخطير مش عمايله .. لكن اللى  
بيتحكى عنه .. ده بقى ولى من الأوليا .. بيحلفوا شافوه  
فى ثلاث حنت فى وقت واحد .. وببيرق للحديد يسبح ..  
وموت ميه من حراس القلعه ، وحرر الأسرى .. ومادام الناس  
صدقوا ان أهبل عمل كده .. ممكن يتجراً عاقل ويطسیر  
رقبتى بكره .. فهمتى يامخ ياتخين أنت ؟ ..

زوجته : آه .. يعنى أنت تجيبه هنا تقتله .. لا .. اقتله بعيد عن  
هنا .. عفريته فى قصرنا يسكن ..

الوالى : يامخ تخين ومغفل .. أنا لا يمكن أقتله لا هنا ولا هناك ..  
زوجته : بتخاف منه ؟ ..

الوالى : أنا ممكن أفرمه بين صوابعى .. لكن لو قتلته الناس  
حتصدق حكاياته للأبد .. والحكايات تكثر أكثر .. والمواويل  
تظهر أخضر وأحمر .. والفلاحين يفكروا يبقوا فرسان ..  
ويتفرعنوا الزعران .. فى كل مكان .. لا .. ونضيع احنا  
فى خبر كان .. فهمت ياغفلان .. أنا دعيتة عشان أفضحه  
أكلبشه بصداقتى .. وكل مايطمع ح اديله أكثر .. وأريحه  
.. الحكاية تهدى .. يهيص فى النعيم ، ينسى الناس حكايته  
.. احكى حكايتى أنا على طريقتى .. حكاية عن واحد ..  
مجاص .. هلاس .. دماغه محشية قلقاس .. ( يضحكان )  
ويبقى مضحكة .. ينساها الناس فى غلبهم الأزلى .. فهمت  
يافار سمين راكب بقرة غرقانة .. انتى ..

الزوجة : فهمت يابطبوط فى المطره محطوط انتى ..

( يخرجان وهما يتبادلان الغزل والضحك على سى اليزل ) ..

## •• الوصول الى نهاية السبق حيث أكل النبق أو يصدق النبأ

( يدخل سعدون وهو يتأمل ما حوله من فخامة ثم يتبعه  
شحاته انهكه التشرد والتفكير المتفجر في رأسه •• يجعله أكثر  
نباله وعقلا )

سعدون : كده بقى وصلنا لغاية المراد من رب العباد •• ده قصر  
بحق وحق ، صاحبه أمير حقيقى وتشريفه حقيقية لا حماره  
ولا خماره ••

شحاته : قلبى بيقول لى المره دى بالذات وصلنا لخماره ••  
ياسعدون !

سعدون : لأ بأه •• أنت بتحب المخالفة •• اذا كان الأمير هو اللى  
دعانا بعد ما عرف قيمتنا •• حاسس انه حيوهبنى أكبر طابيه  
عنده ••

شحاته : مش حاسس هنا أى نسمة محبه ولا شامم ريحة صدق اللى  
دايما بتدل قلبى •• ( شامه ) مش هنا ياسعدون !!

سعدون : طب والطابيه ؟ ••

شحاته : يمكن تكون هنا طابيه •• لكن المؤكد أن المكان ده مش



المكان اللى بيدخلوه الفرسان الا عشان يهدوه على دماغ  
اللى فيه .. !

( يدخل الوالى مرحبا )

الوالى : مرحبا .. ببطل الأبطال وسيف الرجال .. وفارس الهول  
المهول .. محرر عبید الأسطول .. الفارس العاشق اللى  
الدنيا بتحكى عنه عرض وطول ..

شحاته : ( متحفظا ) من أنت يا هذا ؟ .. ومن أين تعرفنى ؟ ..

الوالى : ( سعدون يحاول تخفيف التوتر بحركات صامتة وتحذيرات )  
.. من أنا .. ؟ شفت يا صديقى .. مستغرب انى أعرفه ..  
أنا الأمير اللى حيختم بالمجد رحلتك العبقريّة .. حتنول  
ماتشتهى .. أيا كان .. عندى تفويض من السلطان ..

سعدون : أنا ياباشا لى فى نمتكم طابيه .. صغيرة .. قد كده !  
كان وعدنى بها سى اليزل أول ما جينا نشغل ..

الوالى : اختار أى طابيه . تبقى لك .. وده وعد زى وعده ..  
تمام !

شحاته : لا أعرف .. ان كان حسن حظك وضعنى فى سكتك ..  
والا سوء حظى هو اللى رماك فى طريقى .. أنا .. ( مقاطعا )

الوالى : وفيلسوف كمان ؟ .. فارس وصاحب فلسفة .. ده هو  
الكمال بذاته .. الكمال اللى حيجعل لصبرنا معنى خطير ..  
ولانتظارنا ..

شحاته : ( مقاطعا ) .. كنت أفضل لو كانت ( شامه ) هى اللى فى  
انتظارى ..

الوالى : وهى فى انتظارك فعلا ..

شحاته : مش ممكن .. فى الأمر شىء غريب أو مريب ..

سعدون : جرى أيه ياسنى اليزل .. ما غريب الا الشيطان ..

الوالى : لا ياسعدون .. فعلا .. فارسنا له حق فى احساسه للأسف الشديد مش ح أقدر أخبى عليه الأمر المحزن اللى حصل لكن وشرف السلطان العثمانى .. انا حاولت بكل ما أملك منع الكارثة .. لكن أنا مش فارس وماعنديش الكفاءة عشان اتصدى ( اسقرديون ) اللى هاجمنا امبارح .. وسخط ( شامه ) وشوه جمالها .. آه .. أنا حاسس بالعار ..  
وياريت تتقبل أسفى ..

شحاته : مستحيل !! .. ( يخاطب سعدون ويلومه )

هذا عقابى العادل ! .. لاننى استمعت لنصيحتك القاصرة ..  
وهربت بجلدى كالأرنب .. هيه فين ؟ ..

الوالى : الصبر يليق بالفرسان .. وبالانسان الكبير القلب اللى  
زيك .. حتشوفها بالتأكد .. اهدأ ..  
كل شىء حيكون على مايرام ..

( يأخذه ويمضى مواسيا .. وبإشارة خفية يدخل بعض  
الجنود والسياس يحيطون بسعدون ويحجزونه .. وهم  
يرحبون به )

سعدون : هو ده وقته ياسنى اليزل ؟ .. مش كنت تخلينا فى الهم  
( السياس يحاولون مجاراته اكسب وده ) ..

كانت حبيبته طول الوقت تحت مناخيره .. وف بيته .. ومش  
شايها عايزها أميرة يوه .. مش كنا خلصنا الطابيه وبعد  
ساعة وحياتكم انقذ له أميرته دى .. سواء من خماره البوظة  
أو من تراب الفرن .. وأقدمها له على طبق .. فضه حقيقى ..  
بس استلم مفاتيحها وحتشوفوا يا عيال .. أنا ح اعمل ايه فى

التاريخ .. والنبي .. لأعمل فيه زى الحداد ما بيعمل فى حقة  
صفيح .. كده هه ..

ساييس : تقدر ..

سعدون : انتم مين ؟ ..

ساييس : احنا ولاد كار ، ساييس خيل وحمير الوالى .. جايبين نرحب  
بك ..

ساييس : اهلا بأشهر ساييس بين ساييس العصر والأوان ..

سعدون : أنا ؟ ..

ساييس : وصديق أشهر الفرسان ؟ ..

سعدون : أنا ؟ ..

ساييس : أنت مش عارف قيمتك والا ايه ؟

سعدون : مرحبا .. وعائزين ايه ؟

ساييس : اسمع بقى .. احنا دلوقتى لوحدنا .. احنا اخوات

ساييس : وأولاد كار ..

سعدون : أى خدمة .. تحت أمركم ..

ساييس : احنا دلوقتى لا معانا ساده ولا سلاطين ..

ساييس : احنا المولودين العائشين فى الطين

ساييس : المنحطين ..

ساييس : نتكلم مع بعض بصراحة .. زى همه ما بيتكلموا دلوقتى  
مع بعض

سعدون : همه مين ؟ ..

ساييس : أسيادنا .. سيدنا وسيدك ..

سعدون : أولا .. هو مش سيدي .. هو صاحبي .. انما دكته  
سيدكم مش صاحبكم ..

ساييس : الفرق مش مهم قوى .. كلهم أسياد مع بعض واحنا  
خدم ..

سعدون : لأ .. فيه فرق .. هو صاحبي وأنا مش خدامه .. وبعد  
شوية أنا ح أبقى حاكم طابيه قد الدنيا ..

ساييس : لا يا شيخ !؟

سعدون : طبعا .. أنا حاكم طابيه .. ازاي بقى الروس تتساوى

ساييس : طب ما أنا ملك الاصطبل ..

سعدون : بتنكت ؟ .. أنت لا حاربت ولا اتغربت .. ولا ضربت  
وانضربت أنا دفعت عشان حكم الطابيه دي كتير قوى .. دم  
وعرق وجوع ودموع .. وألم ..

ساييس : يا عم روق .. أنت تعرف صاحبك المجنون ده سن كام سنة ؟

سعدون : لو قلت عليه مجنون تانى .. ح أقول ع الوالى انه أعرج  
وأعور وأعمى كمان .. وشحات ..

ساييس : بس ده مش حقيقى .. الوالى لا أعرج ولا أعمى .. ده  
أمير وعاقل ..

ساييس : بس .. ماتلاوعناش .. واعترف ..

سعدون : اعترف بايه ؟ ..

ساييس : بالحقيقة ..

سعدون : وانتم تعرفوا ايه عن الحقيقة ؟ .. وانتم مابتشوفوش غير

تحت رجلكم .. الجله والزبل والتبن والطين .. عايشين

بين رجلين البهايم .. تعرفوا ايه عن الحقيقة .. الحقيقة

اللى اعرفها عنه أطول من السكك اللى مشييتها معاه ..

وأقوى من الشوم والعصيان اللي دقت على دماغى وكسرت  
ضلوعى ..

ساييس : ده باين أجن من سيده

سعدون : قلت لك مش سيدى ده صاحبى ..

ساييس : أنت بتخرف اكر منه ..

(يبدأون فى زغده وضربه )

سعدون : اسمع .. أوعى تفكر ان أنا خايف أرد عليكم عشان فى  
قلعتكم لا .. أنا بأرد الوقتى بلسانى .. لكن أقدر أرد بايدى  
وباسنانى .. آه ..

ساييس : أنت فاكرف نفسك فارس أنت كمان يامعار .. أنت ولا حاجه  
.. وأهبل زيه ..

ساييس : وحيمشى ورا المجنون مين غير الاهبل .. يا أهبل ..

سعدون : أهبل ؟ لا .. فليكن فى علمكم اننى خرشمت وشدشت ناس  
زيك

( تزداد سخريتهم ويناوشونه )

صحيح كانوا حماره .. لكن واضح انهم كانوا أشرف منكم  
( يضربونه )

آه ياغجر .. ايوه .. أنا كمان هربت معاه من القلعه بعد  
ماغلبنا الحراس .. آه .. وأنا اللي كسرت الاقفال بتاع  
المساجين .. يا أولاد الكلب ..

( يصرخ ف وجههم فتزيد سخريتهم به )

ساييس : أمك اسمها طابيه ..



ساييس : ياسلام سلم .. الطشت بيتكلم ..

سعدون : باتكلم وباضرب كمان .. أنا مش هفيه .. آه ..

ساييس : طب خد .. اعدل لسانك المعوج ..

سعدون : ماتضربش .. قلت لك ..

ساييس : خد .. عشان تعرف تكلم أسياذك ..

سعدون : ياغجر يامجرمين .. الحقنى ياسى اليزل .. كلامك صح .. دى لا يمكن تكون الا خماره .. ودول حماره .. آه .. ضربهم شبه ضرب الحمارين ..

الوالى : ( يدخل الوالى وشحاته ) .. ولد !! .. أمنع الضرب ياولد .. ياغجر يا بقر ازاي تضربوا ضيوفى ياكلاب ..

شحاته : لا تتدخل .. لانه قادر على تشتيت شملهم ..

سعدون : ياسى اليزل دول أحمر من الحمارة .. ملعون أبوها الطوابى .. اذا كانت فيها اهانة كده ..

الوالى : لا ياسعدون .. الطابيه بقت بتاعتك خلاص .. اعتبر نفسك حاكم عليها من دلوقتى .. ده فرمان ..

( يتباهى أمام السياس المنحنون أمام الوالى ) ..

طول الوقت بافكر أنت ستستلم طابيتك منى أنا .. انما أنتم ياغجر .. فحسابى معكم بعدين .. أمشوا .. وأحبسوا أنفسكم فى المطبخ عقاب لتناولكم على سيادة الحاكم .. ياكلاب ..

( يخرجون ) ..

سعدون : المطبخ ؟ .. تسمح لى اتحبس معاهم .. وبعدين نرجع

نسوى أمور الحكم يامولاي .. أنا أصلى ما يخففش من  
مواجعى قد ريحة المطبخ ..

الوالى : أنت دخلت التاريخ .. ولا يمكن لمن يحكم طابيه ان ياكل  
مع السياس !

سعدون : ماتعدهاش أنا حاكم شعبى ..

الوالى : لا تبدأ حكمك بالتنازل .. اصبر فهناك وليمة تليق بالملوك  
فى انتظارك .. أنت صرت منا .. وأكثر .. فأنت الوحيد  
الذى شاهد أمجاد فارسنا الهمام .. أنت الشاهد الحى ..  
الذى رأى كل شىء ..

( جونج )

الحاجب : مولاتى الأميرة ..

( تدخل امرأة محجبة معها وصيفة )

شحاته : شامه؟! .. ( يسرع ويمسك يدها ويركع معتذرا ) ..  
لن اسامح نفسى لانى تركتك وهربت .. وعطيت الساحر  
الشرير الفرصة يعمل عملته الدنيئة ..

( الوالى يخفى ضحكاته وتكشف الزوجة عن خمارها ..  
ويضحكان ) ماكنتش متصور انه شوه جمالك لهذه الدرجة  
البشعة ..

( الوالى يفاجأ .. وتحس الزوجة بالاهانة ) بالدناءة مافعل  
.. لقد حول انفك الى منقار بطه لابد أن يعاقب على هذه  
الجريمة ..

الوصيفة : يا أعمى القلب دى مولاتى زوجة الوالى ..

سعدون : ضاعت الطابيه ..

شحاته : اذن فانه لم يكتف بتشويهاها .. وانما لوثها .. وزوجها  
من غيرى ..

( الزوجة تصرخ ويغمى عليها ) ..

الوصيفة : ده مش مجنون وبس .. ده حمار كمان ..

الوالى : انك تخطىء كثيرا يا فارس الفرسان ..

هذه زوجتى .. ألا تستطيع أن تفرق بين حبيبك وحببية  
غيرك ..

سعدون : آه .. المسألة اتعقدت ..

شحاته : اذن فهو لم يكتف بتشويهه حبيبتي فقط .. بل شوه زوجتك  
الى هذه الصورة البشعة ..

سعدون : كحلها قام عماها ..

الوالى : مش عارف ان كان فيه باقى ف مخك ذرة واحدة من فهم ؟

شحاته : لك حق .. أحس بالتعب منذ دخلت الى هنا سأخرج لأشم  
قليلا من الهواء النقى .. المكان ده مليان هوا فاسد وملوث ..

الوالى : حاول تفرغ الهواء الفاسد اللى جوه نافوخك ..

سعدون : خدنى معاك .. ياسى اليزل .. ماتسبنيش وحدى هنا ..

( يخرج شحاته والوالى يعترض سعدون ) ..

الوالى : دعه يا صديقى سنبقى هنا لنتحدث فى شئون الحكم ..  
سنتكلم كحكام نفهم حقيقة تخاريف صاحبنا اللى مش حاكم  
.. ايه اللى حصل ؟ ..

سعدون : ما حصلش أى حاجة .. على الأقل أنا ما عملتش أى حاجه  
وحياة دقنك ..

الوالى : ماتخافش أنا عارف انك ماعملتش حاجة ، أنت غلبانة ،  
هو اللي غواك وضحك عليك ..

سعدون : ضحك على وغوانى ؟ ..

الوالى : طبعا .. أنت فلاح لا لك فى الطور ولا فى الطحين .. ايه  
رأيك ؟ ..

سعدون : أنا رأى أن الست بتاعة سيادتك أجمل أميرة فى الدنيا ..  
وعلى الأقل أجمل وأحلى من مراتى ..

( تكون الزوجة قد أفاقت .. ) يا صلاة النبى .. أيه ..

الوالى : ياسعدون زوجتنا تحب الفلاحين .. وعلى فكرة هى  
صاحبة الطابية اللي حتحكما ..

سعدون : الله ! ...

الوالى : طبعا .. بس عايزه منك تحكى لها عن أعمال صاحبك  
المجنونة احكى من البداية ازاي فاتحك فى الموضوع .. ومين  
شركاته ؟ .. ومين اللي ساعده فى تهريب المساجين .. واللى  
ساعده على الهرب مين ؟ .. وكده احكى .. احكى لها ..

سعدون : أنا مابحكيش عنه .. الناس هى اللي بتحكى ..

الزوجة : وأنت .. لسانك مقطوع .. مش كنت معاه طول الوقت  
وشفت كل حاجة ..

سعدون : أنا ماقدرش أقول عنه أى حاجة .. عشان أنا ما بحبش  
الكذب ..

الوالى : حنعتبرك شريكه ف كل جريمه ...

( ثم يتدارك غضبه )

أنا أقصد بما انك شريكه في بطولاته .. احكى عن خطته دانته  
الشاهد والراوى اللى حيخلد ذكره في التاريخ ..

سعدون : التاريخ ؟ .. تصدقونى لو قلت لكم .. ان حمارى بي فهم  
في التاريخ اكثر منى .. التاريخ كتابه .. وأنا أجهل من  
القول الحراتى ..

الزوجة : لكن لك لسان فانطق ..

سعدون : أقول ايه ؟ ..

الزوجة : اللى شفته .. من أعماله .. !

سعدون : أعماله بتتكلم عن نفسها .. ومش محتاجة دهل زى  
يحكيها أنا لا شاعر ولا مداح ..

الوالى : مش وعدك يعطيك طابيه ؟

سعدون : أيوه .. لكن ..

الوالى : من غير لكن ..

كان ناوى يستولى على الطوابى العثمانية ويفرقها عليكم ..  
مش كده ؟ ..

سعدون : ياعم لا .. دى لى أنا بس

الوالى : طب فين الجيوش بتاعته ؟ ..

سعدون : جيوش .. أنت بتصدق ؟ .. ده وعدنى .. وأنا صدقته  
عشان هو راجل بيقرأ ويكتب وأنا جاهل .. زى ما أنت  
وعدتنى واجب على أصدقك ..

الزوجة : وأنت ما عندكش عقل تميز ؟ .. بتصدق كل اللى يتقال  
لك ؟ ..

سعدون : وما أصدقش ليه يامولاتى .. انتم ناس أكابر .. ومتعلمين  
وعيب على واحد فلاح زى ما يصدقش أكابره ..



الوالى : اسمع يا تغلب أنت يامكار .. بطل لف ودوران ح اسلخ  
جلدك ازاي صدقته وأنت شايفه بيحارب الهوا .. وبيقاتل  
الحجارة ع الطريق ..

سعدون : لأنه مش ممكن يحارب ويقاقل وهو قاعد فى بيته زى  
السلطانية ..

الزوجة : ده فلاح قليل الأدب ولازم يتأدب ..

الوالى : ( متماسكا يصدها ) واجبك أنك توضح لاهلك الفلاحين  
المساكين أنه بيشوف اشباح .. وان اللى حكوه عنه كذب ف  
كذب .. واللى سمعوه عنه أكذب وأكذب ..

سعدون : واذا كانوا سمعوا كذب همه ذنبهم ايه فى دنيا كلها كذب  
ف كذب .. داحنا غلابة قوى يابيه ..

الوالى : والغلابة لما يخذعوا ف واحد زيه مش حرام .. ذنبهم فى  
رقبتك ..

سعدون : ربنا غفار الذنوب ..

الوالى : احنا مش عايزين الناس يتمسخروا عليه .. ساعدنا نوضح  
لهم الحقيقة .. عشان صورته ماتبقاش مشوهه فى التاريخ ..  
وعشان مايقولوش ان فارس فوارسهم مجنون أو مهفوف ..

سعدون : اذا كانت فى الدنيا ناس دون وأشرار مالهمش شغلة الا  
السخرية من خاق الله .. فسنى اليزل حيقضى عليهم فى يوم  
من الأيام ..

الوالى : وأنت طبعا ايده اليمين ..

سعدون : أنا معاه ع الحلوة والمره .. هو الوش وأنا القفا ..  
خرجنا مع بعض وحنرجع مع بعض ..

الزوجة : أو حتموتوا مع بعض ..

سعدون : الآجال بيد الله ..

الوالى : وتضيع حياتك من غير ماتعمل حاجة ؟

سعدون : عملنا اللى قدرنا عليه ( يتحسس مابه من آثار ضرب )

الوالى : آه .. عملتوا ايه ؟

سعدون : حاجات بسيطة خلينا بنت مسكينة تحلم بحياة شريفة ..

وخلينا راجل نصاب يبطل غش ؟ وريحنا حبة مساكين من

السخرة ؟ ترقيع يامولاي .. حقة عدل هنا بسمة أمل هنا ..

حاولنا نرقع وش عالم مايستحقش غير الحرق ..

الوالى : وهربتم المساجين عشان يساعدوكم فى حرق العالم .. مش

كده ؟

سعدون : افكرهم مظلومين فخلصهم ..

الوالى : أهه .. اعترفت انه اعتدى على الشرائع .. وأنت كنت

معاه ..

سعدون : ماتظلمنيش يامولاي .. دانا غلبان ..

الوالى : ( يعاود المكر به ) أنا اظلمك ياسعدون .. معقول .. دانا

حبيبتك من أول ماشفتك .. احنا أصحاب وزمايل .. ولما تبقى

حاكم حتيجى تزورنى .. وأنا أزوح أزورك .. تشاركنى فى

تجارتى وأنا اشاركك أفراحك .. حكام بقى ؟ وبالعكس

حتكون أنت حاكم من نوع فريد .. فلاح مصرى بيحكم طابيه

عثمانية مجد لازم تقدم الدليل على استحقاقك ليه حتبقى مسئول

قدام السلطان عن الرعية وعن النظام .. المجنون ده هو عييك

الوحيد .. علاقتك بيه بتشوه صورتك .. أقول للسلطان

وهبته أكبر طابيه في ممتلكاتك ياسـلطان وهو بيكذب ..  
ويخبي عليك؟! لازم أقول له انك معنا .. وانك راجلنا اللي  
حيكشف المجنون ده اللي عامل فارس!!  
( سعدون ينفجر في البكاء )

**سعدون :** ياخسارة يامولاي .. بتتكلم زي السياس بتوعك مع انهم  
تربية الأصطبل .. وأنت سيدهم .. تصور كانوا عايزيني  
أقول عن صاحبي انه مجنون .. ازاي انطقها يامولاي ..  
ازاي افترى عليه وأنا كلت عيش وملح معاه .. وشاركني  
في أحلامه .. أعطاني أعظم حلم فيها .. خلاني لأول مرة  
أحس أن أنا مش دوده .. ( يضحكان غضبا ) .. ودي حاجه  
بيتهيال ما تضحكش ممكن تضحكوا مننا عشان بنحلم في عالم  
ما بيقبلش الاحلام .. عالم عينه فارغة .. ما يملهاش الا  
التراب .. لكن سى اليزل .. خلاني أحلم احلام حقيقية ..  
ممكن البنى آدم منا يمسكها بايديه .. لو كان أقوى شوية ..  
أو كان أشرف شوية أو أنكى بعضشى ..

**الزوجة :** ده حمار ومهفوف زيه .

**سعدون :** ماتشتميش الحمير يامولاتي .. أنا كان لى حمار بيفرق  
من أول نظرة .. بين الحشايش اللي تتاكل .. والشوك السام  
.. حمار أصيل لكن حتفهموا ازاي في الحمير .. ؟ .. الا  
اذا فهمتم اننى فاهم أنكم مش حتدونى الطابيه الا اذا بقيت  
.. كلب ..

**الوالى :** أيها الناكر الجميل .. سأسلخ جلدك ! ..

( يدخل شحاته فيتظاهر الوالى بالهدوء ويرحب به )

**شحاته :** أنا حاسس ان روحى بقت أصفى من ضوء القمر وأكد ح  
أقدر أشوف كل شىء على حقيقته مهما أتخفى في صورة

مخادعة ياسعدون .. بتعيط ليه ؟ مين هنا اتجراً على تبديد  
دموعك الغالية ؟ .. خايف على .. ماتخافش ياسعدون ؟  
.. أنا مش ح أموت الا بعد عمر طويل .. الفارس مابيموتش  
قبل التابع مش كده ياسعدون ..

سعدون : أنا مش بعيط .. ( اهيه ) لكن أنا بأدعى ربنا يحقق  
أحلامك وينجيك من شر السحرة والناس الدون اللى يكرهو  
لك الخير ..

شحاته : ممكن أكون أضعف من أنى أنازلهم كلهم .. لكن ح أحاول  
ياسعدون .. وح أكون أقوى وأقدر على مواجهتهم .. مادمت  
أنت معايا ..

سعدون : أنا دوده .. يادوب أنا دوده ..

شحاته : لا .. لا ياسعدون لا .. بعد كل المعاناة والألم مش ممكن  
الانسان يفضل دوده .. مع بعض حنواجه كل أشرار الدنيا  
.. وحتحكم طابيتك اللى تستحقها ..

سعدون : ماعدتش عايزها .. خلاص ..

شحاته : اهدا .. أنا مش خايف مادمت أنت معايا .. فماتخافش  
وأنا معاك .. قدامنا لسه كثير .. وفر دموعك ..

أيها الأمير .. أنا الآن على استعداد لمواجهة شر الدنيا كله  
لانقاذ حبيبتى .. فأين سجنها الساحر ؟ ..

الوالى : مش عارف .. خطفها وخلاص .. وهربوا لما عرف  
بوصولك ..

شحاته : وراح فين ؟ ..

الوالى : راح لمملكته المسحورة ..

شحاته : وفين مملكته المسحورة .. ؟ لازم اللي زيك يعرف مكانها .

الوالى : بعد السبع بحور والسبع جبال .. فى النجوم ..

شحاته : فى النجوم !؟

الوالى : طبعا .. مش كل ساحر عايش فى نجم .. ماتعرفش

تنجيم !؟

شحاته : شفت ياسعدون ..

فى الوقت اللي افكرت فيه أن أنا وصلنا لقلعة أمير نبيل قلت

لك اننا وصلنا خماره حقيرة .. بص .. بيحاول خداعى وف

وقت الجد .. يهزل ويقول نكت سخيفة ..

الوالى : اخرس .. واعترف بعجزك وتخاريفك ان كنت مش قادر

توصل لمملكته فأنت أعجز من أن تكون فارس ..

شحاته : أنا أقدر أشق البحر وأهد الجبل .. لكن النجوم . يمكن

فى يوم من الأيام .. يوصل لها غيرى .. لكن أنا لا .. دلوقتى

أنا متأكد أن حقيقة الانسان هى ادراكه لحقيقة قدراته ..

وحدودها ..

الوالى : برافو .. وعرفت دلوقتى انك مجرد كراكون مضحك ..

ماعملش أى حاجة ولا حيعمل ؟ .. أيها المهرج التافه ..

صفقوا له .. فقد اتقن دوره ولا أعظم مضحك فى الشوارع !

شحاته : ( ضاحكا ) شفت ياسعدون .. فعلا وصلنا لقصر الساحر

لا يمكن أن يكون الساحر إلا على هذه الصورة القميئة ..

الوالى : أخرس أيها التافه البهلوان الحقير .. الكذاب ..

شحاته : ( يلاقيه بسيفه فبرعبه ) أنا سمحت لك تضحك بمافيه الكفاية

لكنى مش ح اسمح لك باهانتي أيها الوالى المتخفى فى ثوب

الساحر أو الساحر المستتر فى هيئة والى .



أيا ماكنت .. أشهر سيفك .. وقاتل ..

الوالى : أيها المهرج الاونطجى أركع وأطلب الصفح والغفران على كل ما قلته وما فعلته واسترحمنا لنسمح لك باختيار الخازوق الذى ستعدم به .. أيها الحارس ..

شحاته : لن يسمعك أحد منهم فقد أغلقت عليهم أبواب المطبخ ..  
فهي للمبارزة لو كانت لديك ذرة من الشرف ..

( يتجمع الجوق حولهما أو يظهر فى مدى البصر ويحرضونه بصوت هامس يتصاعد ببطء أن يقتله ) ..

شحاته : أستطيع أن أذبك كالشاه ولكنى لست مخادعا مثلك ..  
فان كانت لديك ذرة من نباله .. فلتبارزنى كالفرسان ..  
( الجوق مستمر فى تحريضه ) لن أخون مبادئى .. فأشهر سيفك قاتل بشرف ..

الجوق : اقتله .. فرصتك الآن .. بعد الآن يكون الوقت أتأخر ..  
شحاته : لا .. أنا لست سفاحا .. اننى فارس .. أعطيك الفرصة لتكون نبىلا للحظة واحدة فى حياتك .. قاتل بشرف ..

( يستدير ليعد خطوات المسافة بعد أن يلقي اليه بسيف )  
( الارجوز يضحك ضحكة أقرب للبكاء ) ..

شحاته : ( متوترا بعض الشيء ) هيا ودافع عن نفسك أمام الجميع ..  
( الوالى يلقي السيف ويشهر خنجره ويسرع فيطعنه ..  
يسقط شحاته فى بظء ويتماسك )

الفتاة : ( صارخة ) سدى اليزل .. ( فى ملابسها العادية الأولى )

شحاته : وصلت فى الوقت المناسب .. سامحيني لاننى تركتك ورحلت ..  
ماعرفتش سكتى كويس .. الشر طمس على عيونى ..  
زى ما طمس على عيونكم .. لكن أنا حاولت انى أصنع حلم

بسيط ٠٠ لى ٠٠ ولكم ٠٠ وأحياناً يبقى الحلم أقرب من حبل  
الوريد ٠٠

سعدون : ماكانش حقه تسبب له فرصة يغدر بيك ٠٠

شحاته : وده كان حيغير ايه ياسعدون ؟ ٠٠ دول كتير ٠٠ كتير  
قوى ٠٠ أكثر مما كنت أتصور ٠٠ المهم ياسعدون تساعدنى  
علشان اكتشفهم الرحلة أطول من خطاوى الواحد منا لوحد  
٠٠ وأصعب من جهد فارس واحد ٠٠ لكن أنا مشيتها على قد  
ماقدرت ٠٠

سعدون : ماتسيبنيش ٠٠ وتموت ٠٠ أنت وعدت أنك ماتموتش قبلى

الفتاة : أنت الأمل الوحيد ٠٠ تعمل ايه من غيرك ! ٠٠

شحاته : لا ٠٠ ماتصدقوش ٠٠ لو كان الأمل الباقي ، فارس وحيد،  
حتى ولو كان سيف بن ذى يزن نفسه ٠٠ يبقى أمل ناقص  
وحلم عمره ما ح يتحقق ٠٠

( الفتاة تنفجر باكياً - الجوق الذى أصبح الآن يخفيه  
هو والبنت وسعدون بطرق فى حزن ٠٠ الراوى يتأمل  
الأراجوز فى يده ٠٠ يلقي به على الأرض ٠٠ يظهر سعدون  
حاملاً سيف شحاته وهو يمسح دموعه ٠٠ البنت تتعلق  
وتتأمل على رئيس الجوق الذى يتقدم ) :

وبكده ياسأده ٠٠

يامنورين السهره وزياده ٠٠

انتهت سيرة فارسنا المنصورى ٠٠ شحاته البشجورى على  
غير ماجرت به سير الفرسان وان كنت أظن أنها كلها تنتهى  
هكذا فى العادة ٠٠

- احنا ياما قرينا وانتم ياما سمعتم ..  
 وان كنا قصرنا ..  
 فلانه الألم عصرنا ..  
 لكن في سلك الفن ما اتحسرننا ..  
 طول مانفس مصر - مهما نشت ونغرب - يمصرنا .. !!  
 ( والكل يغنى )  
 - وتظل الناس - تحلم وتعيش وتعيش تحلم - تحزن تفرح -  
 تضحك تبكى ..  
 - ترضى وتشكى وهيه بتحلم ..  
 - وعلى الانفاس يركب انجاس ..  
 - مملوك صعلوك - فرعون تركى ..  
 - وشاهات وملوك - ودوسيه سركى ..  
 - بيدوسوا بقسوة حلم الناس - والناس بتعيش عاشان  
 تحلم ..  
 - والدنيا تسير ع الحلم تعيش ..  
 - ونعيد ونزيد نحكى ونعيد ..  
 - فى سلك أبو زيد - نحلم ونطير ويا الاساطير ..  
 - عاشان نخرج من قعر البير ..  
 = الشمس لا تنسانا المواعيد .. - ونعيد ونزيد نحلم ونعيد ..  
 - لكن يلزم للحلم أكيد  
 - .. يلزم تفسير  
 - يافراخ الطير يلزم لك ريش !  
 - اضاءة -

## سيرة شحاته سى اليزل ( سعدون )

- قدمتها الفرقة النموذجية للثقافة الجماهيرية عام ١٩٨٠  
اخراج : عباس أحمد
- قدمتها فرقة دمياط المسرحية عام ١٩٨٠  
اخراج : حافظ أحمد حافظ
- قدمتها فرقة بنها المسرحية عام ١٩٨٣  
اخراج : ماهر عبد الحميد
- طبعت الطبعة الأولى بدمشق عام ١٩٨٢ ضمن مطبوعات  
وزارة الثقافة . . .

# الليلة فنظرية

سهرة من تراث المسخرة الشعبية



## حيص بيص والبحث في الهجيص

● منذ أن حدا الحادى قافلة مسرحنا - تحركت القافلة لتشرق وتغرب وتنحدف فى شعاب اليسار واليمين والغث والتمين . وضربت فى بواى التقريب والتغريب والترغيب والترهيب والتحديث والتجريب والاسقاط والاستطراد والتسطيح والتفصيح والترويح والتباريح والاستلهام والاستعلام والكشف والتنوير والتطهير والتطوير . . . والخ وتملحم ( أدهم ) حتى صار بريشتيا . . .

وتفرهد ( بعجر ) حتى أصبح وجوديا . . .

ورمز غطاء الحلة للمقدر الفولاندى والكانون للثورة . . . ورمز الفجل لمصر . . . ودار صراع جدلى بين الملعقة وقعر الكوب اذ أن الجدل الدائر بينهما أذاب فوارق طبقات السكر ( ولا تنسى الرمز الجنسى الفاضح والواضح ) ونسينا فى غمرة توهان القافلة أنه من حق البسطاء الظرفاء أن يكون لهم مسرحا كما لأرباب الحرف والترف وأصحاب التحف والنجف مسرحا كما كان للمثقفين يوما - مسرحا . . .

ومن هنا كانت هذه ( الليلة الفنطزية ) مسخرة شعبية ندعو اليها هؤلاء وهؤلاء ليشاركونا البهجة والضحكة والأزمة انها حالة من حالات دعم المتعة الفنية وتوصيل الدعم لمستحقه . . .

حيص بيص العصفورى

## الجوق المطلوب للتشخيص المكتوب

- **حيصن بيصن**
- **نص نص**
- ممثلان من تراث المسخرة الشعبية
- **زقمانه : زوجة حيصن بيصن**
- **حشنيش : أو حسنين سابقا ، حشاش قرارى لكنه يلعب دور النكدى عند اللزوم**
- **زعرى وزقرد ونطاط الحيط**
- **شرم وبرم**
- **حناطه وعباطه وزعيط ومعيط**
- خلاصة من الفنانين القادرين يغنون ويرقصون ويفعلون السبعة وتمتها .. لو فلت الحبل ..

## الشخصيات المشخصة بلا حشوة

- عمدة وفلاحين وأهل قرية بعبلهم .
  - معلم قهوه وجرسونها وزبائنها الكرام .
  - سلطان وسلطانة وحاشية طبعا من أول كبير أمناء الخزنة الى شيخ عموم غفر البلاد .. وطبعا جلاد ..
  - صعيدى فلح كلح يصبح وزيرا فى خبطة حظ ..
  - بصاصين ومخبرين ومنادى وبائعين وبائعات ..
- والأمر مايسلمش ، يلزم أحيانا ديكور واكسسوارات وميزانسين والهان وربما يلزم مخرج غير حيص بيص لزوم المعاصرة !
- الجماعة من بقايا الارتجالين والمشخصاتية يعكسون مانعرفه عنهم من معلومات مهوشة فى الملابس وطرق الاداء .. انهم غرقى يطلقون صيحة استغاثة .. هباء .. لأنهم يعرفون أن نجاتهم لا تتوقف عليهم وحدهم ، فالبحر والرياح والعصر ضدهم ، فقد جاء بقيمه وفنونه وجمهوره وهم لا يحتجون على انقراضهم وان تفاخروا بماض غامض واستدفتوا بوهج ( فن جنونى ) ( وجنون فنى ) حفظهم حتى قدر لهم ان يشهدوا فاجعة انقراض بساطتهم المعجزة وانسانيتهم السانجة .. وذكائهم الفطرى الماكر .. وقدرتهم على الضحك والاضحاك حتى على مأساتهم هم والتي تجعلهم قادرين على الفرح بالحياة والابتهاج بممارسة اللعبة حتى اللحظة الأخيرة !

## التقديمية

● على بروجى شعبى أو هيصة نحاسية يدخلون ويتجمعون  
فى خطوات هازته هازله وفى ملابس ملفقة من تراث الصعلكة فى  
الحوارى والكفور ..

.. يتلون بيانهم الأخير جماعيا وفرديا

الجوق : ليلتنا فنطزية ..

ضحكه ماهيش اذيه ..

وفرحة مش رزيه

سمع .. يا حاضرين .. للفنانين المنقرضين ..

اللى راحت عليهم .. لكن مش معترضين ..

.....

احنا اللى راحت علينا زى سوارس يابيه

بعد ما صارت القهوه كافيتيريا

والجرن صبح كباريه

والفن صار تطجين

وبعد ما صبح الفنان اسطى ..

على كل لون يا باتصطه-

والتليفزيون اتلون واشتغل من غير مفتاح

والهشك بشك ع الموضه تول الفلاح ..  
واتلف السوليفان ع القشطه ..  
والعتبه صبحت ميلامين ..

**تليفزيون :** ( ياتجيب لى شاكلاته يامنيش لاعبه  
وخذنى فى الطياره ازور الكاعبه )

● احنا بتوع فن الكانى والمانى ودكان الزلبانى ..  
بتوع فن كان يامكان فى كل زمان ومكان ..  
فن الادبائيه الشخصياتيه الكلمانجيه والاراجوز  
فن الحكاواتيه الهالليه الزنانائيه ..  
.. وفرقع لوز ...

بتوع ياليل وياعين .. ويا آه ..  
كالميميرا كالسبيرا كوم سى كوم ساه  
احنا اللى رطنا باللاوندى للاوندى ..  
وبالرومى للرومى  
وبالتركى للعثمانلى ..  
احنا اللى قلنا الكلام دوغرى بما معناه ..  
كدنا الممالك  
ممالك سلطنه وولاه ...

**مغنى :** علشان مراكبك تعدى لبكره يابلدنا  
ويخف حمل الليالى عليكو يا اولادنا  
والغمة تنزاح عن الأمه وتلقى صباح  
لا يتسرق مننا الصندوق ولا المفتاح



ويلاقي كل اللي زي حالتكو وحالتنا

سند ومعين ..

● احنا اللي قلنا الكلام واحنا ندور ونلف

علشان تخف الحمول

والليل بنوركو يخف ..

الدنيا دي علمتنا .. لو يكون فيه خيط

أوعى تشده لمنتهاه .. وتحف

لينقطع بك .. ومين راح يغيثك مين ؟ ..

● احنا اللي دوخنا أتألمنا ..

وفهمنا الفوله لما تعلمنا :

- من التعالب الدحلبه

- ومن الحناش السحلبه

- ومن القرود الشقلبه

- ومن النيران السهلبيه ومن الكرابيج اللهبه

ومن الرياح الدرديه ..

ومن الفقير مد البساط الاحمدى ع المصطبه ..

ومن الحمير قوة الاحتمال ..

- ونجوع ولا نعد الايديين ..

احنا الفنانين المنقرضين ..

● مانحبش الفرع هبهبه .. ولا الحزن مندبه ..

ولا الخناق عبعبه

● احنا اللي طالعين من الطين .. ومن التاريخ جايين

- وعارفين ان الزمن سابقنا  
والوقت سارقنا  
والموت ملاحقنا  
واننا ضايعين ضايعين ..  
وسط الفن الهجين والفن السجين  
اللى فارش على العقول الغيامه  
- وحاطط ع اللسان والعقل ميت كاماه ..  
- وسابق الأيامه ..  
- ومخبى برانيطه تحت العمامه  
- وقاصد ان العصر الاتى ..  
بموجه العاتى يفرقنا ..  
من بعد مايقطع حبال الجغرافيا والتاريخ ويغرقنا ..  
● ولذلك نعلن نحن .. نحن .. الفنانين ..  
المنقرضين ..  
- نعلن باسم فننا المنقرض الهالك  
المجتهد اللى مش متهاك ..  
واللى مهما لفت به السكك واتلعبكت به المسالك ..  
أصيل المدارك ..  
- فننا .. اللى رسم حدوده جدنا ابن دانيال  
وعمنا ابن عروس  
وتاج راسنا ابن النديم .. وأنا ..  
حيص بيص ..  
- فننا اللى خط خطوطه أبو فرقله ..

- وانا .. نطاط الحيط ..
- واللى زبط زعبوطه جحا وابو النواس ..
- ومعيط .. انا ..
- وزعيط .. انا ..
- وبرم طرطوره شكوكو .. وانا ..
- شرم .. برم .. وانا ..
- نص نيص ..
- نعلن باسم هذا الفن المنقرض العظيم ..
- وبلسان فصيح وصريح ..
- ونسجل هذا التصريح بكل وعى سليم وبعقل حكيم

#### ● بكره ابن النهارده

- والنهارده ابن امبارح
- والزمن آتى .. ورايح
- ولكل وقت اذان
- ولكل زرع اوان ..
- واللسان حصان ..
- ولذلك فالفن العظيم يفضل حكمه لكل اوان
- ومتعه في كل زمان ومكان
- ومن هنا ..
- من قلب القاهرة العامرة الطاهره ..
- اللى شهدت وشاهدت تفانين جدودنا العظام
- نقدم هذه الحفلة الساهرة

- وبنفترض ..

احنا يابتوع الفن المنقرض ..

انها حتصحى فى قلوبكم منابع الذاكره

للفن البكر ..

اللى مش حكر على الكاسكيتيه

ولا ع البرانيط

- الفن الجميل البسيط

اللى مش عويل ولا عبيط

واللى يقدر يسحركم ويمتعمكم وهو لابس اللبده

والزعابيط ..

حيص بيص : ويلا للا يانص نيص .. يانوارتنا ..

دق الطرمبيط ..

وخليك واد حويط

زمر وخبى دقنك ..

وبالهداوه .. لا يطق لك عرقى .. ويطلع آخر الزمر طيط ..

( نصيص بيبدأ الملاغية فى الوقت الذى يستعد الجوق لمشهد

القرية )

نص نيص : ليلتنا فنطزيه .. وفنطزيه من الفنطزه ودى معناها

القلب الداى والجيب الخالى ..

وهيه عكس العنطزه ..

العنطزه قلاطه والفنطزه بساطه

الخواجات بتوع بلاد الخواجات يقولوا على

الفتنزه - فنتزه - مايصه .. ومعناها  
السرحة بالعالم وخيالات الهلبمبم  
واضربك بونيه تخش الحيط  
وأرقصك ع الحيط وأغرقك في الهجايس ..  
لا .. والف كلا ..  
الفتنزه جدعنه ومجدعه .. آه  
معاك قرش فنتز بيه على أول صاحب يقابلك  
أو فنتز بيه علينا يابيه ..  
اوعى تخبيه بخل .. أو تنكره عواله ..  
لانه ان مكانش معاك .. حط ايدك على  
كتفنا وتعالى نسرحة مع بعض .. نشحت سوا ..  
عشاننا عليك يارب ..

**حيص بيص :** ( معترضاً يسرع رافضاً سكة الابتزاز والشحاحه )

لا شهرتنا الليلة بلوشى .. للى معاه وللى مامعاهوشى ..  
للناس البلسم اللى ريحها يشفى الكرب ويفرج عن القلوب ..  
وللناس العلقم .. اللى بتمرر الريق والمطرح ..  
لكنا مابيهمناش .. نفعتونا والا مانفعتوناش ..  
المهم سهرتنا ماتروحش فى الطناش ..

**مغنى :** وياقلب صافى وصادق النيه

ريش حمامك افتح البنيه  
واخضع لحكم الفن والغيه  
تصبح ليلتنا انس للمتانس ..

وفنطزيه تلم فرط المجالس ..  
تفضح المتواكس والمتوالس  
وتفك أسر المحابس  
دى الأرض نشفت .. طالبه الميه !?  
.....

حيص بيص : ويحلا بينا الكلام ..  
( يبادله الكلام وهو يستعد للتشخيص ولعب دور العمدة )  
خش ع الكفر اللى مايتسماش اللى سماه ..  
نص نيص : بس حسك عينك أنت وياه ..  
تزود ع اللى شفناه وسمعناه ..  
اصل يا ابنى أنت وياه .. ابن آدم مننا ..  
ان ما اتمسكش من لسانه .. ح يتعلق من قفاه !!

\* \* \*



## كفر حماقه

- عمدة كفر حماقه وبعض أمهاتها ٠٠ تتخلق المشاهير من بعضها  
( البعض ، لا حدود بينها وكل اللعب على المكشوف )
- النكدي : والعمل يا حضرة العمدة ؟ ٠٠ ده مش كلام ٠٠
- نموت احنا بقى دونا عن بقية البلاد اللي حوالينا ٠٠  
( يتدخل ( نص ) كمخرج وموجه للعبه )
- نص : وله ٠٠ جاك ضربة الدم اللي تعوجك ٠٠ حتمثل
- زى بتوع التلفزيون ٠٠ فلاحينا مش بالألوان يا ابن الرفضى  
خش صح لا خلى ليلتك ابيض واسود ٠٠  
( يعيد القاء الكلام حتى يرضى )
- العمدة : ماتموت يا اخى ٠٠ تخف الذريه وعلى روحك نقبض  
قرشين من بتوع حاجه بلاش كده ٠٠
- ( يضحكون مجاراة أو نفاقا أو رغبة فى شد السلخ على أيهم )  
قال يموت قال ٠٠ تكونشى فاكر أن فسل زيك لما يموت ح  
يعلنوها كارثة قوميه ٠٠ !
- حناظه : والا حيدوا اجازه للمصالح الحكوميه ٠٠
- شرم : لأ ٠٠ دول حيقروا عليه قرآن ومزيكه عسكريه ٠٠

برم : وأنت الصادق حيعملوله جنازه حاره .. والميت كلب ..  
زقرد : تعرفوا يا أولاد .. حيعملوا له تمثال .. تمثال كبير قوى  
ويهروه بالجزم ..

النكدى : انبسطتم ؟ .. ارتاح بالكم ؟ .. لقيتوا اللى تتمقلتوا  
عليه ؟ طيب ؟ .. مقبوله .. لكن انا حيا الله حته فلاح ..  
ان رحمت والا جيت .. لكنها بقى تخيل عليك يا عمده .. أنت  
لما تموت برضه اسمك من سلك الحكام ..

( يضحكون غصبا نفاقا للعمدة )

زقرد : اقلبها غم .. ياباى .. صدق اللى قال ان أبوك كان بيضحك  
.. شكك ..

( تعود الضحكة الصاخبة )

عباطه : عمدتنا مش وش موت .. دى بلدنا أساسها هو وبنوها  
حواليه بيت بيت ..

النكدى : وزريبه زريبه

حناطه : جاك داهيه تغمك ولد وأنت شبه جحشة أبو حشيش

العمدة : سيبوه يطول لسانه ماهى عادته ، ح يشتريها ؟ ..

الله يرحم أمه .. كانت عاملة أبونيه فى البازابورط ..

الابعدية حتبور لو ماجاش القطر ؟ .. أنت ياواد عمرك ركبت  
دراجه ؟ ..

حناطه : عايز القطر عشان يلحق الديوان ..

شرم : ح يعلقه فى الساقية ..

برم : يا جدعان لا : ده عايز يروح بيه البندر يمشى من جنب السور  
النكدى : يا خلق .. فوقوا .. ح تفضلوا لامتى ناسيين انكم منسيين  
من سنين على شط القرن العشرين . هو أنا عامل على  
روحي !؟

العمدة : طول عمرك عاملها على روحك ..

( يعاودون شد السلخ ) ..

عباطه : يا فضيحتى .. وتركب القطر ازاي وأنت كده .. طب صن  
شويه ..

النكدى : أهو ده اللي احنا شاطرين فيه .. لها حق الحكومه طبعاً  
ما يعبروناش فى الصرمه القديمه ؟ ..

مادام الكفر مش عامل لروحه اعتبار ، مين يعبره ؟ ..

عنها المحطه ما اتبنت .. حينوبنى أنا منها ايه ؟ ..

آنى رجلى والقبر .. مش مخلد زى العمدة اللي كلامه خفيف  
على قلبكم ..

كلامى ثقيل عشان فى مصلحتكم .. معلش ..

كل اللي حوالينا حيلحقوا القطر .. يركبوه ويعدوا علينا  
للمستقبل .. وهو يزرط على بلدنا ..

عشان يغيظها اكثر ..

آنى عامل على مستقبل ولادنا ..

العمدة : وهو أنت يا ولد اللي عامل على المستقبل لوحدك ؟ ..

آنا عملت ما لا يعمل ! .. وقابلت فى الموضوع ده من أول

العسكري أبو بريزة .. لحد باشكاتب عموم الخطوط في البر  
والبحر .. أبو بريزة حمرة .. والكل قال ما فيش .. مافيش  
محطه لبلدكم .. مش مصروف محطه لكفركم ..

اعمل ايه بقى يافطين ؟ ..

ؤخره : طب ما نروح لغيرهم ..

حناطه : نشوف مين اللي ف ايده أس الحكايه واساسها ..

حسى لو كان الشهر العقارى ..

حناطه : أو سواق القطر نفسه .. ونشوفه برضه بحاجه !

العمدة : ياخرابى .. صدق اللي سماه كفر حماقه .. ياجاموس  
أبيض افهموا ..

السواق ما هو الا ميكانيكى بيمشى القطر .. لكن الحكومه  
هى اللي فى ايديها توقف وتمشى حسب مواعيد موقوته ! ..

النكدى : وفين كلمتك المسموعه عند الحكومه ؟ .. طول عمرها  
بتسمع منك .. قول لها على حالنا .. قول لها مرة ان  
روحنا متعلقه بشريط القطر .. ياخذنا لبكره .. قول لها ع  
اللى فينا مرة .. ما أنت فاهم كل حاجه هو أنا ح اقول  
لك ..

العمدة : غلبت .. كفر حماقه مش داخله للحكومة ف زور

النكدى : تبلع وراها حاجه ..

تزلط .. ده تاريخ ياعمده وطول عمرها بتبلع ..

العمدة : محشوره المره دى .. كل ورق البلاد اتأشر عليه بالاعتماد  
الا كفر حماقه .. زى المره اللي ما بتخلفش أولاد ..

- حناطه : يعنى ايه ؟ ٠٠ هو احنا اللي واقعين من قعر القفه ٠٠
- العمدة : عشان اسم بلدكو يا حماقه ٠٠
- زغرب : هو احنا اللي كنا اخترنا الاسامى ؟ ٠٠
- زقرد : حتى الحكومة حتمقلت علينا ٠٠ وده نكد ايه ده ؟ ٠٠
- عباطه : وعشان ايه نفضل مضحكه للى يسوى واللى مايسواش ؟
- الفكدى : طبعا ٠٠ اذا كنا احنا بنضحك على نفسنا ٠٠ وبنتمقلت على بعضنا ؟ ٠٠ لهم حق ٠٠
- شرم : احنا وعينا لقينا اسمها كده ٠٠
- يرم : واتولدنا فيها كده ٠٠ حد كان خد رأينا فى شىء ٠٠
- عباطه : يمكن احنا اللي سميناهها ٠٠ ومش فاكرين ٠٠
- حناطه : أو يمكن فاكرين وناكرين ٠٠
- زقرد : الحكومة اللي سميتها ٠٠
- زغرب : أكيد كان لها غرض ٠٠
- زقرد : مؤكد كان لها غرض ٠٠
- العمده : جاك سم بدنك منك له ٠٠ انت ياواد يا أبو دلق ياولد حقتهم الحكومة ان لها غرض وانها سممت البلد ٠٠ غرضك ايه ياوله ؟ ٠٠
- زقرد : ماتضربنيش يا عمده ، تضربني على سهوه ليه ؟
- هو كان أبويا اللي سماها كفر حماقه ٠٠
- العمدة : مايكونش هو ليه ؟ ٠٠ مش هو اللي حبس الديب فى غيط القمح وقال اهى الجسور سده عليه للصبح

شرم : كان نظره على قده

برم : الحلفا كانت عامله زى الجدار ..

العمدة : جتكم نيله حزم .. والباقي جزم .. فضحتونا ..  
قال قطر قال ..

خليكم مرطوطين وامتداريين عن الخلق ببلاويكم ..

النكدى : وعاييزنا نفضل مرطوطين ليه عمده .. ما احنا أهلك واللى  
يرطنا يرطك .. واللى يحط بينا يحطك .. عاييزين محطة القطر  
تنجدنا .. تاخذ ولادنا للدنيا وتاخذنا ..

العمدة : وتاخذكم ليه .. ما ربنا موجود وقادر ..

حناطه : ياخساره .. القطر كان برضه حيطلعنا على وش الدنيا

زعرى : ياللا .. نبقى نتمشى على القضبان

زقرد : أهو ينوبنا م الحب جانب .. عفره ودخان ..

النكدى : يا عمده لازم تعمل حاجه .. ودلوقتى قبل بكره .. بكره  
حيبقى الوقت فات .. العالم بيتكلم عن الذره وحرب الفضاء  
واحنا بنحلم بمحطة قطر؟! دي نيلة ايه دي يا أولاد ..

عباطه : ولو ما اتبنتش المحطه الوقتى .. ولا عمرها حتتبني ..

زقرد : يا عمده يا ما عملت انجازات ..

شرم : افضالك ع البلاد لا تعد ولا تحصي .. تتمها ..

العمدة : عملت .. ياما .. لكن المره دي مش عاييزين عشان اسم  
البلد المنيل ده .. هو موال حنقول ونلت فيه ..

النكدى : يا عمدة قصة الاسم دي تليكيه .. وتمحيكه ..

حناطه : الحكاية فيها ان ..



زقرد : انت سيد مين يقنعهم .. انت فاهم لغوة الحكام ..  
 ( يشخص كأنه يتحدث لموظف ومحاو لا رشوته ) .. ايه ؟  
 والنبي ما أنت قايل لأ .. هه .. داني ماشى لك بلاد ومسافات  
 عشان اطالع بهاء بهويتك ..  
 ومشى حالك تمشى المراكب .. مانت عارف طول عمرها على  
 كده !  
 العمدة : كلامك صح يا ابو شنف .. وأنا يا مارطنت معاهم بلغاهم  
 وكانوا بيدوا فى الكلام .. وياخدوا ..  
 لكن أول ما الورق يبقى ع الامضا .. يروحوا ضاحكين  
 ويقروا اسم البلد وينزلوا سلخ ..  
 اللى يقولك مش بلدكو دى اللى طابور منها وقع فى حفرة ..  
 واللى يقولك .. مش بلدكو دى اللى منها الواد اللى صابه  
 الجفاف فأبوه عصره ..  
 ولما حب يرضعه دق له البيرونه بمسمار فى صدره ..  
 مع ان عمر ما حد عرف ايه البارومه دى ..  
 انت تعرفها يا ولد ؟ ..  
 طب أنت يا ولد ( يردون بلا .. وراء بعضهم ) ..  
 طب انت ؟ ولا انت ؟ ..  
 يبقى أكيد فى بلدنا حد غريب بقى ؟ .. ( يضحكون )  
 زقرد : طب بس بتضربنى ليه على سهوة .. والنبي عمرى ماشفتها  
 .. اتهمونا بقى ..

النكدى : حلو قوى ٠٠ وانتو بقى فرحانين بنكتهم عليكم دى ٠٠  
قولو كمان ٠٠ يمكن نتقدم لقدام لو فشتكم عامت من الضحك  
زيهم ٠٠ هه ٠٠ والا تخفوا من البلهرسيا ٠٠ اضحكوا ٠٠  
الجراب يامافيه نكت ياغاوى ٠٠ مضادات حيويه ضد الهم  
والقهر ٠٠ أقول لك نكته يا أفندى ؟ ٠٠ طب قول أنت ؟ ٠٠  
نكت ؟ ٠٠ مافيش أحلى من الضحك ٠٠ ياراجل ٠٠ فكها هو  
حد بياخذ حاجه معاه فى القبر ٠٠ وحياتنا ومستقبل ولادنا  
٠٠ يروح فى ضحك الافنديه ٠٠ والسلام ٠٠

عباطه : يا حالوه ٠٠ كل النكت دى على بلدنا ٠٠ طب على كده احنا  
وبلدنا مشهورين قوى ٠٠

حناطه : الهى ربنا يحظهم اكثر لحد ما يفتسوا من الضحك ٠٠  
زعراب : يا هناك يافلاح ٠٠ بقيت نكته على لسان أهل البندر  
والافنديه ٠٠

شرم : تيجى يا عمده تأمر نلبس كلنا ( زنز ) ونبقى افنديه ٠٠  
برم : آه ٠٠ عشان ما يلاقوش فلاحين يضحكوا عليهم ٠٠ يموتوا  
من الغم ٠٠

العمدة : وبكده نحل الموضوع ٠٠

برم : ننكد عليهم بدل ما ينكتوا علينا ٠٠

العمدة : فالح زى أمك ٠٠

شرم : طب تعالوا نطلع عليهم نكت ٠٠

العمدة : قول يا ناصح ٠٠ طلع ٠٠

شرم : مره كان فيه واحد افندى جارر جاموسته وطلع اسانسيه  
المجمع ٠٠

( يضحكون ويبتكرون نكاتا شبيهه ولكنها لا تضحك أو غير  
موفقة )

**النكدي :** ياناس احنا مش ضد الضحك .. داحنا عاملين الليله دى  
مخصوص عشان الناس دى تضحك بس مش علينا ..  
يضحكوا الافنديه وينبسطوا بس ما يضحكوش علينا ويهفوا  
المحطه .. ينكتوا زى ما هم عايزين .. بس المحطه تلزمننا  
وتلزم بلدنا .. لانها لو ما اتبنتش حتبقى النكته سـخيفه  
وسئيله .. وضحكه مش مقبوله حقنا فى المحطه مش حيضيع  
عشان همه بيضحكوا وينكتوا علينا .. لاً ..

**دول همه بيضحكوا وينكتوا عشان يضيعوا حقنا فيها ..**  
وده الضحك اللى مش قابلينه ..

**حناطه :** هو ده الكلام اللى مايتعيبش .. !

**العمدة :** ماهو بس لو ماكنش الاسم المقرف ده ؟ ..

**النكدي :** اسم ايه وبتاع ايه يا عمده ؟ .. أنت مصدق .. دى حجه  
.. تفرق ايه كفر حماقه والا كفر ظرافه .. نغير الاسم  
ياسيدى .. بلاش من حماقه ياسيدى .. صحيح .. ان  
الحماقه اعيت من يداويها !

**العمدة :** والنبي بلاش فلسفة .. هيه مصيبه ثقيله وخلص .. سكة  
القطر حتنهب من اراضينا الشىء الفلانى .. ولا حينوبنا غير  
دخانہ وزعيقه ونهيقه ..

وأنا بقى ماعدتش ف امكانى .. عملت اللى ما يعمل وقالوا  
مافيش لبلدكم ولا موقف حمير حتى !!  
يقولوا لك .. معقول ؟ .. محطه قطر تنكتب فى أوراق الحكومه  
وفى الخرايط الرسميه كده .. حماقه ..

طب ولو ترجمناها وسألوا السياحة ٠٠ في بلاد بره ٠٠ نقول  
لهم ايه ؟ ٠٠ كفر الفوليش ٠٠ نيس ٠٠

قال ودى قباحه وشتيمه قال ٠٠

وحنبقى قلة قيمه للبر كله ٠٠

زقرد : وسكت لهم ياعمدة ٠٠

العمدة : أنا ما اسكتش ابدا ٠٠ ! اشتكيت للى فوق ٠٠ ورفعت  
الأمر لفوق اللى فوق ٠٠ مافيش فايده ٠٠ مكتوب عليك ياكفر  
حماقه ٠٠ تموت بالحيا وتكفنا اسامينا ٠٠٠

( جرس تليفون ٠٠ ويجرى الحديث بطريقة كاركاتورية )

العمدة : الون ٠٠ ايوه انا حماقه ٠٠ طب ياسيدى ربنا يضحكك ٠٠  
ويحظك اكثر واكثر ٠٠ هه ؟ ٠٠ لأ دى نكته قديمة ٠٠ ربنا  
يسامحك ؟ ٠٠ ايه ؟ معقول ؟ لأ ؟ مش معقول ؟ ٠٠ لأ ٠٠  
معقول ؟ ٠٠

( يضع السماعة ٠٠ وهو مذهول من الفرحة ) ٠٠

العمدة : زغرطوا يابنات ٠٠ راح يبنوا محطه ٠٠

الجموع : معقول ؟ ٠٠ مش معقول ؟

( العمدة يقود الزفة واثناءها يتحول الى حيص بيص يقود  
الجوقة )

ايه هو اللى مش معقول ٠٠

دالمفتوح أصلا مقفول ٠٠

هيصوا يابنات

- وارقصوا يا اولاد
- راح يبنوا محطه
- وخلص من بكره
- ح يدقوا حديدها
- وبلدنا حماقه
- تزبط مواعيدها
- وف كل خريطه
- فلتحيا حماقه •• حتى بلافرنجي
- وفوليش ياللى أنت
- تنكر يوم عيدها
- نخرج للدنيا •• ونشوف النور
- وعلى المدنيه كفرنا حيفوت
- بمكن ومداين •• توت توت
- سينمات وجناين •• توت توت
- كازونات الابنده •• توت توت
- بوتيكات ولوكانده •• توت توت
- اصحى واتحرك •• يا هلفوت
- ع الفقر ودقه •• بالنبوت
- توت توت

( وتدور الزفة التي تصبح زيمة صبيانة تعكس احلاما سانجة  
وبدائية عن معنى المحطة الجديدة الى المدينة ) !



## زقمانه

زقمانه تمسك بخناق زوجها فينفرط العقد وتسكن الزيتة )

زقمانه : حيص بيص يا منيل داير تتصرمح مع العيال ؟

حيص : كل الشنبات دي وتقولى عيال

زقمانه : عاملين دوشه على ايه ؟

حيص : ع المحطة ..

زقمانه : شى الله يامحطة .. شبعنا كلام

حيص : لأ يا زقمانه خلاص .. المره دي دقوا الحديد ورسـموا

الخرائط .. توت توت ..

زقمانه : تعالى هنا .. النهارده سوق البندر

مش تلم صبيانك ويالاعشان تسعى على رزقك ..

حيص : النهارده ( فكنص ) .. خلاص من هنا ورايح مش رايح ..

فننا حيبقى لأهل كفرنا ..

زقمانه : وناكل منين ياروح أمك .. حيلة أهل بلدكم ايه ؟ ..

كلهم عارفين ملاعيبك .. زى ما أنا عارفه عيبك !

حيص : عيبى ؟ .. عيبى جيبى وده مش مهم فى ميزان الرجاله !!

مادام الفنان قلبه دافى وعينه مليانه .. يلزم بعد كده ايه

للانسان يا وليه يا .. ماديه !



زقمانه : يلزم له ياكل .. حتى لو كان مشخصاتى زيك بتلاته مليم  
 مادام له بيت يلزم له مونه لبيته .. والمونه مؤونه .. والمؤونه  
 مش معونة ! .. ولا تحت البلاطة مدفونة .. !! ..  
 حيص : ( يفاجأ بكلامها فينزعج ) بلاطة ؟ .. بلاطة ايه ؟ ..  
 ( لنفسه ) ايه اللي عرفها باللى تحت البلاطة ؟ .. ( لها )  
 يكون فى علمك مافيش أى حاجة تحت البلاطة !  
 زقمانه : مالك ؟ .. اتلخبطت كده ليه يا عكر .. فيه ايه تحت  
 البلاطة ؟ ..  
 حيص : طبعا مافيش حاجة .. هو أنا حيلتى ايه عشان اشيله تحت  
 البلاطة ؟ ..  
 زقمانه : الفلاس ! طول عمرك محوش الفلاس .. وجاى دلوقتى  
 تتصرمح وتزمر بلوشى وحتضيع السوق ..  
 حيص : ياوليه البلد فى عيد وحتشخصن لهم ونهيص لحد البابور  
 مايشرف ..  
 زقمانه : وحنقبض ايه ؟ .. حيدولك قطر عمله مرجيحه ..  
 والا ح يعينوك سمافور ..  
 حيص : ياوليه عيب تهزأينى قدام الناس اللي جايه للفرجة مش  
 للنكد ..  
 زقمانه : يافرحتى ، قبضنا وصرفنا .. كله بيتفرج بلوشى ..  
 حيص : عيب .. احنا فنانيين .. مش بنشحت .. بلاش احراج  
 ليزعلوا ..  
 زقمانه : اللي يزعل يتوكل .. واللى ينفعنا أهلا بيه .. ولد يا زعرب  
 يا زقرد .. ياشرم .. يابررم ..

انزل ياواد منك له ٠٠ الافندى عازمهم ( ببونات ) ٠٠ عشان  
يتفرجوا أونطه ٠٠ لفوا عليهم يا اولاد وودفعوهم ماتفوتوش  
حد ٠٠

حيص : عيب ياوليه ٠٠ الفن خدمه انسانية ٠٠ زى الميه والهوا ٠٠  
حنبيع الضحكه ؟ ٠٠ حد بيبيع الشمس والا النسمة الحلوه ؟  
٠٠ الفن مش للبيع ٠٠

زقمانه : فوق يا فالح ٠٠ كله اتسعر واتباع ٠٠ اصحى ٠٠ ياروح  
أمك ٠٠ لافرج عليك خلقه ٠٠

حيص : آه ٠٠ دعوة امى عليه ٠٠ شردتنى وحكمتك فيه ٠٠ آه ٠٠  
ياخساره ٠٠

زقمانه : اعمل لك همه ياواد منك له ٠٠ ( لحيص ) ما هو لو كنت  
فلحت لك فى شغله غير شغلة الهم والفقردى ٠٠

حيص : يا جاهله شغلتي انبل شغله ٠٠ دى مهنة اللى قلوبهم شايله  
العالم فى قلبها وشغلة اللى حب الحياة ماليهم ٠٠

زقمانه : ( تزغرد ساخرة ) واللى بطنهم فاضيه وعقلهم أفضى  
يافقردى ٠٠

حيص : الفقر مايعيش الفنان ٠٠

زقمانه : الفقر عيب وعار وشنار على كل من كان ٠٠ فنان والا  
سجان ٠٠ شحطتتنى وياك من يوم ما اتنيلت اتجوزتك ٠٠  
الجوع طول عمره تالتنا ٠٠ دفنتتنى معاك بالحيا ٠٠ واللى  
زى فى البندر من كتر العز بيغيروا اجوازم زى الشرابات  
روح ياشيخ منك لله ٠٠ عريتتنى وجوعتتنى ٠٠

حيص : قطط ! ٠٠ زى القطط نسوان تاكل وتنكر ٠٠ داحنا ياوليه  
ياما كلنا ويما شربنا ٠٠

زقمانه : فى بيوت الناس ، ، صدقه ، بواقى المعازيم .. فى كل البيوت  
الا بيتنا ..

حيص : ده من محبة عشاق فننا لنا ..

زقمانه : مايحملكش ياروح المرحوم .. اسمع .. ياتركب صبيانك  
وع السوق والا واللى نبا نبا النبى نبى لاسوقك غصب عنك ..

حيص : ( بطريفة مبالغة ) تسوقينى يا زقمانه

زقمانه : ( تبكى من شدة قهرتها ) زقمانه ؟ وبتقولها بملو الفم يا حيص  
بتدوس على عقدتى النفسية وبتنطقها قدام الناس ..

حيص : حنعيط ؟ .. مش ده دورك طول عمرك ..

زقمانه : تعايرنى بدورى وباسمى .. يالهورتى ..

حيص : الله .. هو احنا يا نعيط يانصوت .. اسمك وقسمتك كده !

زقمانه : من حظى النكد ، من أب خلقه على قده لجوز رزقه على  
قده ..

حيص : يا قلبى لا تحزن حقك عليه .. ( يحايلها )

زقمانه : ( تتجبر ) حقك وجع حقك ..

حيص : تانى .. طب اتفلقى .. زقمانه .. وطول عمرك زقمانه  
ولا تقدرى تشخصى غير زقمانه .. هه .. ! ( تبكى )

( يعود الاولاد ويشخلون بالنقود بالقرب منها فتعود للتسلط )

حيص : تعالى هنا يا اولاد منك له .. لमितوا كام ؟ ..

زقمانه : مالكش دعوه باللى لموه ..

حيص : تعالى يا شرم ..

شرم : ايوه يا معلمى ..

حيص : هات اللى معاك ..

شرم : المعلمة تضربني ..

زقمانه : تعالى هنا يامقصوف الرقبه ..

شرم : سمعا وطاعة يامولاتي ..

حيص : مولاتك في عينك .. أنا مولاك ومعلمك يا حمار .. هات  
يا زعرب ..

زعرب : ماكانش انعزر ولا باع جزر ..

زقمانه : مالك بيهم مش كنت بتقول مايلموش .. مش كنت بتعارض ..

حيص : لكن دول لموا خلاص ..

زقمانه : لا ياشيخ .. هات ياواد .. لبيتوا كام ..

زقرد : هباء .. ياما رخصت يامرصح ! ..

زقمانه : قول له .. عشان يقول لي فنان .. يا أخي اتنيل دي نقطه  
دي .. ده لعب عيال .. قال فن قال ..

حيص : فنى ما يتقدرش بمال ..

غصبن عنك أو برضاك ..

زقمانه : أنت وفذك لو بعناك .. مش ح تساوى نص ريال ..

حيص : لا .. لا .. يالضيعة الحياة .. ما أنا للبيع لا .. ( يودى

بطريقة يوسفية ) ان فنى هو نبراس الوجود وشمس عقل

الدنيا في عصر الجهالة .. والطغاة .. لا .. ولاه ..

والغباء المتناه .. وافهمى يا جاهله .. ان هذا المبلغ التافه

يعنى انك اتفه منه .. فاشبعى بيه .. ولكن لا تنسى ان

تذهبي للسوق .. واحضري لحما وأرزا وبطاطس ..

علنا نوقد في الرماد نارا .. ان نشم روائح التقلية في البيت

وهاتى سمنا بدلا من الزيت .. الذى حرق قلوبنا .. فلم يعد  
الحب يجمعنا زى زمان .. يمكن لما اللحم يشبعنا .. الحب  
يرجع يجمعنا .. يا زقماااانه ..

( تجرى وراءه غاضبة فيهب منها هو وصبياناه )

زقمانه : طيب يابوز الاخص والنبى لأحرق قلبك ع اللى تحت البلاطة  
فاكرنى كروديا .. ها .. قال انا زقمانه .. حقه يا جدعان  
.. والنبى أنا مش الجازيه والا عبله والا مرأة المأمور حتى  
.. والنبى لا أعرفك مقامك .. بعد ما أخذ اللى تحت البلاطة  
وع السوق أمنجه نفسى .. وكفايه اللى شفته .. من فقرك  
ونكدك ! .. قال زقمانه ؟! اللى زى ف مصر اسمهم زوزر  
ياندل .. ان ما وريتك مين زقمانه يا حيص بيص يا ابن  
الاتانه ؟!

\* \* \*

## السوق

( تذوب ، زقمانه في السوق حيث يظهر بائعون وبائعات  
اشكال وألوان .. أصوات البيع والشراء تتداخل - مزایدات  
نداءات تختلط فيها السرقة بالخنق بالخطف - اتفاقات  
طعنات ، هبش هنا وهناك .. البيع والشراء أقرب الى  
المصارعة والقتال - طعن في هدوء .. لعنات وسباب .. عض  
ونهب واحضان نفاق وضحكات .. مع تبادل البضائع يتم  
تبادل القبلات والطعنات ) ..

الحق الحق ياللى ما تلحق  
اللى اتأخر مالهوش ملحق  
اللى ف بقك هفها غيرك  
واللى لغيرك تصبح حقه

اخلط لخبط

هرب درب

واقلب قبل ما تشرب مقلب

خون دايمًا وواعى تأمين ..

دقه قبل ما هو يدقك ..

بكش هوش

لملم كوش ..



خف الايد تكبر وتريش . .  
سحاب دحلب . . واقلب شقلب  
سمم هبش . .  
اقتل انهب . . اسلب نتش . .  
ادبح واخنق . . حوش لوش  
نافق خانق  
زانق لاحق . .  
واعمل وحش ماتعتقهوش  
حلق حوش . .  
وحش حتبقى ف وسط قروش .  
كرش وتبلع أعتى وحوش . .  
واللى نشف تفه من بقك !

( تندمج الأصوات وتندغم . . تشتبك المقاطع وهى تتحول  
الى تكتكات وجز اسنان وانفاس تفتح وآهات وغنغمات حناجر  
تستجير من حناجر . . صيحات مسعورة تعلو وتهبط وتشكل  
اطارا للحركة . . حيث يدخل نصنيس متنكرا فى ثياب افندى  
فهلوى نصاب . . ثياب ملفته حديثة وقناع . . نلاحظ آخرين  
يرقدون مثله ومعهم أقنعة شبيهه . . )

نصنيس : خش وغامر - الحق نفسك - واوعى ترنخ والا تكش . .  
لما تكون السوق غشاشه - فذك انك فيها تغش . .  
حجر قلبك - ذنبك جنبك - هذا والا رجعت تنش - السوق  
حامى والدنيا والعة . . وأنا ايه رمانى ع المر غير الامر منه  
. . آه يازقمانه يابنت الاتانه . . تجرجرينا وراكى هنا  
ليه . . ؟ . . تحويشة العمر حتضيع يا جدعان . . ده عالم

اللى ما يحرقش فيه حينحرق .. واللى مش ح يبيع بينباع ..  
واحنا ما حيلتنا غير كلام .. وكام جنيه تحت البلاطة هفتهم  
بنت الكلب .. لكن لأ .. مش ممكن يروحوا .. اتحسرك  
يا نصنيص .. ده مصير شعب بين ايديك .. شعب الفن  
المنقرض الفنان بيناديك .. اتفهلوا واتفنط .. طول عمرك  
بتبيع كلام للناس .. وكتر البكا يعلم النوح .. أنت النور  
المتنور .. خش يا واد بقلب كلب .. هع .. هاه

( يلاحظ ان بعض نوى الأقمعة يحيوته فيتعجب ثم  
يسوق فيها .. ويستغل خوف البعض منه )

نص : خد هنا يا ولد ..

رجل : ما عملتش حاجه يابيه دانا جاى أصلح ناف بهيمة جوز خالتي

نص : تصلحه وتروح جرى .. لاطلع روحك ..

الرجل : حاضر يابيه .. ( يجرى ) ..

( يمر به أحد الأقمعة )

نص : أهلا ! .. الله ؟ .. ده بيضرب تعظيم ؟ .. المخبرين زى الرز !

.. حيكشفوك وتروح فى داهيه ! .. اثبت ! .. لأ .. هاع ..

زاحم لاحم .. ان مادستش حتنداس .. خد تعالى هنا ..

( المخبر يأتى مهرولا ) أنت .. ؟ ..

المخبر : تمام يا أفندم ..

نص : مع مين ؟

المخبر : هنا يا أفندم مع البيه ..

نص : طب فتح عينك .. وابقى ادى البيه تمام ..

المخبر : تمام يا أفندم ..

نص : انصراف .. ( لنفسه ) شفت .. دانت ملعب .. احنا  
بتوع اللعب ! ده اترعب منى .. نخش فى الموضوع ..

( تدخل زقمانه .. تبحت هنا وهناك او هى موجودة  
من فترة فى التشكيل مرتعية بعضهم ينادى عليها ونلاحظ  
رفضها واحتجاجها على الاسم يدور حولها .. كمن يطارد  
صيدا .. ويفتعل الاصطدام بها .. )

نص : لامواخذة ياست الحلوين ..

زقمانه : معلش يا اخويا .. حصل خير ..

نصنيس : الخبر بين ايديك ..

زقمانه : طب ابعده ايدك كده ..

( ينادى عليها بعض المعارف وهى تتضايق )

نصنيس : قطع لسانهم من لغوغه .. ناس معندهمش نظر

زقمانه : قصدك ايه ؟ ..

نصنيس : كل خير .. قصدى الجهله بتوع كفر النيله دول .. حد  
ينادى لست الحلوين بالاسم ده ؟ .. مافيش نظر جتهم  
البلا ..

زقمانه : شفت يا افندى .. بختنا الحزين .. من أب عقله على قده

نص : لجوز رزقه على قده ..

زق : ايش عرفك ؟

نص : دى عايزه معرفه .. حلوه زيك .. أكيد .. مظلومه

ومجوزينها واحد مايسـتاهلش التراب اللى تمشى عليه ..

وتلاقيه بينادى لك زيهم كده ..

زق : أى والنبي .. تصدق ..

نص : مصدق طبعاً ماهى الدنيا مشقلب حالها .. تدى اللى  
مايستحقش واللى يستحق ..

زق : تديه على دماغه ..

نص : عليك نور ..

زق : لسانك زى العسل ..

نص : دانت كمان بتفهمى !

زق : ربنا يخليك

نص : وحلوه ..

زق : ماتقولش .. حنروح فين من بنات البندر

نص : أعوذ بالله .. ايش جاب لجاب ..

زق : انت عايز ايه يا أمير انت ..

نص : أنا .. لو عندى حصان أبيض كنت أخطفك ولا الشاطر  
حسن .. عايز اسعدك ..

زق : لأ .. يا اخويا .. ابعده عنى ..

نص : مش قصدى .. ممكن حظك يتغير وتنولى السعادة

زق : البخت باين .. مايل والحمد لله ..

( ينادون عليها باسمها فتتضايق )

نص : ماتردش عليهم وش الفقر دول ..

زق : ولا ح اعبرهم ..

نص : العقده هنا .. ولو واحدة زيك عندها عقدة سحر .. وتفضل

تحل فيها على مهلها مش حتنحل ابدا .. انما لازم ساعة  
الضرورة تقطعها وتفك أسر نفسها ..

زق : كلامك حلو .. بس مش فاهمه .. يا افندى ..

نص : معايا مفتاح سعدك وحظك وعرفت عقدتك .. وف ايدى حلها

زق : أنت بتعمل أعمال يا أخويا .. ( تتف ف عيها ) بسم الله  
الرحمن الرحيم ..

نص : زى كده .. لكن بالعلم .. الاعمال والرمل والودع والحاجات  
دى .. زى الحماره قصدى زى ركوب الحماره .. لكن اللى  
عندى .. زى القطر .. الطياره .. احنا العلم والتكنولوجيا  
.. وعشان كده فهمت حالتك فورا وعلاجك عندى ..

زق : يا صلاة النبى .. وحالتى ايه ؟ .. شخصتها

نص : دانا الشخصاتى نفسه ( يغنى )

أول ماشفتك .. حسيت بحوستك

ومن عيونك .. عرفت ليه ؟

زق : يجبر بخاطرك .. وشفت ايه ؟ ..

نص : شخصت حالتك ، وعرفت ماذا السبب فى خيبتك

زق : يخليهم لك .. وخيبتى ليه ؟

نص : فى كل شىء له شىء يشبه له .. بالتكنولوجيا .. ورورياالوبيا

احنا اللى كله .. نقدر نحله ..

مهما تعقد .. فنحن ليه !

زق : يارب زيده واديه كمان

نص : لذاك يلزم ، لزوم مايلزم .. القرش قادر يشفى الجنان

زق : طب بس .. بس ..

نص : بسببتي ليه ؟ حظك رماكى ، مابين ايديه ..  
وأنا لما شفقتك ، قلنا ح نخدم .. واجب عليه ..

زق : كله بثوابه .. ربك كريم ..

نص : لأ يا حبيبتى .. المونة تلزم للشغل لازم .. والمونة يا اختى  
ماهيش مؤونه .. ولا معونة .. وانتي اللي أدري ، يلزم له  
دمغه .. ورسوم لوازم .. ومواد خام .. أو يفتح الله ..  
ربك يعينك يا نور عينيه ..

ومع السلامة .. باى باى .. سلام !

زق : بس أنا كل اللي معايا ثلاثة جنيهه ليناهم من الخلق دى قرش  
قرش ..

نص : شحاته .. حرام ..

زق : عرقنا .. وتلاتين جنيهه جوزى كان مخبيهم ..

نص : شحاته وسرقه .. لا .. لا حرام ..

زق : ومش حرام تسيبنى فى الغلب اللي أنا فيه ؟ دانا عشتى هيه  
اللى حرام ! .. والنبي ربنا يسعدك خلصنى .. ودلنى على  
بختى .. خدهم حلال عليك ..

نص : ياستى مايكفوش ..

زق : يا بختك المنيل يا زقمانه .. جت الحزينة تفرح مالقيتهاش  
مطرح .. يازقمانه .. يامنيله وغلبانه ..

نص : قلت لك ماتبوظيش الشغل وتنطفى الاسم ده على لسانك ..

زق : أنا عارفه بختى .. أنا حظى فى منـاخيرى .. وأنا اللي  
قلت لقيت لعيشتى الهباب دوا .. اتابينى باتشـعلق بحبال  
الهوا .. يازق ..



نص : لأ .. ماتنطقيش

زق : خدهم يسعدك ..

نص : طيب .. بس ماتنطقيش الاسم الملعون ده ..

ولا تردى على اللي يندهك بيه .. وخدى .. آدى بدرة عقل  
العمريت عكروش .. ومصارين نملة الملك سليمان .. وريش  
بيضه تعلب منقرش .. كل ده وتولعى عليهم ، وماترديش  
على حد .. وتقفلى على نفسك لحد يوم الحد .. اسمك من  
دلوقتي ست البنات .. تقوليه ( ١٠ ) مرات كل دقيقة ..  
تلاقيك ست البنات .. ربنا يعمل اللي فيه الخير ..

زق : ( تزغرد ) يارب ..

نص : هش .. ولا كلمه .. دارى على شمعتك تقيد .. أوعى حد  
يسمع اللي دار بينا .. يا الللا .. وماتبصديش وراك ..

( تمضى كالمسحورة المنومة .. وتخرج .. بينما هو  
يضحك ويعد الفلوس يمر عليه مخبر يحييه فيجيبه ويخفى  
النقود .. المخبر يبتسم فى مكر ويتحسس جيبه هو الآخر  
ولكن محتسرا .. ثم يفاجئه حيص بيص فينزعب حين  
يحييه )

حيص : تمام يا أفندم

نص : مين .. حيص بيص !؟

حيص : هه .. عملت ايه ؟

نص : خلاص .. جيتهم منها .. وحتحبس نفسها لحد يوم الحد ..  
بتسبح على ايدها .. ست البنات ست البنات .. ست البنات  
.. لحد ما يغمى عليها ..

حيص : دانا ياله روحى طلعت لما لقيت البلاطة مش مطرحها ..

وانا اللي شايلها للزنقه قلت لما يبدأ الشغل فى المحطة .. نعمل  
قهوه محترمه .. نشخص فيها .. بدل اللف فى الموالد  
والاسواق وهد الحيل .. يجولنا الناس ونستقر بقى يانصنيص  
.. ويمكن ده يخلى زقمانه قصدى ست البنات ترضى علينا .

نص : افكارك طول عمرها جهنمية .. موافق .. خد آدى الفلوس  
وآدى الجرسون كمان ..

( ويبدأن فى تجهيز القهوة ويتخلق منظر القهوة خلال  
الأغنية القادمة ويتخذ المكان صورته وضجته ويرتدى نص  
ملابس الجرسون )

حيص بيص : وآدى الجمهور ..  
.....

جهز ياللا معايا القهوه  
ضربة حظ وحت على سهوه  
قيم النصبه  
وقيد النار ..  
لجل اللحمه تخش الدار ..  
...

شهل .. كمل شد الحيل ..  
ان كان بخت الفن قليل  
ربك ع الفنان ستار  
بكره زباينك يبقوا كثار  
...

رش الميه

رص كراسى ..  
فتح مخك خليك واسى ..  
داحنا غلابه فى زمن قاسى  
ازعق زى اولاد الكار ..

**تصنيف : ايوه انا جاى**

ينسون شاي ..  
فى الخمسينه قوام مطلوب  
ع الريحه وزياده وصيه  
واتوصى بالمونه شويه  
والدخان مصرى يا حبوب  
واجهز بالمزبوط فى البوسطه  
شهل يا اسطى وزيد النار ..

\* \* \*

## الحشاش

( ومع تحول القهوه الى قهوة .. يرتادها عمال بناء  
رجال لزوم الازدحام الانساني ، وآخرين لهم سحن وملابس  
متشابهة .. في الخلفية .. يدخل حشنيش ( النكدى ) حاملا  
الجوزة في خطوات خاصة به يتأملهم .. ويقدم نفسه )

حشنيش : ها .. أخيرا .. قهوه ف كفر حماقه .. قطر وقهوه  
بيعملولنا مركز بين الجهات الاربعة .. أخيرا دماغ كفر  
حماقه المخروم حيستقر .. قهوه شعبيه على محطة رسميه ..  
ايه السعد ده ؟ .. حنرتاح .. حنرتاح يا حشنيش .. على  
فكره ماكانش ده اسمى .. أنا اسمى كان حسنين .. ده قبل  
قبل ما انسخط واتشخص في السامر الهباب ده .. كنت واد  
.. بطل الجرى الاجتماعى فى الكفر ده .. يا حسنين ..  
( اللبن بيتوزع فى المستشفى الحق يا حسنين ) .. ويجرى  
حسنيين كله يبقى تمام والعدل ياخذ مجراه .. يزعلوا منى  
بتوع المستشفى لكن الستات الارامل .. يدعولى ( يخليك  
يا ابن زهيره .. يجبر بخاطرك .. يا ابن زهيره ..  
يخلوهلك يا زهيره ، الحق يا حسنين .. الواد بتاع الجمعية  
بيمضى الخلق على بياض تانى ) واجرى .. أعرفه حدوده  
ويزعل ويزعلوا بتوع الجمعية الله هافينها .. لكن أهل البلد  
يدعولى ( أهى الرجاله كده يابلاش .. ياسلام لو عشره زيه  
ف بلدنا - يا حسنين - الحق يا حسنين .. المدرسة الالزامى

تبيع الكراريس بتاع الحكومة للتلامذة ) واجرى .. يتغاض  
اللى يتغاض لكن التلامذه يلفوا فى البلد يهتفولى .. وهكذا  
دواليك .. عاديك .. ( حشنيش .. الحق يا حشنيش ) ايه  
ده .. مين ده ؟ .. آه .. دالواد لاهبل ابن زنوبه ..  
عايز ايه ؟ ..

( العسكرى بتاع النقطة مجرجر زهيرة ع النقطة ) وجريت  
.. كانت الخلق ياما .. وامى فى التراب .. قال عشان  
التسعيره .. والبلد كلها عارفه غرضه الحقيقى .. كان نفسه  
منها من اول ما وصل البلد مش التسعيره .. كان عينه من  
أمى .. أمى اللى ربنا .. بعرقها وبشرفها .. قلت للناس أمى  
فى التراب بتتمرمط يا خلق هووه .. دى زهيره أم ابن زهيره  
.. حسنين .. بتاع الحق يا حسنين .. يا اولاد يا خلق هووه  
.. ولا حد عبرنى .. مادريتش بنفسى .. كانت البدلة  
والزراير نساير نساير .. وخليت بنطلونه يطل من ياقه  
الجاكته .. واللى حصل حصل .. مرمط بيه الأرض  
وعاديكم ع اللى جرى .. آه .. لا مايتحكيش .. لازم تجرب  
.. لازم تدخل التجربة .. ايد الحكومة ثقيله قوى ..  
ماتتاقلش وقراييها كثير يا جدع ! .. لأ .. مش ح أقول ع  
اللى حصل .. مسيركو تجربوا .. لأ .. بس كان بمزاجى  
.. أنا أصلى صاحب مزاج .. أهم حاجه التخصص .. اللى  
متخصص هنا .. واللى .. متخصص فى ده .. وايش ..  
هنا وهنا .. وكله فاهم اللى بيعمله .. لا .. لا .. ماينحكيش  
.. اللى ذلنى وكسر نفسى .. ان الخوف كان ملجم الخلق  
.. زهيره خلفت .. لكن البلد ماخلفتش ! لكن ماكرهتهمش  
.. بعد اللى شفته عذرتهم .. وصعبت على نفسى .. لكن  
برضعه صعبت على اولاد الحلال .. ( روق يا حشنيش ) ..

خلاص بقیت کده بعد وضع النقط على الحروف ( روق ياراجل  
واقعد - شد ياراجل شد - حد واخذ منها حاجه - تعالى بطل  
مناهده وسيب كلابها على ديابها ملعون أبوها ومن جابها ..  
شد ) وشديت .. ( اکتتم ! ) وکتتمت .. واخيرا .. حنستقر  
حتى م الجری ع الغرز .. والنومه من غير غطا .. قهوه  
المحطه دى مركز الكون .. ( بلا قلة قيمه ومرمطه - الدنيا  
دى ماتسقاھلش غير جزمة وطا ! ) ( أجدع حاجة الفرجه ! )  
أنا كمان ح البد هنا واتفرج .. النار قریبه .. والشر بره  
وبعيد !! وشد واکتتم !! ..

\*\*\*



## التحقيق

( على المقهى يتجمع عمال البناء معهم عواد حركة  
الطلبات والحديث والضحكات .. والدندنة .. الرجال ذوى  
الملابس المتشابهة يدورون بينهم .. منهم ذلك الذى كان يحيى  
نصنيس فى المقهى .. يقترب منه يتفرس فيه .. يختبره بتعنيته  
.. يهمس لرئيسه .. ولكن دندنة العود وغناء المغنى يطغى  
مؤقتا على همساتهم :

المغنى : كل الجدران دى - هيل بيلا

شيلتها على كتفى - بالشيله

وبلقمه بالملح قليله

مادام لك ضهر .. تشد الحيل

هوبه وشيل .. عبي وشيل ..

ياما لسه ولسه يابكر تشيل ..

اوعى تفكر راح تتعكر .. خلى الليله تفوت عنابى

كركر حبه وقوم ترتاح .. مشوار بكره اكيد كعابى

وانت يهمك .. يحرق سيرك .. دانت لابد ياشاب مسيرك

تلقى الحلوه اللى ح تلمك .. وح تعمل لك .. لقمه ترمك ..

بقى معقول - تفضل على طول ..

تلفح ياما حمول وحمول ..

وتعلى عمارات وبيوت ٠٠ وتيجى تموت ٠٠ من غير ما تطول  
شبر ف شبر فى شبر يلمك ٠٠  
حقه وهقه ٠٠ والفين لاد ٠٠ دا يبقى خزوق جامد وأصيل ٠٠  
هوبه وشيل ٠٠ لله تدبيرها ٠٠ ولا ح تعيش وحتاخذ غيرها  
واكثر من ده تزيج يا جميل ٠٠  
هوبه وشيل ٠٠ عبي وشيل - ياما لسه ولسه ياسمره تشيل

( تتزايد حركة المخبرين ويثقل وجودهم يحاصرون  
الجرسون ( نصييص ) مع نهاية الأغنية يحصرونه ٠٠ ممزقين  
بالقبض عليه ما كان قد توحد بين الحاضرين ٠٠ وتنغم  
الحوار التالى مقصود لخلق درجة من عدم الواقعية سواء فى  
الأداء أو فى التنفيذ )

مخبر : هوه بنفسه بتاع السوق ٠٠

مخبر : بتستخبي احنا كاشفينك ٠٠

حيص : ياعم سيبه ده واد غلبان ، مشخصاتى بنص لسان ٠٠

مخير : بيتهيالك ده تعبان ، وأبعد أنت احنا عارفينك ٠٠

( يتدرج الأمر من استجواب نصييص الى استجواب الجميع )

نص : فيه ايه يابا عملت ايه ؟ ٠٠

م : مش مصروف لك انك تسأل ، احنا بنسأل وانت تجاوب ٠٠

م : اسمك ايه ؟ م الحرافيش العجر - وعامل لى بيه !

م : طرى مخك ٠٠ هذا والا ده يرخك ٠٠ ( مشير للكرباج )

كنت فى السوق تعمل ايه ؟ ٠٠

م : كنت ويا ؟ ٠٠ والا ويا ٠٠ ؟ ٠٠

- طب وليه مش ويا ۰۰ ليه ؟ ۰۰
- م : وانت من ده والا من ده ؟ ۰۰ والا من ده ؟ قلت ايه ؟
- م : كنت فين ؟ ۰۰ جاى منين ؟ ۰۰
- م : ليه يميناك مش شمال ؟ ۰۰ ليه شمالك مش يمينا ؟ ۰۰
- م : عيب عليك وسمعت ايه ؟ ۰۰ وسمعت ليه ؟ ۰۰
- مخبر : مين معاك ۰۰ كنتوا كام ۰۰ روحتوا فين ؟ ۰۰
- م : كنتوا تلاته والا اتنين ؟ ۰۰
- م : شد ودانه ؟ ۰۰ فتش جيبه ۰۰ شوف خلجاته ۰۰
- حيص : ليه كلات ده ؟ ۰۰ ياناس ده حرام ! ۰۰
- مخبر : دخلك ايه ؟ ۰۰ محموق قوى علشانه ۰۰ وليه ؟ ۰۰
- رجل : بس يا عم الرحمة جميله ۰۰
- حيص : ممكن أعرف تهمة ايه ؟ ۰۰
- مخبر : ايوه يابيه ۰۰ عايز تهمة ۰۰ هات له وحضر له المطلوب !
- ( احدهم يحضر شيئاً ما غريباً يخرج منه قهقهة فى اشكال  
أغرب )
- مخبر : حطه يابطه ۰۰ يادقن القطة ۰۰
- حالى بالى ۰۰ يادقن الوالى ۰۰
- حادى بادية ۰۰ شد قصاى ۰۰
- هوبه يالوبه ۰۰ ياسهله ياصعبه
- أقرا وقول له من الناحية دى ۰۰

- والا تحبها م الناحية دي ..
- آدى دليلنا .. واذا مش عاجبك ..
- يبقى عليك ياعزيزى اثباته .. وساعتها ذنبك على جنبك !
- م : اثبت عندك من بصماته .. انه كآنه بانه لأنه .. كان سايق  
في السوق حركاته ..
- حيص : بقى ده كلام طب وانتم مين ؟
- عين وصابتنا .. ايه تهمتنا ..
- م : اول يوم نفتح قهوتنا .. اللي من الشارع لمتنا  
رجل : حسدوا الأقرع على شعر مراته !
- مخبز : احنا اللي كاشفين حركاته ..
- م : فتشوه ..
- م : فتشناه ..
- حيص : وايه لقيتوه .. دي الريح ساكته تحت بطاطه ..
- مخبز : أمر طبيعى مانلقاش حاجه ..
- حيص : يبقى الحق بانث علاماته ..
- ده فنان ومافيش اخواته ..
- مخبز : احنا مش ممكن راح نغلط ، هذا الصنف احنا كاشفينه  
مايشيلش المنوع وياه ..
- م : واكيد حيدلنا على ذنبه .. اول ما حنطق شنباته ..
- ( يتكاثرون عليه ويوسعونه ضربا ورفسا في طقس كلاسيكى )

- حیص : ایه یا اخوانا ده حتی حرام ..  
 وده معقول .. حتی التهمه لیها اصول ..
- مخبر : أنت بقى مش واثق فىنا ..
- مخبر : فىن شهاداتك .. البلدية ؟ .. والصحية ؟ .. والسياحية ؟
- م : فىن اسعار حق المشاريب ..
- م : اعمل له محضر اشغال
- حیص : یا اخوانا الحلم جميل .. ده واد غلبان شغال عندى رزقه  
 ورزقى على الله ..
- مخبر : دانت شريكه !؟ ..
- حیص : طبعا .. أنا صاحب القهوه .. بس ده كله ياناس تمثيل ..  
 تشخيص فنى .. دانا بس اللى عملت معلم .. قهوه تلم  
 الفرقة بتاعتى .. نقدم فن لأهل الكفر ناوى ع الخير وغرضنا  
 شريف ..
- مخبر : واللى بيعمل خير يتنكر .. ويشلفط وشه كده ليه ..
- حیص : حوشوا ياناس .. ده تمثيل .. وأصول فنيه ..  
 قهوه ديكور .. حوشوا ياناس ..
- مخبر : بتحرضهم ، عايز الكفر يقوموا علينا
- حیص : حيلك .. دانا حیص بیص .. أنت حتقلب جد معانا ..
- نص : وانا نصنیص ..
- مخبر : لا یا شیخ .. ؟ بقى معقول ؟ .. آه یا خراشى ..
- مخبر : احنا حقیقى .. یا حیص آسفین ..

نص : بعد ما خزقتوا لى عينيه .. أصررها منين أسفين وبكام .

مخبر : غلطة .. بقى .. وخلص .. مردوده ..

وتعيش بس وتاكل غيرها ..

م : ياللا بعودة ..

م : بس الحق انت الغلطان .. تسكت ليه ؟ ..

م : ليه ما اتكلمتش ..

نص : واللى نطق سيبتوه يتكلم ؟ ..

مخبر : قلنا خلاص أسفين يامعلم ..

مخبر : وان كان عاجبك .. ياللا .. يادفعه .. بينا قوام ..

حيص : وده معقول .. هو دخول الحمام برضه زى خروجه ..

داحنا الليله سعداء جدا . بيكم طبعاً وبأفعالكم ..

لازم نعمل لكو هليله .. حفلة تشخيص لكن ايه ؟ ..

حفله جميله حتمتكم وحتنفعكم .. قال عايزين يسيبوننا

يانص .. ويمشوا ..

نص : يمشوا .. لأ وحياءه زهرى المسلوخ .. ودماغى المفتوح ..

لأ أبدا .. الشاى ع النار !! .

حيص : مش ممكن .. قال يمشوا قال .. دى الحفلة حتبقى ..

ماحصلتش .. حفله عشان نصيص .. اتبرأ وعشان

كفر حماقه اتجراً .. وحتبقى له محطة قطر ..

نزل يا نص الطلبات .. للبهوات ..

وكله على حساب الصندوق .. دخان وشايات .. وضرورى



ينسون بالذات .. وسمع همس .. رش الميه وعلق زينه عشان  
اخوانا .. دى ليلتنا مندوره عشانهم .. ( شوبش نقطه  
ومزيكه )  
الرجاله ..

بتوع الأمن .. الزراعى والقومى .. والتقافى ..  
المخبرين الألاجه ..

فخر الدوله .. الجدعان .. اللى ايديهم بتخر انسانية ..  
ولسانهم بيشر عسل ..

واللى شرفوك بالضرب محبه .. يالبيب ..

اذ ان ضرب الهبيب زى اكل الزبيب .. وضرب الزبيب  
زى أكل الحبيب ..

ياللا وأنا وأنت ..

عشان الحته الأصلى .. حكاية زمان ..

( يرتدون الملابس ويجهزون قطع الديكور أو ما يوحى  
بالانتقال الى المشهد القالى ) ..

الحكاية الجميلة اللى احلا من ألف ليله وليله .. واجدع من  
شمشون ودليله .. فيها خبره وعبره ..

فاسمع ياللى مالکش ودان .. وانطق ياللى مالکش لسان ..

داحنا فى رحاب رجال الأمن والأمان .. اللى استبدلوا القلم

بالخزيران .. عشان يعلموا الانسانية للانسان .. هس سمع

.. هس ..

داحنا الآن فى قصر السلطان !!

\* \* \*

## التشخيصة ..

السلطان : دبرنى ياوزير .. ياوزير .. الله فين الوزير ؟ .. طبعا لازم يكت .. ماحدث عايز يتحمل المسئولية .. تعالى ..

بناء : أنا ؟ ..

س : أيوه انت .. أمال خيالك ؟ .. مالك ؟ ..

البناء : وأنا مالى .. ماعملتش حاجه ..

س : خايف ليه ؟ .. تعالى هنا .. دانا ح اعملك وزير !

البناء : خبر اسود .. انا ماعرفش اقول ايه بالوزير

دور على حد يكون بي فهم انا ما انفعش

س : انا قلت تنفع .. كلام السلاطين لا يكب .. انت الوزير وبطل

مقاوحه .. انا اختارتك لدور سهل .. اخف من دور العيا

مطلوب توافقنى وترافقنى هيا ورد قوام لما أقول .. ( دبرنى

يا وزير ) ..

الوزير : التدابير لله ياسلطان الزمان ..

س : شفت وكأناك مولود ع الكرسي .. عليك تدبرنى سايبنى وحدى

ألوص والحاله بقت زفت .. والمدينة منيله بستين نيله ..

اعمل حاجه ..

وز : أنا لسه متعين حالا .. حتحط كل البلاوى دى على دماغى

ليه ؟ ..

س : حثقتوا عليه وعلى شـبابى ٠٠ هلكتونى ف شغل المملكة  
وغرقتونى ف شغل البيت ٠٠ دى عيشه زفت ٠٠ جتكم نيله  
ف بلاويكم ان كانت بره القصر والا جواه ٠٠

( تدخل المملكة وهى شرسة شلق ٠ وهى نفسها زقمانه طبعا )

المملكة : عيب على شيبتك ٠٠ عمال تعدد زى الست اللى ضاع  
خلخالها فى المولد ٠٠ حثفضحنا قدام الدول ٠٠

س : يافتاح ياعليم ، ع الصبح ٠٠ انتى سيبتى فرشتك ليه ياست  
البنات لم تتعبين نفسك وانت مريضه وقد تموتين ٠٠ قول  
يارب !!

المملكة : نفسك تقتلنى عشان تورث ٠٠ ايه شغل البيت اللى عملته  
٠٠ شراباتك زى ما هى م الجمعة اللى فاتت تحت العرش ٠٠  
لما كمكمت ٠٠ فكرت تنقعها والا ترميها ٠٠ يا راجل د الكلب  
اتسمم عشان كل واحد منها - اف ٠٠

س : طبعا لكى حق تقولى اكثر من كده ٠٠ مادام سلامتكم دقنى انت  
وابوكى ٠٠

م : بفلوسى ٠٠

س : كده بتعايرينى بالملاطيش اللى سالفهم من ابوكى بالفايظ ٠٠  
ارحمى اعصابى ٠٠ أنا الآن منعقد مع وزيرى تاريخيا لبحث  
أمر خطيره ٠٠

م : أمور خطيره ٠٠ من غير شورتى ٠٠ ماينفمش ٠٠ بلغ بابا  
يتصرف ٠٠

س : ياستى اهمدى ٠٠ ده شىء ما يخصش باباكى ٠٠ دى أمور  
داخلية ٠٠ وأنا مش ح اسمح له يتدخل فى شئونى ٠٠ هس ٠٠  
اخرسى ٠٠

م : بتشخط ٠٠ على ايه ؟ ٠٠ م الصبح ألم هدومي وأروح على  
بابا ٠٠ وأخليه يسحب كل جيوشه اللي بتحملك وفلوسه اللي  
صارفها عليك ٠٠ ونبقى نشوف حيديرها معاك ازاي الدهل  
اللي انت جايبه م الشارع ده !

وز : عيب يا جلالة الملكة ٠٠ عيب تردحي في قاعة العرش  
التاريخ بيسجل ٠٠ يقول علينا ايه ؟ ٠٠ وعليكى بالذات  
يامدام ٠٠ ؟ ٠٠

م : والله اتنجرنا وعدنا بنرطن أهه ٠٠ ايه ياروح أمك ٠٠ لسه يادوب  
متعين وحتتدخل في الأمور العليا ٠٠ لأ فوق لأعرفك مقامك  
وأخلي وراك قدامك ٠٠

س : انتى ملكش صالح بيه ٠٠ سيبيه ٠٠ ده وزير من قلب الشعب  
٠٠ وناصح ٠٠ وبيثبت ان الحكم ده مش صنعه ٠٠ ولا كيميا  
٠٠ أهه ٠٠ بيزغر وينطر ويحكم ٠٠ هائل ٠٠ انت ولد تمام ،  
مع انك هزاه ومن الدهماء ٠٠

وز : لأ ٠٠ ياسى ( حيص بيص ) أنا مش هزاه ولا يمكن أتهاز باسم  
وزارتك ٠٠ خد آدى عبايتك مش لاعب ٠٠

س : لأ ٠٠ ماتزعلش ياولد ٠٠ أنا باهزر ٠٠ أهو أنت كده ياشعبي  
الحبيب ما بتعرفش امتى بنهزر وامتى مش بنهزر ٠٠

م : سيبه يغور ٠٠ هو عايز يبقى وزير بلوشى ٠٠

وز : ياست الكل أنا مش عايز ٠٠ أنا قبلت أشخص معاكم ، خدمه  
عامه يمكن نلاقى حل للمشاكل اللي بتقولوا عليها ٠٠ خدمه  
لا اكثر ولا أقل ٠٠ يانشغل صح ٠٠ يا أمشى ٠٠ لكن اتهاز  
٠٠ لأ يفتح الله !! ٠٠

س : هايل ٠٠ شفتى ٠٠ صدقتى ٠٠ اتنورت يا ابنى لما استوزرت ٠

بقيت بتفهم كل حاجه .. مشاكلنا طقت في نافوخك وبقيت  
مستول ! ومفتح مع انك لسه جديد .....

م : اتفتحت في نافوخك طاقه منك له .. ده جديد ده .. ماهي شبه  
اللى قبله وقبل اللى قبله .. ويمكن أظطرط .. ( الوزير  
يحتج )

س : ياستي ارجوكى .. انهبى ودعينا الآن كى ندبر أمور الحكم  
الشائكة واسكتى خالص .. ايتها المماحكة ..

م : ماتشخطش أنا ماينشخطش فيه ..

س : طب اسكتى .. الأحوال عماله تتدهور وعايزين حل والا نضيع  
.. واللى زيه فاهم أحوال الرعية .. ويقدر يساعدنا ..

م : هو ايه اللى بيتدهور ؟ ما أنت آكل شارب ونفسك مفتوحه ع  
الاخر ! .. ماشفتكش مره زورت في اكل لما افكرت الجعانين  
.. ولا الميه وقفت في زورك عشان حاله اتنيلت .. ! قال  
بيتدهور ! ..

س : أنا مش قصدى أنا .. بيت المال قرب يشطب .. وترع الرى  
مسدودة والأراضى الزراعية باظت وبارت .. والناس هجت ،  
مابقاش فيه اخلاق .. امبارح اتنكرت أشوف أحوال الرعية  
.. سمعت شتيمه عيب قوى بودنى دى .. وفيه أنا ..  
وواحد عمل نفسه مش عارفنى .. وقد يدينى !! فيه حاجه  
غلط .. الناس حتاكل بعض .. وحتاكلنا ..

وز : العسكر .. كمان ظلمهم زاد .. الضرب ع الفاضى والمليان  
وخصوصا ان كنت غلبان .. والنهب علنا صبح شرع وقانون  
.. والفقر كانه أزلى .. والجوع .. يامولاي آه .. ناس  
بتبات من غير عشا ليالى طويلة .. وفيه اللى بيتعشى لوحده  
بأكل قبيلة .. ! ..

م : الله .. الله .. سامع آدى وزير نقاوة ايديك ياملك الغبرا ..  
ده معاهم والا معانا ؟ !!

س : أيوه صحيح ! دانت كأنك كنت حتاخذنى قلمين .. انت بتدافع  
عنهم كده ليه ؟ ..  
أنا جايبك تدبرنى مش تقطمنى ..

م : نقاوه ايديك ..

وز : ابدا يامولاي .. أنا قصدى .. كان فى نفسى ان اقول لك ..  
( يغنى )

الصوص فى كل حته  
والهدوم كلاتها عته  
والولاد مش لاقيه حته  
تريح الجته عليها .. أو سرير  
كترت الرجل الغريبه  
كل شىء أصبح مصيبه  
وناس بتلهط لما تشبع فى الفطير ..

س : أنا جايبك اشتكى لك

جاي انت تشتكى لى ..

م : ده باين مدسوس دسيسه

شوف ملامحه ازاي خسيسه .. يامجير ..

وز : يا ملك الأمر باين ..

المدينه حيصه بيصه ..

س : والعمل يا ابن البريصه ..

وز : الحقيقه الوضع أصبح شىء خطير ..



م : غيروا اسم المدينة ..  
واقتلوا الناس الحزينه ..  
والحمار سموه سفينه ..  
والدبلان اصبغوه .. يبقى حرير ..

وافرضوا حالا ضريبه ..  
ع اللى تحصل له مصيبه ..  
واللى يعمل حاجه عيبه ..  
واللى يتجراً ويشكى ويستجير

وز : لا يامولاي تمهل ..

س : اعمل ايه ؟ ..

وز : اقتراحاتها غريبة ..

لو طاوعناها مصيبه ..  
داحنا نرضى بحالنا احسن ..  
والفرج ساعته قريبه .. يامجير

م : الوزير ده ترفده ..

وعن القصر ابعدده ..

س : اسكتى انتى ايش فهمك

دى امور عليا وعويصه

خشى جوه لاخرشمك

انت فاكراه الحكم هيصه

والا عرش الملك أصبح كالسريير

م : انت بتلقح عليه ..

وابويا اللي حاميك ..

طب وحق نور عينيه

ما أنا قاعده تانى ليك ..

وانا مالى انشالله تخرب ..

بكره ح أهرب ..

ولا ح أسأل تانى فيك ( تخرج )

الملك : ياللا فكر يا وزير سيينا منها ..

الوزير : روح صالحها الصلح خير ..

الملك : انتهينا .. قول لى كيف الآن ح نخرج ..

من مرار داهيتنا ديه ..

ياللا دبرنى وفكر ..

الوزير : التدابير للاله .. الله اكبر .. وانت بعد الله تفكر ..

الملك : ايوه لكن الوضع يوم عن يوم بيخطر ..

الرشاوى ف كل حته - م المسافر خانه للسلاخانة للسوق الكبير

والفساد ما خلا جته ..

والعقول .. زى ما تكون اتحشت بصل وفول ..

الحيطان شقع بقع ..

والبنايات بتقع

والخيام بقت رقع .. أعمل ايه ؟ قول ودبر ياوزير

انت راجل عشت وسط الناس كتير ..

الوزير : ( يلتفت نحو المخبرين ) ..

التدابير للاله ..

وانت عارف .. أصل أنا ما عندي خبره

وبلديكم غير بلدنا .. ده كلام مزبوط ويدي الخلق عبره ..

احنا غيركم - حلوه دي - وف بلدنا حكمه قالت :

الحمد لرب مقتدر ..

خلق الجميز على الشجر ..

فأكلنا منه وشبعنا .. ورمينا الباقي للبقر

الملك : هو أنا جايبك تعايرنى .. وبأى كلام تنطق وتقول ..

والا أنت جاي تدبرنى .. هيه كلمه واحده بس ..

فيه ثلاث تيام قصادك .. مهله فيها تلاقى حل

وان ماجيتليش قبل وقتك ..

وف ايديك حل المشاكل .. كلها ح اقطع رقبتك ..

( اثناء المنظر الماضى يتابع الحشاش المنظر ويختار

لنفسه موضع يرص فيه أدواته ويتأمل .. ومع انتهائه يراه

بوضوح فى عالمه الخاص مع صوت الجوزة والدخان ..

منفصلا عما يجرى بعد ان ييدى سخريته من كل ما جرى )

الحشاش : شد وكركر .. خللى الليلة تفوت عنا بى .. واوعى تفكر

.. راح تتعكر .. مشوراك دايم كعابى .. ده .. لازم

يكون نشيد كفر حماقه القومى .. ايوه كركر .. عمرك

ماحترتاح .. سرقوا الصندوق يا أبوصلاح .. لكن العبرة

فى المفتاح .. والمفتاح عند الحداد والحداد عايز بيضه

والبيضه صبحت سوده سوده زى الفحمة عايزه لحمه واللحمه

أكلتها القطه .. يا خرابى فوق يا حشنيش الدور جاي عليك

حيسألوك تانى • لأ أنا ما أتسألش اللي ينضرب مايتسألش لأنه  
مايعرفش ان الفرخة عايزه قمحه •• والقمحه عند التاجر عايز  
فلوس •• والفلوس عند الصريف •• والصريف سرق  
الصندوق •• هاؤه •• ماكنا حلوين نرقع هنا ونلرزق هناك  
وكانت بتتنيل اكثر •• لكن مالناش دعوه دلوقتي عملنا معلمين  
وفاهمين الفولة •• خطفتها الغولة •• لأ برضه أنت ابن بك  
حتى بعد ما انضربت بالجزمه لك لازمه مادام ده فوق دماغك  
•• حيجيب داغك •• ها •• كح كح •• آه •• ياخرابى ••  
معايا •• آه يادماغى •• دماغ الواحد منا •• جوزه هند ••  
ايوه لو تفضل على طول مقفوله •• تاخذها الريح •• يحدفها  
التيار للبحر •• تعوم •• وتقب •• تتخبط فى الصخر وترجع  
•• تتهد وتترزع •• لكن أكيد فى يوم معلوم •• راح ترسى  
على بر أمين •• تتغرز فى الطين •• تنبت •• تطلع شجره  
•• ويمكن تطرح •• ياكلها غيرك آه •• لكن لو انكسرت ••  
مع •• حتاكلها •• وترمى القشر أو تشربها وتتروى بيها ••  
وبعدين ح تجوع تانى وتانى ح تعطش ••

انا بقى لما الدماغ •• قصدى الجوزه تتخرم •• حتصهرج  
فوقها النار •• دخان •• احلام •• وتكركر •• يبقى أحسن  
تسيبها والا تكسرهما •• اجدع من ده ومن ده تخرمها ••  
خير الأمور الوسط •• عشان تكركر وتصهرج زى نافوخى ••  
تقدر تطلع من مناخيرك •• وتقدر تكتم •• تكتم •• اكنتم ••  
( يدور الوزير حائراً •• ثم يحاول ان يسأله عندما يقترب  
منه )

الحشاش : اكنتم •• انسد واكنتم ، ايه ده ؟ بيعيط ! •• أنت بتعيط ؟  
حد ضربك من عيلتهم ؟ •• عيله كبيره قوى •• شايف قفايا ••

طب عيط على كتف اخوك .. عيب .. الدموع غاليه .. أوه ..  
ده اسمه كلام ؟

.. ده حيقوقنا .. ياعم .. انت بتشتغل ايه ؟

وز: : وزير ..

ح : لأ .. بسيطه .. ! .. ! .. ايه ؟ ياخبر اسود الحقونا .. طفى  
النار ياولد كبسه ..

وز : ماتخافش .. وأنا وزير تشخيص .. شخصونى ..

ح : انت بتضحك عليه ..

وز : لا أبدا .. دانا وزير كده وكده .. ما أنت شايف الحكاية من  
أولها ..

ح : شايفها وعارفها .. بس بقى مافيش أعزم الام .. كان لازم  
أعمل كده .. مهما كانت الزراير .. آه .. اوعى تكون وزير  
العسس ؟ ..

وز : لأ ..

ح : الحمد لله أmaal وزير ايه ؟ ..

وز : ماقالوئيش .. هو نده لى وقال : روح تبقى وزير .. وصدرفولى  
الملابس دى .. لكن زعل تانى وقال حيقطع رقبتى ساعة  
المغرب !

ح : عادى جدا .. مادام عينك يبقى من حقه يقطع .. على كل  
ماتزعلش .. ضمننت معاش كبير لأولادك .. ريحت قلبى  
ياشيخ .. عشان مش وزير العسس .. أصل الأمر مايسلمش  
برضه .. خد .. شم دى وماتقولش لحد ..

وز : ماليش نفس .. وماتخافش منى أنا أصلى خلاص فنش ..  
وأنا اللي جييته لنفسي .. كروتونى وقالوا تمثيل وتشخيص  
بس برضه أنا طمعت .. واستأهل .. حيشنقونى المغرب ..

ح : طمنتنى ياشيخ .. قبل ما يطيروا الكرسيين اللي معمريين  
النافوخ ..

يبقى أنت بقى الوزير الهزاه اللي اتفرجنا عليه من شويه والملك  
عمال يهزأ فيه ويقوله حل .. حلها .. ويهزأك

وز : أنا .. هزأنى .. لأ ..

ح : ماتتحمقش قوى كده .. كل الناس شايفين مراته وهيه بتمرط  
بيك الأرض ! ..

.. اشمعنى يعنى القلم لما ينزل من فوق ماتزعلوش  
كلامنا احنا اللي دمه ثقيل ، روح ياشيخ وأنت عامل زى الست  
أم رجل ف مناخيرها ..

وز : أنا ما اسمحش انك تشتمنى ..

ح : ايشمعنى قبلت منه هوه .. هه .. ما احنا برضه معلمين ..  
خلاص شوف بقى مين حيحل المشكلة وابقى قابلنى ، لما يعلقوك  
تتمرجح واحنا نتمزج ونسقف ..

وز : تقدر تساعدنى ..

ح : المساعد ربنا .. واحنا راضيين بالمكتوب ..

وز : دول حيقطعوا رقبتى

ح : أمر الله .. كلنا لها .. كل شىء بأوان ، ولكل وقت أدان ..  
والحيطان لها ودان ..



وز : حرام عليك .. أنا دخت السبع دوخات ..

ح : وأنا دخت م القعدة ..

وز : اعمل معروف .. دلنى على حل المشكلة دى ..

ح : ده عزرائيل نفسه لو سألوه .. عن حلها .. يعيط ..

وز : رقبتى ح تطير .. يرضيك ده ..

ح : اللى يرضى الملك يرضينى .. ( بيكى ) الله .. ده بيعيط ياعم

روق ماتندمجش قوى .. واحنا معمرين دماغنا ، احنا

ناقصين ؟ وانا بصراحة بقى مالياش فى السياسة .. تبت ..

خد وشد ، ده احسن حاجه بدل الدماغ . ما تنكسر ..

تنخرم .. وتبقى عال ..

وز : ماليش نفس

ح : ومين اللى له .. خد ياراجل ، ماهى بايظه من زمان .. هو

انت يعنى كتافك اللى حتشيل وحدها .. ماتعتلش هم ..

وز : لكن ده حيقطع رقبتى !

ح : آه .. خايف على نفسك بقى ..

وز : يعنى ؟ .. لكن خايف اكثر انهم مايقوش حل بعد مايدبحونى

ح : مش حتبقى مشكلتك ، حتبقى خرجت لباب الكريم .. وسيب

كلابها على ديابها .. اشرب .. بس اكرم .. فيك من يكتم

السر ..

وز : فى بير ..

ح : ح اصدقك .. همه قالوا لى بصراحة كده .. أفكر وأقول لك

الحل ..

وز : صحيح .. الله يخليك .. أوعى تكون بتكذب ..  
ح : الحشاش عمره ما يكذب .. وخصوصا وهو تحت السلاح ..  
( يسير بخطوة عسكرية رافعا الجوزة ) ..  
وز : وحتقولى الحل ؟ هه ؟ ..

ح : كله بأوان ملهوف على ايه .. أصل احنا يا صنف الحشاشه  
ماتفرقش معنا .. أحمد زى ازدهم .. لأننا ما بنفهمش فى  
أموركم دى .. عشان احنا اجدع من يفهم فيها .. بس  
ما بنقولش .. بنكتم .. برق عنيك .. وبص لى زى لاهبل  
بقى ، وكأنك لأول مره بتسمع الكلام ده .. تقولى ازاي ..  
أقولك .. صلى ع اللى ح يشفع فيك .. يا بنى الدنيا المكبشه  
المغبشه المدغمشه المنعكشه . ماتفهمهاش الا الدماغ المحششه  
.. خدلك نفس يمكن تفهم .. انت مش أصلا ( بنا ) ..  
م اللى بيبنوا المحطة .. خلاص .. فى ايدك صنعه بتكسب  
ذهب حتى لو الملك ده شنقك ..

وز : ازاي بس .. انت ح تخرف ..

ح : الله يسامحك .. فيه حشاش فى الدنيا يخرف .. دى مسئولية  
كبيرة ..

وز : وعشان كده ارجوك قول لى الحل .. انقذنى ..

ح : اسأل الملقن ..

وز : مافيش ملقن .. ودورى ماكانش مكتوب

ح : خلاص .. مش حنحط العقده قدام المنشار .. زى مايعمل الملك  
السلطان الأونطجى بتاعك ده .. كل الحكاية احنا بنتسنى  
وبنحتفل بنجاة ( نصنيس ) من ايدين اخواننا الطيبين دول

ومن عدالتهم ! • ولا يمكن •• نسمح ان رقبة واحد زيك  
تنقطع في حفلتنا •• وأنت اللي اتطوعت بنفسك تستوزر أنا  
لذلك لازم أقول لك على الحل اللي يريح السلطان ويبسط  
البلد •• ويحل كل المشاكل •• وينجيه من بلاويها •• ومن  
الأونطه والتهليب •• والسرقه والتهريب •• بس فوت عليه  
بعد المغرب يكون فكرت لك ••

وز : لأ •• في عرضك بعد المغرب •• الوقت يبقى فات •• وشنقوني

ح : يبقى أنت عايز حل لمشكلتك •• مش لمشكلة البلد ••  
وهنا مربط الفرس •• روح اختار لك جحش منه وروح هات  
الملك بتاعك ده •• وأنا ح أقولكم الحل بنفسى ••

وز : طب ما تيجى معايا القصر ••

ح : ده كلام •• هو ينزل مره ، يطل علينا •• داحنا حلوين قوى ••  
برضه ••

وز : بس اعمل معروف ماتمشيش •• وخذ الحته دى اتسلى بيها •  
عقبال ما ارجع لك ( يخرج )

ح : ايه ده ؟ •• حشيش ؟ •• أعوذ بالله •• والا ده ماركه مضمونه  
•• مع •• زوق الراجل ده •• وخساره في المشنقه •• زى ما  
انا خساره في الدنيا دى والله •• اتكلمت مع الوزير بكل  
شجاعه •• ولا خفت منه •• مش تقول لى •• زمان كنا  
بنقرا عن الوزرا دوله •• لما ينزلوا متنكرين بيصيصوا على  
أحوال الرعية •• لكن ده جرىء قوى •• قال على نفسه  
بنفسه •• آه •• مش حيموت بقى •• لكن احنا يا الأود البلد  
جدعان برضه •• كان ممكن اتقالط عليه والا اعيره واسيبه  
يغلى لكن انا قلبى طيب •• معلش ما هو مأزق •• رجل في

مزنق .. حيتشـنق .. المغرب .. الله .. يكونشى ده اللي  
خلاه يتواضع ؟ .. ياسيدى ! .. معلش .. كح .. كح ..  
( بوق وطبول .. الملك والوزير فى الموكب الملكى الهزاه ..  
يلاقهم من بين رموشه ) ..

ح : ياه .. مالها الدنيا بمبى كده .. انت جيت يا مرزوق ..

س : مين ده ؟

وز : ده الحلال .. قصدى الحشاش ..

ح : تاج الجزيرة .. يا ما انت كريم يارب ..

س : ايه ده ؟ .. بيخرف .. انت جايبنى أزور حشاشين يا جدع  
انت ؟

أنا السلطان ( بهبهان بن كهرمان ساهنشاه الملح والمرجان )  
ينزل من قصره .. ويغالط عصره .. ويروح غرزه ..

ح : لأ .. فات عصر الغرز دى قهوه شعبية محترمه على محطه  
رسمية عصرية .. وان كان عاجب سيادتك أهلا وسهلا ..  
مش ... مع ...

س : ايه ؟ .. ايه ده ؟ ..

احنا حلالين العقد ، من غير أى عقد .. ولاحظ انك ضيفنا  
هنا ، ومالكش حكم علينا .. الكلام ده فى القصر تبعك  
والعصر بتاعك ..

وز : معلش يامولاي استحمل علشان خاطر مدينتك ومشاكل  
شعبك ..

س : طول عمرى باضحى عشان مدينتى .. ومدينة غيرى كمان ..  
بس مش للدرجة دى ..

وز : ده اللى حداه حل المشاكل كلها ٠٠ ومعاها الدوا للأزمة اللى طلبت منى ألقيلها حل ٠٠ ده عنده الدوا الأكيد والحل الوحيد ٠٠

س : ايه ؟ ٠٠ حشيش يعنى ٠٠ قصدك كده ؟ ٠٠

ح : لا ٠٠ يامحترم ماينفعش ، ماكانش حد غلب من زمان ٠٠ وكأن حصل وتم المراد وارتحنا ياجميل ٠٠

س : ماهو مش معقول ٠٠ تنزلنى من عرشى عشان واحد زى ده يهزر معايا ؟! ٠٠ هو ح يفهم اكثر من العلماء اللى عملنا منهم لجان سلطانية ٠٠ للبحث والدرس ٠٠ والا المشايخ والكهان اللى طلبنا منهم يصلوا فى الجهر والهمس ٠٠ والا المجالس اللى شكلناها من أكبر المختصين فى لجان متخصصه ٠٠ وكلهم فشلوا والحمد لله ٠٠ ده ييجى ايه جنبهم ٠٠

وز : ده اللى حينجح ٠٠٠

س : تعرف ٠٠ لو ماحلهاش أبو غابه ده ٠٠ أنا ح اكسر الدنيا ٠٠

ح : شد معانا نفس تورق ٠٠ واعطينا مما أعطاك الله ٠٠

س : ده شحات كمان ٠٠

ح : الشحاته م السلطين مش شحاته ٠٠ قب باللى يخرج من ايدك والا نزرجن ومافيش حل ٠٠ فين العطايا ؟ ٠٠

س : أنا مامعايش ٠٠

ح : مفلس ؟ ٠٠ طب ازاي ح اغلبك ٠٠ قالوا المفلس غلب السلطان ٠٠ طب لما مفلس على مفلس ماينفعش ٠٠

س : أنا مش باشيل الفلوس ٠٠ الفلوس هيه اللى بتشيلنى يا مغفل

ح : ماليش دعوه ٠٠ تدفع ٠٠ تمشى المراكب ٠٠ ماكانشى اتكل ٠٠

وز : أنا باتعهدك بكل اللى أنت عايزه ٠٠ حديدك مايكفيك بس  
خلصنا ٠٠

س : دى تبقى فرده بقى ٠٠ برطيل ٠٠ رشوه ٠٠

ح : فرده ٠٠ ؟ آه ٠٠ عساكرك بيسموها اكراميه ٠٠ ضرائب !

حوافز ٠٠ !! جهد زايد ٠٠ حلوان ٠٠ ! اشمعنى أنا ٠٠

يعنى ٠٠ هو أنا اللى واقع من قعر الفرده ٠٠ هع ٠٠

س : والله دمك خفيف ٠٠ ( يضحكه )

ح : ايوه ياراجل أفرد وشك ٠٠ وزيح كرشك ٠٠ امال والا خايف  
رموشك تقع ؟!

وز : ايوه كده علشان نوصل ٠٠

ح : نوصل ؟ ٠٠ داحنا وصلنا من زمان ٠٠ شد أيوه ٠٠ ده جاهز

تمام ٠٠ يابا ٠٠ معلم ٠٠ قرارى ٠٠

س : حلو قوى الدخان السخن ده ٠٠

وز : مش كده ! ٠٠ ياجدع ! ٠٠ عيب تعمل فيه كده قدام الناس ٠٠

ح : اسكت انت ٠٠ حينبسط قوى وكله ينحل ٠٠ جاك حل وسطك

خايف عليه ٠٠ ليه ؟

س : بس انت مش حتضحك عليه ٠٠ ياللا ٠٠ ماعدش وقت نضيعه

وح تضيع معاه ٠٠ المغرب حل ٠٠ ووجب الشنق ٠٠ ايه اللى

عندك ؟!

اذا الدوا طلع شفا ٠٠ والغمة انكشفت عن الامه ٠٠



كان بها .. لك الاكرام .. وان ماكانش .. ربيته ورقبتك  
.. هاما ..

قول يارحمن يارحيم .. طاروا ..

ح : ده واخدها جد قوى .. حيندمج ويبوظ الدنيا

( يفوق السلطان وينحمق )

س : وح اكسر كل الجوز حقتك بتتك .. وامنع شرب الدخان  
السخن ده ..

ح : ها .. ها .. لا .. وانت تمام واحنا تمام .. وميت فل  
وعشره ..

س : انت باين نصاب .. ومافيش حل عندك ..

ح : لا .. داحنا نفهمها وهى طايره يابيه .. يارب ياسلطان ..  
وصدقنى .. ح تبقى بيه كبير قوى .. احنا عندنا الدوا ..  
والحل لكل الاسرار ..

.. داحنا اكمنا عارفين الحل .. حششنا .. لا زرعنا ولا  
قلعنا .. قلنا ايه .. خير الأمور وسطها .. نقوم الدماغ  
دى وايه ؟ نخرمها ونلهلبها .. بدل ما تلهلبنا هيه ..

س : هيه مين ..

ح : الجوزه ..

س : جوزه مين ؟

ح : القضية ..

س : قضية ايه ؟

ح : عمك شنطح ..

س : ماله ؟

ح : جالك ينطح .. تديه ايه ؟ ..

س : ايه ده .. لعبه دي .. آه فهمت ..

ح : يافيهم انت يا عاقل ؟

س : طبعا .. أنا السلطان لازم ولا بد أفهمها وهيه طايره ..

ح : اسم الله عليك .. آيه الحل بقى يا فهميم ؟ ..

س : ده بيسألنى يا وزير .. ياسياف ..

وز : ده بيهزر ، أصله بيحب الضحك .. يخرّب بيتك حتودينا فى  
داهيه !

س : بيضحك علينا يعنى ؟ .. ياسياف ..

ح : لأ .. ماتقولش كده .. احنا ما بنضحكش على حد .. احنا

اللى طول عمرنا مضحوك علينا .. ازاي نضحك على سيادتك

معاذ الله .. واحنا اللى شلنا الهرم على اكتافنا عشان يندفن

فيه اللى زيك .. وماقلناش ليه ؟ ..

وعملنا مراكب زينه وتجاره ركبها اللى زيك وقعدنا احنا فى

قعرها تقدف .. وبرضه ماقلناش ليه ؟ ..

وفتنا ع الصحرا كان تخضر من خطاويننا وشرفك .. ولهفها

اللى زيك .. يابيه ..

وكتمنا قولة ليه ؟ ..

عشان كده احنا عارفين الحل البريمو السحرى .. وساكتين

خرسانين .. حششنا عشان نعرف نكتم كويس ..

- وز : انت ح قلبها غم ليه داهيه تغمك المغرب حيدن ..
- ح : ما يدن .. طول عمره بيدن وطول عمرنا كويسين ..
- بس هومن السلاطين اللي مش فاهمين ..
- س : خش في الموضوع .. وياللا .. بلاش لف ودوران وقلة أدب !
- ح : شوف ومع انك ولا فاهم كلمه م اللي أنا قلته ..
- مش قصر نظر لكن قصر كلام .. ياسلطان الزمان ..
- الغمه حاظه على بلدك ومدنيتك اللي بتولد فقر وغلب وكذب
- ونكد .. علشان بلدك ياسلطان الزمان ياملك الكوتشينه ..
- بلدك مليانه ( اولاد حرام )
- بس .. خلاص ..
- س : ايه ده ؟
- ح : الحل ..
- س : ده بس
- ح : آه .. بس
- س : اولاد حرام يعنى ايه ؟
- ح : طبعا .. مش حتفهم .. منين أجيب ناس ..
- وز : أنت واثق من اللي قلته ..
- ح : طبعا ومتأكد .. اسأل اکتافی واجنابی .. اسأل الفقافیق
- والنفانیق والباقیق ..
- اسأل خوف اللي يتكلموا أو ينطقوا .. اسأل .. امال الهباب
- ده كله كان ليه ؟! ( يرفع الجوزه )

عمر المدفع ده ماطلع فشنتك .. مع ان المدافع المدافع كلها  
فشنتك لكن تعمل ايه .. اولاد الحرام ماخلوش لأولاد الحلال  
حاجه ..

مخلوش ايه ؟ .. حاجه .. !

س : انت فاهم حاجه من تخريف الراجل ده ياوزير !؟

وز : فاهم يامولاي .. بس مش عارف بالضبط .. صن علينا شويه  
.. يعنى ايه البلد مليانه اولاد الحرام دي .. - يخرب بيتك !

ح : ولو تنصفوا البلد منهم .. حتبقى البلد تمام .. والواحد يروق  
وينام .. وياكل حمام .. مع الملايكة ..

س : لكن انت جاي تحل اللغز بفزوره ياراجل انت ؟! أنا ح أقطع  
رقتك حالا .. ان ماقلتش ح اعرفهم ازاي ! ولاد الحرام  
دول .. وانصف البلد منهم ازاي ؟ ..

ح : تعرفهم ممكن .. ادلك .. لكن تنصف البلد منهم ، دي  
ما اضمنهاش ؟ ..

وز : طب قول لنا نكشفهم ازاي .. على الأقل ..

ح : شوف ياسيدي .. ياللي ماسيدك الا انا .. لا ..

ماينفمش .. كده .. اتعد وروق .. وشد .. ايوه لازم تشد  
.. وتخلي المنادي يلف .. ويقول : .....

( يتداخل طبل المنادي ضعيفا ثم يشدد يدور المنادي بين  
المتفرجين يخبرهم بما ينبغي عمله ) ..

المنادي : بأمر سلطان السلاطين

أبو عمه مبرومه طبقتين

اعلان لكل البنى آدمين

صغار كبار شبان نساوين  
يتجمعوا كلك في الحال  
في قلب ساحة قصر الطين  
من أجل ما نحل مشاكل  
بلدنا كلها في دقيقتين  
الواحد اللي حيتجراً ..  
ويسك شيخه وأستاذه  
ومعلمه قلمين جامدين  
يصرف له بيت المال في الحال  
من الذهب جنيهاً ثلاثين  
واللي ح يرفض .. بالكرباج  
يجلد بشده على الجنبيين  
لحد ما ننسيه اسمه ..  
وشماله يبقى كأنه يمينا ! ..

\* \* \*

## المصفة

( طبل وبروجى يبدأ بهما احتفال ( اضرب واقبض )  
حيث يتجمع الخلق ويجلس الملك ليبدأ التنفيذ - طابع خاص  
وتأثير مدروس بعض عمليات الصفع تثير الشفقة وأخرى تثير  
السخرية والفكاهة ويمكن ارتجال مايعن ويفيد - دون تزيد )

### نموذج واحد

العجوز : يا ابنى حن عليه ، فرصة وجت لحدك ..  
الشاب : يا ابويا لأ .. تنقطع ايدى ولا أمدها عليك ..  
العجوز : الدنيا صعبه ، وحتى علامى مافادش - ٣٠ ذهب ح  
يعتقوك من الهم والديون ..  
الشاب : يا عمى أروح من ذنبك فين ؟ ..  
العجوز : ربناغفور ، دى نجده من السما .. حتلاقى حته تتاويك .  
الشاب : أموت ولا اضرب اللى ربانى ..  
العجوز : فقرى .. ياخلق فى عرضكم اقنعوه ما أنا ياما انضربت  
على قفايا وبيلاش .. قولوا له ان كلنا مناخيرنا لفوق واحنا  
ملزوقين على قفانا .. فى البيوت الشوارع .. ياخلق دول  
٣٠ من الذهب الابريز .. هو حد حيموت من الضرب  
ياضنايا .. لكن حتموت م الجوع !! ..



## نموذج تانى :

العجوز : مصمم تضربنى يا ابنى ؟ ..

الشاب : معلهش بعد اذنك برضه .. حاجه زى لفحة الهوا

العجوز : هيه حصلت .. تتنكر لتعليمى فيك يا خساره ع الجدعان

الشاب : ماتحبكهاش قوى .. بعدين ابقى ادينى ميت قلم ..

حيجرى ايه ؟ .. دى شكة دبوس ونفلسع بالمعلوم ونبقى

الاجه والسطه .. وح اشوفك برضه ..

هو انا ح اقب لوحدى .. انا ح اضربك على القفا كده خفيف

.. خفيف .. وانت تعمل الشويتين بتوعك .. نتأبج ، ونقسم

.. وسلم لى على البتاع ..

العجوز : حسبى الله ونعم الوكيل .. فى علامى وتربيتى فيك ..

شكيتك لمن رفع السما وقادر يخسف بيك الارض ..

الشاب : ما يضرش .. ثلاثين دينار ذهب .. نصوم لهم كفاره ..

هاو ..

( بدون افتعال يتقسم الشبان الى قابضين ومضروبين

جلدا لرفضهم الضرب )

س : خلاص يا وزير الهم ؟

وز : خلاص يامولاي .. كل شىء تم ..

س : دول اللى ضربوا وقبضوا .. طبعا .. حلوين ! .. جدعان !

سمعوا الكلام ..

وز : طبعا يامولاي .. كلك فراسه ..

( الحشاش يضحك معلقا على مايجرى بطريقته )



حالا تقطع رقبة المجرمين دول .. حالا .. عشان البلاد  
تنصف ..

( يتدخل نصيص )

نص : لا .. حياك .. مش للدرجة دي يا ملك .. يطق لك عرق  
( حيص مدمج )

س : لابد من تطهير المدينة منهم لانهم أس البلاء .. وسبب كل  
المصايب .. مش انتوا اللي قلتوا .. آدينى بنفذ اللي  
قلتوه ..

انت الشعب وده وزير من الشعب .. ياللا يا جلا ..

نص : الله ، نسيت نفسك ؟ مين اللي بيتكلم ومحموق قوى كده ؟  
انت ؟ طب معلم قهوه جايز .. عمده استحملناك .. تنفع  
برضه .. انما سلطان يا حيص بيص .. ماتنفعش ..

س : اخرس .. يا جلااااد .. انا سلطان بن ..

( يقاطعه ضاحكا ) ..

نص : فوق .. ما انا اللي مسطناك .. حتعملهم على انا ..

حيص : انا قصدى ان ننصف المدينة .. لازم نتخلص منهم عشان  
تتطهر وتتطور .. ده الطبيعى .. وده اللي لازم يقوله الدور  
.. والا انت غاوى تقطع كل سكه نمشى فيها ..

نص : الكلام ده لما يكون حيص بيص قاعد مع نصيص بياخدوا  
ويدوا فى الهجيص انما سلطان البرين والبحرين .. اللي انت  
كنته لو فهمته ح يعمل حاجة تانيه خالص .. والا يضيع ..  
يا ابنى .. دانا فايق لك اكثر من حشنيش ..

حيص : طب وحيعمل ايه سلطان المدينة دي .. مش نكمل للناس  
الحدوته .. لازم حبسهم طول العمر ، جلدهم ، نفاهم ..  
لازم يعمل حاجه .. !

نص : طبعا .. عمل .. حبسهم ، بس فى قصره .. نفاهم ، فى  
وظائف متعبه .. مرعبه .. ايشى جباة ضرايب .. ملتزمين ..  
.. خشداشيه خازنداريه .. حكمداريه .. استداريه ..  
ومخبرين .. وخلافه .. أى ملك أو سلطان أكيد حيكشف  
فيهم مواهب تنفع عرشه عبيد مخلصين للى فوقهم ، مادام  
عندهم قلب يدوسوا ف قلب اللى تحتهم .. حيلفوا آه ، لكن  
حيملوا بيت المال .. بالمال .. ويشغلوا الأشغال .. ويجمعوا  
الأموال .. ويروجوا التجاره ويعلو مقام الاماره ! ..

حيص : دانت دماغك باينها مخرومه يانص .. عرفت الكلام ده منين  
.. ده كلام حشاشين ..

ح : احسدونا بقى .. دى أدمغه متكلفه .. قال جييته منين ؟ ..  
جييته منين صحيح يانصنيص ها .. ها ..

نص : من تواريخ المدن وأحوال الزمان .. ياسلطان الزمان قوم كمل  
اللعبه ! ..

( مجموعة الذين قبضوا يرقصون وينشدون .. كل معه  
أدوات عمله الجديدة يرتدون الأقنعة .. ينشدون نشيد القصر  
فى قوة يتضائل معها الجانب الآخر .. وحيص بيص يعود  
ملكا .. حركاتهم تبرز تفسيرهم المناقض لكلمات النشيد .. )  
احنا رجال القصر العالى .. واصحاب الطبلية

مانحبش كلمة وأنا مالى .. ونحب الحريه

نسهر نحمى الملك الغالى .. والشعب ف حنيه

نتعكن من الكيس الخالى ٠٠ دى الأعمال بالنيه  
داحنا رجال القصر العالى ٠٠ ياويل الحراميه !!

( حيص بيص ونص نصنيص والجميع يضـحكون  
ويهنئون أنفسهم وكأن السهرة انتهت ويبدو عليهم السخرية  
من ضيوفهم ٠٠ الذين وجموا ٠٠ يجرى أحد المخبرين الى  
رئيسهم بورقه ٠٠ يقتمر ولكنه يكتم غيظه بعد قراءتها ٠٠  
ولكنه بعد ما يلاعب الساخرين بابتساماته الصفراء وحركاته  
المرعبة يوقف الضحك والمرح بقسوة ! )

\* \* \*

## شم البصل

المخبر : خلاص .. خلصتوا ؟ رقصتوا ؟ واتمسـخرتوا كفايتكم ؟  
اللى سماها كفر حماقه ماكذبش !!

اسمع انت وهو اسمع .. كل عمال البنا من بكره .. يمشوا  
على بلادهم من طلعة الفجر ..

الفلاح : والمحطة ؟ ..

المخبر : مافيش محطه .. خلاص .. بلدكوا ماينفعش لها الا موقف  
حمير .. يابهايم ..

حيص : والقهوه اللى صرفنا عليها دم قلبنا ولقينا سبويه تغطى  
مصارييف الفن ..

المخبر : مافيش قهوه .. ياسلطان الزمان .. ياملك الأونطه ..  
وانت وهوه بالذات لو رجعت ولقيتكم مالميتوش عزالكم ..  
نهاركم حيبقى طين .. وانت استنى عليه .. لك حساب ..  
يا ابن زهيره ! ..

الفلاح : والكفر يرجع تانى شمس الدنيا تمر عليه وتفوت .. والزمن  
يسبقنا أكثر ما هو سابقنا .. مكتوب عليك ياكفر حماقه ..  
زى زقمانه .. تفضل فى الضلمه .. تعيش فى الضلمه ..  
محروم م النور لحد الموت ..

المخبر : من اعمالكم سلط عليكم .. كفر حماقه ؟! .. عايزين الاسم  
المقرف ده ينكتب فى الخرايط والتذاكر ؟ فضيحه .. ! فضيحة



عالمية ! .. فى الدنيا دى بحالها حد قرا أو سمع عن بلد  
رسمالها اسم بيفضح عقل رجالها ! ..

الفلاح : نغيره ياعم .. الاسم اللى مش عاجب نغيره .. دى حاجه  
سهله .. يغور الاسم واللى بدعه .. المهم المحطه ..

زق : هيه اللى حتغير حياتنا .. ياجدعان .. أنا أما غيرت اسمى  
ضحكتوا عليه أكثر .. مع انى غيرته عشان انضحك عليه ..

الفلاح : انضحك عليكى لما غيرتيه .. لكن البلد مش حينضحك  
عليها لو غيرت اسمها .. دى حيبقى لها محطه .. والوابور  
ياخد ولادها .. للمدارس للمدنيه .. وتدخّل لها الكهربا  
والنور .. صدقونى ..

فلاح : كنا بنحلم نركب الهوا سوا ..

آخر : والمحطه كانت باب للحلم ..

المرأة : غيروا ( كفر الحماقه ) غيروا لها اسمها .. انشالله تبقى  
كفر زفت ..

المخير : أنا ما عنديش كلام .. مش مصروف لى .. كله على بيته  
يروح ..

وابقوا قولوا للحكومة .. غيروا لها الاسم .. ياسلام ..  
كان أصول سموكم كفر فتاكه .. مين يازقمانه حيدفع اجرة  
التغيير وتكاليفه .. لسه فيه تحت البلاطه .. ؟ فاكراه انه  
حاجه سهله يغيروا اسم بلد .. فين مضاريف اللجان ..  
والانتقال .. وبدل سفر اللجان .. ودمغة التغيير ياروحى ..  
غيروا لها اسمها ؟ ومين حيبحث فى تاريخ الاسم وأسبابه ..  
وليه حنغيره .. هه .. غيروا لها اسمها ؟! مين هنا منكم  
جدع وعامل فهلوى ؟ .. عشان يفكر فى تكاليف طبع شهادات

الميلاد .. الجديدة وشهادات الوفاة .. من يومين ما كان  
للكفر ده اعشاش فى الخلا .. وسجلات الضرايب ؟ ..  
وعقود البيع وأوراق المحاكم وشهادة القرعة من أيام ما كانت  
بدلية ؟ .. وبطاق البنك والتموين وعقودات الجواز ..  
والطلاق .. واللى واللى .. ده تاريخ الكفر والا حتشطبوه  
.. ايوه مادام حيص بيص بقى سلطان .. يجوز .. اسمعوا  
.. من غير كلام .. الأوامر عندى قالت كل شىء يرجع لحاله  
.. وكل واحد على بلده وعلى بيته .. مافيش محطه ..  
ولا قهوه .. ولا تشخيص بعد النهارده .. والسلام ..

### ( يخرج مخلفا الذهول )

حيص : لأ .. لأ .. لأبقى لأ .. فيه تشخيص طول ما فيه دم ..  
آه .. وأنا لسه سلطان الزمان .. وح أفضل لآخر الزمان ..

زق : ح تشخص ايه تانى يا حيص بيص يا حبيبي .. خلاص حتنام  
الناس فى الضلمة .. مافرقتش معانا .. الضلمه خدنا عليها  
.. أهو حلمنا شويه بالنور .. كفايه علينا ..

حيص : لأ .. أنا لسه عندى فى الجراب ياما .. اقعدوا يا أولاد  
ماتتكمروش .. لأ .. مش حتتهشنا الوحوش .. لأ .. قوم  
يانصنيص .. قوم نكمل ..

نص : أنت يظهر عجبك اللعب الملوكى .. اوعى يا حيص بيص ..  
دى لعبه خطيره يا حصحص قوى .. وانت ما انتش قدها ..

س : أنا قلت اخرس .. ياوزير .. انده الجلاب وخليه يخرسه ..  
( الحشاش يحاول الاختباء .. ولكن ضياع الجوزه عندما  
اخفاها يعطله طول الوقت )

فلاح ! فضها دلوقت .. مش وقت الجوزه لايمها .. مش شايف  
قلبت جد ..

( رجال القصر يلتفون حول السلطان يدورون فينكمش  
الجميع الملك والوزير في الوسط ) ..

ح : فينك ياوش المصايب .. فين الجوزه حبيبة قلبي ؟ .. وسبب  
البلاوى ! كان كل ده ليه ؟ .. ماكانوا تايهين دول ف دول ..  
وساعات كنا نلقى من دول .. في دول .. ومن دول ..  
في دول .. النهارده كله سن اسنانه .. ودول .. حيناموا في  
الضلمه ولسه حيحلموا بالنور .. يابوى ..

س : دبرنى يا وزير ..

وز : التدابير لمولانا الأمير ..

س : ياسلام .. دانت اتنجرت قوى .. بقت التدابير ليه دلوقتى  
حتى ماهيش لله حتى !؟

اعوذ بالله .. امال انت بتعمل ايه ؟ .. لما انا اللي ح ادبر  
.. والا هيه مناظر على الفاضى ..

و : جزء م الملك الوزارة .. احنا برواز الاماره ..

س : ياسلام .. برواز ؟ .. خشب بقى والا ورق ..

عايز تهرب والسلام ..

و : لا يامولاي معاك .. بس الكلام آخذ وعطا .. واللباقه من اللياقة  
.. والاثنين صنعة اللي تحت أمرك .. أنا عقلى وروحي رهن  
اشاره من طرف صباع حضرة جلالتك ..

س : والبلد !؟ ..

وز : مالها البلد وحشه البلد ؟ .. حلوه البلد .. نايمه في برميل  
عسل .. واحنا ما صدقنا لمينا ولاد الايه .. ولقينا لهم اشغال  
وأعمال تصونهم م الخيانه وم الحرام .. ومراكز تحمى

نفوسهم الضعيفه م الانحراف .. كلهم صاروا بظلك يستظلوا  
.. يشربوا العطف اللى انت نبيع بحره .. يفرقوه ع الناس  
حنان .. يدرسوا العدل اللى انت بدعت أمره .. يعكسوه ع  
الناس امان .. باقى ايه ؟ .. كل شىء هادى وتمام ..  
س : البلد فى الضلمه عايشه .. لو يغيب البدر ليله بتبقى كحل ..  
يكتروا فيها اللصوص والجهله واللقمه الحرام ..

وز : ويبقى جوها شعرى وسساحر .. الظلام سستار على دنيا  
الغرام ..

س : ده كلام فارغ .. وزور ..

وز : لما شعبك ياملك حيناموا بدرى يصحوا بدرى .. بكل همه فى  
الصباح ..

س : الظلام غمه وخوف .. البلد لازم تنور ..

وز : مافيش كفايه فى الخزانة ..

س : يعنى ايه ؟

وز : يعنى خطتنا على قد اللى عندى .. واللى جاى قد اللى  
رايح ..

س : انما السلطان أمر .. وأنا امرى لازم يطاع ..

وز : آدى الله .. وآدى حكمه .. لو حداك فى خزينتك الخاصه  
حاجه باقيه منك .. تحت امرك ..

س : ( يتردد لحظة ) .. لو مافيش ح اخلقه .. فى سبيل النور  
أنا ادفع رغيفى .. لجل شعبى .. خد .. وآدى مليون دينار  
لجل ماتنورلنا ليل المدينه .. خلى الشعب الطيب الغلبان  
يشوف أفلام ويسهر فى القهاوى .. يقرأ ميكى وألف نكتة

.. ويشوف ويفرح بالمشخصاتيه وأصحاب الفنون .. أنا  
عايز النور ينور عقل بلدى .. لوح اشوفها فى الظلام تانى ..  
ولو لحظه دقيقه .. راح أطير رقابيكم كلكم .. انت فاهم ..  
خد أدى .. مليون دينار .. وقصادك ليل نهار .. بعدها ..  
لو مافاضش النور على ليل المدينة وهنا ناسها .. اعتبر  
نفسك حماره قطعنا راسها ..

( يخرج السلطان ويفكر الوزير من لازمة موسيقية ساخرة  
ستتكرر مع الآخرين بعد ذلك .. نفس الحركات نفس النغمة )

وز : مليون دينار ؟ .. شايل على قلبه مليون دينار ؟ .. تحت  
البلاطة !! وساكت وعمال يقول البلد فى أزمة وكلام ملوش  
لزمه .. ايه اللي جرى للراجل ده من يوم الحشاش ما  
قابله ؟ يكونش دماغه انخرم ؟ .. لا .. الحكاية عايزه تدبير  
وتفكير .. وانا فى دماغى مليون فكره ..

ح : لأ .. كثير .. مليون كثير !! انت لسه جديد .. كفايه نص  
مليون فكره .. لجل الأمر يمشى .. بكره تفهم ..

وز : ايوه فعلا .. نص مليون فكره تكفى .. ياكبير الامناء ..  
( يدخل كبير الامناء على نفس النغمة )

الكبير : امر مولاي الوزير

وز : اسمع ونفذ اللي أقوله بدون مناقشه .. عندك انت مهله واحده  
- للمغربيه .. مع ندهة الله اكبر .. البلد توج نور عايزين  
تلعلط .. الملك أمر ، والملك أمره قانون وقد رصد من حر  
ماله - الخاص جدا .. نص مليون دينار .. لانارة المدينة  
حاره حاره - ودار دار .. والا اعتبر نفسك مع الادان حمار  
وراسه طار !! ..

( يخرج بعد ان يسلم له المبلغ )

**الكبير :** نص مليون دينار ياخبر .. ياخبر .. كبير الامناء عبر ..  
دى حكاية عايزه تدبير م الكبير ، وتفكير م الكير .. وأنا فى  
دماغى نص مليون فكره .. هايله ..

**نص :** لا فى عرضك ماتبالغش .. خف عشان تعوم .. ربع مليون  
على قدك .. لسه فيه رجاله بعدك ..

**الكبير :** أيوه فعلا .. يكفى انى اقدر أفكر وأشيل الهم شيل بقدر ..  
ربع مليون من الافكار كفايه .. يا صغير الامناء ..

**الصغير :** تحت أمرك يا كبير ..

**الكبير :** شوف يا ابنى .. الملك أمر ، وطبعا أمره واجب .. المدينة  
لا بد لابد يصير ليها نهار ومهما كانت المهمة .. احنا ليها ..  
وآدى الربع مليون م الدينار اللي مولانا رصدها للعمل ..  
عدهم .. ربنا بينا وبين مال العموم .. وعلى المغرب تجينى  
بعدهما تقيد المدينة كلها بالنور تجينى تقول تمام .. والا ..  
اعتبر نفسك ساعتها انك حمار ع المشنقه ومش لاقيين له راس  
يربطوا فيها اللجام .. ( يخرج ويتكرر الامر )

**الصغير :** شىء جميل .. وبسيط قوى .. المدينة مش كبيره يكفى  
ليها ميت ألف فكره عشان تنور ..

**نص :** لأ ده عاقل ومتودك ..

**ح :** فاهم الفوله .. وعال .. ده أكيد مخضرم ..

**الصغير :** كل فوله لها كيال .. وكل فكره لها عبره .. واحده  
واحده ، احنا مش مستعجلين .. كله بيمشى واحنا باقيين  
للابد .. علمتنا الدنيا ان اللي بيكبر فجأة يصغر فجأة لازم  
.. والا ايه يامعلمين ؟ يا كبير حرس المدينة .. تعالى حالا ..

**كبير الحرس :** تحت أمرك يا صغير .. ايه الأوامر ..



الصغير : عندنا م الليلة شغل كثير كثير .. الملك أمر وأمره أكيد  
مطاع .. واحنا كالعاده جنود ومجندين من أجل تنفيذ  
الأوامر ..

الملك عايز المدينة في عز ليها تكون نهار .. وأدى ميه ونص  
ألف من الدينار من خزينته الخاصة .. يعنى فلوس حلال ..  
اعطاهم لى هديه لجل عيون مدينته .. ياللا يا ابنى .. يكفى  
حتى المغربيه .. أيوه يكفى .. ياللا .. والا - اعتبر نفسك  
حمار ع المشنقة ومالوش دماغ للحمرقه ..

ح : والحكاية اتسلسلت ..

نص : كل خطوه بعد خطوه اتنيلت .. قبل ما يقيدوا القناديل ..  
واتقنذلت لحد ما وصلت لآخر السلسلة ..

ح : لرئيس عموم غفر الدينه ..

ر : غ : هع .. يا حلاوة ؟ .. بقى عايزها تنور كلها ؟ .. نقلب  
الليل المدغمش لنهار .. ياسلام ع الابهة وتكرم ع المدينة  
جلالته قال - ومن حسابه الخاص رصد لجل الاناره .. ميت  
دينار ! حاجه تقرف !! دى الجاموسه اللى دايره فى المدار ..  
اكيد ح تحرن لو حنديها علف بالميت دينار .. طب وكيف  
عقلى يفكر .. حاجه فقري .. همه طبعا لهفوها حمري  
جمري ( يدس النقود فى جيبه فى قرف ) ..

عمرنا ضاع كله فى تنفيذ أوامره .. والنهائة .. ميت دينار  
فى شغله غايزه ميت نهار .. الأصول الشخص منا يهيج يطفش  
من البلد دى لآى داهيه .. يلقى فيها اعتبار .. يا عساكر ..  
يا غفر .. اسمعونى يا غجر .. الملك حالا أمر .. تجمعوا لى  
هنا قوام .. جميع مشايخ الحارات .. جر جرهم ..  
جرسوهم وهاتوهم لى قوام ..

( ومع الموسيقى يجمع الغفر مشايخ الحارات حوله )

نص : كل عزومه وليها بواقى ..

وارحم انت لهفت الباقي

ح : حظك بمب اللي فضل حاجه ..

راسك للتفكير محتاجه .. ( يعزم عليه بالجوزه )

في زمن داير زى سواقى ..

ر غ : اسمعوني يا عجر .. الملك بالنور امر .. وكل صاحب بيت

.. عليه يجيب الزيت .. ويعلق على بابيه فانوس .. الخزينه

.. مافيش فلوس ..

وكل واحد منكو مسئول عن بيوت حارته قصادي

والليلادى .. انتو أحرار في اختياركم .. يالفانوس ..

يا المشنقه .. على باب دياركم .. وانتم أحرار في اختياركم

ياتيوس .. مشنقه والا فانوس !؟ ..

( رقصة نشطة تحت الكرايج - سمكره ومعاصر زيوت

- عمل نشط تحت الضرب الأغنية الراقصة تنتهي بفوانيس

مضيئة كالنجوم ) ..

كورس : شقق دقدق

لفق وفق

لزق عفق ..

كرباج ورا دى الحوجه بتحرق ..

قشـر نشـر

أفرز مزمز

عصر مسـر

زيتنا دموعنا شموعنا تبصر

خطط بطط

زبط ربط

واوعى تلخبط .. أو تستعبط

شـبـك .. حـبـك

شـلـل سـلـك

كل ماليل الويل اتلعبك

تلقى فتيل الضى يشقشق ..

حيص : بس انا كان قصدى .. مش كده يانصنيص ..

نص : كان قصدك ايه ؟ مين كان قصده ؟ دى مدينه وملوك .. أمرا

وسلاطين .. وليهم قوانين .. من مينا لعصر الملامين ..

ان الملوك اذا ..

حيص : ما انا كان قصدى ان نغيرها .. مش بس طاحونه ندورها

نص : احنا ياعم بتوع تفانين واللى علينا .. احنا عملناه ..

لا فى ايدينا نبني محطه .. ولا نعصر زيت للفوانيس ..

شغلتنا نفاك الترايبس ونحرر قلب المحابيس .. وعقول الجهل

ننورها ..

( مع الفوانيس التى تضاء وتملاً المسرح يغنى كل

المشخصاتيه ) ..

احنا اللى علينا ننورها ..

واحنا بايدينا نغيرها ..

مش معقول ح نبيض البيضه ..

وح نسلقها ونقشرها ..

ونسبها ازای الی هبرها  
داحنا عرقنا الی مخضرها  
ملیون سنه ساقیه ندورها  
یاکل لحمتنا جزارها ..  
یعصرنا لمونة الی عصرها ..  
لکن لازما ح نغیرها ..  
لما بفوانیسنا ننورها ..

**نص نیص : ویا الف اهلا ع الصحبه ديه ..**

شرفتمونا وان كان عليه ..

**اهدیکو قلبی یشهد علیه .. سیدنا الحسین ..**

**الحشاش : ویاالف مرحب ملعون یا جهلا ..**

الکون بیجری لا تقول لی مهلا .. ولا تمهل ..

الفن نورن .. مهما نعانی .. ویکره اجمل ..

وانا ان سقطت فخذ مکانی ..

وشیل .. یعینک عبد المعین ..

**حیص بیص : ویا الف اهلا ویامرحبنا .. الفن یلطش کالکهربا**

فاسمع ودقق .. مقق وبحلق

یاتشوف کویس .. یاتعیش متیس .. ع المصطبه

**یامشخصاتی .. شکشک وطبطب .. ضحک وکهرب**

نکته وآهن .. تحت السواهن .. نکشف دواهن ..

ونكون دواءا للمظلومين ..  
والف أهلا يا مغنواتي ..  
ماتشد حيلك .. صحى الناياتي ..  
انا طال سكاتي .. والجهل عاتي ..  
نفسى اقولها .. فى ريج مواتي  
مصرف قلوبنا  
مش فى جيوبنا  
وان كان ده عيينا .. واكبر ذنوبنا  
يارب نفضل كده معيوبين ..

\* \* \*

( جزيرة بدوان - مارس ١٩٨٤ )

## الليلة فنظرية

● قدمتھا فرقة السامر المسرحية بالثقافة الجماهيرية عام ١٩٨٤

– بوكالة الغوري

اخراج : سمير العصفوري

● قدمتھا فرقة منفلوط المسرحية في نفس العام

من اخراج : مسعد الطنباري

● قدمتھا فرقة زفتي المسرحية في نفس العام

من اخراج : السيد فجل

● قدمتھا فرقة بدواي المسرحية

من اخراج : سمير العدل

واشتركت بها الفرقة في مهرجان المائة ليلة عام ١٩٨٥ على

مسرح السامر ..

● قدمتھا فرقة شباب من هواة المسرح بمركز شباب الهرم وتجولت

في قرى الجيزة ..

من اخراج : محمد عبد المقصود ..

● طبعت بمجلة المسرح العدد ٢٤ / يوليو ٨٥

● قدمتھا فرقة السويس المسرحية

من اخراج : أحمد منصور عام ٨٨



# واقراً الفاتحة للسلطان

فرجه مسرحيه

- 
- قدمتھا الفرقة النموذجية بالثقافة الجماهيرية باسم .. الفورى يبنى الهرم الأكبر عام ١٩٨٦ بوكالة الفورى
  - من اخراج محمد سمير حسنى وقام المؤلف بدور السلطان الفورى .

## ملاحظـة

- تجرى هذه الفرجة على ليلة من حكم الغورى السلطان الملوكى بكل ما تعنيه كلمة ( مصر الملوكية ) من أصداء ..

- لا نريد أن نعيد ونزيد حول - الممثل الشعبى والتشخيص وقواعد فن التمثيل كما أنزلت .. فالدخول والخروج والاهاب والغياب والتقمص والتحنشص ، كلها ملك ايدين الفتك من الممثلين .

- المسرح فى أشد حالات واقعيته فنطزية ومنتعة مخطوفة من براثن الواقع المر للمشاركة والتشارك والمحاكاة والتعارك ! .

- مافيش أى حساسية من استعارة بعض ملامح ( سور الصين ) ولا صفات ( هوانج تى ) .. فالسلطان والقيصر والملك والشاه والامبراطور والزعيم الأوحد واحد أحد من الأزل للأبد والكاتب المسرحى مجبور لما يحل بيه .. لكن الذرة والنسبية - مسألة نسبية - لأن لسان السياسة الطويل سلطة ومعارضة .. مش قادر يعمل علاقة مع الأخرس العام .. وكل عام وانتم بخير ..

- نقطة -

- هذه ليست ارشادات اخراجية ولكنها هموم نقدية .. عند مؤلف منقود أو منقوط !!

- نقطة ثانية -

- الشخصيات التى دعيت للحفل مش كل ما يجب أن يوجد ..

أنا آسف للى ما افكرتهمش لكن الحالة المزاجية الآنية التى كتبت  
فيها المسرحية فرضت دول كتنويغات وظلال للتيمة اليتيمة !

- نقطة فاصلة -

- على المخرج .. أن يتناسى كل هذا .. ويحتفل مع أى  
غورى بأى نصر فى أى عصر .. وف أى مصر أيضا .. وان كنت  
أفضل مصر المندفعة الى كهوف العصور ( العثمانية ) المظلمة ..  
طبعا !

## بيان لهام لأهل مصر المحروسة

الغورى يبنى الهرم الاكبر !

وشجرة الدر ترقص القاسم مع ابن القاج بطل رسالة الغفران !!  
وكليو بطة تصيد للغورى (السمك المشوى) في باينوالحمام والججاج بن يوسف يدرب  
المتقنين على اصول الحكم حتى لا يفلت لنهاام .. بينما لا يكف ابن العاص وابوالعباس  
السفاح عن الشجار والنقار من اجل (امة واحدة ذات رساله خالده) على الدوام ..!

وسليم العثمانى يبارك بنفسه (انتصار الغورى على البرتغاليين) الذى خلده عنتره بن شداد  
بحد الحسام على خد عبده شعرا ونثرا ... رغم انف التاريخ وابنه الغورى تحث عن عربيس  
يشكمها التحيه ! وتعا طيه الغرام ... والام المصرية تشهد مقتل (ابنها الوحيد)  
يا حرام . بينما السلطان تنفقع مرارته من اشاعات يطلقها (شاعر اخرس) ومهرج  
(بتاع كلام) والشعب المصرى يتفج على الجميع (فى وكالة الغورى بالحسين كل ليله طوال  
شهر يوليو ١٩٨٦م) .. والدعم مفتوحه لحضور العشاء السلطاني ...

فى المسرحيه التى كتبها ولفقها الشاعر سمير عبد الباقى .. ولحن اغانيها ونمقتها (عمر الشاوى)  
ولونها وزوقها حسين العزنى وهندسها ووفقها محمد سمير حسنى .. ويبلعها وياكم من جوق  
الفن المرسى بالثقافه الجماهيرية محمد عمر ونور الدين وكريم الحفناوى ولبنى ونس وحمى بسير و  
محمد عبدالرزق وناوليزه وعلاطف عبدالقاسم وسيزالهر وهري وهري وهري محمد والعمري ... برصطفى شعبان  
وعلى سلفه وكثير غيرهم منهم المؤلف بنفسه (يا اهل مصر المحروسة يا كرام ..

لا يجب ان يفوتكم هذا الحفل العجيب الغريب ... الذى يجمع فيه ابطال التاريخ  
معكم على سفر واحد من هنا لبلد لاق وعلى هم واحد تصبره الاشواق المصرية  
وضحككم القلب يجمع له العشاق فى سهره عصرية ...

داللى بنى مصر كان ناوى يضحكها ... خلط المرار بالعسل  
والسم بالترياق ...

فا ضحكك واياك تموت يا طويل العمر !

## الجزء الأول

( افتتاحية غنائية بالطبل والزمر يقدمها الجوق كله الأقنعة  
والشخصيات الكومبارس والعسكر ٠٠ )

● اقرا الفاتحة لسلطان العصر الذهبى

ف أيام الممالك

أيام كان فيها الشعب المصرى يادوب

الله لا يوريك

من غلبه ماشى يدارى عذابه ف ضلة أقرب حيط

والكذب غنيمه - ان كنت جعان

وان قلت كلام الحيطه ودان

تنده كرابيج الوالى لو اتكلمت ترد عليك ٠٠ !

● اقرا الفاتحه لسلطان الغورى اللى مايعرفش العيب

ولا عارف ايه اللى مخبى علشان حضرته فى الغيب ٠٠

والناس فى طاحونة العيشه فريك

فى السوق بتموت م الجوع تماحيك

أو فى السرايب بتهم تلاكيك ٠٠

وان كنت مريض بالشوق للعدل لا يمكن تلقى طبيب ٠٠

● اقرا الفاتحة لسلطان البر الغورى وقرب منا وشوف -  
المعزه حتصبح كلب وابن الكلب حيبقى خروف - واللى حيبص  
لفوق ..

حيموت مشنوق مخنوق مخزوق

أو يتشاكل بالزوق - على حربة رعب وغدر وخوف ..

- وان كنت حترضى تعيش - كده زينا تاكل عيش

دراويش حرافيش زى الخفافيش - لكن من غير خرابيش

خليك زينا فى الصبح بسيط - والضهر حويط - والعصير

شاويش واهتف ويانا وقول للغورى - ياغورى اسم الله

عليك !!

( يصعد الطالب من وسط المتفرجين ملفتا انتظارهم

بوسيلة ما من على المسرح يستغربون ولكنهم يتقبلونه )

الطالب : النهارده المحروسه فى عيد

عيد تاريخى ماحصلش قبل كده فى التاريخ ولا يحصل ..

النهارده فى القاهرة أم الفنون والجنون ..

كل الخلق واقفه على رجل واحده .. وبترقص على الواحده

ابتهاجا بعودة عسكر الأسطول السلطانى .. منتصرا على

البرتغاليين ..

بفضل حنكة وشجاعة السلطان الحاوى لكل فضل الان ..

الملك الأشرف أبو النصر قنصوه الغورى الأشرفى ..

الذى زالت بسلطنته الشكوك والظنون .. وقرت به العيون ..

( السلطان يستعرض نفسه والأقنعة تزفه الى الداخل )

المشاعر النهارده فى المحروسه فياضه .. والسلطان

الفرحان قرر اقامة هذا المهرجان اظهارا للعرفان لابنائهم اللى

راحوا فى البحر غدر ، واللى حيروحووا فدا للسلطنة والأوطان

( يدخل البلهوان العجمى الشـقنـجى مع زفة امامهم  
نموذج للاهرامات الثلاثة والطالب كمنيع أحد المواكب  
يواصل )

( طبول جبارة ويقود المهرج الأغنية )

المهرج : يا أهل المحروسة ياغاليين ، ادبنا البرتغاليين

لما فى المالح قابلونا وعلى خوانه جم هاجمونا  
بعزيمة الغورى لاقيناهاهم فى بحور الهند وتاويناهم  
وأسطه اللنش وراجعين

( الطالب تاخده الحماسة فيذيع مثل المذيعين )

الطالب : سيداتى سادتى لا تصدقوا ما روجه اعداؤنا عن هزيمة  
الغورى ..

فهاهو احتفالنا اليوم أكبر دليل على ..

( يتنبه نفسه فيتأسف )

أنا معذور .. لأن اللى أنا شفته هنا الحقيقة يهبل ويجنن ..  
ايه العزده ؟ .. تصوروا .. الناس كلها معزومه على سفرد  
واحدة من هنا لبولاق .. كمونية وألماظية وصوانى لحم هبر  
.. سمك مقلى ومتبل وعسل أبيض منيل .. وجبنه مقلية  
وطعميه محشيه .. واوزى ومحشى وحمام .. وعدس ! ..  
اشكال والوان .. ايشى وايشى ايه ده ؟ .. كل ده عامله  
للناس المحتسب المكتسح الكاسح الفالح .. بركات بن موسى!  
ابن موسى مين ؟ .. على الطلاق ده ابن فرعون ..

اللى يقدر يعمل سفره زى دى .. فى زمن أزمة وقحط  
ومجاعات زى ده .. ويدعى لحفلة زى دى .. ضيوف زى  
دول .. ده يبقى ابن فرعون والا لأ ؟ .. ياخبر أسود ومنيل  
ياجدعان .. دانا كلت أكل ! .. وقابلت كل أبطال التاريخ



العربي والمصري هنا .. كلهم معزومين النهارده ..  
وحتشوفوهم ..

( يقاطعه المهرج الذي يعود اليه مداعبا )

المهرج : لا .. لا .. لا .. لن يظهر كل الضيوف الممتازين هنا ..  
بعضهم فضل أن يبقى حضوره الاحتفال سرا .. لتجنب بعض  
التعقيدات الدبلوماسية والبعض الآخر توجه على الفور  
للجزيرة الوسطى ( الزمالك حاليا ) لينعم بمباهج الفنون  
والمتع الصريحة المباشرة ..

وكبار السن آثروا البقاء في الحريم لأسباب مرضية ..  
أما البعض الآخر ففضل صيد السمك لانهم مصابون ببعض  
الحساسية الجماهيرية ..

وأنا كلفت نفسي أن أخبركم بذلك ..

علشان ماحدثش يضيع وقته في انتظار ظهور حد يكون عايز  
يضحك عليه ..

أو يكون عايز يشتمه أو يشمت فيه ..

الطالب : معاه حق .. لان المؤلف له رأى في ظهور بعض الشخصيات  
بالذات وكذلك الرقابة

آه .. عنتره العبسى ولد شداد !؟

( يظهر عنتر وعبله - قناعان )

المهرج : عبله لا تفارقه لحظة .. لانه منذ أصبح سن الأشراف ..  
وبعد جوازه بست أشهر .. بدأت تنتابه حالات مراهقة  
صبيانية ..

الطالب : احم ..

- المهرج :** لا تتناسب مع عاشق وفارس زيه .. ايه ؟ ..
- الطالب :** وهاهو الحجاج بن يوسف الثقفي ، مؤدب أهل العراق الشهير ..
- المهرج :** جلا جلا ، ابن جلا ، متى أضع العمامه تعرفونى
- الطالب :** سمعته يؤكد للكثيرين من الضيوف الاكابر .. انه لولا الضرب بشده على أيدي أهل الكوفه .. لما أمنت الدولة مكر أهل دمشق .. أو الفسطاط ..
- المهرج :** برافو .. اضرب المربوط يخاف السايب واشخط فى المربوط يترعب العايب ..
- الطالب :** بشت .. هس .. آه هاهى شجرة الدر التى ولدت دولة الممالك من رحمها العاقر ..
- المهرج :** ومن شابه أمه فما ظلم .. واكفى القدره على فمها تطلع الدولة لأمها ..
- الطالب :** هى بدأت كل هذه المأساة يوم قتلت ابن زوجها توران شاء ابن صالح أيوب شنقا وحرقا وغرقا فى المنصورة ..
- المهرج :** ياويلتاه .. أول الغيث قطره ..
- ( يتوالى دخول الضيوف الأقنعة ) ..
- الطالب :** فاتح مصر عمرو بن العاص .. مهندس الدولة الأولى الدولة الأم ..
- المهرج :** يعنى الأموية .. ها ..
- الطالب :** ابو العباس السفاح الذى لن يترك له فرصة الانفراد بالساحة أية ساحة .. منذ أقام دولة العباسيين على أنقاض دولته .. فشتتها ..

المهرج : ان كنت فارس احنا كمان فرسان

وان كنت تعلب أنا يابطل العبان

وان كنت خدت الخلافة بحد سيف المكر

والتكحيم ..

احنا امتلكنا الزمام

بحد سيف الحسام ..

هيلا هوب ..

الطالب : وبنينا مجد الفتوحات بالقوة والايمان !!

المهرج : ( تأخذه الجلالة ) أمه عربية واحدة ذات رسالة خالدة ..

الطالب : واظننى رأيت بالقرب من البوفيه .. بهاء الدين قراقوش

.. وكافور ..

آه .. غير معقول .. من الذى أرى ؟

عبد الله بن محمد قائد ثورة الزنج .. سبارتاكوس بلاد

المسلمين ..

عجيب .. غريب ..

( عبد الله بن محمد مقيد ويدفعه حارسان بينما هو يقاوم )

المهرج : لا غريب ولا عجيب .. الغورى يحاول قدام الضيوف انه

يؤكد اتجاهاته الديمقراطية ..

عبد الله : عرفت لكن بعد فوات الأوان ، لما صحيت لقيت خناجرهم

بتحز رقبتى ..

الثورة والقصر ما يتقابلوش فى عزومه .. خلونى ارجع

عصرى .. خلونى ألحق عصرى .. خلونى أسبق عصرى ..

عارف انكم مش ح تخلونى لا أرجع ولا أسبق ولا ألحق ..

فاحذر يا من كنت شبيهى فى أيها عصر .. اياك ترقص على  
سلم أيها قصر !!

الطالب : وعلى فكره أنا سمعت ان سليم العثمانى .. موجود هنا .  
المهرج : قبضوا على تلاته أوغاد بيأكدوا انه بعد ما تخلص المسرحية  
الدى على طول .. حيزم مصر لأملاكه .. ويسقط الخلافة  
العباسية ويقلبها عثمانية للابد ..

الطالب : ما حدش يعرف حاجة عن المستقبل ! مين قال كده ؟

المهرج : كلام الناس ..

الطالب : مين ؟ ..

المهرج : كلام الناس ! .. الرجل الأولانى .. قطعوا لسانه فاعترف  
بالمؤامرة ..

والتانى .. نشره من ساسه لراسه ..

اما الثالث فسـلـخوه حيا .. واكتفى الاستادار بالانكار  
كدليل على التهمه ...

الطالب : اللهم احفظنا .. قطع ونشر وسلخ ؟ ..

المهرج : وطى صوتك حد يسمعك تروح فيها ..

الطالب : ( يزعق اكثر ) أنا ضيف هنا وعندى حصانه .. لاننى  
مكلف بتقديم الحفل .. وتقديم الضيوف للضيوف .. تفضلى  
ياسيدتى .. لا تخافى .. تفضلى ..

( تدخل الأم وابنها كقرويان يتفرجان مبهوران على المدينة )

الأم : الله يسـتـرك ..

الطالب : انتى من الضيوف ؟ ..

الأم : انا مش من هنا ..

الطالب : وانا كمان ، ماتخافيش .. انتى مين ؟

الأم : انى فلاحه يسترك واسمى ست أبوها ..

الطالب : تبقى ست الكل دانتي الشعب ، كل واحد هنا له اسم ولسان  
وبيزعق عشان انتى ساكته .. قولى حاجة وخذى راحتك !

الأم : رجلينا فأفأت من المشوار .. انا وابنى مشينا سنه لحد هنا

الطالب : دانتي وابنك تستحقوا تكونوا ضيوف الشرف .. سنه  
بحالها عشان تشاركوا فى حفلة الانتصار جيتوا فى الوقت  
المناسب ؟

الأم : سامع يا متولى ( يضحك دون صوت ) حنلق الفرحة ..  
وناكل ..

الطالب : كل الاكل ده من خيرك ، قلتى لى أنت منين ؟! ..

الأم : من بعيد قوى .. بس احنا أهل .. وقرابى مولانا - الأشرف  
اللى مايعرفش الكذب ولا العيبه ..

الطالب : ياه .. انتى حكايتك ايه ؟ ..

الأم : حدوته ! .. حكاية ولا الحدوته ! .. السلطان مر من عشرين  
سنه على بلدنا .. كان بيصطاد .. وتاه عن رفقاته .. آويناه  
.. وكان عطشان سقيناه وخايف طمناه .. وف حضننا  
داويناه .. ماكناش نعرفه سلطان ..  
حبيناه ..

الطالب : آاه ..

المهرج : وبعدين ..

الأم : ولا قبلين ؟ .. كلنا عيش وملح .. وسافر وفاتنا .. معلش

حيشيل هم مين والا مين .. شسايل هم الدنيا كلها على  
قرونه ..

احنا .. فقرا ونستحمل ، لكن لما الحالة بقت زفت والطاعون  
ضرب في الوادى .. جيت له .. ( توشوشه )

الطالب : ياخبر أسود ده .. ؟

الأم : حكمتك يارب ..

المهرج : انزل ياعم بالادان .. دى فيها ولا ألف مدنه .. ياللا ..  
( الله اكبر .. ) حكمتك يارب .. آن .. آن

الأم : فى عرضك ماتفضحنيش الا لما نعرف هو ناوى على ايه ؟ ..

المهرج : ( مشخضا ) تم التحفظ على بعض العوام الذين حلالهم  
التلفظ ببعض الكلام عن قرابتهم للسلطان .. بالحلال أو  
بالحرام .. قطع لسانهم من لغوغه .. وسلم بعضهم للزيني  
.. فلم يقر بما قاله .. فعصر من أصدائه ما اعترفش ..  
كسرت اضلاعه قال ما اعرفش لقطوا حلما بزازة بكماشتين  
محميين فى النار .. انكرو ما نطقش ..

الأم : انا ح ارجع بلدى ياريتنى سمعت كلام الناس

الطالب : كلام ايه ؟

بيقولوا انه مالوش صاحب ولا حبيب

قعد يتمسكن لحد ما اتمكن وأول ماشطح نطح الاتنين اللى  
سلطنوه ..

المهرج : مين سلطنتك

اخلىص منه

أياك تآمن وتسديه  
ولو عطاك ٠٠ آه ٠٠ خد منه  
واعمل له ان انت حبيبه  
بس أوعى يوم  
تغفل عنه  
لو زاغ ماتقدرش تجيبه  
اعطيه امان  
واكسر سمه ٠٠  
لحد ما يكشف عيبه ٠٠  
قنطر أبوه واخلص منه  
تحلو ليام ويطييو  
مين سلطنك !!

الأم : دول بيغنوها كمان ؟!

الطالب : ما انتى عارفه أهل مصر لا يطاقوا فى لسانهم لو طلقوها  
على أحد ٠٠

الأم : بيقول انه يبيع أعز أصحابه ٠٠

الطالب : هو مين اللى بيقول ؟

الأم : كلام الناس

الطالب : وبتصدقى كلام الناس ٠٠

الأم : ح يعد ايه الفقير

لو عاش نهار لانتصار

وايه ينوبه ان قلت م الموت



نهار الهزيمة

ما يطول في ساعه الحصار

الا خراب الديار

والغورى بطل المرار

فايز بكل الغنيمه ..

الطالب : وده برضه كلام الناس ..

الأم : الحمد لله أنا ابني أخرس

الطالب : أخرس !؟

الأم : خالص .. لسان الناس طويل وع الفاضى من أيام فرعون

وهمه نازلين كلام .. ويقولوا حنتغير ؟ امتى ؟ .. عندك

انت أخبار ؟ ماسمعتش حاجه ؟ ..

الطالب : لأ .. ماسمعتش

الأم : ما تسأل دول ؟

الطالب : دول من زمن تانى .. ولو عرفوا سرك حيفضحوكى

( يدخل ابن القارح مع الحرس وهم يسرون بخطوة

معينة وينشدون بطريقة معينة )

الحرس : انتصرنا .. انتصرنا .. وقول الله ..

واللى كان عايز يكسرنا كسرناه

عمر السلطان ماخيخسرنا

اللى على الكرسي احنا معاه

ابن القارح : ياأهل المحروسة تخطى الأعداء حدود الله وكسروا السد

اللى ذو القرنين بناه .. ليحجز بين المؤمنين والكافرين يريدون

سحب التجارة منا والذهب للهند غصب عنا .. لكن بفضل  
الغورى .. عاش ..

الأم : عاش يا اخويا عاش  
( يزغر للطالب )

الطالب : .. عا .. ش

(المهرج يأتى بطبلة ويقلد حركاته ويردد آخر مقاطعة )

ابن القارح : ولا تستمعوا لطبالين الاعداء .. اللي قالوا اننا  
اتحاصرنا وانهم غلبونا ..

كلا .. وألف كلا ..

قالها صعلوك ليس بمملوك .. بيتناول على مقام الملوك ..  
ويقولك ده كلام الناس .. ولد أرشل أهوج أهرج كداب من  
أصل وشه ..

ولكنا فى سبيلنا للقبض عليه .. وسـلـخه حيا .. ومن ثم  
محاكمته محاكمة عادلة .. فنحن متحضرون .. ولكن من  
يردد أكاذيبه .. فنصيبه حيصيبه من نصيبه .. وعاش  
الغورى ..

( - عاش .. عاش )

الأم : كداب واحد .. وموقف سلطنه بحالها على رجل

الطالب : وانتى جايه من آخر الدنيا بحكاية ممكن تقطع الرجل  
التانيه ..

الأم : احنا راجعين بلدنا .. أحمد ورينا يا ابنى انك أخرس ، احنا  
لا سمعنا ولا قلنا

( تسحبه وتخرج )

الطالب : سيداتي آنساتي .. سادتي

انا عارف اللي بيدور في دماغكم .. عارف اللي حيثقال عن  
الدراما .. وعن التاريخ .. حتقولوا بتضييع وقتنا في حاجات  
عارفينها كويس ..

هو فيه مصرى أو عربى مايعرفش تاريخ بلده .. خلينا نبص  
لقدام .. عامل حفله بانتصار ماحصلش .. ليه ؟

المهرج : الضرب في الميت حرام ..

الطالب : ايه يعنى الغورى اتهزم .. اجدع منه وعملها ..

المهرج : لكل جواد كبوه

الطالب : ومايقعش الا الشاطر

المهرج : والكوره مالهاش كبير .. صح ..

الطالب : ثم ان هزيمه واحده .. بقعه على توب كله ابيض ..  
وتاريخ كله انتصارات وأمجاد ..

المهرج : وافرض ان طق في نافوخ الغورى يبني هرم الجيزه ...  
حصل ايه يعنى ؟

الطالب : أى عيل في الروضه عارف ان اللي بناه خوفو

المهرج : خوفه والا خوفنا ؟

الطالب : حتسألوا كل ده مقصود به ايه ؟ .. مين الغورى ده ؟  
خلينا في اللي احنا فيه ! ..

الحقيقة مش قصدى اللي بيدور في دماغكم أنا راجل نفسه  
يمتلكم .. باكذب كذبه وانتمو تستمتعوا باكتشاف الحقيقى

من الكذب .. والصادق من الزايف .. يمكن نوصد الحقيقة  
أم حدين من الحقيقة أم وشين ..

( دقة المسرح الأولى ) ..

أهه .. دقة المسرح .. المسرحية بدأت .. غصب عنى وعنكم  
زى أحداث التاريخ .. لكن بارجوكم تتذكروا طول الوقت ان  
احنا فى مسرح وضيوف على التاريخ .. وأى واحد أو واحدة  
شايف فى نفسه انه شخصية تاريخية أو مسرحية له الحق  
يحضر الحفله ويطلع القصر فى أى وقت وينقطننا بسكوته ..  
ولاينساش ان زمن الحفل دى هو الليلة ، يعنى واحنا متأكدين  
تماما .. ان الغورى مش بس اتهمز قدام البرتغاليين فى  
البحر .. لكن وفى البر كمان .. وانه ماينساش أى هرم ..  
ولا هرم كاريوكا ! ..

( دقة المسرح الثانية )

حاضر .. على فكره .. أنا ولا حاجه .. أنا مجرد حليه  
أو حيله هبله لجأ ليها مؤلف أهبل .. علشان يركب تركيبه  
هبله ..

دقى يا طبله !

( الدقة الثالثة ) ..

( يدخل المدعوون من كل مكان ممكن ناس على راحتهم  
مظاهر احتفالية فى كل ركن ضجة ويدخل عنتر وعبله وأكلين  
الجو .. أصوات تحييم على طريقة أولاد البلد ) ..

– عنتر يا حاميها

– ايوه يا عم صبرت ونلت

– اللي عطاك يعطينا

– حنا للسيف ٠٠ حنا للضيف

**عبله :** شايف يا عنترتى ، لولا صيبتك وشجاعتك ماكانش حد خد باله  
مننا ٠٠ شوف حبي خلاهم يحبوك قد ايه ؟ ٠٠

**عنتر :** عبرنا بحر الرمال والربع الخالى بحد سيفى اليمين بهدات  
ألف ع الشمال وبحد سيفى الشمال قندلت ألفين ع اليمين ٠٠  
وسفحت دم العدا من شان عيون عبله ٠٠

**المهرج :** اديله قبله ٠٠

**عنتر :** جيبت النوق العصافير ٠٠ مهر لبنت الأمير ٠٠ رقص  
عشانها الغنى قبل الفقير ٠٠ أنا نصير اللي مالوهش نصير ٠

**المهرج :** وجيبت الديق من ديله ٠٠

**عنتر :** وشقيت صدور المغاوير واتحديت المقادير ٠٠ بيضت وش  
العرب فرحت قلب القراب وكدت الغرايب ٠٠ ورفعت رايه  
عبس تضوى بروس لجبال

**المهرج :** ياواد ياعتره يا أبهه ٠٠ انت الجرىء وعملتها

**عبله :** رقصت بلاد العرب على رنة الخلخال ٠٠ صح يا رجال

**المهرج :** أيوه صح ٠٠

**الطالب :** يافارس الفرسان ٠٠ تسمح بكلمة ٠٠ بردون ان كنت  
قاطعتك ٠٠

**عنتر :** من أى حى – انت ؟ وبأى لهجة بتلحن ؟ من عبس ؟ من فلول  
هلال ؟ ٠٠

مين جبيلتك ؟ ٠٠

الطالب : مالي جبيله أنا عربى ..

عنتر : عربى ومالك جبيله ؟ • تبقى قليل الأصل ( داسوس ) وذنبك  
مقتلك

الطالب : حاسب بس خد نفسك •• ذنب ايه ومقتل ايه ؟ •• ما عدنا  
قبائل ، احنا ماشاء الله كلنا عرب •• ساحت المسائل ••  
أمة عربية واحدة - ذات رسالة خالدة ••

عنتر : أسمعت يا عبل ؟ بيقول هذا الداسوس المسائل ساحت !! ••  
هل عبس تغلبت على باقى الجبائل ••

الطالب : يا عم لا عدس ولا عبس •• الحكاية ••

عنتر : ايش تجول •• يا عديم الأصول ؟ ••

الطالب : استنى بس •• أصل الدنيا اتغيرت •• هو انت فاحدش  
قال لك ••

عنتر : اخرس !! •• ماجينا عشان نسمع تخاريف مثل هذا •• هذا  
زمان الهزائم ••

عبله : أيوه كده يابطل ••

المهرج : ماترحموش ••

الطالب : ياسيد فرسان الزمان والزمان والعرب •• سمعت عن رأس  
الرجاء الصالح ؟!

عنتر : كل الرؤوس طاطت قصاد سيفى

لأن سيفى فوق جميع لسيوفى

هذا قانون للحرب •• معروفى

عبله : فن الحرب احنا بدعناه

المهرج : والجاهل ياما علمناه ..

الطالب : كان بودنا قانونك ينفعنا ، كنا عايزين نستشيرك .. تند  
بايه مولانا الغورى ؟ .. يعمل ايه مع البرتغاليين ؟  
اسكندرية اتبهدلت قوى يا عنتر بعد امتناع البحرية ..

عنتر : يبدو انك لا تعرفنا .. وما تقصد غير تخالفنا

المهرج : اللي ما يعرفك يجهلك يابطل ..

عبله : ايه بحرية وايه برية ؟ .. عنتر ما فى شىء يعصى عليه

عنتر : احنا خلينا الصحرا بحور من دم .. بتريد النصيحة هيك  
والا هيك .. ( يهدده بالسيف فيفزعاه )

عبله : لا تخاف يا أزرع عنتر ما ينازل غير الفرسان ..

الطالب : كل قصدى اننا نسأل نعمل ايه مع البرتغاليين .. د  
شددوا الحصار على بلاد العرب ..

واسكندرية عليها العوض .. نعمل ايه ؟

عنتر : انا جيش وحدى .. وسأخرج لهم لاجعلهم عبيدا لعبلتى  
( عبلة تزغرد )

الطالب : بس دول راكبين ياعم مراكب ..  
( يمضى عنتر ليقوم فيهم خطيبا )

رايح فين يا عنتر ؟ ..

عنتر : لما رأيت القوم أقبل جمعهم

يتزامرون كررت غير مذمم ..

يدعون عنتر والرماح كأنها



أشطان بئر في لبان الأوهم ..  
مازلت ارميهم بغرة وجهه  
ولبانه حتى تسربل بالدم

المهرج : الله اكبر .. الله اكبر .. انتصرنا ..  
ربنا ينصرك على مين يعاديك

الطالب : رايح يغنى لمعركة فانتت .. مافيش فايده .. وكأن التاريخ  
حجر نزعق من فوقه .. المهم نطلع بقصيدة خالدة

( وهو يستدير فيصطدم بأحد الأقنعة ) متأسف ياسيدى جدا  
.. لا تهتم بى فأنا انفعل بالشعر .. دائما ..

الحجاج : اقترب منى .. تعالى ..

الطالب : ياسيدى .. لا تهتم .. فأنا مجرد صعلوك

الحجاج : قل من أنت ؟

الطالب : أنا ضيف من الدهماء

الحجاج : اقترب ولا تراوغ ..

الطالب : أكرر شديد أسفى ياسيدى ( مبالغا ) وأوكد .. اننى  
لم أكن أقصد ..

الحجاج : ( ضاحكا ) تقصد ؟ .. اعرف انك لا تقصد .. وهل  
تجرؤ على الظن بأنه يمكنك ان تقصد ؟

الطالب : ما عاذ الله .. اننى أضعف من ذلك ياسيدى الحجاج ..

الحجاج : انت اذن تعرفنى ؟ ..

الطالب : اعرفك ؟ أنت أشهر من نار على علم !

**المهرج :** أطفالنا يحفظون خطبك في المدارس ليشـبوا على الطاعة والأدب فلا يضحكون بلا سبب ولا يشكون مهما كان السبب !

**الحجاج :** دائما تبالغون ، الأمر يابنى لم يكن على هذه الدرجة من الصعوبة كان على أن افاجئهم قبل أن يفاجئوني .. ان أروضهم .. استل من عيونهم نوايا التمرد بجمر عيوني .. هل أنت أبله .. ؟ .. لم أر أحدا في هذا الزى من قبل .. من أى فرق الخوارج أنت ؟

**الطالب :** أنا لست من الخوارج ! بل أنا في الحقيقة من الدواخل .. ومن المعجبين بك .. فأنت تتقن دورك تماما .. أكنت تتدرب على اللقاء قبل أن تواجه الجماهير ..

**الحجاج :** ايها السانج .. اذا لم يتقن أمثالى أدوارهم اختل النظام العام وافلت الأمر من أيدينا جميعا .. وعليك ان أردت أن تتعلم .. ان تتذكر .. لا عواطف ولا مثل ..

لا عواطف .. ان الممثل الذى يسمح لنفسه بالاستسلام للعواطف على المسرح .. سيكون حاكما رديئا .. قد يغتاله سائس بغال .. أو يقال ..

**الطالب :** ولكن معظم الذين اتقنوا الامسك بالزمام اغتيلوا .. هم أيضا ..

**الحجاج :** ولذلك أنا لا أوافق الغورى على دعوته لامثالك من العامة لحضور حفلات الانتصار فأنتم لا تفعلون شيئا في سبيله سوى ان تموتوا في المعارك ..

**الطالب :** أو لا يكفى هذا !؟ ..

**الحجاج :** يكفى ان تموتوا على أرض المعركة حضوركم حفلات النصر خطأ فادح .. لانكم ستظنون بعدها أن لكم حقا فيما

يكون بعد النصر ! من هذه المرأة التي تبخلق في وكأنها رأت  
شبحا !؟

الطالب : انها مجرد أم .. أم مصرية .. كالأخريات ..  
الحجاج : أبعدها من هنا .. لست تأدرى لم يسمح لكم بالدخول ؟  
ان هذا خطر جدا ..

( يبعتها الحرس بقسوة هي وابنها )

الطالب : فهمت لماذا يلعنك الناس حتى أيامنا هذه ..

الحجاج : ولكنهم يخشوننى اكثر ..  
سيفى يذكرنى .. خوفهم منى يخلدنى

الطالب : وغدا يا حجاج ؟

الحجاج : ماذا تظن أنه سيحدث غدا يا أبله ؟ تأكد أن دورى مغر  
جدا للكثيرين أمس واليوم وغدا - أيها الشاعر الأحمق ..

الطالب : لست شاعرا ..

الحجاج : ولكنك أحمق كالشعراء فاحمد الله والى أجبرتك على قرص  
الشعر موزونا مقفى ..

الطالب : أنا هنا ضيف على السلطان ولى حصانه ..

الحجاج : لا تكن مطمئنا فانها لم تصبح ديمقراطية بعد ! واستطيع  
أن أنادى أحد جنودى الذين تمرسوا مع العراقيين ..

الطالب : اظنهم مشغولون عنك هذه الأيام .. بأحداث جسام ..

الحجاج : بأى شىء ؟ ..

الطالب : باعادة فتح القادسية والعراك القاتل مع بعض المسلمين  
الأجانب .. اقصد المجوس !!

**المهرج :** كلاكيت - عاشر مره - فيلم الموسم ( المشاجرة الكبرى )  
بين المسلمين والمسلمين !

**الحجاج :** وما أنت تطالبنى أن أكف ! .. مازلت أهل الشقاق  
والنفاق ..

ومازلت أرى رؤوسا في كل مكان حان قطافها إذ اينعت ..  
واني صاحبها على الدوام - ها ها .. لا تخف  
فقلبي تعلق بك .. فمنذ وقت طويل لم يحدث أحدا يمثل هذه  
المودة ..

( تدخل شجرة الدر مقاطعة لهما وهي ، مندفعة في غضب )

**شجرة الدر :** ما الذى يجرى هنا .. هل انعدم البروتوكول في قصور  
الممالك الى هذه الدرجة المهينة ؟ أم نسيتم من أنا ؟ .. ما  
هذا الاستقبال الفاتر ؟ لا أحد في الشوارع .. لا طبول ..  
لا زينات لا برازانات ولا هتافات .. من الذى يستضيفنا هذه  
المره .. لا بد أنه سلطان من سلاطين عصر الانحطاط !

**الطالب :** لا تغضبى ياسيدتى الجميلة .. بل لك ان تفرحى فلم  
يشغلهم عنك الا نصر عظيم .. ياصاحبة المنصورة ..

**شجرة الدر :** هووه .. أووه .. شكرا يا اسمك ايه ؟ ..

**الحجاج :** ولكن هذا لا يعطيهم الحق في تجاهل سيده نبيلة مثلها ..  
أى ملكة هى ؟ .. رائعة !!

**المهرج :** الجهة الصالحية ملكة المسلمين وعصمة الدنيا والدين ..  
ذات الحجاب الجليل والستر الجميل .. أو العكس بالعكس ..

**الطالب :** الملكة شجرة الدر ..

**الحجاج :** أهو أنت ؟ ! ..

شجرة الدر : هناك من يريد تدمير مجد بنيناه ..

الطالب : الغدر يهدم ما بنته الخيانه ..

الحجاج : بماذا تهمهم يا ولد ..

الطالب : عفوك فكلنا يعرف ان هذه السلطنة ولدت من رحمها -  
العاقر !!

المهرج : مائتان وسبع وستون عاما .. كل شيء مباح للدفاع عن  
الذات .. عن العرش .. عن الكرسي ..

وللمحافظة على الثروة .. التي جمعت نهبا وسلبا ..  
وتسخيرا وتشميرا .. وتقصيرا .. وتقتيرا ..

الطالب : ولكنها صرفت بكل ( تبذيرا ) ..

شجرة الدر : كان علينا ان نبني ملكا راسخا .. يواجه الصليبيين  
.. ويحرر القدس .. ويوقف زحف التتار .. وينقذ الخلافة  
من اعداء الاسلام ..

الحجاج : ( منصتا ) برافووووه ..

الطالب : بالطبع .. ولغرس جذور العرش في نافوخ الخاضعين -  
هناك دائما ما يحتاج للانقاذ بالدماء من أجل البقاء

المهرج : ومن أجل تزيين اسوار القاهرة برؤوس المشنوقين ..

ولنقش حيطان دمشق بأشلاء الوسطين والمخزوقين . والملئ  
أسواق بغداد ومكة بالمشموطين والكوفة بالمسـمومين ..  
والقيروان بالمشنكلين !! ..

شجرة الدر : الحكم مسئولين صعبة ..

الحجاج : كنت أدربه على السلطة ولكن يبدو انه غبي !

شجرة الدر : من أنت يا صاحب القلب الرقيق ؟ ..  
الطالب : أنا لا أحد .. شبح غير حقيقى من زمن لم يحدث هنا بعد ..  
وجدت ان من واجبى التعريف بكم مادمت هنا ..  
شجرة الدر : ومن اعطاك الحق فى تجاهلى ، أنا صاحبة النحر الذى  
كان ؟ ..

الطالب : أنا اتجاهلك ؟ .. ما عاز الله وأنت صاحبة الريادة ..  
المهرج : قتلت ابن زوجها .. ماذا فى ذلك ؟ كانت تضرب لهم  
المثل ..

الطالب : سرير الهناء فوق بحر من الدماء ..  
شجرة الدر : رغم حدة لسانك اجدنى أميل اليك .. تعالى ، هل  
تسمح لى بهذه الرقصة ؟ .. أتحب الفالس ؟ ..

الطالب : لم أكن أعرف انك تتقنين الرقص على الطريقة الأوروبية  
شجرة الدر : لا تنسى اننى التى هزمت الفرنسيين ..

المهرج : واذا أردت أن تأمن شر قوم .. فاتقن رقصهم ..  
الطالب : أرقص معك ؟ .. شرف لا استحقه .. ولكنه للأسف لن  
يذكر فى كتب التاريخ ! ..

المهرج : التاريخ مشغول دائما بتسجيل الأحداث السطحية ..  
( تقتحمهم ضجة كمعركة بين اثنين ومشجعين من كل لون  
صياح وضجة )

شجرة الدر : من هذان المقاتلان الرائعان .. مملوكان للفرجة ؟ ..  
الطالب : لا أنهما من الأشراف المنسبين .. التعلب والسفاح ..  
شجرة الدر : من تقصد ؟ ..

( تشاهد الأم وابنها ضمن الجمع حول المتبارزين )

الطالب : احدهما ساعد معاويه على تأسيس الأموية بالخداع ..  
والثانى أقام العباسية فوق بحر من دماء ..

شجرة الدر : ما احلاهما !

الطالب : ومن يومها صاروا مثل ناكر ونكير .. لم يلتقيا فى أى  
مسرحية الا وكانا كالديكه ..

الحجاج : ومن منهما سينتصر ؟

المهرج : انتصر دائما من كان معه خير مثلك !

الطالب : لن ينتصر احدهما .. ولكننا سنهزم دائما لاختلاف  
التفسير ..

شجرة الدر : هل أنت مطلع على المستقبل ؟ اقرأ لى كفى ؟ ..

الطالب : أنا المستقبل ياربة الصون والعفاف ..

ولانى لم أفهم ماضيكم أصبحت أجهل مستقبلى ..

( الحجاج يندمج فى المبارزة ويخرج معها وتبقى الأم مع ابنها  
مشغولة به )

شجرة الدر : دعهم يذهبون واقرأ فنجالى .. اضرب رملى ..

الطالب : انا اقرأ كتباً .. بها أكاذيب كثيرة . ولكنها أفضل من  
الودع وقراءة الفناجيل . ولكن اتعرفين ؟ .. أنت مازلت  
جميلة ؟ ..

ولكن التاريخ قبيح .. صحيح انه أعظم منجزات البشرية ..  
ولكنه اضعفها .. فكل كلب وصل الى صفحاته بال عليها بكل  
غطرسة ..



شجرة الدر : أيها البذئء .. أهكذا تتحدث الى احدى صانعات التاريخ .. يا قبيح ..

الطالب : انها هيصة ياسيديتى .. مهرجان .. وأنت بالتأكد تحتاجين لبعض الترفيه الذى كان سمة رائعة من سمات دولتك السنية !

( بروجى وطبل يدخل عدد من الحراس ويقودهم ابن القارح )

شجرة الدر : ومن هذا ؟ .. بهلوان ؟

الطالب : هذا ابن القارح .. جاء ضيفا كالضيوف .. ولكنه لا يضيع وقته .. فله موهبته فى الدخول الى قلوب الحكام .. وجد عملا يليق بمواهبه .. أصبح استادارا ..

شجرة الدر : استادارا ؟؟

الطالب : نعم .. استادارا دائما

شجرة الدر : اذن احترس لا يجب أن يرانا معا .. فمثله لا يؤمن جانبه ..

الطالب : أترحلين بهذه السرعة ؟

شجرة الدر : لو وجدنى معك - فقد تجد نفسك على الخازوق ..

ابن القارح : ( يدور حول الموجودين كالصياد )

هيا أيها السادة .. يا أفاضل .. كيف يفوتكم موكب النصر حين يبدأ .. هيا .. أنه أول نصر حقيقى لنا منذ عين جالوت

الطالب : لا تنس ذات الصوارى يا ابن القارح ..

ابن القارح : هيا .. من ذا الذى يقاطعنى .. أى صوارى يا هذا أمام أسطول البرتغاليين الجبار ..

الطالب : اقصد ..

ابن القارح : اعرف كل ما تقصد .. فأخرس .. نحن هنا أمام  
منعطف تاريخي فاما أن نكون أو لا نكون - نندثر تحت ركام  
حثة الشـعوب الكافرة التي تتطفل على التاريخ .. ولذا  
فهزيمتهم لها فرحة لا تعادل ..  
( تقاطعه شجرة الدر )

شجرة الدر : أنا هزمت الفرنسيين وأسرت ملكهم .. يا هذا ..

ابن القارح : سيدتى .. صاحبة الصون والعفاف .. اعذرينى ..  
ولكن الغورى احتفظ لمصر مع النصر بالخلافة .. وحافظ  
على موارد المال ورسوم البضائع .. احتفظ بنبع العملة  
البندقية وبالفلل - والزيت والكمون وكله ..  
( يدور حول الطالب )

وفوق ذلك كله .. احتفظ بالرعايا راکعين على الركب ،  
يهتفون فرحا فى الشوارع ، ويفتدون السلطان بالروح والدم  
.. والوطن بالدم والروح !!

ونحن يامولاتى .. جئنا بكم لكى تكونوا ، شهودا على القبر ،  
الذى سنبنيه ليكون ، مزارا للسـياح ، من ابناء اعدائنا  
ليتأكدوا من خيبة جدودهم وهزيمتهم .. هيا .. السادة ..  
السادة فقط .. هيا لتروا بداية الموكب .. هيا ..

( يلمح الأم وابنها ) من الذى سمح لها بالدخول مرة أخرى ؟  
قلت ألف مرة ، ابعدوا هذه الحثة .. ( يخرجها العسكر )

الطالب : انها الأم يا ابن القارح وقد يكلفك طردها الكثير لو ان  
الأمور سارت حسب الأصول الدرامية ..

ابن القارح : ( يبحث فى دفاتره ) هل أنت أحد القادة التاريخيين ؟  
الطالب : لا ..

ابن القارح : سلطان من سلاطين المسلمين ؟ ..

الطالب : لا تزعج نفسك فلن تستطيع تصنيفي حسب جداولكم

ابن القارح : مفكر من المفكرين ؟ ..

الطالب : الا اذا أرسلتم تسألون المستقبل ..

ابن القارح : داسوس .. ان نظرتي لا تخيب .. شككت فيك منذ

البداية وأنا عندما أشك في أحد ما .. فأننى أدفع به الى

العرقانه ليتعفن وتأكله الكلاب ..

( يحاول ان يشير الى العسكر فيمنعه الطالب )

الطالب : اسمع يا ابن القارح .. ليدع كل منا الآخر وشأنه والا

فضحتك أمام كل هؤلاء واخبرتهم بما كتبه عنك - ( ياقوت

الحموى ) واطلعتهم على رأى شيخنا ( أبا العلاء ) فيك ؟ ..

هه .. هل أقول لهم .. من هو ( على بن المنصور ) ؟ ..

هل أخبرهم بأنك بليت فى الاناء الذى أطعمك ..

دع الطالب مستورا .. والا فضحت قصة الدنانير الكعبية ؟

.. ونصحت كل الحاضرين بقراءة رسالة الغفران ؟ احذرني

والا ..

ابن القارح : اخرس قلت لك ..

الطالب : كده اتعدل .. حتعكر عليه ؟ .. ح ادخن عليك ! ..

ابن القارح : أنا لا أفهم ما تقول .. وعندما لا أفهم كلام أحد فأننى

أرسل به الى أحد سراييب الـ .. الخوند تمرباي ؟

( تدخل الخوند تمرباي ابنة الغورى ومعها وصيفتها

فيقطع الكلام ويتقدم منافقا .. )

الطالب : اسحب يا ألعبان ..

ابن القارح : زهرة المحروسة مولاتي !! على بن المنصور الحلبي  
المعروف بابن القارح يحمد الله اذ يتشرف بالمثل بين يديك ..  
لكي ابشرك ..

الطالب : يا تعلب !!

ابن القارح : بأن اميرك قد احتفظ بقلب العالم في قبضة ايديه وملوك  
الأرض جميعا جاءت تهنيه ..

المهرج : ( يدخل بطبلة وفي لعبة مقصودة ) .. اتفرج يا جدع -  
اتفرج ياسلام - .. شوف النوادر العجيبة - والأحداث  
الغريبة - صدفة مقصوده .. مش معهوده .. سفراء من كل  
الأرض .. ١٤ سفير وقاصد خير .. من السند والهند ..  
من الكوفة والمدينة .. رسول ملك الكرج - وقاصد ملك الترك ..  
- من تونس وفد .. ومن عند ابن درغل وفدين .. ومن  
التركمان ومن عند ابن عثمان ست وفود .. ورسول ملك  
الفرانسة .. وقاصد البندقية .. السنيور دمينيكو ترايفزاني  
.. كله قاصد العتب السلطاني .. كله شاف لعب الكوره ..  
وكله برق مبهور .. من نطح الثيران والكباش .. وكله قال  
الله .. على شجاعة الممالك لما عملوا مخصمانية بسيف  
يمانیه .. شهدوا بعظمة دولتنا .. وبقوتنا ووجاهتنا ..

زغاريد من الطيقان تلبش الشجعان وأكل ممدود من جرجا  
لمسمنود شيء يفطر الصائم ويلهى العابد .. شفتم غنا زى  
غنانا وقوة زى قوتنا ؟ .. ههيبه ! بالويبه ..

يا غاشم ..

يا ظالم ..

دى حالتك عدم

برغم الحرس والخدم والحشم

حتسمع أهاتى

وتشبع ندم

فتتمنى يقتل ودانك صمم

وتصحى فتبنى بكديك .. هرم

وترمح كما الديب

واحنا الغنم

وفاكر تدوم للابد عزوتك

وقبرك على بعد

فركة قدم .. !

( الأغنية تجمع البعض وابن القارح بنعومة هو ورجاله  
يتسللون ويقبضون عليه دون أن يلاحظ أحد ويخفونه ويسحبونه  
- ويعيد ابن القارح الحديث والطالب يذعر مما حدث )

ابن القارح : وها أنت سمعت بنفسك يامولاتى أن كل هؤلاء

تمرباى : هل هو من الضيوف يا زليخه ؟ .. ( تتجاهله )

ابن القارح : أنا الاستادار الجديد ، على بن منصور المشهور بابن  
القارح .. ألفين سنة خبره فى خدمة القصر . من أول بقت  
مصر - مصر . فجر وصبح ، وليل وعصر ، خادم السلطان  
وأهل بيته .. والقريب قوى من نسوانه وغلمانه .. وموضع  
سره - وسر بره - وتحت أمرك ..

( الطالب يختفى وهويراقب ويكتم ضحكاته )

تمرباى : لم أره من قبل .. ليس ما يقوله مضحكا .. ان كلامه

يجعلنى أحس أننى سأموت مسـمومة ٠٠ أرسلـيه بعيدا  
واحضرى مضحك القصر بسرعة ٠٠

زليخه : خطفوه ياستى قدام عينيا ٠٠

تمرباي : كان هنا دلوقتى ٠٠

زليخه : سبحان من له الدوام ٠٠ تبخر ٠٠

تمرباي : الحقيهم ورجعيه ٠٠

زليخه : مكانش يتعز ٠٠ زمانهم خوزقوه من امبارح ٠٠ مش  
سمعتيه وهو بيتأوز على انتصارنا ! ٠٠

تمرباي : خساره ٠٠ الوحيد الذى كنت بأفهم كلامه ٠٠ وكنت معاه  
بافهم الدنيا ٠٠ تعرفى يا زليخه ٠٠ كل السلاطين عشان  
رجاله : أغبيا !! وخصوصا بابا الغورى ٠٠

زليخه : ماتقوليش كلام الناس ٠٠

تمرباي : أهه ٠٠ أدى انتى قلتيا ٠٠ تصورى انه عايز يقبض على  
كلام الناس ! ٠٠

زليخه : يا أميره - ابوكى مايقصدشى كلام الناس - كلام الناس ٠٠  
لكن ده راجل ادباتى زجال - مسمى نفسه كلام الناس ٠٠

تمرباي : راجل !؟

زليخه : أيوه راجل ٠٠ طبعا

تمرباي : الله ٠٠ وشكله ايه ؟ ٠٠ أكيد حلو ٠٠ مادام أبويا بيكرهه

زليخه : راجل ٠٠ ده مجرم بيستهزأ بأبوكى

تمر : يبقى أكيد راجل هایل

زليخه : نعرف مزين كلامه - كله قلة أدب . غلط في غلط . اشاعات

.. ده بيقول ان احنا اللي شربنا مية المحيط الهندي ..

تمر : صح !

زليخه : وان الموانى بتاعتنا راحت عليها .. والتجارة فلتت من

ايدينا

تمر : صح .. صح ..

زليخه : ايه هو اللي صح ؟ .. ده بيقول ان بعد الشر - بعد الشر

.. السلطان بعد الشر - حيطق بعد الشر - فى مرج ؟ مش

عارفه ايه ؟ .. وان رجالته حيخونوه ويسلموه لسليم ! ..

تمر : مؤكد الراجل ده مكشوف عنه الحجاب ! .. وبيقول الحق ..

بابا السلطان محتاج لحد يخونه ويقلشه ، لأن مدة حكمه

طالت قوى .. أكثر من المعتاد الملوكى ..

زليخه : مولاتى .. عيب .. مش انتى اللي تقوليها ..

تمر : ليه يازليخه ؟ خايفه يعلقونى على باب زويله .. او يشنقونى

ويسلخونى حيه ؟ .. الله .. لعبه حلوه ..

زليخه : يامصيبتى ..

تمر : مش أحسن ما يجوزى لحصان م اللي راكبهم ..

صح كلام الناس وكلامه صح .. مش يجوز يكون هو الواد

اللى ف بالى والا أنا باحلم بيه ؟ .. مش يجوز يكون هو

الراجل اللي حيوقعنى ف حبه وغرامه ؟ ..

زليخه : مين ؟ لأ ياستى ف عرضك - أنا مش ناقصه ..

تمر : لكن أنا ناقصه ، لانى ما حبتش لغاية دلوقتى .. الله لازم أحب

حد .. والا فيه عندك كلام تانى ؟ ..



زليخه : الامير جاب النصر هديه لفرحك .. حبيه ..

تمر : أنا مش باحب القفل ده ..

زليخه : يا أميره تمرباي .. السبعه اللي قبله .. ماتوا علشان  
يرضوكي .. اللي مات عطشان في الصحرا وهو بيطارد  
العربان .. واللى شنقوه الفلاحين عشان حرق بيوتهم ..  
واللى اتخوزق على أيد القتر .. واللى واللى .. لكن ده  
علشان خاطر عيونك حفظ مركزنا بين الدول ..

تمر : كلهم زي بعض - الواحد منهم يحط راسه زي السحلية على  
صدرى - وفجأة عينه تبظ وينهج زي السمكه الحوله اللي  
خرجت من الميه على سهوه .. ويحوطنى بدرعات زي التعابين  
.. ويقول باحبك .. أقوم أنا لما اضحك من المنظر يزعلوا ..  
ويروح الواحد منهم منظور .. وراكب فرسه ويدور الدبج  
في اللي يقابله .. الله ؟ .. وعايزنى أحبه .. طب ليه ؟ ..

زليخه : لكن انتى وعدتى الأمير تتجوزيه لو غلب العدوين

تمر : حصل .. ورجعت ف كلامى .. ايه يعنى روحى هاتى قرقه  
ودورى على حد يكون سمع وأتأكد ، ان الامير مات .. وله  
عندى حلوان .. كاملية بسـمور و ١٠٠ دينار بندقى ..  
( تخرج ) يارب يكون مات .. وكلهم يموتوا .. كله عايز  
السلطنه .. مع أن بابا السلطان مش ناوى يموت ويسيبها ،  
وعينه مفنجله قد كده .. الخطرين ياوسطهم يانفاهم ياقتلهم  
.. واللى طماعين سلخهم أو فلسهم .. واللى ف حالهم  
حلفهم على مصحف عثمان .. داهيه ، بابا السلطان ده داهيه  
كبيره .. وعشان كده اللي حيتجوزنى منهم ، نقبه حيطلع على  
شونه .. لأن بابا مش ناوى يسيبها ، ولا لبنته وجوزها ، أنا

عايزاها بس من باب التغيير زهقت .. حتى هدوم التمثيل دي  
قرفانه منها موت ..

### ( تتوجه بالحديث للحاضرات )

ياساتر .. أى واحده عايزه تلعب الدور ده مكانى ح اخلع  
عليها هدومي .. على طول .. وح انزل اقعد اتفرج عليها  
وسط الشعب .. واشوف حتقدر تتحمل قرف اللعبه دي قد  
ايه ؟ .. تصوروا سبعتاشر سنة متحملة .. وبعدين ييجى  
واحد يبرق فى عينى ويحول .. ويحلف انه بيحبنى .. كذب  
.. نفس حد مره يقول الحق .. وياخدنى على مشمى ويدينى  
علقه عشان اعقل .. وجايه تقولى لى - أوعى تسمعى كلام الناس  
دانا أكيد ح اقع فى جبهه .. أو يمكن بحبه فعلا .. لانه راجل  
.. وقال - لأ .. ياغورى .. بطل كذب .. كفايه كده ..

### ( الطالب يدخل ويستمع اليها فترة ويراقبها ثم يتقدم ويلمسها فتصرخ وتنادى الحراس )

الطالب : يا آنسة .. ماتخافيش .. لأ ..

تمر : يا حراس .. الحقونى .. عفريت ..

الطالب : أنا .. لأ .. دانا .. أنا ..

تمر : أنت مين ؟ أمير ؟ ..

الطالب : أعوذ بالله .. أنا شكل أمير ؟ .. هدى نفسك دانا - من  
الشعب ..

تمر : مين ؟ ..

الطالب : طالب فى الجامعة العربية - صعلوك .. جاى ادرس لغز  
الغورى اللى حير الجميع .. بتبطلقى فيه كده ليه ؟ .. أه ..

بدلتى ؟ دى جاهزه من بلد اسمها بورسعيد .. مدينة حرة  
لسه حتظهر بعدين على الخريطة .. أكيد ؟ لأ ؟ شنبى ؟ غريب  
هه ! مع انه ولا حاجه جنب الشنبات اللى هنا ..

تمر : أنت مين .. بالضبط بالضبط ؟ ..

الطالب : طب اقعدى .. حنفضل واقفين كده ؟ .. ده حتى الكلام  
يزعل مننا والا انتى مستنيه حد ؟ ..

تمر : انت طلعت لى مينين ؟

الطالب : اشرح لها ازاي دى بقى ؟! ياستى أنا مش من هنا .. أنا  
من بعدين قوى ، من قدام .. أكبر منك يمكن بخمسـميت  
سنه ..

تمر : يعنى عارف مستقبلنا ..

الطالب : فيما يختص بابوكى آه .. ومستقبل السلطة دى آه ..  
عارف كتير قوى ..

تمر : أنا قصدى مستقبلنا احنا .. مستقبلى أنا .. أكيد أنت شايف  
حاجه .. أصل أنا مش شايفه .. حاجة خالص .. مين اللى  
ح احبه ؟ هه ..

الطالب : احم ..

تمر : مش عارفه ممكن يحصل ايه بعد دقيقة واحدة من دلوقتى ؟  
قول لى ع اللى تعرفه .. اتكلم .. جاي تعمل ايه هنا ؟ ..  
هه .. قول ..

الطالب : يا اميرتى العزيزه أنا جيت فى مهمة محددة .. عايز اعرف  
ليه اتهمتم قدام البرتغاليين ؟ ..

تمر : اتهمنا ؟؟

**الطالب :** ماكانش فيه طـريقه تمنع التدهور اللي حصل ده ؟!  
الاسواق تخرب ٠٠ والعمله تقل قيمتها وتتغير سبع مرات في  
خمس سنين ٠٠ ه ؟ ليه ؟ عايز اعرف ليه الفلاحين سابوا  
الأرض ومابقوش فلاحين ؟ ٠٠ وليه الدود ضرب في كل  
حاجه ؟ ٠٠

والوظايف تتباع ؟ ٠٠ والمراسيم تتغير وتتفصل حسب الثمن!  
والمقشرة عمرانه بالمعصرين والمشنكلين ؟! ٠٠ الفقر والبذخ .  
الشحاتين والحراميه والأمرا والمقدمين ٠٠ ومع ذلك استمر  
حكمة كل المدة دي ؟! وكأنه لزقه مش حتطلع الا بطبل انتصار  
العثمانيين ٠٠ بعد ما يبلينا بأكبر هزيمة عرفناها في العصور  
الوسطى ٠٠ بعد متين و ٦٧ سنة مملوكية عباسية ٠٠ بلا  
نيلة ٠٠

**تمر :** انت الادباتى ٠٠ هه ؟

**الطالب :** ماحصلش ٠٠

**تمر :** أنت بتاع الكلام – ده ٠٠ كلام الناس ٠٠ أنت ؟ ٠٠

**الطالب :** أنا ٠٠ ازاي ؟ ٠٠ ياريت ٠٠

**تمر :** وقدرت تقتحم القصر ؟ رغم كل الحرس والطوارىء ؟ أنت  
شجاع كمان ٠٠ هايل ٠٠ بأحبك ٠٠

**الطالب :** استنى بس ٠٠ خدى نفسك ٠٠ الحكاية ٠٠

**تمر :** ياسلام ٠٠ واخترقت البستان ونطيت السور ! ٠٠ ازاي ؟!

**الطالب :** ياستى خلى بالك ان ممكن أبوك يخش ف أى وقت ٠٠ مش  
كويس ٠٠ وانا وحدانى ٠٠

**تمر :** وأنا وحيدة ٠٠

الطالب : لو شافك حد كده .. حيطيز رقبتى على أحسن الفروض ..  
انتى سنك كام سنه ؟!

تمر : ١٧ سنه ..

الطالب : صغيرة ..

تمر : لأ .. دانا كبيرة خالص .. بص ..

الطالب : للاسف أنا ٣٤ عمري قدك مرتين .. مش حينفع ..

تمر : ازاي ؟ .. مين قال كده ؟ .. دا حنا متناسبين جدا .. حتى  
شوف ..

الطالب : ماتبصليش كده !

تمر : أمال أبص ازاي ؟

الطالب : مش عارف .. انتى عارفه ؟ ..

تمر : ياترى أنت اللى انكتب لى أحبك .. واللى أنا عشت العمر  
الطويل ده استناه ..

الطالب : ياه .. تنتظرينى أنا ؟ .. قلت لك مش حينفع لانى من  
بعدين قوى ..

تمر : قول ان أنت اللى ح احبك .. قول ..

( يدخل ابن القارح ) ..

ابن القارح : أنا استادار القصر الجديد ، الخادم المطيع المقرب من  
السلطان ومن الحرير .. والمشرف على المطابع والافران  
والمكلف بالغلماان وبالنسوان والأمين على المخازن والبيوت فى  
كل مكان .. وأنت مين ؟ .. أنا لما ما عرفش اللى قدامى ..  
يبقى داسوس على السلطان .. ولا بد انى أقوم بواجبى ..  
واحطه فى العرقانه لحد ماينتتن ، ارميه للكلاب ..

( الحراس يلفون الحبال حول الطالب ) ..

والاميرة تنزع الحبل وتلفه بنفس الطريقة حول ابن القارح )  
تمر : خذوه وخطوه في العرقانه لحد ما يعفن وتأكله الكلاب ...  
الطالب : اشكرك يامولاتي .. أنا مدين لك بحياتي .. عندكم غيره ؟  
.. مين اللي حيعمل شغله ؟

تمر : اللي بعده حياخد مكانه وحيورثه ..

كل ما مات اللي قدام فرحوا اللي وراه ..

الطالب : لكن انتي رميته للكلاب .. كده ممكن أبوك يزعل ؟ ..

تمر : أبويا ؟ أبويا حينبسط جدا .. أولا لانه حياخد نص املاكه  
على الأقل .. ثانيا لان اللي حيحل محله قدامه مده على بال  
ما يطمع في السلطنة ..

وبكده .. تطول مدة اطمئنان أبويا .. دانا بخدمه .. رغم  
ان ده ضد معتقداتي ..

( يضحكان )

الطالب : انتي ذكية .. ورائعة .. مش فاهم ليه بس حالتكم منيلة  
كده .. ؟

تمر : وانت عاجبني .. قول لي بقي بصراحة .. هو أنت ؟ ..  
أرجوك .. ( تبكي ) أنا وحيدة جدا ..

الطالب : مافيناش من عياط يامولاتي تمرباي .. لأ .. اسمك  
تمرباي ؟ ..

تمر : هم ..

الطالب : الله هم اسم جميل يتاكل أكل .. ( تضحك )

تمر : كنت نسيت الضحك من زمان .. الضحك مقتول في القصر

حتى البهلوان اللي كان بيضحكنا خوزقوه بمناسبة الاحتفال

الطالب : ماتفزعيش .. تعالى .. بس .. اهدى ..

تمر : كل الدم ده .. وكل الكذب والرعب .. ومش عايزنى اتفزع ..  
خدنى معاك من هنا ..

الطالب : بينى وبينك خمسميت سنه ..

تمر : ومع ذلك باحبك ..

( يدخل ابن القارح فى شكل جديد )

ابن القارح : أنا ستادار القصر الجديد خادمكم المطيع المقرب من  
السلطان ومن الحریم والمشرف على المطابخ والافران ..  
والمكلف بالغلمان وبالنسوان .. والأمين على المخازن والبيوت  
فى كل مكان .. ويشرفنى رؤية وجهك الجميل الذى يجلب  
السعادة .. الجميلة .. لاخبرك ان بابا السلطان الملك  
الأشرف أبو النصر قانصوه الغورى الاشرفى .. موجود ..  
هنا .. هنا

عاش عاش ..

( يقترب من الطالب .. ) أنت لا تهتف من قلبك ؟ ومن لا يهتف  
للسلطان من قلبه يثير الشك بقلبى .. وعندما أشك فى انسان  
.. فاننى أرسله فوراً الى العرقانه ليتعفن ثم تأكله الكلاب ..  
( الحراس يلفون الحبل حوله - الاميرة تفك الحبل وتلفه حول  
ابن القارح )

تمر : خذوه .. ارموه فى العرقانه ليتعفن وتأكله الكلاب ..

الطالب : انقذتى حياتى مرة ثانية .. الثالثة حتبقى ثابتة .. عن  
اذنك ..



تمر : رايح فين ؟ ٠٠ ح اعمل ايه لوحدى ؟ ٠٠ ماتسيينيش ٠٠٠  
والا ح اتجننن ح أكلم الحيطان ٠٠ والحجر ٠٠ كل اللي هنا  
زى ماشفت مزيفين ٠٠ أنت بس اللي حقيقى ٠٠ ومع ذلك ح  
اضطر اتخيلك ارجوك ماتمشيش ٠٠ أكيد ح اعيا ويمكن أموت  
٠٠ هه ٠٠ أنت ساكت ؟

الطالب : وانتى بتتكلمى ٠٠

تمر : ايه ده ؟ ٠٠ جرح قديم ؟ من ايه ؟ ٠٠ من خصمانية بالسيوف  
٠٠ مع مين ؟ ٠٠ والا من التعذيب ؟ ٠٠ أنت اتسجنت ؟ ٠٠  
عذبوك فى العرقانه ؟ ٠٠

الطالب : تقريبا ٠٠ لكل عصر عرقانته ٠٠

تمر : ارجوك قول لى ؟ ٠٠ لازم اعرف ٠٠ وح اعرف من مين  
غيرك ؟ ٠٠

الطالب : أبوك على وصول - دلوقتى دلوقتى ٠ اعلمى معروف ٠٠  
تمر : أنا مابيهمنيش ٠٠

الطالب : أنا بيهمنى

تمر : وأنا مسنودة لصدرك - أقدر اسمعهم وهمه بيتصعبوا عليه  
ويقولوا بكره لما أموت : صاعقها الحب ٠٠ ومش ح يهمنى  
برضه ما دمت أموت على صدرك !

الطالب : يا حلوه ارجوكى ٠٠ باى باى ٠٠ بابا جاى ٠٠

تمر : مش ح اسيبك تمشى ٠٠ طول عمرى باحلم بفارس احلامى ٠٠  
واهه قدامى ٠٠ قدامى ٠٠ ياه ٠٠ أنا سعيدة ٠٠ تصور ٠٠

الطالب : سامع أصواتهم بتقرب ٠٠

تمر : أكيد بتحب واحدة تانيه ؟

الطالب : أبوكى وصل ٠٠

تمر : فيه واحدة تانيه ؟ ٠٠ لو فيه ماتقولش ٠٠ بعدين أموت ٠٠

الطالب : ياستلى أنا نفسى أقول لك الدنيا ماشيه ازاي ! ٠٠  
اسمعى ٠٠ !

تمر : استخبي ٠٠ استخبي جم ٠٠ لكن استنانى ٠٠

الطالب : فين ؟ ٠٠

تمر : ح اجى لك ولو فى آخر الكون ٠٠

( يدخل ابن القارح والعسكر ومجموعة صحفيين  
ومصورين - عدسات تصوير )

( بروجى - هرج ومرج - وجرى ٠٠ وسط الزيتة يدخل  
عمرو وشجرة الدر يتحدثان فى وقار الكل ينحنى ظنا انه  
السلطان ) ٠٠

شجرة الدر : أنا اللى خلّيت عز الدين ايبك سلطان ، تنازلت له عن  
العرش ٠ كنت باحبه فاذا بيه يخوننى مع مراته ٠٠ كان  
بيخطط يتعشى بيه ٠٠ لكن أنا تغديت بيه ٠٠ لكن قتلونى  
بالقباقيب ورمونى للكلاب - دعيت عليهم ٠٠ مافيش سلطان  
منهم مات على فرشته مرتاح البال ٠٠ اللى على الجسور  
نهشت النسور جتته ٠٠ واللى دويت الشمس عضمه فى  
الصحرا ٠٠ واللى ٠٠ واللى ٠٠ ها ٠٠ ها ٠٠

عمرو : ويبدو لى أيضا انهم كدابون ٠٠ ولذلك احتاجوا لنا لكى  
نشهد على انتصارهم ! على من ؟! البرتغاليون ؟! لست  
اعرفهم ٠٠ هل هم نوع من الروم ؟ ٠٠ كنا نسوقهم أمامنا  
مثل النعاج ٠٠ ولكن ما يحيرنى شىء ، ان قائد الجيش هنا  
- والمعركة على بعد آلاف الاميال ٠٠ نوع جديد من القيادة

.. ولكن .. انظري .. نفس الوجوه التي تعودت أن أراها  
عقب كل هزيمة .. أو انتصار .. نسور حارجة .. ضباع ..  
أعود بالله .. لو كنت أدري أن الأمور ستسير الى هذه الدرجة  
من السوء .. لما ..

شجرة الدر : تعالى من هنا .. حتى لا نقابل ذلك السفاح الذي  
يتحرش بك كلما رآك تستطيع أن تجلس في هذا المكان لنشاهد  
كل شيء .. هيا .. فالبداية على ما يبدو كانت على يدك  
القويتين .. نعم .. أظنه أنت .. كنت البداية قبل بدايتي ..

عمرو : نعم ! قصدا أخرت قراءة خطاب الخليفة حتى عبرت حدود  
مصر .. خفت ان يثنييني عن فتحها .. هل اخطأت - أم كان  
صوابا ما فعلت ؟ لست أدري .. فهي بلاد كالحلوى .. تجذب  
كل ذباب الأرض .. ولذلك أثقلها الدخلاء بالجرائم ، واغرقوها  
في الدماء .. الآثمون من كل جنس ولون حتى من ابنائها  
يحملونها رهقا ..

شجرة الدر : لا تشغل بالك بالأجناس .. فان الله يسلط جنسا على  
جنس ..

( الغورى يظهر - ترتفع الهتافات .. يبدأ فى تحية الناس  
.. يوزع ازهارا على كل من يقابله .. فى رقة .. )

الغورى : ابنائى .. ( هتافات ) ها نحن أخيرا نلتقى بعد مسيرة  
طويلة .. وناجحة بكل المقاييس .. وانتم عارفين .. أنا من  
الأول - الأول رفضت السلطنة .. لدرجة اننى بكيت بشدة  
وبكل صدق .. لا أريد هذا .. لا أريدها !! مسئولية كبيرة ..  
ان تحكم بلدا كهذه .. وأنا رجل بسيط ضعيف .. وقلبي  
خفيف .. كلهم كانوا ضدى - قيت الرجبي أمير سلاح  
ومصرباى أمير كبير - ولذلك سلطنونى لاحمل ذنوبهم

وذنوبها ٠٠ وذنوبكم وكيف سأقابل ربي ٠٠ وفي رقبتى طعام  
كل هؤلاء الجوعى ٠٠ وملابس كل هؤلاء العراة ٠٠ ولكن ماذا  
كنت أستطيع أن أفعل ٠٠ وقد حاصرونى ٠٠ فلم أجد بدا الا  
ان اجلس على المكان الوحيد الآمن ٠٠ على العرش ٠٠ ثم  
قتلتهم جميعا ٠٠ نعم قتلتهم ٠٠ لم يكن لى أن آمن لهم  
والاخطار كانت حولنا فى كل مكان ٠٠

لست ألقى الكلام على علاته ٠٠ ولكن هاهى الاحصاءات  
والوقائع ٠٠ والحسابات ٠٠ والارقام ٠٠ هى التى تتحدث  
وتتكلم ٠٠ نعم ٠٠ وكلها تؤكد اننى فعلت لمصر كل شىء ٠٠  
ودفعت لها كل شىء ٠٠ وصرفت عليها كل شىء ٠٠ حتى لم  
يبق شىء ٠٠

#### ( هتافات ) ٠٠٠

عشنا معا وكافحنا ايد لايد ٠٠ وحققنا أهدافنا العظيمة أوقفنا  
نزف الدماء وغلبنا أهل الدهاء ٠٠ فيماعدنا بعض الفلاحين  
الذين يهربون من فلاحه الأرض من الجعيدية ومن الزعر ٠٠  
والاوباش ٠٠ وسكان الحارات البرانية ، الذين لا يريد أحد  
منهم ان يشتغل بصنعة ٠٠

وفيما عدا بعض العربان الذين لسنوا على ( أييك ) وقالوا  
انه عبد ومملوك ولا يصلح لما تصلح له الملوك ٠٠ وهل هم  
يصلحون ؟ ٠٠ تصوروا ٠٠ لو أن العربان حكمونا ٠٠ كان  
حالنا يبقى ايه ؟ ٠٠

أما اليوم ٠٠ فانه ليسعدنا ان يتقدم مواكب احتفالاتنا ٠٠  
بالنصر ٠٠ صديقى سليم العثمانى بنفسه - مفاجأة ٠٠ هه ؟  
سربريز ! ٠٠

ففى الوقت الذى دمر فيه الفرنجة السد الذى بناه ذو القرنين

•• ووصلوا بحر الروم ببحر العرب يضع هو يده في يدي ••  
لنبنى سويا عالما أبديا ثابت الأركان •• من الثقافة المشتركة  
والأمن بين أولاد العم •• واليوم سنبنى هرما - رابعا ليكون  
مزارا لاحفاد المعتدين •• ليعرفوا كيف حافظنا على طرق  
التجارة آمنة وليعرفوا اننا - وليعرف الذين ظلموا أى منقلب  
ينقلبون ( ••

ابن القارح : هرم الجيزة الأكبر •• احدى عجائب الدنيا السبع ••  
مبنى على مساحة ١٢ر٥ فدان مرابطة تماما •• وله أربعة  
أضلاع • كل واحد منها يواجه جهة من الجهات الأربعة ••  
وقد استخدم في بنائه حوالى ٢ مليون و ٣٠٠ ألف حجر ••  
متوسط وزن الواحد منها ٢ر٥٠٠ طن •• وارتفاعه حوالى  
٥٠٠ قدم أو ١٦٧ متر تقريبا واستخدم في بنائه مائة ألف  
عامل •• مات منهم على الأقل ستون ألف •• وسيستمر العمل  
فيه حوالى عشرون سنة انشاء الله •• وسهل ••

الغورى : ولقد قررت أن يبدأ العمل فيه من الغد •• في وجود كل  
هؤلاء الضيوف الكبار ليكونوا شهودا على من سـيـزيـفون  
التاريخ بعدنا وسيتقولون غدا بأننا هزمنا •• يا ابن القارح •

ابن القارح : أمرك يامولاي ••

الغورى : هل حضر جميع الضيوف ••

ابن القارح : نعم يامولاي •• ولكن فيه بعض سوء الفهم •• فقد  
اضطررنا لمنع الملكة كليوباتره ••

الغورى : كيف تجرؤ ؟ ••

ابن القارح : منعها فقط من الظهور عند باب السلسلة •• لانها جاءت  
عارية تقريبا يامولاي كسلو زمانهم ••

الغورى : تخلف ! .. ويسألون لماذا هزمنا ؟! اعتذروا لها وادخلوها  
الى جناحى مباشرة ..

ابن القارح : وحاجة تانيه يامولاي .. الشاه اسماعيل الصفوى ..  
احتج على وجود الخنكار سليم .. وانسحب وهو يهدد  
بالحرب قائلاً : ان الحية لا تلد كتاكيت وان مافيش حاجة  
تسر القلب تيجى من الغرب ..

الغورى : يعنى ايه ؟ ..

ابن القارح : لست أفهم ..

الغورى : فى ستين داهيه حنلاعب عيال احنا .. ( للناس )

ابنائى بهذه المناسبة البهيجة أبشركم يا أصدقائى لكى تنفتح  
شهيتكم للطعام - فقد حققت ما وعدت به منذ بداية ولايتى ..  
قضينا على كل الاعداء الداخلىين .. ولم يبق سوى معارض  
واحد .. هو الادبى السافل .. بتاع كلام الناس .. وما هو  
الا داسوس خناس وازجاله بذينة وعديمة الفنية وغير موزونة  
.. لكن أبشركم اننا قبضنا عليه .. وهذا فال حسن  
لاحتفالنا .. و

( هتافات ) ..

تمر : ( منزعة ) قبضتم عليه ؟ .. ازاي ؟ .. معقوله ! ..

الغورى : وسوف نجرى له محاكمة عاجلة وعادلة .. فنحن لسنا  
برابرة .. حتى اعدائنا نكفل لهم المحاكمة العادلة .. فقلب  
العام يدق على دقات طبولنا .. فهيا للمحاكمة الفورية ..

ابن القارح : قبل الأكل يامولاي !!

الغورى : لك حق يا ابن القارح فلنؤجل المحاكمة للفصل الثانى  
اما الآن كلو واشربوا من خيرات مصر ..

واعزفوا الموسيقى .. الضيوف هم الأولى بالرعاية فنحن  
أصحاب كرم ..

اشعلوا البخور .. انثروا العطور .. عايزين موسيقى شعبية  
وباليه وطبل .. وزمر .. ورقص ودانص ثقافة .. ثقافة  
لكل الناس .. ثقافة ! .. شعبية !!

( تضاء الأنوار ويشارك الجميع في رقصة عامة وأغنية تلبية  
للإرادة السنوية السلطانية .. )

ثقافته .. ثقافته

قهاوى

صحافة ..

رداوى غناوى

في سوق الهيافه ..

تعيش الثقافة

.....

واهى الناس تقرفش

في ضلك تنعنش

ياسلطان مخلى رقبتنا زرافه

بفضل الثقافه ..

.....

مطولها خالص ..



وايه اللي ناقص

م القلعة نرقص لكوم الشقافه ..

لبس الثقافه

.....

ممالك وهيبه

وعمه شيبه ..

وعقلك ياغورى مثال الحصانه

ونبع الثقافه ..

.....

ياطلعه بهيه ..

كلامك بديع ..

لياليك هنيه

وعصرك ربيع ..

فاض النيل بأمرك عصر الجوافه ..

محللى بثقافه ..

● توزع المشاريب ●

## الجزء الثاني

( استعراض موكب وفد العسكر يحيى الغورى وهو يحيى  
الجماهير مع ابنته )

ياغورى يارافع رايات الصمود  
يافاقع مرارة العدو الحقود  
نسبح بعدلك ..

ونسلم كلامك ولا يوم نجادلك  
مادام فيه جرايه كفايه وبارود  
.....

احنا الممالك فخار الممالك  
عبرنا ألوف الظروف والمعارك  
وكل اللى قادر  
وشاطر مغامر

بيسبق الى العرش لو كان مبادر  
وفزت أنت كلت البلد بالجنود  
.....

واذا كنا من كل أرض اتخطفنا

رمانا قدرنا فى مصر اتحدفنا  
ملكنا ترابها  
جمعنا ذهبها  
وريحنا نمنا على كتاف تعبها  
فخمسه وخميسه فى عين الحسود  
.....

آدى احنا انتصرنا انتصار الأسود  
ورجعنا بالحرب مجد الجدود  
رجعنا .. واحنا  
كده زى ما احنا  
وطبل انتصارنا اغانى ولحنا  
ملبش اعاديننا خلف الحدود ..  
.....

( الغورى مع ابنته بعد الموكب )

الغورى : بنتى حبيبتى ، مؤكد عجبك الحفله .. كل ده علشانك ..  
نمتى كويس ؟ .. هاتى قبله لبابا ..

تمرباى : بابا .. بابا ..

الغورى : ايه ؟ .. مالك متغير حالك ليه ؟ .. احنا النهارده ف  
عيد ..

تمرباى : مش عارفه أقول لك ازاي ؟ .. مش عارفه ان كنت تفهم  
والا لا ؟

الغورى : نعم ! فيه ايه ما أقدرش أفهمه ؟ .. كونك بنتى لا يعطيك  
الحق فى الشك فى قدراتى .. احنا النهارده فوق قمة التاريخ ،  
قلب العالم فى قبضة ايدينا ..

ابن عثمان نفسه جأى بنفسه يسترضينا ٠٠ واللى ضاع من  
أراضينا حنعوضه بكره ٠٠

تمرىبأى : أنت مش عارف أى حاجة عن بكره ٠٠

الغورى : يابنتى أنا عارف كل حاجة ٠٠ الرمالين فاتحين المستقبل  
قدامى زى الكتاب ٠٠ كل اللى حصل كان غلطتى ٠٠ لانى  
سمحت لنفسى أضحك على كلامه من باب الديمقراطية - كنت  
فاكره ينفع مضحك بدل جوهر الزنجى ٠٠

تمرىبأى : اللى سلخته حى وحشيته تبين ٠٠

الغورى : ده كلام عدوى ٠٠ ازأى يتقال فى القصر ٠٠ تبقى فوضى  
يابنتى ٠٠ الحقايق كلها ظهرت ٠٠ هزمناهم ٠٠ وانتهينا ٠٠  
تمرىبأى : احنا فعلا انتهينا ٠٠

الغورى : لسه بدرى ٠٠ خلاص حبيبك وصل ٠ وح اعمل لكم زفه  
اجدع من زفة قطر الندى ٠٠

تمرىبأى : مش بتقول فيه أزمة وتشحيط فى المون والفلوس ٠٠

الغورى : ده كلام بنقوله عشان الممالك يهدوا ، والخلق يتهدوا  
عننا ، لكن عشانك انتى وأميرك الخلبوص كله تحت أمرك  
وأمره ٠٠

تمرىبأى : تقصد ؟ ٠٠

الغورى : طبعا ومين غير حبيب قلبك وقلبى ٠٠ لولاه كانوا  
البرتغاليين خدونا على خوانه ٠٠ سابهم لحد ما وصلوا بحر  
الحجاز ٠٠

وغرقهم عن آخرهم ٠٠

تمرىبأى : حكاية لقبل النوم ممكن يحكوها للاطفال بعد خمسميت  
سنة ٠٠

الغورى : هو اللى حافظ على المستقبل

تمرباي : المستقبل ؟ .. أنت مش عارف أى حاجة .. يابايا  
ياسلطان الزمان كل دى مش حقيقى .. ده كله غيره ديكورات  
.. سلطنتك وحربك وحتى قائد أسطولك .. وعمتك دى مجرد  
اكسسوار .. وده كله تمثيل فى تمثيل ، أنت مش قادر تفهم ،  
المستقبل غير كده خالص .. المستقبل حيعملوه ناس تانيين .

الغورى : ياخسارة ، مخك اتروش ..

يا بنتى المستقبل فى ايدينا .. والفضل لاميرك الشجاع ..  
ضحى بكل رجالته ورجع لك حى بكل كرامته ..

تمرباي : وعايزنى هديه مكافأة على شجاعته ..

الغورى : حق المنتصر ..

تمرباي : لعلمك بقى أنا مش ح اتجوز أى أمير

الغورى : امال ناويه تتجوزى مين ؟ ..

تمرباي : حزر فزر

الغورى : غلب حمارى .. مين ؟ ..

تمرباي : خمن ؟

الغورى : ماخمنش قولى مين ؟ ..

تمرباي : هوه .

الغورى : مين ؟ ..

تمرباي : الادباتى .. كلام الناس .. الزجال اللى أنت بتدور عليه

الغورى : هاها .. مش ممكن .. مش حينفع .. لاننا خلاص

قبضنا عليه .. وحنعدمه ونحاكمه؟! قلتى ايه ؟ ..

تمرىبى : هاها مش ممكن ٠٠ قبضسوا عليه ازاي ؟ ٠٠ اذا كان  
عمركم ماشفتوه ٠٠ ولا تعرفوا شكله ٠٠

قبضتوا على كلامه ؟

الغورى : ياسانجه مادام اعتقلناه بيبقى عرفناه ٠٠ انا ليه يابنتى  
بصاصين فى كل شق ٠٠ ويقدرروا يقولوا انتى حتفكرى فى ايه  
بعد بكره ثم ان احنا كنا عارفينه من الأول ٠٠

الحمار الثرثار ٠ بتضحكى ؟! ٠٠ ايوه حمار ومجرم ٠٠ انا  
كنت على راس الموكب بنشق المدينة ٠٠ الزينة ماحصلتش ٠٠  
الفسوان بتزغرت من الطيقان ٠٠ الطبول والبرازانات عامله  
هيبه وجو ٠٠ موسيقى تصويرية تشرح القلب ٠٠ هتافات  
الناس بتتهز كيان العالم ٠٠ احمر واخضر واصفر الاعلام زى  
الأطفال بتنادى على السلطان ٠٠ ايدين وقلوب بتترفرف ٠٠  
وحمام بيهفهف وأنا وسط كل ده بالشاش والقماش والكمبوز  
والقبة والطير ٠٠ أول ماشافنى الشعب ٠٠ زعق ٠٠ وهيص  
كله هتف وهل ٠٠ من قلبه ٠٠ الا هو ٠٠ المجرم السافل ٠٠  
رقمته وسطهم ساكت بيتسم فى سخرية وبلاسه ٠٠ قلت اكيد  
اللى يقدر يسكت وسط الزيتة دى بيبقى بيفكر فى حاجة فظيعة  
٠٠ حاجة مايقدرش يبعد عنها بالزعيق والهتاف ٠٠ قلت  
لابن موسى ٠٠ عليه بيه يابركات أول ما الموكب يعدى ؟ ٠٠

تمرىبى : ومسكتوه ٠٠

الغورى : طبعا ٠٠ بعد ماعدى الموكب ٠٠ وكل الناس شـبعت  
م الهتاف ليه ٠٠

تمرىبى : وكلهم دوروا وشهم ، وشتموك ، واتريقوا على هدومك  
وحرركاتك وقالوا نكت زى كل مره

الغورى : فعلا ..

تمرىبى : وهو ساكت برضه ..

الغورى : فعلا ..

تمرىبى : راحو رجالتك الاغيبيا حسب امرك الغبى .. واعتقلوا

الساكت الصامت الوحيد ..

الغورى : الشجاع الوحيد ! ..

تمرىبى : ازاي بقى ؟

الغورى : لما واحد يمثل دور الشجاع ويسكت فى وقت زى ده لازم

يكون داهيه مسيحة وانا لا احب الدراهى اسيحة .. ولا اثق

بالصامتين .. المتكبرين الاوغاد .. انا مابيهمنيش اللى

بيزعقوا .. حتى ولو كانوا بيشتمونى ..

تمرىبى : ليه ؟ ..

الغورى : لانى عارف همه بيزعقوا ليه ؟ ..

تمرىبى : ومايهمكش اللى بيتريقوا ويضحكوا ..

الغورى : لانى عارف همه بالضبط بيضحكوا على ايه ؟ .. انا عارف

اللى بتكلم قال ايه وماقالش ايه ؟ .. وليه ؟ ..

( يتحدث وكأنه يهدد الحاضرين )

عارف اللى معاه .. من منين ؟ واللى مامعاهش وداه فين ؟

لكن اللى ساكت .. ماباعرفش هو مخبى ايه ؟ .. وماقلش

ليه ؟ .. وده ماہتفش ولا حتى اتريق زيهم .. قصده ايه ؟

( الطالب يدخل من فترة ثم يظهر نفسه متريدا .. )

الطالب : احم .. تسمح لى اقدم نفسى

( الغورى يشهر خنجره )



- الغورى : أنت .. هوه .. الكداب المجرم ..
- تمرباي : مش هو يابابا .. اكيد مش هوه ..
- الغورى : مين أنت ؟
- الطالب : أنا راجل بسيط .. انسان
- الغورى : تبقى هو ..
- تمرباي : يابابا ده من بعدين قوى
- الغورى : يعنى ايه ؟ ..
- تمرباي : ده راجل تاريخى ..
- الغورى : هو أنت ؟ .. جيت فى وقتك عشان تشاهد انتصارنا على  
آخر الاعداء .. ياللا .. روح للاستادار وقول له يجيب الولد  
الكداب الشاعر اللي اعتقلناه عشان نحاكمه قدامك للتاريخ  
.. ياللا .. المحكمة محكمة ..
- الطالب : مولاي السلطان ..
- الغورى : ليه مش بتروح ؟ ..
- تمرباي : عايز يكلمك عن حاجات مهمه ..
- الطالب : عايز اوضح لك ..
- السلطان : أنت ؟ .. توضح لى .. ايه ؟
- تمرباي : ليه الحكاية تمثيل فى تمثيل ..
- الطالب : أنا أصلى من بعدين كتير وعندى معلومات ممكن تنفعك
- الغورى : هايل .. تبقى شاهد ضده فى القضية مادام عندك  
معلومات ..

**الطالب :** دى معلومات عنك أنت .. أنا كتبت رسالتى عن انجازاتك  
وأعمالك العظيمة .. السبيل والوكالة والبستان .. والمسجد  
الحرام ..

( الغورى كمن لدغ )

**الغورى :** كذب .. المسجد ده بنيته بأموال حلال ..

( تنفجر تمرىاي ضاحكة وتحاول ان تشرح للطلاب وتهدى  
غضب والدها )

**تمرىاي :** مايقصدش يابابا مايقصدش .. ( للطلاب ضاحكة )

الناس سموه كده علشان نهب العمدان والقبلة من القصور  
والقبور - ليه كده بس !؟

**الطالب :** ما اقصدش يامولاي .. انا قصدى انى قرئت عن المساجد  
والمقبرة والسرايب والعرقانه .. والمنشأر الاوتوماتيكي  
اللى بتنشر بيه العربان .. المفرمة ..

( تمر تضحك ) .. ( والسلطان يتباهى )

**الغورى :** وح ابنى الهرم الأكبر كمان .. عشان الأحفاد والاجيال  
تذكر انتصارنا على البرتغاليين ..

**الطالب :** احم .. وأحفادهم ييجوا ويدفعوا عملة صعبة على شرف  
خيبة جدودهم ..

**الغورى :** بتتناوز !؟

**الطالب :** وأنا اقدر وخنجرك فى قفايا ..

**تمرىاي :** قصده ع السياح يابابا .. ضيوف زى السفرا والقصان

**الغورى :** امال ايه العملة الصعبة دى ؟ ..

تمرباي : دنانير بندقية .. بس امريكانى ..

الغورى : عظيم .. انا ح اسسمح له .. احكى عن أمجادنا  
وانتصاراتنا وأكد على استقرار نظامنا ودولتنا الى الأبد ..  
خلاص .. بنتخطى فترة النقاهاة وح ننطلق

تمرباي : يابابا ده عارف حاجات كتير .. عارف مصايب .. ولازم  
تسمعه وتعمل اللي ح يقولك عليه ..

الغورى : هو اللي حيسمعنى وحيعمل اللي قلت له عليه .. هيا ..

الطالب : يعنى سيادتك مش عايز تسمع بعض الحقائق . وتفضئ  
ان التمثيل يستمر .. نكمل ؟ والا أقول لك ع اللي كل الناس  
دى عارفاه دلوقتى عنك .. ونضرب كرسي فى الكلوب ! ؟

الغورى : تمثيل .. تمثيل .. التمثيل لازم يستمر والا حيتهد المسرح  
على دماغنا كلنا .. هيا .. تمثيل ..

الطالب : طب حاسب .. ماتزقش .. كنت بأسأل بس ( يفتعل  
ويرى الأم بين الجمهور ) سمعا وطاعة يامولاي .. ياقوم ..  
ياحجاب .. يا أم متولى خشى واقعدى هنا - الله - امال  
فين المحروس ؟ ..

الأم : مش لقياه .. ضاع منى فى الزحمة .. أنا خايفة عليه قوى  
ليتوه ..

الطالب : طب اقعدى هنا وبحلقى له قوى ..

الغورى : شوفتى ، ماقدرش يقول بم .. راجل تاريخى .. لكن  
قدرت أخضعه .. هه ..

( تخرج هى أيضا غاضبه )

تمرباي ٠٠ استنى ٠٠ يخص عليكى ٠٠ مش عارف زعلت ليه  
دى تانى ٠٠ والنبي لمخاصمك ٠٠ هه ٠٠

( يرى الأم ولكن يتجاهلها ويخاطب الجمهور )

انا عارف بتفكروا ف ايه ؟ ٠٠ وبتقولوا عليه ايه فى سركم ٠٠  
عاملين ان انتم فاهمين كل حاجة ٠٠ والحقيقة انه لو فيه  
شجاع واحد وسطكم ٠٠ ماكانش التمثيل اسـتمر ٠٠ ولا  
الغورى قعد على العرش كل المدة دى ٠٠ ياكل وينهب ويقتل  
ويسلخ ٠٠ ويبيع الوظائف مرة واتنين وتلاتة للى يدفع ٠٠  
ويقاسم الشحاتين حتى الشحاتين فى أرزاقهم - ابعدوا الوليه  
دى من هنا - ( لا احد يدخل ) ٠٠ انا عارف انكم بتتمنوا  
موتى ٠٠ مش كراهية فيه لكن من باب التغيير ٠٠ لكن انا  
بارادتى باخرجكم تهتفوا للغورى طويل العمر ٠٠ وتكتبوا فيه  
الشعر غصب عنكم ٠٠ وتدعوا له ينتصر ٠٠ على من يعاديه  
٠٠ وتزينوا الحيطان بالشاش والقماش ٠٠ وانتم عرايا ٠٠  
وتدبحوا البهايم قدام الموكب وانتم مش لايقين تاكلوا ٠٠  
وبتدعوا لى بطولة العمر ٠٠ وانتم بتتمنوا يطلع عليه اح كلب  
ويبقر بطنى بسكينه تالة ٠٠ لكن طظ فيكم ٠٠ بعينكم ٠٠

( يراها فيتجاهلها غصبا )

انا على قلبها لطولون وحاغير التاريخ ٠٠ وح ابنى هرم مبنى  
قبل كده اغاظة فيكم ٠٠ وحيحفظ اولادكم فى المدارس ان انا  
اللى بنيته ٠٠ وحتفضلوا تقروا اسمى بالمانشيت وع الصفحة  
الأولى للابد كل يوم ٠٠ كل يوم ولاحدش حيقدر ينزلنى من  
على صدركم ولا المؤلف الأهل اللى مفبرك الحكاية الهيلة دى  
كلها ٠٠

( ينتبه للأم فينتابه الغضب )

الغورى : انتى لسه هنا ؟ طلعوها يا ابن القارح .. ارموها بره ..  
حتى لو كان التمثيل محتاجها .. مش عايز اشوف خلقتها  
والا !!

( يدخل ابن القارح مهرولا والحرس ويسحبونها فى قسوة )

الأم : أنا كنت راجعة بلدى .. ابنى تاه منى لو الاقيه مش ح اقعد  
دقيقة واحدة هنا .. يامتولى .. تعالى لأمك .. مالناش حد  
.. هنا

( يتضايق الغورى ويغضب ويبدو عليه الغيظ .. تدخل  
كليوبطره )

كليوبطره : امبراطورى الجميل .. مالك .. مـبـوز ف عيد  
انتصارك

الغورى : أنت مين ؟ ..

كليوبطره : نسيتنى ياغدار .. ياعينك يا جبايرك مش عارفنى ؟ ..  
أنا .. أنا التى من سحرها افقتن الدهر ..  
وقال فيها ابن اباطه الشعر ..

الغورى : مين ؟

كليوبطره : والشوك بريحه عطرها فتح ..

الغورى : معذور .. لخمونى بالتوافه .. وغرقونى فى الحمامه ..  
نسونى طعم الجمال .. ياست الحسن والجمال ..

كليوبطره : أنا مش ست الحسن والجمال .. لكن عذرك معاك ..  
اللبس غيرنى ..

ماحدثش واخذ على انه يشوفنى كده .. يا عصفورى ..

الغورى : أنا اسمى الغورى ..  
( تجلس على ركبته )

كليوبطره : وأنا كليو .. بطره ..  
( ينتفض )

ياسم .. مالك واخذها جد كده ليه مش مهم الاسم ..

الغورى : الحالة مأزمة جدا والوضع خطير ..

كليوبطره : طول عمر الوضع خطير من أيام مينا وخوفو ..

الغورى : النهارده الحالة دي ماحصلتش قبل كده ..

كليوبطره : نفس اللي قاله قيصر .. وهو بينام على رجلى .. لكن  
انطونيو قالها وهو بيبيص فى عينيه .. كل اللي بيصنعوا  
التاريخ على مزاجهم قالواهاالى .. مهما كان اللبس اللي أنا  
لابساه .. وعشان كده بأفضل أكون من غير لبس خالص ..  
عشان مايجصلش لبس .. أصل أنا حبيت كل اللي صنعوا  
ولو حته قد كده فى التاريخ .. همم ! .. دانت وحدانى  
خالص .. ياخراشى ..

الغورى : من يوم ماقعدونى على الكرسي .. ده وأنا باتمنى يوم  
هناوه .. الأكل والشرب ياما .. والجوارى ع القفا لكن  
مافيش راحة بال عملت كل شىء علشان أرضى كل الناس ..  
لكن مافيش فايده .. !!

( يقولها بطريقة ما )

فرقت عليهم قمحى ولحمى .. وقماشى .. برضه .. لكن  
مافيش فايده ( ! )

( بنفس الطريقة )

مش عاجبهم ٠٠ عايزين رقبتى ، كل يوم يقوموا ضدى ٠٠  
كليوبطره : طول عمرهم ناكرين للجميل ٠ ياكلوا من خيرنا  
ويشتمونا ٠٠

الغورى : قال وايه بانهب الدكاكين والغيطان ٠٠ قال وباسسرق  
مخازن التجار ٠٠ وبابيع الوظائف واقبض برطيل ٠٠

كليوبطره : كدابين - أوباش ٠٠

الغورى : ح اجيب لهم منين ؟ ٠٠ البى طلباتهم ازاي ؟ ٠٠ هو  
أنا بازرع والا باغزل ٠٠ ماهو لازم الم واجمع عشان أقدر  
أوزع ٠٠ أربعين سنة على كده ومش عاجبهم يهتفولى  
ويشتمونى ف قفايا ٠٠

كليوبطره : منافقين ٠٠ معاك معاك وعليك معاك ٠٠

الغورى : ويطلعوا اشاعات ولما اقتل اللى بيردها ٠٠ يقولوا لى  
مجرم وسفاح ٠٠ أنا ؟ ٠٠

كليوبطره : ياله من ببغاء عقله فى اذنيه ٠٠

الغورى : اللى يكذب على السلطان ويدعى الفقر ومايدفعلش اللى  
عليه ليه ٠٠ اعمل فيه ايه ؟

كليوبطره : اقتله فوراً ٠٠

الغورى : لأ لازم يعترف على الأموال الأول ويقر والا ضاعت  
اعصره من كعابه أقلع له عينه ٠٠ اكمشه بالكماشات  
أنا مش غاوى ٠٠ لكن الكرسي صعب والسلطة محتاجة  
يقولوا عليه سفاح ومصاص دم !!؟

كليوبطره : قطع لسانهم من لغوغه ٠٠



الغورى : لا ٠٠ وعائزين زينة وفنكشه وموكب كل يوم ٠٠ كل ليئه  
وأوزع اكراميات ٠٠ ولما أبيع الوظائف علشان أعطى  
مصاريفهم يقولوا برطيل ٠٠ طب اعمل ايه ؟ ٠٠ دوله عايزه  
مصاريف ٠٠

كليوبطره : أنا فاهمك جدا ٠٠ بس ماتعيطش ٠٠ يا حبيبي ٠٠

الغورى : ويضطرونى اعمل تجريده ورا تجريده ٠٠ وحمله ورا  
حمله ٠٠ لا المالك يرحموا ولا الفلاحين بي فهموا ولا العربان  
بيتهدوا ولا الفرنجه ٠٠ بيرحونى ٠٠

كليوبطره : هو هوه ٠٠ نام ٠٠ ارتاح ونام ٠٠

ح ادبح لك الحمام ٠٠ وأجيب لك السلام ٠٠ على فرش ريش  
نعام ٠٠ نام الننه نام ٠٠

الغورى : ( يهب ) وازاى ح انتصر من غير ما احارب الحرب كرب  
وصعب ودم للركب لكن اعمل ايه ؟! هو أنا غاوى حرب ٠٠  
أبدا ٠٠ دانا بحب زراعة الزهور ٠٠ شوفتى الجنينه اللى أنا  
زارعها بايديه ٠٠

كليوبطره : جنه ٠٠

الغورى : مش عائزين راحتى ليه ؟! وبيحسدونى ٠٠

كليوبطره : أنا قلبى طول عمره معاك ٠٠

الغورى : ودلوقتى ٠٠ بعدما ارتحنا من كل الحروب ٠٠ يطلع لى  
حته حشره ٠٠ عشان يقول عليه ٠٠

أنت قلت لى اسمك كليوبطره ٠٠

كليوبطره : أنا بتاع المنتصرين ٠٠ خصوصا فى ليالى احتفالهم  
بالنصر لانى بافهم اللى محتاجينه بالضبط ٠٠

الغورى : كليوبطره

كليوبطره : عيني ..

الغورى : قولى لى يامجرم ياسفاح ..

كليوبطره : قطع لسانى ياغرغر ..

( يدخل ابن القارح )

ابن القارح : أنا الاستادار ..

الغورى : اخرس .. عايز ايه دلوقتى .. جاتك داهيه ف شكلك ..

ابن القارح : الامير الشجاع الهمام أمير ما وراء الهند بعث طالب  
المثول بين أيديكم .. يدخل ؟

الغورى : خليه يتنيل يدخل .. وأنت تغور من وشى .. ارمى نفسك  
فى العرقانه لغاية ماتعفن .. جاتك داهيه أنت وهو ..

( الحرس يقودون الاستادار )

الغورى : خلاص .. جه الفرج فى وقته .. ح اريح دماغى واتنازل  
له عن العرش والسلطنة ..

كليوبطره : أوعى ..

الغورى : ح اجوزه بنتى واسيبه يصنع شويه فى التاريخ ..  
واتفرغ لك أنا .. قصدى .. اتفرغ .. لاعمال البر .. أنا  
أصلى زهقت .. من قلة النوم نفسى ف حقه حنيه .. دانتى  
لو شفقتينى من عشرين سنة ؟ أنا اتغيرت خالص ..

لدرجة ماحدث م اللى عارفينى عادوا عارفينى ..

كليوبطره : اقعد ع الكرسى اعرفك مهما اتغيرت

الغورى : أنا حقيقى غير كده .. و حياة عيونك .. ماليش فى الحكم  
وماكانلش فى التمثيل .. دانا عاطفى جدا .. ورقيق  
خالص .. ياااه .. فىن أيام المراهقة .. خالص .. نروح  
نصطاد سمك .. ونقرا كتاب ألف ليلة .. مع بعض ونعيش  
فى كوخ زغنطط .. لقمة صغيورة تكفيننا .. عش العصفورة  
يغطينا .. ونسكر طينه .. على أى شط مايوصلوش مملوك ..

كليوبطره : وتكتب مذكرات سيرتك الذاتية ..

الغورى : وعرفتى منين ؟

كليوبطره : كلهم لازم يعملوا كده ياغرغورى ..

الغورى : ده اسمى ده

كليوبطره : همم ..

الغورى : جديد .. ولزيد على لسانك ياكليوبطتى ..

( يتعانقان )

( زينة وهيصة وهتافات يدخل الأمير والاستادارا  
الجديد هو ابن القارح أيضا فى شكل آخر - يعيش يعيش ..  
طبول بالتبادل مع الهتافات .. الغورى قرفان يلعنه سرا  
لاقتحامه المكان .. ويحاول طول الوقت أن يدارى كليوبطره  
التي يشغلها الفارس الجديد .. قليلا .. )

الغورى : جئت فى وقتك بالضبط يا بطل ..

بعد ان سبقتك انباء انتصاراتك فاسعدتنا .. ولقد علمنا انه  
بالرغم من غرق كل مراكبك الا انك ظللت تقاتل حتى آخر  
جندى وها انت جئت فى اللحظة التاريخية لتأخذ مكافأتك التى  
تستحق ..

( تلفت كليوبطره نظره ) ..

لا مش دى ان أميرتك تنتظرك

الأمير : ان من يؤدى واجبه لا ينتظر جزاء ولا شكورا ..

فلا تؤجل عمل اليوم الى الغد ..

فتصبح ملوما محصورا .. اننى

الغورى : أنا عارف نفسيتك كويس ( يبعد كليوبطره ) وقد قررت

تعينك أمير آخور كبير .. وأمرت بان الطبلخاناة تمشى قدامك

.. حتى وأنت رايح الدبليو .. سى ..

الأمير : هذا كثير كثير ..

الغورى : على قد اللى بيموتوا بيبقى حجم الانتصار .. وكل مازادوا

المقتولين زادت مكافأة اللى عاش ..

( يدفع الغورى كليوبطره الى الخارج )

الغورى : ولك كاملية بسمور

الأمير : أنا لم أحارب من أجل الدمور والسمور

الغورى : انتهينا .. أنا أمرت وأنت تقبل .. طول عمرك بتقبل

حتعمل عفيف على ايه ؟

الأمير : حاربت من أجل الوطن .. المجد العظمة .. حاربت من

أجل السماء .. الحق .. النظام الخالد الى الأبد ..

الغورى : عارفين .. وح أجوزك بنتى وح تكون وريثى - الجمل

بما حمل ..

( تدخل كليوبطره ومعها شراب )

( تتغير اللهجة - وكأنهم رجال أعمال عصريون )

الغورى : اووه .. شكرا ..

الأمير : مرسى ..

كليوپطره : أكيد جاى من البحر عطشان ؟

الغورى : الحر فظيع

كليوپطره : ويسكى . فودكا .. جعه .. بتشربوا هنا ايه ؟ ..

الأمير : جين

ك : وأنت ياغرغورى ؟ ..

غ : احم .. عرقسوس ..

مش باشرب كحوليات ..

ك : أوه يقطعنى نسيت .. اسلاميك ( تغازل الأمير )

غ : سيبنا دلوقتى .. نخلص شغلنا .. سيبونا ..

( يبعدها )

خلينا فى موضوعنا .. الهرم الأكبر .. الكبير جنبنيه بايه ؟

الأمير : ها .. أنا فى خدمتك فى الحرب وفى السلم

غ : جنبنيه بالحجر الرملى أفضل

الأمير : يخيل لى ان الجرانيت أطول عمرا

غ : طبعا لان أبوك هو المسيطر على محاجر الجرانيت .. الحجر

الرملى أنا ح أبيعته للدولة بسعر القراب ..

الأمير : لكن مش حيبقى متين ..

غ : خلاص .. منظر والسلام ..

الأمير : أمرك يامولاي

غ : لو كان أبوك يشغل مخه ويعمل حساب نصيب مكاتب الخبره  
وفرق العملة .. ويمشى أموره .. شوية كانت الدولة اشترت  
منه الجرانيت بسعر كويس وأنا كنت وفرت الحجر الرملى  
لمشروعات الاسكان الشعبى ..

الأمير : السعر اللى تأمر بيه يمشى يامولاي ..

غ : أنا مش بأفهم قوى فى الأمور المادية دى .. اتصرف أنت وفوا  
الأوراق .. وزبطوها .. وخصوصا مسائل العمولة ..  
والبرطيل والحلوان ..

الأمير : خلاص يا أفندم اعتبر اننا خلصناه النهارده ..

غ : والرسوم والدمغات .. أنا مش عايز تدخلونى ف أى تفصيل ..

الأمير : حنتصرف ربح بالك خالص .. احنا ماكناش بنتصرف أى  
كلام ولا بالصدفة .. دى خبرة وشجاعة وتدبير

غ : كاسك يا أمير ..

الأمير : كاسك ياوطن ..

غ : لكن فيه مشكلة يا أمير ..

الأمير : الأيدى العاملة؟! ..

غ : التجاريد جردتنا من الجنود . والماليك مستنفرين .. حنحتاج  
على الأقل لمليون فلاح .. عشان يموت نصهم - العربان  
ماينفعوش .. مالهمش فى حضارة البناء .. وأهل القاهرة

مش متحمسين ، تصور فيه اشاعات بتقول هرم ايه اللي  
حزبنيه وفيه في عهدة السلطنة ثلاثة قدام .

الأمير : مش معقول .. فين ؟ ..

غ : ماقالوش

الأمير : كدابين .. ولازم ينقطع لسانهم ..

غ : قبضنا عليه وحناكمه ..

الأمير : تحاكمه ؟ .. يعنى ايه ؟ ..

غ : يعنى اننا مش برابره ..

الأمير : على كل حال أنا رأيي كل ما زاد عدد المعارضين سهل

الأمر علينا ، نسخرهم .. ألافوتر ..

( يدخل الطالب ) ..

الأمير : مين ده ؟ ..

غ : رجع سيفك .. ده المهرج القاريخي ..

الأمير : هه ؟ ..

غ : بتاع تاريخ .. ( يضحك ) عملت ايه يابقاع التاريخ ..

الطالب : حسب أوامرك التمثيل حيسـتمـر .. حنجيب المتهم ..

والاستادار خد على عاتقه يفهمه خطورة اثبات براءته ..

ومن الأكرم أنه يعترف بالخيانة العظمى خبط لـزق .. لان حكم

الاعدام صدر .. وانتهى !

غ : عظيم .. ياتواريخي .. دانت طلعت أجدع من جوهر



ط : دى مش نكته يامولاي ..

غ : وبنفسك لمست يا أمير قد ايه انجزنا النهارده ..

اعتقلنا آخر واحد من كان واقف ضدنا ..

وبكده جنبدأ فوراً عصر الاستقرار العظيم

الأمير : سمعت اشاعة زى كده قبل ما أوصل ..

غ : امتى ..

الأمير : الحقيقة لازم فعلاً نقطع دابر كلام الناس اللي داير فى

الحوارى وسداد الطرق للقلعة .. زى النمل لحد باب

السلسلة .. ولولا كان معايا بواقى العساكر المخلصين وكام

كيس ذهب ماكناش وصلنا لهنا .. أول ما هتفنا باسمك

معلنين انتصارك ، الطوب بقى اكثر من الزغاريد فاضطريت

أبدر كام كيس ذهب على الزعر والحرافيش وألهيهم بيهم ..

واقدر أدخل لك ..

غ : هنا قدام القلعة ؟ .. عايزين ايه تانى .. كل اللي حيلتى صرفته

ع احتفالهم ..

الأمير : تصور خطفوا عمم عساكرى ولعبوا بيها كوره ..

وكانوا عايزين يخطفوا قلنسوتى .. لكن اضطريت للعنف ،

شايف الدم فوق سراويلى ..

غ : لا بقى دى قومه .. أسيب لهم السلطنة يطقشوا ف بعض

وأطفش ؟

الأمير : مش للدرجة دى يامولاي .. احنا فداك وهمه كمان لآخر

واحد فيهم ..

الطالب : الفرحة بانتصارك يا مولاي زادت حبتين • وأنت عارف  
الناس بتحبك قد ايه ؟ ••

( تدخل شجرة الدر )

شجرة الدر : أنت ازاي تسمح لنفسك تقدم الجراكسة على التركمان؟  
أنت نسيت مين اللي خلى لكم سعر في البلد دي ؟ •• هه ••  
الواحد منكم ماكنش يسوي تلاته درهم •• صبحتم سلاطين !  
على مين الكلام ده يا غوري ماتنساش أصلك ••

غ : يامولاتي يا صاحبة الصون والعفاف ••

شجرة الدر : بلا صون بلا عفاف •• أنت طينتها •• كلهم بيشتكو  
من تشحيط التبن واللحم ••

الطالب : قبضنا على المعلم على الصغير عشان اللحم وقد تم  
تعصيره من أكعابه وانتزعت حلقات صدره بكماشات حامية ••  
شجرة : بلا نيلاه •• لما انتو مش لاقيين تاكلوا عاملها خمس طبقات  
ليه ماكانوا اتنين ••

غ : ياست شجرة ! ••

شجرة : اللي يتسلطن يتسلطن على قده •• وبلاش جرسه ••  
الطالب : عندنا ضيوف يا ملكه المسلمين •• ومافيش داعي ••  
ننشر غسيلنا ف يوم مفترج ••

كليوبطره : اتفضلي يامدام ••

شجرة : مرسى •• فيه كحول ؟

كليوبطره : تفضلي ايه ؟

شجرة : في صحتك يا حلوه .. اسمك ايه ؟ .. ( تندمجان معا )

غ : وماقلوش القومه دي ليه ؟ ..

الأمير : قال عايزين تصدر عفو عن الولد ده .. الكلامنجى ..

زى ما عفيت عن .. ( يوشوشه ) ..

غ : مستحيل .. ده تدخل في أمور دستورية عليا ..

الطالب : هذا اعتداء على السلطة .. لازم يحاكم علنا كلنا قدام القانون سواء .. ولازم يعدم مع ان ياما سلاطين اعدموا وبدون محاكمة ..

الأمير : وأى تصرف آخر حيدل على ضعف احنا مش في حاجه اليه .. لازم من اعدامه ..

غ : محاكمته .. محاكمته ..

الأمير : وتوسيطه وخوزقته بعدين ..

الطالب : وتعلق راسه على حربه كما تقضى التقاليد الأصيلة ..

غ : أهه .. ممكن يطلع لنا ألف شاهد من التاريخ يؤكد حقنا في اعدامه ..

الطالب : بس أنا شايف ليكون مش هو اللي نقصده ! كل الشواهد بتقول ..

غ : مش عايزين شواهدك .. اخرس ..

الطالب : خرسست .. بس أنا كنت عايز أنورك .. لتغلط في حق نفسك .. الضنا غالى !

الأمير : قصدك ايه ؟ ..

الغوالرى : تعالى هنا .. أنت تقصد ايه ؟ ..

الطالب : مش ممكن يطلع الولد ده قريب حد هنا ؟ ..

الغورى : بدأت تتكلم زيه .. وأنا لن أسمح بالتساهل معاك زى  
ما حصل مع اللي قبلك ..

الأمير : بيقول ايه ده ؟

الطالب : ولا حاجة .. أنا أخرس ..

الغورى : احنا محتاجين رقبه يابتاع التاريخ .. ورقبتك مناسبة  
جدا الناس على الابواب محتاجة ضحية تتلهى فيها .. وفى  
ظرف دقيقة واحدة من دلوقتى ح تقول لى قصدك ايه ؟

الطالب : على ايه ؟ .. أنا كان قصدى فيه زبادى على شسنبك  
يامولاي ..

غ : كان قصدك تقول حاجه تانيه ..

الطالب : أنا ؟ .. مش ممكن .. دانا حتى اللي ف قلبى على  
لسانى .. كلمنجى ..

غ : يمكن تكون عايز تدخل التاريخ ؟ .. تعمل كلام الناس ؟ بطل  
الشعب ؟ .. وعلى فكره .. كل كلامك متسجل هنا .. ان كان  
نفسك حتلاقى لك ماده .. تكفى لقطع رقبتك ونشر القفص  
الصدري الجميل ده ..

الطالب : يامولاي !! أنا قصدى ان الشعب الحقيقى عمره ما يضيع  
وقته فى الشوارع .. لان الشعب مشغول بأكل عيشه ولقمته  
الشريفه .. مهتم بتعليم ولاده الصنعة ولما بيلاقى وقت يادوب  
بينام يرتاح .. انما اللي بيزعقوا فى الشوارع دول غوغاء  
وعواطليه وصيع .. وعملاء .. دول أجنبية .. جواسيس  
مأجورين ..

( في حماس مفتعل وخطابي يؤدي ماسبق )

غ : يعنى ايه ؟ .. معناه ايه الكلام ده ؟

الطالب : معناه يامولاي ان الشعب الطيب العامل الشقيان اللى  
بينى الحياة فى صمت بيايد السلطان فى كل زمان ومكان ..  
واللى يلاقى وقت يضيعه فى الصريخ فى الشوارع .. ما همه  
الا عملاء ..

الشعب الحقيقى دايم فى مكانه الحقيقى .. فى الحقول  
والبساتين والورش والطواحين .. والموانى والسجون ..

الأمير : برافوا ..

غ : هایل جدا ..

الطالب : عجبتك؟! والا لو كان الدم ده يا أمير دم الشعب .. كان  
حيالك جدا .. دم الشعب مؤلم انما لانه دم عملاء .. فهو  
مجرد ميكياج ..

الأمير : مش فاهم الكلمات اللى بيرطن بيها دى ..

الطالب : دى كلمات مفيده جدا يامولاي .. كلمات حديثه .. من  
عصر الصحافة المتقدمة .. تقضى على الحقيقة فى مهدها ..  
فيسود الامان والسلام ..

غ : أنا كنت متأكد انك داهيه مسيحه .. وأنا أحب الدواهي المسيحه  
ولذلك أنا ح اصدر أوامرى السلطانيه .. ان تظل فى خدمة  
دولتنا الخالده الى الأبد ..

ط : ودى برضه مش نكته يامولاي ..

غ : يابطل الهند والسند وقاهر البرتغاليين ..

الأمير : بأمرك يامولاي

غ : لقد وضحت الحقيقة الآن .. هيا يازوج ابنتى ووارث عرشى  
.. أمام القلعة .. مخربون وعملاء هيا

وخلص الشعب منهم .. لتكون لك السلطنة خالصة بريئة ..

الأمير : هكذا فهمت يامولاي ..

غ : مش ح أقولك على شغلك ..

الأمير : ساعملهم بما يستحق كل مخرب وعميل ..

غ : اننى اعتمد عليك فى هذه اللحظة التاريخية .. هيا قاتل من أجل  
ميراثك ..

الطالب : ع الجاهز ياعم .. عرش وسرير ومجد للابد ..

غ : وسألاقيك فيما بعد فانا سانشغل قليلا .. برى ازهارى ..

.. والا ماتت من العطش ( يأخذ كليوبطره فى ايده )

( يخرجون )

الأمير : سمعتم ؟ وقدامكم .. بيكلفنى مره تانيه أطول عمر سلطنته

.. خلصته من الاعداء الخارجين .. وح اخلصه من اللى

جوه .. وف مقابل ايه ؟ .. بنت مابتحبنيش .. وعرش

مش ضامنه .. لكن لأ .. وشرف اللى ماتوا وكلهم السمك ..

واللى شربوا مية المحيط ، ما ح اسمح المره دى بالضحك

عليه .. السلطنه حقى والبيت من نصيبى شرعا ..

أما أنتم فاسمعونى يا حرافيش القاهرة سأجعل من جماجمكم

سلما فاختبئوا .. فى الشقوق .. اننى قادم .. فاحفظوا

اسمى .. لاننى سأعلمكم الهتاف لى بطريقتة أخرى .. على

نغمة أضعها بنفسى .. أعزفها على ارغولى أنا .. أين ابنتك

ياسلطان آخر الزمان .. لأريق بعض الدماء الملكية فأنا في  
حاجة الى مايرفع روحى المعنوية قبل أن انقض على هذه  
المدينة اللعينة !!

( يقتحم القاعة مجتاحا المتفرجين الى الخارج ..

بقعة ضوء وحيدة عبد الله بن محمد مقيدا مايزال ينشد أو  
يغنى في لحن بسيط مؤثر )

عبد الله بن محمد : هبوب النسيم شوق لهوج العواصف

وحبى الاليم مش مخبى دا خايف ..

أنا عشت عمرك ..

مطاطى لأمرك

وامتى تزيحى القناع اللى زايف ..

...

تعالى انجدينى ..

ومن أول الحرف دا فهمينى

يا يرمينى جهلك .. بما فى قلب أهلك ..

يا أموت والكلام حى فوق الشفايف

...

ياليلى ونارى ..

ياجمر انتصارى ..

ملهلهب ضلوعى ..

منشف دموعى ..

مطفى شموعى ..

ولو كنت أعمى .. يخلينى شايف !



( ضجة .. الحاشية والضيوف في انتظار السلطان صوت يذيع  
بطريقة المذيعين الجوفاء ويصف ارتجاليا موكب السلطان الذي  
عاد من افتتاح الهرم الأكبر .. الحماسة تزداد كلما اقترب  
الموكب من اقتحام المكان الغورى يوزع وروده ويقدمها لكل  
واحد بتعليق مناسب متفكه )

الغورى : والآن اقترب حفلنا من نهايته الرائعة . نموذجاً حياً وأبدياً  
للفرح والهدوء .. هكذا ننهى هذه التمثيلية التى هى حقيقة  
راسخة مثل كل ما فعلنا خلال فترة ولايتنا الطويلة ..  
حديقتنا ازهرت واينعت وترعرعت فيها زهور لم تعرفها ارض  
مصر من قبل .. انا زرعناها ورعيتها بنفسى ورويتها بعرقى  
.. واقسم على ذلك بشرفى .. تفضل يا عمر فانك تستحقها  
والله ، فانت لم تفتحها عبثاً .. وانت ياربة الصون والعفاف  
.. ياشجرة الورد خدى .. رائحة مثلك لتعرفى ان احفادك  
صانعو المعجزات - زراع كما هم قتالين قتله .. وانت  
ياحجاج .. لتتأكد انه حيث يطيع الشعب تنبت الزهور ..  
ها ؟ وانت ( لعبد الله بن محمد فى عداة متبادل ) خذ لا اكن  
للجميع اننى لا اكرهك بما فيه الكفاية ..

( يدارى عكنة طارئة بسبب عيد الله ) ..

والآن .. ستعودون لبلادكم .. وحتوحشونا جدا .. ولكن  
تذكروا .. ان اللى يشرب من ماء النيل .. لابد يرجع له  
مرات ومرات ولذلك .. سنجعل من الاهرامات مزاراً وسبيلاً  
.. وتكية - وملتقى لكل الناس من الأديان والأجناس .. وكل  
من يريد فتح مكاتب سياحية هنا أو فى بلده .. نحن نرحب به  
دائماً .. كما رحبنا بكم فى حفلنا المتواضع ..

تمرباى : بابا .. بابا .. بابا ..

الغورى : انتظرى .. لا تقاطعيني ..

تمر : الأمير .. يابابا ..

الغورى : نتكلم عند بعدين .. روحى العبى معاه بعيد ..

الغورى : أنا طردته فخرج غضبان وببيهددك

الغورى : بلاش دلع صغار .. ونحن ياسادة فى اجتماعنا التاريخى

هذا .. وفى نهاية احتفالنا .. وبداية حقبة جديدة ..

( تقاطعه من جديد )

الغورى : هس .. بقى .. روحى صالحيه .. امشى ..

نحاول ان ..

تمرىباى : قال انه حيطريقها فوق دماغك .. هيه هيه ؟

الغورى : نشهد العالم على ما نحن عليه من استقرار وعدالة ..

- هس - خذى يا ابنتى أنت أيضا تستحقين زهرة .. هاهى

التي سميتها باسمك .. - خذى .. فقد قررت الانتهاء بسرعة

من هذه المحكمة العاجلة حتى نتفرغ لأسباب سعادتنا .. ونبدأ

عصر الشعوب العظيم ..

احضروا الولد المتهم ..

دع الزهور الآن .. سنوزعها فيما بعد ..

تمرىباى : حلف حيعمل ثورة عليك .. وراح يحرض الممالك والناس

الغورى : هس - تعالى يا ابنى ..

اننى اسلمك لقضائك الشرعيين .. نعم هم شرعيون لأنهم

اشتروا مناصبهم بأموال حلال معروفة المصدر - فقط - انبهم

بأن يحكموا بما فيه صالح هذا الصرح الشامخ الذي بنيناه  
سويا .. وفي زمن قياسي جدا - ليكون شاهدا على عبقريتنا  
.. نحن زراع الزهور وبناءة المقابر العظيمة . ( ينفعل )

ولذلك .. أرجو أن يعاقب بما يتناسب مع فداحة فعلته ..  
ليكون عبره لمن يحاول انتهاك مقدساتنا .. بأقوال مفرضة  
شريرة ..

**الطالب :** خف اللعب يامولاي مش كده .. الناس يقولوا ايه ؟

**الغوري :** آسف .. لاننى انفعلت .. اعرف ان هذا لا يجوز ..  
وأنا اعتذر عنه .. وسأشغل نفسي بكتابة قصيدة جديدة ..  
وحتى لا يقول ذوى الغرض اننى تدخلت فى مجرى العدالة ..  
( عبد الله بن محمد يقترب من الولد )

**عبد الله :** ولا حربه بقيت يفرسوا فيها راسك ..

وأنا لا أملك حتى ظلى .. فهو بأرض المعتمد وتحت حوافر  
خيله .. لا أملك الا أن أنصح بكلمات جوفاء .. ماتسييلهمش  
غير اشلاءك .. أياك تفرط فى كرامتك .. ارفع قامتك ..  
( يدفعونه بعيدا )

**تمرباي :** حلف انه حينتقم منك .. حلف بأمه ..

**الغوري :** هشت .. أنا بأكتب شعر دلوقتى .. روحى لعريسك  
وصالحيه قطم رقابيكو يا حلوين ..

**تمرباي :** مش رايحه ومش حاصالحه .. أنا بقى عايزاه يهدها ..  
ولا يمكن أبقي نيشان يعلقه على صدره ..

**الغوري :** بالعكس .. ده حيحطك فى قلبه .. ياللا أمشى .. أمشى  
.. هيا .. ولا تعطلى العدالة .. هيا ..

ابن القارح : التفت هنا .. وماتستعبطش .. هنا .. ليه .. اننا  
الآن نقيم أسس العدالة - ونذكركم ياساده بما جرت عليه  
العادة من تلاوة بعض ما أقره علماؤنا الأفاضل من أمثال  
الجاحظ - والقاضى الفاضل - الذين علمونا ان الله .. عز  
وجل - من على الملوك - وخصهم بكرامته - واکرمهم بسلطانه  
- حين مكن لهم فى البلاد - وخول لهم أمر العباد - ولذا  
أوجب علينا تعظيمهم - وتوقيرهم وتعزیزهم - وتقريظهم ..  
كما أوجب على الرعية طاعتهم .. والخشوع لهم فقال فى  
كتابه الكريم :

« وهو الذى جعلكم خلائف فى الأرض ورفع بعضكم فوق بعض  
درجات » وقال عز وجل : « أطيعوا الله وأطيعوا الرسول وأولى  
الأمر منكم » ..

الغورى : صدق الله العظيم

الطالب : ( مندمجا فى دور المهرج )

« ربنا انا أطعنا ساداتنا وكبراءنا فأضلونا السبيلا ..

الغورى : هشت

ابن القارح : وتعلمنا وصايا الأقدمين السالفين - الا ننسى أن من  
ليس له قديم لا جديد له - .. وقد قال أجدادنا المصريين  
المؤمنين الطيبين - ما استطاعوا بفضلهم عمارة كل ما بنوه من  
عمائر ومقابر ..

- أحن ظهرك لرئيسك وسوف يغمر بيتك بخيراته وتنال  
مكافأتك فى موعدها ..

ما اتعس الذى يناصر رئيسه العدا

ان المرء يحيا فقط طالما كان رئيسه راضيا ..

الطالب : وقيل قالوا :

لقد خلقت الرياح الأربعة ليتنفس الانسان

مثل أخيه الانسان ..

لقد خلقت المياه العظيمة ليستعملها الفقير مثل السيد

لقد خلقت كل رجل مثل أخيه ..

الغورى : أخرس يا ولد ليس هذا وقت الفكاهه ..

الطالب : ده فرعونى هيروغليفى .. منقوش ع الحجر

ابن القارح : ويقول أردشير من بابك ..

ان سعادة الرعية فى طاعة الملوك

فالملوك هم الأساس والرعية هى البناء ومالا أسس له مهدوم \*

الطالب : ويعيش مأزوم من غير هدوم

عبد الله محمد : لما يملك راجل واحد كل الدنيا .. لازم تعمل من

خلاخيل أم عيالك .. من لحمك عضمك من أغلالك .. تعمل

سيف ..

لما يكون راجل واحد مالك كل الدنيا

لازم ترفع سيفك

أو تاكل دود الأرض

الغورى : قلت كفى هذرا .. لسنا فى حالة تسمح بسماع هذا الشعر

الركيك .. الضيوف لا يتدخلون فى المحاكمة فانه أمر داخلى

لا نريد افساد العدالة بالشعر وأنت .. أيها الناكر للجميل ..

جعلتك مضحكى الأخير فقتطاول على الملوك ..

الطالب : ان الملوک اذا دخلوا قرية افسدوها ..

الغورى : وبعدين !!

الطالب : وجعلوا اعزة اهلها ادلة ..

الغورى : اسكت ..

الطالب : صدق الله العظيم ..

الغورى : ماتخليش غضبى يزيد عن اعجابى ببيك ! افرمك .. دعهم  
دعهم .. يتممون عدالتهم فى هدوء .. وسنضحك كثيرا بعد  
انتهاء هذه المهزلة ..

ابن القارح : العدل اساس الملك ..

وكل راع مسئول عن رعيته ..

هكذا سارت الامور وهكذا ستظل تسير .. دائما ..

بفضل حكمه وحنكة مولانا السلطان ..

والآن .. أنت متهم ياولد .. بانك المجرم الذى يسمى نفسه  
كلام الناس ..

ويطلق اشاعات واكاذيب والناس بتردد

كلامه بكل قلة ادب وبدون اذن

العدالة بتسأل لآخر مره .. عارف الكلام اللى احنا قصدنا  
عليه ؟

الطالب : ضاعت ما بيننا الأصول ..

لاصحاب بتكبر تقل ..

ويزيد مقامها تذل

واللى استراح بيعل

حين يفهم الفولة أول ماينول بيقل  
القصرمل يطول ويشب يصبح غول  
جمل الحمول بيكل  
ويهل عصر الجوارح ..

الغورى : كفايه ياولد ده مش شعره ..

الطالب : يامولاي .. ده من عندى .. اسمع ..

هذا المدى الكالج ..

بحر المسافة ما بين السم والمالج ..

هذا المدى البطل ..

تمن التعاسه فى سجن الحق يا قوال ..

هذا المدى الممرور

الغورى : أنا قلت مش عايز شعر .. احنا النهارده يا ابنى بتقيم

صرح مثالى ونموذجى للعدالة ..

والشعر ممكن يشوه أى شىء جميل ..

الطالب : عندك حق .. وكمان دى اشعار حديثة وبايخه وعاميه ومش

موزونه قوى .. وضعيفه ..

ولا يمكن تاخذ أى جايزه من جوايزكم

ابن القارح : العدالة بتسأل لآخر مره .. أنت اللى قلت الكلام ده

والفته ..

الطالب : ماتتعبوش نفسكم .. لانه أخرس

الغورى : ايه ؟ .. أخرس

الطالب : عرفت ده بالصدفه .. أمه .. أمه حكت لى حكاية كده



ولا الحواديت احكيها يامولاي .. حكاية ولا الافلام العربى  
.. واظن مافيش أم تعيب ابنها \* لو مافيش عيب .. احكى  
يامولاي ..

الغورى : اخرس .. آخرس ؟

تمرباي : أيوه يابابا .. فيه فى الدنيا دى ناس خرس كثير ..

الغورى : عايزه تقولى ان أنا أقعد ثلاثين سنة أدور ع اللى قال عنى  
كل الكلام الفارغ ده .. وبعدين لما اعتر عليه ، يطلع اخرس .

تمرباي : ممكن ..

الغورى : معنى كده انه قعد يتمسخر علينا كل المده دى وهوه  
ماينطقش ..

تمرباي : يابابا ..

الغورى : مش ممكن ح يفضل آخرس .. أنا عندى اللى يخليه ينطق

تمرباي : حتعذبه ؟ ..

الغورى : لحد مايعترف وينطق

تمرباي : تعذب الآخرس ..

الغورى : ح ينطق .. لازم يكون فيه لسان حامى ورا كل الكذب  
ده بيقلب نصرى هزيمة ..

ويشوه أكبر نصر ف تاريخنا ..

الطالب : بس ده آخرس فعلا .. علاوة على انه ..

( يكتم فمه ويزيحه )

( يتقدم فى نعومة )

القارح : يا ابني سكاتك مش كويس عشان العدالة اعترف .. والا  
تبقى خايف من العدالة .. تبقى معترف بانك المجرم اللي هي  
بتدور عليه ..

• معنى كده يبقى من حقنا نقتلك من غير محاكمة •

• ودى اهانة وتشويه لانتصارنا ..

• حتعترف والا حتنكر ؟ ..

( متولى يهز رأسه )

القارح : بتنكر !؟

( يهز رأسه عكسها )

القارح : بتعترف !!؟

( يهز رأسه .. )

القارح : انكر تانى يامولاي ..

الغورى : ( عائدا لمكانه ) اثبتوا ده عليه • هو الجانى على نفسه  
ويايلا بسرعة ..

القارح : تحت أمرك يامولاي ..

الطالب : شايف .. لو حتتكلم زينا مش حيخافوا منك .. سكوتك  
مخوفهم .. لانك بسكوتك اللي مالكش يد فيه - بتنكر قدرتهم  
على تحقيق عدالتهم .. نكته .. مش كده ؟ لمجرد انك مش  
بتتهتف للغورى ..

الغورى : كفاية خلصونا ..

الطالب : ما تسكتش .. انقذ نفسك زينا .. كلمة منك أنت يمكن  
توقع السلطنة .. تصور .. كلمة مستحيلة ..

الغورى : أنا قلت .. اخرس !!

الطالب : بأحاول أقنعه يتكلم ! .. قول .. قول يا أخرس .. قول  
أى حاجة .. أمك محتاجه لك مش كفاية ضاع الأب ..  
حتطيع أنت منها كمان .. ياللا ..

امدحه بعلو حسك .. يا أخرس .. أهتف يا أخرس للغورى ..  
اللى مايعرفش لسانه العيبه ولا ينطق الكذب .. ياللا ورايا  
ياللا .. عاش الغورى عاش ..

ياللا .. أهتف له وقول واتكلم

خللى الناس منك تتعلم

قول له الضفدع سايق المركب

والنملة ع الفيل بتسلم

شفت السبع بيضحك سنه

والماليك بتفرق لوز

وحمار قاعد يفتل دقنه

جاب الحق عطاء بالجوز ..

طاوعه .. وقول له ع اللى يعوز

قول له عشان بالعدل تفوز

ويجوز تعلا تقرب منه !!

الغورى : كفايه .. ياولد .. احنا ماجيناش هنا وعزمننا كل  
الضيوف دى وكل الأكابر دول .. عشان نضيع وقتنا مع  
مهرج غبى زيك ..

ابن القارح : معلهش يامولاي .. لازم يكون مع المتهم محامى ..

حقه .. والمهرج من حقه يطلب له البراءة ..

الغورى : نعم ؟ البراءة يا ابن القارح !؟

القارح : هو يطلبها بس .. آه .. لكن احنا لنا تدبيرنا .. وحنثبت  
العكس ..

امال احنا شغلطنا ايه ؟

دا احنا اللي بنقبن الموازين ..

الغورى : طب شوف شغلك بسرعة ..

القارح : يامسرور ..

( موسيقى عنيفة وتظهر غرفة التعذيب أو أى معادل يجعل  
السيدات يخفين وجوههن رعبا .. ماعدا شجرة الدر تمضغ  
ليان يتقدم الطالب )

الطالب : بالمناسبة أنا دورت على اسم الجلاذ أيام الغورى فى كل  
المراجع مالقيتش .. والظاهر ان كل واحد كان بيتولى مهمه  
تعذيب غيره بنفسه لكن استكمالا للديكور لجأت للتراث  
الشعبى ، المنقذ الوحيد لكل مزنوق .. فسميت ..  
الكومبارس ده ( مسرور ) .. لانكم أكيد حتنبسطوا من  
اختيارى الشعبى ..

الغورى : كفاية ! نكمل عايزين ننتهى من المحاكمة ..

الطالب : يامولاي .. لا .. أنا مؤمن ان اللى تطوله عدالتكم  
ولا يمدحهاش عشان يفلت بجلده .. يبقى حاجة من اتنين ..  
يا اما مجنون .. يا أخرس .. أنت مجنون يا ابنى .. ( يهز  
رأسه ) شفت اهه مش مجنون ، بينكر ، يبقى أخرس أكيد ..

الغورى : كل واحد ممكن ينكر كل واحد ممكن يبلع لسانه ويعمل  
أخرس

لكن التعذيب حينئذيه ٠٠

( يخرج الغورى وابن القارح والعسكر يجرون الأخرس الى  
غرفة التعذيب )

الحجاج : الحقيقة أنا ماشفتش فى حياتى حاكم غبى زى الغورى ده  
٠٠ لماذا يريد ان ينطق ؟ ٠٠

عمرو : انه لا يفهم انهم حين يتكلمون من وراء ظهرك فهذا دليل قوتك  
٠٠ وبرهان أكيد على ضعفهم ٠٠

الكارثة تبدأ حين يتجراون على الكلام أمامك !

شجرة الدر : عجيبة اصراره انه يخللى الأخرس ينطق ٠٠

السفاح : الحاكم يجب أن يقطع الألسنة لا أن يدفعها الى اللغو ٠٠

الحجاج : وماذا لو اعاذ ترديد الحقائق التى نشرها بين الناس ٠٠

الطالب : متخافش ده خلقة ربنا مش حينئذيه ٠٠

الحجاج : ماتضمنش فلا يمكن أن تخمن كيف سـيـتصرف هؤلاء  
الناس ٠٠

ذات يوم كنت أخطب فى أهل البصره ٠٠ وقلت لهم : أيها الناس  
من أعياء داؤه فدواؤه عندى ٠٠

ومن استطال عليه أجله أعجلته له ٠٠ ومن أثقلت رأسه الافكار  
أرحته منها ٠ ومن اتعبته الأيام وفرتها عليه ٠٠ وظل الجميع  
صامتين كأن على رؤوسهم الطير ٠٠ أخرسهم كلامى وشجعنى  
هذا طبعا على مواصلة التهديد قائلاً :

اننى انذر ولا أنظر ٠ احذر ولا أعذر ٠٠ أتوعد ولا أعفو ٠٠  
ثم أقسمت اننى لو أمرت أحدهم بالخروج من باب فخرج من  
باب يجاوره ، سأضرب عنقه ٠٠

وساد الصمت لحظة واحسست اننى ملكتهم .. وفجأة وقف  
أحدهم ساخرا وقال :

عبد الله محمد : كفايه بقى ..

الحجاج : ألا تخشانى يا ولد ..

عبد الله : يا عم روح .. ما يقبض الروح الا خالقها .. لو مكتوب لى  
نفس ح اشمه .. لقمه ح أكلها .. سفر ح اتمه .. وآدينى  
قدامك وح اخرج من مطرح ما يعجبنى ساعة ما يعجبنى ..

الطالب : وعملت ايه ؟

الحجاج : وقفت خائبا مثل صاحبك هذا .. وأمرت المؤذن ان يقيم  
الصلاة ..

( يعود الغورى والحرس يعيدون الأخرس ممزقا مضروبا )

الغورى : باسم الله .. هيا لنستأنف المحاكمة .. هيا

ابن القارح : أنت يا متهم .. حكم الاعدام أصبح فى حكم التنفيذ ..  
لكن مع ذلك احنا مازلنا منتظرين اعترافك ..

الطالب : لازم تعترف .. ماحدث فى دولة الممالك بيموت بدون ما  
يعترف ..

ابن القارح : اعترف يا ابنى .. لان عدم اعترافك معناه تشكيك فى  
عدالة السلطان .. وانه ظالم .. ودى خيانه عظمى .. اسمع  
مرة أخيرة باسألك .. العدالة بتسألك :

أنت بتنكر الخيانة والا بتعترف ؟ ..

( يهز رأسه )

بتنكر ؟

( يهز رأسه )

يبقى بتعترف ..؟! ..

( يهز رأسه )

لا .. بقى .. عيب تهز دماغك وتترقص بالشكل ده فى  
الحكمة ..

كلاكيت - آخر مره ..

بتنكر والا بتعترف ..

( يهز رأسه )

ربنا ياخذ أجلك ما هو بقى يا تنطق يا أما أنت أخرس فعلا ..  
الغورى : ( منتفضا ) لا .. ح يتكلم لازم يعترف .. لان كل اللى  
قاله واللى بيقوله دلوقتى .. واللى عايز يقوله كذب ..  
( يتقدم اليه فى مواجهه )

الغورى : خاين ودوده .. أنت فاكر نفسك ايه .. هه .. متهيا لك  
اننا مش عارفين ايه اللى فى دماغك يامتشرذ يازباله .. كل  
كلمة قلتها مرصودة عليك .. قول - ح تقول - ان الهرم اللى  
تعبنا وشقينا لحد ما بنينا مالناش أى فضل فى وجوده ؟ ..  
كل اللى عملناه اننا قصينا الشريط ودقينا مزيكة .. ح تقول  
- ان الألوف اللى ماتوا راحوا هدر ماتوا غدر لاسباب  
تانيه .. لو راجل تقول الاسباب .. قول - ح تقول - اننا  
ماحاسبناش حد على المراكب اللى غرقت ولا المكاحل اللى  
ساحت .. قول - ان أنا مصاص دم باقتل اصحابى وبابيع  
أهلى وباتنكر لابنى .. قول - ياكداب يانورى ..

عايز تقول ايه تانى عنى ..

مالك يا شجاع .. بترتفش ليه ؟ .. ودلوقتى خانتك شجاعتك



•• ماتبصش ليه كده •• والا خرمت عنيك بايدي !! •• أنا  
السلطان الأشرف اللي خلا للبلد دي سعر مش ح اسمح لحد  
يشوه انتصارى •• أنا •• أنا نقطة ارتكاز العالم •• طبل  
الميادين •• مانشيت الصحف فى أركان الأرض الأربعة ••  
واللى كلكم •• أيوه كلكم ( للمتفرجين ) بتهتفوا باسمى أول  
ما أهل عليكم •• قول •• قولوا •• عايزين تقولوا ان أنا  
خربتها وقعدتها على تلها ؟

اخرس أنت •• كلمة واحدة تانيه من بقك واخنقك •• هه  
ساكت ليه دلوقتى ؟ لو شجاع قولها ف وشى •• أنا ؟ بتقول  
عليه اراجوز ؟! وان أى واحد هنا نفسه يتف ف وشى نو  
قربت منه ( يخنقه حتى الموت )

طب ورينى كده أهه •• وأنت ؟ طب وأنت ؟ مين اللى عايز  
يتف فى وشى أنا بكل سماحه وطولة بال باسألكم ؟ •• فيه  
حد هنا عايز يتف ف وشى ؟

( عبد الله بن محمد يتقدم محدثا ضجة لذلك )

لا •• أنت مش من أهل البلد •• أنت من عصر تانى وكمان  
مش حر أنا باتكلم عن الأحرار اللى مش متطفلين على حفلتنا  
•• حد منكم نفسه يتف ف وشى ؟ ••

ها •• ها •• ولا واحد •• وده دليل قاطع على انكم بتحبونى  
كلكم أيوه بتحبونى ••

( صمت •• توتر •• يتقدم عبد الله بن محمد ويبصق  
فى وجهه يمسح الغورى البصقة بهدوء يتقدم الحراس يستدير  
عبد الله بن محمد منصرفا عنه - الغورى يسحب سيفه  
وبصرخة كلها غل يطعنه من الخلف حركة بطيئة ردود فعل -  
صمت )

( موسيقى عنيفة وبروجى وطبلخاناه ويقتحم الجند على  
رأسهم الأمير المسرح صاعدين الى الخشبة وسط زهول  
الجميع )

الأمير بعد عدة صيحات وحركات يحكم سيطرته على القاعة  
وعلى المسرح تتحول المواقف المختلفة للشخصيات المختلفة  
استعدادا لبدء التمثيل من جديد في ثوب جديد

وعلى دقة ورقة اتخاذ المواقف الجديدة يتوقف تأثير وتعبير  
المشهد عن الانتقال من التمثيلية القديمة الى الجديدة

السلطان الغورى متجمد ومذهول على كرسيه  
في الفراغ مفقوع المראה

ابن القارح بدون افتعال يفتح ذراعيه مرحبا بالوفاد  
الجديد في بوز متميز الضيوف يتخلصون من وقع المفاجأة  
تدرجيا وكان لم تكن

يدخل السلطان سليم العثماني على نفس لحن الغورى  
صيحات الترحيب والهتاف بلغة غير مفهومة أو صامتة  
أيهما أنفع

تمرباي تندفع الى أحضان الطالب باكية بطريقة عيالى كمن  
ضاعت منها لعبة

الأمير ينتزعها ويدفع به بعيدا مهددا ويحضنها كمن يفترسها  
ويسلمها لشجرة الدر يتقدم السلطان سليم الى العرش  
ويدفع بأصبعه الغورى الذى يقع كالشوال ميتا على  
الأرض

يتقدم بعض العسكر يجردونه من ملابسهم وأدوات حكمهم  
وآخرون يسحبون جثة الأخرس وجثة عبد الله الى الخارج

تسحب جثة الغورى ٠٠ يتسلل الطالب دون أن يدري به أحد  
ويختفى يجلس سليم مكان الغورى ٠٠ للحظة يتجمد المشهد  
ثم يصفق سليم فيسرع ابن القارح فى خفة الى اعادة ترتيب  
الموقف ٠٠ ويدندن بلحن الأغنية الأولى ٠ كليوبطره تسقى  
الأمير والسلطان وتدور بين الكل بالشراب ٠٠

ثم تدب الحياة والنشاط فى كل مكان ٠٠ ويرتفع الغناء وكأن  
ما كان ٠٠ كان من زمان ٠٠ وابن القارح يقود الاوركسترا ٠

● اقرا الفاتحة لسلطان العصر الذهبى

أيام أولاد عثمان

أيام كان فيها الشعب المصرى يادوب

على شط النيل عطشان

فى طاحون العيشه فريك

فى السوق بيموت تماحيك

أو فى السراذيب بتهم تلاكيك

واذا كان فيه حد مريض بالشوق للعدل مالهمش مكان ٠٠

( يدخل الطالب من حيث اختفى وقد غلبه الضحك بنفس طريقة  
دخوله الأولى وعلى قدرته على استيعاب كل ما يحدث بضحكته  
وهو يقدم التمثيلية الجديدة على الطريقة القديمة من على  
المسرح يستغربون ٠٠ )

الطالب : النهارده المحروسة فى عيد

عيد تاريخى ما حصلش قبل كده فى التاريخ ولا يحصل

النهارده فى القاهرة أم الفنون والجنون

كل الخلق واقفة على رجل واحدة

وبترقص على الواحدة ابتهاجا بوصول عسكر السلطان  
العثمانى منتصرا على المصريين الـ ها ها ٠٠

( يغليه الضحك - عدوى الضحك تنتقل الى الحاشية والضيوف  
سليم يبرق هنا وهناك ) ٠٠

الطالب : بفضل حنكة وحكمة وشجاعة السلطان الحاوى ( يضحك )  
لكل فضل - يزداد ضحكا ٠٠ - الملك الأشرف أبو النصر  
قنصوة سليم العثمانى الأشرفى - يزداد الضحك - سليم ينفجر  
ضاحكا هو الآخر ٠٠ بطريقة مغايرة ٠٠

هستريا الضحك تأخذ الجميع وكل منهم يخلع ملابسه ويلقى  
بها فى الأرض ٠٠ وهم يتنزعون نقون وعمم وباروكات بعض  
٠٠ اظلام ٠٠ مع صمت فجائى

ضحكة ذات صدى رهيب مجهولة المصدر تسيطر على الفراغ  
اضاءة والجميع متحنين امام الجمهور

\* \* \*

## فهرست

٧	• • • • •	سعدون	●
١١١	• • • • •	الليلة فنطزية	●
٢٠٥	• • • • •	واقرا الفاتحة للسلطان	●

## ● مسرحيات صدرت للمؤلف ●

- سهرة ضاحكة لقتل السندياد الحمال ٠٠
- والبطاقة ٠٠ القاهرة ٠٠ دار الثقافة الجديدة ٨٦
- سيرة شحاته سى اليزل - ط ١ دمشق ١٩٨٤

## ● مسرحيات قدمت على المسرح ●

- الجميزة ٠٠ فرقة المنصورة
- مقال عطييات
- ( اعداد عن مريض الوهم ) - المسرح القومي
- حكاية سقا ٠٠ مسرح العرائس ١٩٦٦
- الشاطر حسن قرن الفول ٠٠ مركز الطفل ١٩٧٥
- مغامرة في مملكة القروود ٠٠ مركز الطفل ١٩٧٦
- البطاقة ٠٠ فرقة الشباب دمشق ١٩٨١
- دبدوب الكسلان ٠٠ مسرح العرائس ١٩٨٨
- حلم علاء الدين ٠٠ مسرح ليلى ( أبو ظبي ) ١٩٨٨
- أرنب فوق العادة ٠٠ مسرح مركز الطفل ١٩٨٨

● عروض مسرحية شعرية ●

- في حب مصر ١٩٧٣
- كانت وعاشت مصر ١٩٧٤
- ليلة أمريكية ٠٠ ١٩٧٤
- غنوة لحرب غنوة للسلام ١٩٧٥

رقم الايداع ٤٣٣٨ / ١٩٨٨  
الترقيم الدولي × - ١٨١٥ - ٠١ - ٩٧٧

مطابع الهيئة المصرية العامة للكتاب



لست أخشى تجاهل القادرين ، ولا تحامل الناقدين  
ولا غيرة الحاسدين ولا تربص الأعداء .

إن ما يرعبنى للنخاع هو غل أنصاف الموهوبين  
وإحسن عديمي الموهبه وبسمة النفاق اللزجه  
على شفاه أفنعة المزيفين من الأصدقاء .  
فأعنى أيها الشعر . . كى أغفر لك ما بلوتنى به من  
تفرد وتعدّد وما وسمتنى به من تواضع وزهو  
وتجدد !!

وأقلنى أيها الشعب . . من عثرة موهبتى المخبولة  
من طيبك وطينك ونيلك وتاريخك الفوار  
فى دمي

واقبلنى . . فى زمرة المرئيين من خدام عمالك  
وفلاحيك وحلمك الذى يتخلق فى دمي !